

245

17

17

17

7
13-A
6



7.13.A.6



~~Ex 10 20~~

B. Hibernia Naveati ex donis auctoris


7. 83 19.

TVNCHINENSIS
HISTORIAE
LIBRI DVO,
QVORVM ALTERO
status temporalis huius Regni.

*ALTERO MIRABILES EVANGELICÆ
Prædicationis progressus referuntur.*

COEPTÆ PER PATRÉS SOCIETATIS IESV,
ab Anno 1627. ad Annum 1646.

*Authore P. ALEXANDRO DE RHODES, Auenio-
nensi, eiusdem Societatis Presbytero; Eorum,
quæ hic narrantur teste oculato.*



LVGDVN I,

Sumptib. IOAN. BAPT. DEVENET, in vico Mercatorio,
sub signo Crucis Auræ.

M. DC. LII.

CVM PRIVILEGIO REGIS.





INNOCENTIO X.
PONTIFICI MAXIMO
BEATISSIME PATER.



IHI cum ad Beati-
tudinis vestræ pedes
vnâ, cum nouâ Tun-
chinesi Ecclesiâ pro-
uolutus, admiranda
prorsus ac penè prodigiosa illius
Christi vineæ incrementa refero,
venit in mentem Pauli V. Christi
Domini in terris olim Vicarij am-
plissimum promissum, cum ad

ã 2

eius

DEDICATORIA.

eius pedes osculandos admissus sum ante triginta & amplius annos in Indias profecturus, hæc namque concepta verba protulit, quæ hucusque cordi meo firmiter adhæserunt. VADE, inquit, AMPLISSIMUM CAMPUM HABES AD FIDEM PROPAGANDAM, ORABO PRO TE: Huic certè supremi Pontificis precationi, secūdum Deum acceptum refero quidquid per hoc inutile instrumentum in ea Tunchinenſi vineâ Diuina bonitas operari dignata est, alios etiam gnauos è minima Societate IESU operarios submittens, qui viginti annorum spatio, quamuis pauci vsque ad annum huius sæculi quadrage

DEDICATORIA.

dragesimum septimum, iam supra ducenta millia Christianorum ad ouile Christi, è cacodæmonis iniquo cultu ereptorū per lauacrum regenerationis adduxerant, atque in dies plurimos adducunt. Quare Sanctitatem vestram supplex obtestor, vt benignitatis suæ oculos in illud etiam remotissimum regnum ad vltimas Orientis oras positum conuertere dignetur vt potenti benedictione & speciali Prouidentia sanctitatis vestræ virentem Oliuæ ramum diuinæ misericordiæ columbâ ibi ostendente, diluuium superstitionum iam cesset, & campus amœnus Christianarum virtutum vbique



AD LECTOREM.



IHI de Tunchinensis regni moribus, primâ Christianæ Fidei susceptione, ac incremento in illis gentibus scribere cogitanti, dubium incidit, BENIGNE LECTOR, ne fortè quædam referenti, quæ tibi essent insolita, fidem minùs mihi adhiberes, sicut mihi de aliquibus relatum est, qui similes Historias longinquarum regionum prosequentes, vt mendaciorum opifices reiecti sunt: Prudentiam fortè sequerer, si quæ in illis vltimis Orientis oris ipse vel oculis lustrauì, vel à viris fide dignis accepi, mihi reseruare potiùs cogitarem, quàm in vulgus edere, ne fortè cum insolita in nostris regionibus referrem, fides mihi omnis denegaretur. At rem maturius perpendens, cum ad Dei optimi maximi gloriam non exiguam fore videam, si hæc ipsa in publicum prodeant, Superiorum quoque autoritas ad id me moueat, veritati quoque innixus, cuius vis omnia superat, statui ea præsertim quæ oculis ipse lustrauì simplici ac minimè fucato stylo tibi proponere tum vt laudem Deo tribuas

DEDICATORIA.
aperiatur ad Majorem I E S V,
C H R I S T I supremi Pastoris glo-
riam & honorem,

Sanctitatis Vestrae,

Filiorum ac servorum minimus,
ALEXANDER DE RHODES,
e Societate IESV.

Ad

AD LECTOREM.

tribuas, tum etiam ut ad eò propensas ad fidem Catholicam gentes vel per te, vel per alios, quà precibus, quà consilio, quà ope iuuare studeas. Tota igitur hæc narratio in duos diuisa est libros, primus est de ipso regno, ac moribus Tunchinensium: secundus de felici principio, ac progressu Prædicationis Euangelicæ ad viginti ferme annos in eodem regno, animo beneuolo exiguum accipe donum, & ora pro me vale.



INDEX

INDEX CAPITVM
HISTORIÆ TVNCHINENSIS.

LIBER PRIMVS.

C A P. I.	 <i>Vnchinensis Regni nomen & situs.</i>	fol. 1
II.	<i>Tunchinensis Regni ortus & initia.</i>	4
III.	<i>Honores exhiberi soliti Supremo Principi Tunchinensium, quem dicunt Būa.</i>	8
IV.	<i>De Rege subalterno quem Cūām dicunt.</i>	11
V.	<i>Triremium Tunchinensium & Cocincinarum robur, numerus, structura.</i>	13
VI.	<i>Regis Tunchinensis potentia & diuitia.</i>	17
VII.	<i>Tunchinensis militia stipendia & Ordines.</i>	21
VIII.	<i>Militum Tunchinensium disciplina & moderatio.</i>	22
IX.	<i>Politica Tunchinensium Gubernatio.</i>	25
X.	<i>Doctorum apud Tunchinenses sollemnis inaugura- tio.</i>	27
XI.	<i>Quo pacto facinorosi à iudicibus plecti solcant.</i>	29
XII.	<i>Terra Tunchinensis fructus precipui.</i>	32
XIII.	<i>Animantia quibus abundant terra Annamica.</i>	35
XIV.	<i>Tunchinensium mercimonia.</i>	39
XV.	<i>Tunchinenses Moneta.</i>	40
XVI.	<i>Tunchinenses superstitiones & prior earum secta.</i>	42
XVII.	<i>Altera Tunchinensium superstitionum secta.</i>	46
XVIII.	<i>Vary Tunchinensium ritus, circa cultum idolorum.</i>	51
XIX.	<i>Tertia Tunchinensium superstitionum secta</i>	53
XX.	<i>Multiplex Tunchinensium Veneficorum, circa de- functos, superstitio.</i>	58
XXI.	<i>De Funeribus & sepulchris Tunchinensium.</i>	61

Index Capirum.

<u>XXII.</u>	<u>De solemnī Conuiuiō quod in honorem defunctorum celebrant Annamici.</u>	<u>65</u>
<u>XXIII.</u>	<u>Plures alia Tunchinensium erga defunctos obserua- tiones superstitiosissima</u>	<u>69</u>
<u>XXIV.</u>	<u>De Caremoniis quibus Rex diem suum natalem cele- brat.</u>	<u>72</u>
<u>XXV.</u>	<u>Varia Tunchinensium Vanissimaeque obseruationes.</u>	<u>73</u>
<u>XXVI.</u>	<u>Matrimonia sua quo ritu Tunchinenses celebrent.</u>	<u>75</u>
<u>XXVII.</u>	<u>Varij ritus Tunchinensium sub anni finem & initia.</u>	<u>79</u>
<u>XXVIII.</u>	<u>Toni & accentus linguae Annamica.</u>	<u>84</u>
<u>XXIX.</u>	<u>Varia Tunchinensium nomina.</u>	<u>86</u>

INDEX

INDEX CAPITVM
HISTORIÆ TVNCHINENSIS.

LIBER SECVNDVS.

C A P. I.	P R I M V S Euangelij ingressus in hoc regnum. fol. 1
II.	Operarij Euāgelici Tunchinū euocati è Cocincina 6
III.	<u>Euangelicorum operariorum felix ad Portum Tunchi-</u> <u>sem appulsus.</u> 9
IV.	<u>Multorum ad Christi fidem concursio , in pagis victi-</u> <u>nioribus.</u> 14
V.	<u>Primus nostrorum in Regiam ad Regem ipsum ingres-</u> <u>sus.</u> 17
VI.	<u>Magni Ethnicorum concursus ad audiendum in pri-</u> <u>ma Tunchinensium Ecclesia verbum Dei.</u> 22
VII.	<u>Alij plures ex pagis vicinis fidem amplectuntur.</u> 26
VIII.	<u>Sayorū inanes conatus & plurium ad fidem conuersio.</u> 29
IX.	<u>Regis Tūchinensis è Cocincinēsi expeditione reditus.</u> 32
X.	<u>Summa Regis voluntate in Tunchini Regno, morari iu-</u> <u>bemur.</u> 35
XI.	<u>Profectio nostra in Vrbem Regiam.</u> 38
XII.	<u>Auspiciatus nostrorum ad aulam Regiam accessus, &</u> <u>prima Euangelij promulgatio.</u> 42
XIII.	<u>Saj quisdam celeberrimus , fidem amplexus , multos</u> <u>Christo lucratur.</u> 46
XIV.	<u>Ethnici non pauci Baptismo lustrantur.</u> 50
XV.	<u>Rex Tūchinensis non procul à suo Palatio hospitium</u> <u>ac templum construi iubet , in quo nostra munia</u> <u>obimus.</u> 52
XVI.	<u>Doctrina Christiana tradenda methodus.</u> 55
XVII.	<u>Euemus quidam insignes senellas adhuc Neophyto-</u> <u>rum fidem magnopere confirmant.</u> 59

Index Capirum.

XVIII.	<i>Complures agros diuinitus curant Neophyti, admota male affectis corporibus Cruce & aqua lustrali.</i>	64
XIX.	<i>Nonnulli Neophyti suam nobis operam in reliquam dicant vitam.</i>	68
XX.	<i>Abalienatur à nobis Rex Tunchinensis.</i>	72
XXI.	<i>Quibus lenimentis exacerbatum Regis animum, & artificiosè confectis hostium criminationibus occupatum placauerimus.</i>	76
XXII.	<i>Neophytorum Zelus ac pietas in festis per annum recurrentibus celebrandis.</i>	81
XXIII.	<i>Christianorum quorundam non felicitissima.</i>	85
XXIV.	<i>Prohibetur nouo Regis edicto, Euangelica prädicationi ulterius operam dare.</i>	90
XXV.	<i>Quantus Christianorum omnium maror fuerit in acerbissimo illo casu.</i>	95
XXVI.	<i>Quomodo Christiani ad Ecclesiam sensim iterum conuenerint.</i>	99
XXVII.	<i>Nouo Regis edicto in exilium tandem amandamur.</i>	103
XXVIII.	<i>Exilij nostri Varj Casus & circumstantia.</i>	108
XXIX.	<i>Reliqua itineris nostri ratio & ducis ipsius ad Christi fidem conuersio.</i>	115
XXX.	<i>Ex Bochinica Prouincia in Gheanicam iterum ingredimur.</i>	118
XXXI.	<i>In summas rerum angustias redacti misericordissimè à Deo liberamur.</i>	122
XXXII.	<i>Adueniente tandem lusitana naui ab exilio liberamur.</i>	126
XXXIII.	<i>In Regia Tunchinensi, nostris iterum ministeriis operam damus.</i>	129
XXXIV.	<i>Christiani aliquot miserè à Damone vexati magis tamen in fide suscepta confirmantur.</i>	132
XXXV.	<i>E toto tandem Tunchinensi Regno, cum Lusitana naui exire cogimur.</i>	136
XXXVI.	<i>Christianorum Tunchinensium data in discessu nostro littera ad Vrbanum VIII. Pontificem maximum.</i>	141
	<i>Redeunt</i>	

Index Capitum.

XXXVII.	<i>Redeunt in Regnum Tunchinense iterum Euangelici operarij.</i>	143
XXXVIII.	<i>Neophyti cuiusdam Tunchinensis praelara fidei confessio & mors constantissima, cum pluribus miraculis.</i>	146
XXXIX.	<i>Ethnicorum complurium conuersiones mirabiles.</i>	150
XL.	<i>Quanta fuerit Regis erga nostros humanitas usque ad discessum Lusitana naui.</i>	153
XLI.	<i>Virginum multarum eximia pudicitia & constantia.</i>	156
XLII.	<i>Laënsis expeditio per nostros frustra tentata.</i>	159
XLIII.	<i>Laënsis expeditio per Tunchini terras, frustra tentata feliciores aliunde successus habet.</i>	162
XLIV.	<i>Molestissima quadam persecutio Tunchini à Cinis concitata sedatur tandem in auctorum ipsorum pudorem.</i>	164
XLV.	<i>Tunchinensis Ecclesia latissima incrementa & operariorum aliquot mors acerbissima.</i>	167
XLVI.	<i>Neophytorum aliquot mors sanctissima.</i>	170
XLVII.	<i>Catechistarum aliquot & complurium aliorum finis deuotissimos.</i>	174
XLVIII.	<i>Nona in Christianos procella.</i>	179
XLIX.	<i>Dei erga Tunchinenses Neophytos eximia quadam gratiarum dona.</i>	184
L.	<i>Patrum aliquot Societatis triste naufragium:</i>	187
LI.	<i>Noua Tunchinensis Ecclesia incrementa ex Cinis.</i>	191
LII.	<i>Recentiora de presenti Tunchinensium statu nuucia.</i>	193

EG o infra scriptus Præpositus Prouincialis Societatis
IES V in Prouincia Lugdunensi , iuxta Priuilegium
eidem Societati concessum à Christianissimis Regibus,
permitto IOAN. BAPT. DEVENET, Bibliopolæ Lugdu-
nensi, vt excudere & libere diuendere possit opus quod in-
scribitur, *Historia Regni Tunchinensis, &c.* Compositum à P.
ALEXANDRO DE RHODES, ac recognitum à tribus eius-
dem Societatis Patribus, & id ad sex proximos annos pro-
hibitis omnibus aliis ne excudant aut jubeant excudi sub
pœnis in eodem Priuilegio appositis. Datum Auenione
1. Maij, Anni 1651.

IOANNES GATËTUS.

HISTORIA



septentrio

12 13 14 15 16 17 18 19 20 21 22 23

12 13 14 15 16 17 18 19 20 21 22 23

CAMBOGIAE
PARS.

LAORVM ' PARS

CINAE
PARS

VN KIN
KEDOM

PROVINCIA
CANTON.

MARE SINICVM

Solitudo



CIAMPA

Macedonia





HISTORIÆ TVNCHINENSIS. LIBER PRIMVS.

De statu Temporalitotius regni.

Tunchinensis regni nomen & situs.

C A P V T I.



VNCHINENSE regnum, vnam
olim è maximis Cinenſis impe-
rij Prouinciis fuiſſe, argumento
eſt, nomen ipſum quod adhuc
retinet. Quippè ſicut Pechinum
Cinæ, regiam dicunt Septentrio-
nalem, australem verò Nan-
chinum, ſic Tunchin Orientalis plagæ regiam ſigni-
ficat. Quod, Tun, Orientem, Chin, recepto idiomate
regiam nominent. Tametſi enim verſus Meridiem,
magis, quam ad Orientem Cinenſium terris Tunchin
adiaceat. Quia tamen imperium illud Cinarum, ultra
A laorum,

laorum, & siami terminos olim protendebatur (quæ omnia regna sunt ad occidentem Tunchin) rectè respectu eorum, regia denominata est Orientalis; quod in ea, regnis ad occiduam plagam vergentibus, ius diceretur. Ne habentes causas, sex & amplius mensium iter, Pechinum, aut Nanchinum conficere tenerentur. Postquam verò à magno Cinenſium Imperio defeceere occidua illa regna, totus hic tractus Tunchini, & Cocincinæ Annam dici cœpit, idest requies meridionalis. Sunt enim Cocincina, & Tunchinum, vna prorsus eadēque natio, similes vtriusque gentis mores, idem idioma, quæ tamen ambo quomodò deinceps diuidi cōtigerit, postea narrabitur.

Nunc de Cocincinæ, aut Caucincinæ quoque nomine pauca ponam. Cum enim totius regni Annam ciuitas primaria *Cbè cè* diceretur; mercatores qui huc è Iaponiâ commeabant; corrupto nomine Coci appellarunt: quod imitari postea Lusitani, vt regnum istud à Cocino quod est iuxta Goam distinguerent, dixerunt Cocincinam, quasi Cocinum iuxta Cinās. Neque noua est appellatio quæ iam indè à temporibus sancti Xauerij vulgaris erat. Vt constat ex Epistolâ magni huius Apostoli vbi narratur ingens procella, quâ iuxta illam oram penè merſa est nauis Xauerium ipsum deuchens in Iaponiam, anno 1549. tunc enim idest ante annos centum, vigeat nomen illud Cocincinæ & ipsi etiam Tunchin commune erat. Vt mirum non sit, si recentiores quoque tabulæ, regnum hoc amplissimum describentes, illud vnico, & notissimo Cocincinæ nomine appellent. Nunc autem quoniam antè annos penè triginta, distincta sunt duo illa regna, de Tunchinensi, mihi solum,

lùm, propositum est dicere; cum autem vtriquè communia occurrerint, tunc communi quoque nomine regni Annam vtendum erit.

Nunc quod ad situm attinet, vniuersum hoc regnum Annam, à gradu duodecimo latè patet versus Septentrionem, vlque ad 23. inclusiue, ita tamen vt quicquid intra 12. & 17. continetur, id totum pertineat ad Cocincinam. Indè verò à 17. ad 23. regnum sit Tunchini. Quæ duo, sic incolæ distinguunt, vt Tunchinum vesti comparent, Cocincinam Zonæ. Quod Tunchinensis regni quatuor Prouinciæ spatijs æqualibus, & fere quadratis, per multa nulliaria excurrant. Cocincinam verò vicini montes ita comprimant, vt ad 50. milliaria vix perueniat totus ille tractus, à littore ad montes quos incolunt barbaræ quædam gentes à reliquo Annam, linguâ & moribus, penitus diuersæ, Remoys vulgo nominant; ab austro autem ad Septentrionem, latè Cocincina diffunditur ad 300. circiter 50. milliaria Italica. Sunt etiam qui dicant pertinuisse regionem hanc olim, ad regnum Ciampa, sed Ciampæos vi armorum pulsos ab Annamitis, totam hanc terram paucis ab hinc annis deseruisse.

Fines igitur regni Annam, ab aquilone quidem sunt Cinæ, ac alius quidam regulus dictus Ciûa-chauh. A Meridie regnum Ciampa, ab Oriente partim mare Cinicum, quod Lusitanis vocatur Golpho de Aïnam. Partim regulus ille Ciuchauh: denique ab occasu terminatur, indè quidem Laorum regno, vastâ tamen inter vtrunque, interjectâ solitudine ducentorum circiter milliarium, inde vero barbaris illis Remoïjs quorum supra memini.

*Tunchinensis regni rotus & initia.*

CAPVT II.



INITIVM huic regno dedit, rebellio contra Cinas, ante annos circiter octingentos. Cum enim Tunchinenses crudele Cinarum dominium ferre non possent, excussere tandem iugum, & gubernatore Prouinciæ interempto, regem sibi elegere de gente suâ: Et ne vllum deinceps vestigium maneret prioris status, diuersos etiam mores susceperunt. Cum enim Comam omnes vulgo promissam nutrent, eamque reticulis aptè supra caput colligerent, ac pileolis operirent, edixerunt publicè Tunchinenses in signum communis libertatis, vt eiectis reticulis coma posthac libera fluitare sineretur per humeros. Deinde cum ocreis etiam omnes vterentur, propter lutum quo abundat regio, conuenerunt omnes, vt omni calceorum usu deinceps abstinerent, quod ad hæc etiam tempora seruatur: multa indè (vt fieri solet) gentis vtriusque prælia, paxque tandem, ea conditione inita est, vt tertio quoque anno Tunchinensis Rex, ad Cinensem, Pechinum veniret cum muneribus. Id quod hætenus præstat semper accuratissimè.

Verùm compositâ cum Cinis pace, dissenserunt Tunchinenses inuicem, geminâque rebellantium conspiratione factum est; vt vniuersum illud regnum Annam quod vni solùm Principi suberat; in tres hodie partes

tes diuifum fit, totidémque regibus pareat. Et prior quidem feditio annis ab hinc ducentis in vrbe regni primariâ sic contigit. Discefferat Rex in Suburbana rura, vt abſtraheret tantisper animum à curis; cum ecce is quem cuſtodix Regiæ domus præfecerat, repente fit regni dominus, expulſoque in vltimos Imperij fines, verſus austrum legitimo Rege, è ſeptem Prouincijs in quas Tunchinenſis ditio diuiſa erat, vendicauit ipſe ſibi quatuor præcipuas, tenuitquè deinceps annis ſerè centum.

Sic ſpoliatus Rex maximâ & pulcherrimâ Imperij ſui parte, desperatâque ſerui rebellis vindictâ, adiecit aliò curas, & verſus austrum regni fines auſus protendere, pugnavit fœliciter aduerſus Regem Ciampa, eumque ad interiores aſtri plagas ſic compulſit, vt tota illâ regione potitus fit, quam vocamus Cocincinam. Atquè ijs tam latis ſucceſſibus, nequaquàm animatus, in medio fœlicitatis curſu; otij amantior quam victoriarum, neglexit fines Imperij latiùs proferre; totumque ſe quieti tradens & delicijs, ſeceſſit in Prouinciam *Thin hoa* totum interim exercitum, belliquè curas, præfecto militiæ permittens, homini ſolerti, & rerum magnarum capaci. Quâ ille ſtatim occaſione vtendum ratus, cogitare primùm cœpit de veteri regno recuperando; & principem illum rebellem ſubito aggreſſus, multis prælijs tandem oppreſſit. Deinde verò cum iam ſatis fortunæ ſuæ credere cœpiſſet cogitauit etiam de toto Imperio ſibi ac ſuis parando. Videbat nimirum exercitum ſe habere amantiffimum & ad omnes nutus paratum, Regem autem otio marcidum regni adiniſtrâdi, curas omnes abiectiſſe, atque in ipſum contuliſſe.

Ex his igitur initijs factum est, vt solum ferè nomen regibus ipsis manserit, administratio autem tota regni, soli militiæ præfecto, cum summa authoritate traderetur:transiuit enim ab eo tempore officium illud, hæreditario iurè ad posteros non expectato vllò Regis nutu. Gerebat porrò præfecturam illam antè annos ferè centum Cocincinæ Regis nunc viuentis abanus. Is (vt ferunt) cum pugnaret aduersus rebellem illum, de quo dixi, in ea solitudine quæ Tunchinum à Laïs diuidit, ab inimicorum repentè cuneis circumdatus, in in summum venit periculum. Erexit autem tunc animum impavidus, & milites appellans; Eia (inquit) socij, fortiter vt soletis agite, sin è vobis aliquis, præsentem me discrimini subduxerit, huic ego, filiam meam vxorem spondeo. Ad has ducis voces, fortissimus aliquis de turbâ miles, elephanto insidens mirè animatus, irruit statim, in medios hostes, præfectumque morti iam proximum in tuto collocat, & mox cum ipso prælium instaurat. Fuit hic viro præstantissimo primus ad summos in republicâ honores gradus. Nam, & præfectus, accepti beneficii memor, filiam illi suam tradidit; & partem etiam exercitus commisit, imò & cum breui postea sublatus, filium reliquisset impuberem, & paternæ dignitatis adhuc incapacem, sufficitur gener in socii locum, summâ regni totius voluntate.

Sed vix tamen præfecturam illam gerere cœperat, cum generosos excreſcentis pueri animos conspiciens, timuit spoliari officio, quo solâ ætas puerum priuasset sicque crudelissimum meditatus consilium, exæcante mentem (vt solet) ambitione, statuit innocentis morte, ab omni se dignitatis amittendæ metu immunem præstare.

Neque occultæ fuere fraudes, subodorata est facinus, adolescentis soror, quæ statim, & maritum à scelere, & fratrem à nece liberare cogitans, viro suadet, ut imminente tunc in Concincinâ bello, fratrem eò dimittat, & specie illâ falsâ honorificæ legationis verum exilium occultet. Placuit marito prudens coniugis consilium, fuitque illud utrique salutare. Nam adolescens, ut erat sagax, & fortis, profectus cum gubernatoris titulo in Concincinam, omnes sensim peremit, à quibus periculi aliquid timere poterat: deinde tantâ sapientiâ, & moderatione usus est; ut regnum sibi Concincinæ parauerit; primus ibi Rex nominatus, cum tributî onere, quod Tunchinensi Regi cognato suo deinceps penderet. Nomen illi *Ciûa on* hoc est Rex dominus, fuitque auus illius Regis, quem ego ante annos quatuor terris illis imperantem vidi.

Sed neque marito, minùs commodè cessit sapiens fœminæ consilium, nam is omni vacuus timore, præfecti munus cum summâ potestate diù gessit, transmisitque illud in posteros. Profligatis enim rebellibus, præsertim illis, qui centum iam annos, quatuor Tunchinensis regni prouincias occupabant, nobile ipse nomen *Ciua bang*, adeptus est, hoc est Rex iustus. Quem aiunt fuisse auum, Regis tunc viuentis, cum ego ad has terras appuli. Vendicauit autem sibi omnia regni iura, præter paucas aliquas prærogatiuas honoris, principi supremo deferri solitas, ut narrabo statim.

Interea vero rebellis ille Ciûa bang armis deuictus, secessit in montes Cinis finitimos, occupatisque locis aliquot situ munitissimis, nomen ibi Regis, & insignia retinuit. Fundato autem regno perexiguo, sæpe descendis.

dit infestus ex præruptis montibus, magnâque in subiectis vndique locis strages edit, multis quidem superatus prælijs, sed nondum omninò profligatus.

Honores exhiberi soliti supremo Principi Tunchinensium, quem dicunt Bîa.

C A P V T III.



INTER alios ritus quos hi populi religiosissime obseruant, primum tenet locum solemnissimus ad aperiendam terram, & colendos agros, omnium inuitatio, quæ incunte semper anno, maximâ pompâ indici solet. Anni autem exordium apud Tunchinenses, & Cinas, incidit in medium illud tempus, quod Hibernum solstitium, ab æquinoctio verno æqualiter diuidit; respondetque quinto Februarij nostro, modò sit nouilunium.

Sub id igitur tempus eligitur dies ille, quem mathematici, aut etiam magi designarunt (quibus hæ gentes omnia tribuunt) illo die qui vt plurimum est ab inchoato anno tertius, conuenire in regiam tenentur omnes, qui officium aliquod gerunt in republicâ, præclaro cuncti ornatu, insignia ferentes dignitatis, eoque apparatu Regem totâ vrbe comitantur, hoc fere ordine.

Primi omnium milites agmen ducunt: omnes egregiè armati, quorum ego numerum, cum præfens adessem, tametsi omninò inire nequaquam potui, iudicavi tamen illum esse hominum circiter quinquaginta millium.

ta millium. Post turmas militares sequebantur duces, & præfecti, delectaque nobilitas vniuersa. Omnes in equis eximie phaleratis, aut etiam grandioribus sublimis elephantis. Memini autem me tunc numerasse huiusmodi elephantos sicures plures trecentis. Deinde Ciuiam vidi *Thando tuang* idest Regem, inferiorem illum quidem, sed totius (vt dixi) regni administrum. Vehabatur ille aurato curru, ex quo postea descendens, elephantem conscendit, quem regebat aptissime. Inde litterati omnes longo agmine tum Doctores, tum Baccalaurei, talaribus induti togis pretiosissimis. Vltimus omnium ipse Büa, grandi conspicuus folio viginti pedes alto, humeris hominum portabatur, pendebant è throno serica vndique, & pulcherrima peristromata coloris aurei, eximio sanè apparatu. Hunc autem colorem solus sibi Rex vindicat, aliorum omnium cultus erat fere violaceus.

Eo igitur apparatu prodiens Rex è palatio quod *Den* nuncupant, est que circuitus eius amplissimæ vrbi fere par, totam obit ciuitatem, deinde in campum latissimum progreditur. Ibi desiliens è throno, ante omnia solemniter cælo litat: deinde aratrum affrabre elaboratum, egregièque ornatum, manu apprehendens, terram sulcat aliquandiu. Vt eo exemplo, suos edoceat nihil esse posse otio peius, nihil la bore amabilius; à quo ne ipsi etiam Regi vacare liceat. Tum Ciüa (ille à quo dixi regnum gubernari,) prostratus, Büam stantem supplex veneratur, obsequijque fidem pollicetur. Deinde ingens illa turba prono in terram corpore Regem suum adorat, eique quantâ maximâ potest amoris significatione benè precatur. Denique in Regiam

B

eadem

eodem ordine princeps reuehitur. Atque hic præcipuus honor est, quo Tunchinenses Regem suum quot annis, religiose venerantur. Ad hæc bis etiam singulis mensibus, in nouilunio nimirum & plenilunio Doctores omnes, & litterati conuenire tenentur principem: cique tum vt Regi tum vt litterarum patrono exhibent obsequium. Nam & ipse Būa Doctores inaugurat, & examinibus præest. Imò & honorum titulos, omnes principibus ducibusque confert; non arbitrio suo, sed ex eius nutu quem communiter Regem appellari dixi.

Denique à die ipso, quo regnum suscepit Būa, numerari anni solent, diplomata omnia tum priuata tum publica obsignari, & nomine quoque ipsius denominari. Sin contigerit communi aliquo malo vexari regnum, ingruere nimirum pestilentiam, sterilitatem, aut alia huiusmodi mala publica, mutatur sequenti anno ipsi Būæ nomen, vt eo mutato, cesset etiam infortunium. Ac deinceps ex eo nomine, incipiunt computari anni, perinde ac si nouus eis Rex obtigisset.

Quod autem spectat ad ipsius Būæ inungurationem. Desumitur ille quidem semper ex antiquissimâ nobilissimâque familia, & Cinis etiam ipsis notâ.

Sed non deligitur nisi ex suffragio ipsius Ciiæ, quem deinceps Regem appellabimus, imò & tantum auctoritate valet, vt Būam etiam ipsum possit deponere, aliūque ex eadem prosapiâ promouere ad Imperium. Familia porro ex quâ plures iam annos Būæ deliguntur, domus *Lè* vocatur, toto regno celeberrima. Estque post fundatum Tunchinense regnum, quarta, ex qua non interrupto cursu, delecti sunt Būæ.

De Rege subalterno quem Ciüam dicunt.

CAPVT IV.



OSTQVAM Ciüa bang ille cuius supra memini, mirabili prudentiâ & fortitudine pluribus tandem præliis annorum quadraginta fudisset, & regno expulisset rebellem illum qui quatuor (vt dixi) prouincias tyrannicè inuaserat; tantâ cœpit valere apud omnes gratiâ, & authoritate, vt communi consensu appellatus sit *Vvan* quod Cinico Idiomate, idem sonat, quod Bûa significat Tunchinico. Suscepit autem annuente ipsomet Bûa cum Regio nomine regiam etiam potestatem. Quo in munere adiunxit sibi omnium animos, & felici semper fortunâ vsus, ad extremam deuenit senectam. Sed vbi tamen ætate iam confectus, in lethalem incidit morbum, degener filius præmaturâ regnandi actus cupidine, moribundo patri eripere tentauit regnum. Quo intellecto furens senex filium statim dire cruciari præcipit, ac tandem confractis curibus necari. Successit in eius locum, & paterno regno donatus est, de fratrum etiam ac cognatorum consensu filius secundo genitus, patri vnice Charus, singulari iuuenis solertiâ, moribus compositis & indole mirabili.

Rex ergo nouus, cum primùm sensit satis sibi confirmatam esse apud omnes authoritatem, in id ante omnia incubuit, vt toti regno firmam sanciret pacem.

B. 2. Et

Et nè rebellium vnquam audaciæ pateret aditus ad rerum nouarum molitionem, constituit vt in tribus illis Prouinciis quæ nunquam à Rege defecissent, quinquaginta militum millia, in vrbe Regiâ *Chè cè* sub signis semper haberentur, alerenturquè impensis quatuor Prouinciarum antea rebellium. Eo consilio, vt eos princeps haberet semper ad manum, ipsquè vteretur ad omnia regni negotia pro nutu peragenda. Cum enim ciuitas hæc in ipso regni vmbilico constituta sit, nulli exoriri possunt in Prouinciis bellorum tumultus, quos accurrentes, iussu principis, militares copiæ non statim opprimant. Neque hic quieuit sagax prudentissimi Principis prouidentia. Cum enim cerneret. Regionem totam plurimis, ac maximis plenam esse fluminibus; per quorum alueos infesti sæpè descendissent rebelles, & omnem latè regionem populati essent. Id tam grandè malum prouidentissimus Rex vt auerteret, innumera construxit nauigia, & plurimas etiam triremes. Numeravi ego aliquando quadringentas & plures etiam grandes onerarias cum myoparonibus, adeò vt omnium numerus superaret haud dubiè millenarium.

Sunt vero Tunchinensium triremes constructæ in hunc ferè modum. Longitudine nostras sæpè superant. Remos vt plurimùm, ex quâuis parte habent viginti quinque oblongi sunt, læuigati, & nostratibus leuiores, possuntque singuli à singulis non difficilè impelli: stantes semper remigant & dissimili à nobis artè; quippe toto corpore incumbentes, remos antrorsùm agunt. Neque ignominiosum hoc munus est, sed maximè apud illos honorificum, præsertim quoties triremi Rex ipse vehitur, aut eius comitatus. Imò cum pugnatur è nauibus,

bus, militum id officium est: eorum enim alij remigant, alij remigibus mixti pugnant. Neque vlla est naus, quæ pluribus instructa non sit tormentis, etiam maioribus. Habent autem ad minimum singulæ in prorâ vnum, in puppi duo, deindè incredibili pollent velocitate, atque adeo europæis nostris etiam grandioribus valdè formidabiles.

Atque vt videas quantâ Tunchinenses arte Bombardis his vtantur, non omittam dicere, quod memini non ita pridem contigisse nobili Lusitano artis huius peritissimo. Prouocatus ille fuerat à militè Tunchinensi ad probandam peritiam, ac primus quidem Annamicus glandulam emittens, tam aptè direxit instrumentum, vt ipsum albi centrum attigerit. Quod perspicuens Lusitanus, ac meritò timens, nè si vinceretur honoris dispendium incurreret, cautè sibi faciendum putauit, vt tormentum exploderet absque glandulâ, tum audacter exclamans, cia inquit in eadem aduersarij rimulâ glandulam meam perquirite. Sicquè ingeniosè explodendi artem, fallendi suppleuit industriâ.

*Trirenium Tunchinensium, & Cocincinarum
robur, numerus, structura.*

CAPVT V.



TRASQUE conjungo quod simillimæ sint, nisi quod Tunchinica Cocincinensibus potiores videntur numero, magnitudine, omniquè genere ornamentorum, præsertim auri ductilis

B 3 quod

quod è Cinis auehitur. Sunt tamen omnes fortissimæ quod patebit ex narratiunculâ quam subijcio.

Exârserat inter Tunchini, & Cocincinæ Reges graue bellum; & iam ter irritò conatu aduersarium, Tunchinensis aggressus erat, quod ferens iniquissimè honorificam ad Batauos qui Iacquetram incolunt, legationem misit, auxiliares ab eis copias postulans. Hollandi Cocincinensibus iam diu infensissimi; opem pollicentur, & sine morâ tres naues è grandioribus, omni commeatu bellico instructas, & egregiè munitas mittunt. Venère illæ fauentibus destitutæ ventis, in conspectum portus alicuius Cocincinæ, vbi tum Rex fortè, cum aliquot triennibus aderat. Regem autem comitabatur nobilis Hollandus, qui è naufragio ante annos aliquot, incolumis euadens, militauerat deinceps in Cocincinâ. Scicitatur statim ab eo Rex, num existimet emitti posse Cocincinenses triremes, aduersus Hollandicas illas naues. Ita nè verò? (inquit Hollandus blatero) triremes illæ tuæ ô Rex nauibus illis victricibus pares esse poterunt, quibus expugnandis totus cœli furor vix sufficit. Siluit tunc, & iram Rex pressit, sed imperauit illico duobus, vt irent impigri, & naues illas bataucas impeterent. Fauebat tum mare triremibus, quod vix flante vento, ægrè naues mouerentur, vnde statim vectores territi cogitare cœperunt de fugâ. Sed irritò Conatu; nam earum quidem minima, modico illo ventorum flatu opportunè vsa, periculum euasit. Altera insectantes triremes fugiens in scopulos impegit, & perijt. Supererat tertia omnium maxima & munitissima, quam aggressæ aduersariæ triremes quatuor, primum emînùs crebrâ Bombardarum dispoſitione, comminuere gubernaculum,

bernaculum, malum, Antennas, vela omnia pessundere. Deinde cominūs cum subire nauim pararent Cocincinenses, desperatā Bataui salute, iniecere ignem tormentario pulueri, quo tum ipsi, tum aliquot etiam aduersarij miserè deflagrauerunt.

Subduxere sē incendio Hollandi septem, in mare desilientes, quos continuò captos, deduxere Cocincinenses ad Regem. Qui tamen si prae gaudio vix sē caperet fremebat tamen adhuc irā, ob audaciam illam priorem tumidissimi Hollandi, ad quem incredibili tunc pudore anxium, conuersus. Heus tu? inquit, nosti eximios hosce homines, ecquid cessas rogare illos vndenam aduenerint, ille fastu in timorem verso. Noui, ait, ô princeps, miserimos milites, tristissimas quassatæ nauis reliquias? pergit Rex, periit ergo nauis, sed quo tandem premente, aduersario, tuarum, videlicet triremium impetu, reponit tremens Hollandus. Ad quæ iterum Rex, triumphales igitur illæ, nec vincendæ nisi cælo naues, paucis hiscè triremibus meis non fuere pares. Eia milites amputate tumidum hoc caput, & septem has victimas misero adjungite. Factum est vt Rex imperauerat, insuperquē præcisæ sunt octo illis nares, & alijs omnibus quorum naufraga cadauera extrahi potuerant è mari, easque coniectas in cophinum insultans misit Rex ad Tunchinensem aduersarium En inquit ô Rex exercitus tui partem selectissimam. Alia si me audis, & tutiora tibi nunc quære præsidia, vt quam præceperas animo de me victoriam possis assequi. Displicuit Tunchinensi, atrocior hæc sanna, & Batauicam illam nauim quæ fugam capessuerat, recusauit admittere in portum aut vllò subsidio iuuare. Et hoc specimen, sit eximij
roboris

roboris quo pollēt hæ naues, nunc venio ad numerum. Hunc autem, ego quidem exactissimè inire nequaquam potui, quod plurimæ illæ sint & in varios portus dispersæ. Sed quia tamen certò comperi, triplo aut etiam quadruplo plures illas esse quàm Cocincinenses, non fuit mihi difficilis de Tunchinensibus coniectura. Numeravi enim, in maximo illo fluuio qui Cocincinæ regiam alluit, octo supra sexaginta, in reliquo etiam regno vidi longè plures præsertim in portu illo celeberrimo quo plurimæ appellant è Cinis naues diciturque *Checian*. Et alias quoque plures iuxta fines Ciampensis regni, vbi semper armatæ, & expeditæ habentur ad repellendos Ciampensium incursus qui ab illius regni finibus olim pulsî, eo rursus penetrare sæpius conantur. In Cocincinâ igitur existimauerim esse semper ducentas ad minimum triremes omnibus semper rebus necessariis instructissimas. Tunchini autem illas esse plures sexcentis, sed amplissimas, & egregie munitas.

Superest structura, pulcherrima illa sanè ac scitu digna. Locus in qualibet triremi honoratissimus prora est. In hac cubiculum eminet ornatissimum variis coloribus auroque depictum. Remi omnes affabrè confecti, puppis & antennæ multâ etiam curâ elaboratæ. In remigando tanta industria, vt ad bacillorum numerosè sonantium pulsum, procedant simul, aut subsistant, retrogrediantur aut progrediantur, & quidem tanto consensu omnes, vt quoties plures simul aguntur, vna vix antecedit aliam vno palmo. In triremibus autem regiis (quas viginti tres aliquando numeravi cum Rex in earum mediâ veheretur) Carbasina erant vela, opere phrygio,

phrygio distincta : Funēs omnes quibus illa vel collebantur vel demittebantur serici erant purpurei coloris. Dùm autem secundæ fauent auræ vela explicant remis quiescentibus : interdùm velis & remis velocissimè incedunt. Imò etiam in conspectu Regis, certare inuicem solent de celeritate, quæ victrices sunt magnis præmijs donantur. Sed ea tamen certaminis lex est, vt si quem contigerit remum, vehementiori aquæ pulsū confringere; si tamen modulate semper ad sonitum bacillorum pulsauerit, is optimè remigasse censeatur, & præmium præ alijs accipiat à principe.

Denique mirum est quantâ celeritate triremes adsint expeditæ ad obsequendum, quoties Campanæ sono conuocantur. Vix enim datum est signum, paratæ statim cernuntur stare in officio ad quod destinantur. Ac licet sua cuique in portu statio sit, momento tamen videas illas omnes egredi, & suo quamque loco stare accinctam ad imperata facienda. Et hætenus de triremibus.



Regis Tunchinensis potentia & diuitiæ.

CAPVT VI.



XIMIAM Regis huius potentiam nihil æque commendat, & vicinis circumquaque populis reddit formidabilem, ac incredibilis hominum frequentia quibus abundant Prouinciæ septem Imperio ipsius subditæ. Hæc autem quanta sit vel ex vnâ Regiâ vrbe non est difficile conijcere. Amplissima

C enim

enim illa est; patetque tum in longitudinem tum in latitudinem sex milliarium; pulcherrimis vbique distincta vijs, adeoque capacibus vt duodecim equites possint per eas vnâ ingredi. Quibus tamen diebus apud eos festa celebrantur, bis quolibet mense, in nouilunio videlicet & plenilunio, tanta per vicos illos omnes, & compita populorum multitudo confluit, vt per ea progredi sine anteambulonibus, nemo, nisi incommodissimè possit. Cum ergo id ego cernerem, statuebam esse in illâ ciuitate, capitum omninò decies centena millia.

Aliud autem præterea ducere solebam immensæ huius frequentię argumentum. Vulgaris enim apud istas gentes mos est, vt bolos quosdam saporis exquisitissimi, conficiant ex folijs & fructibus certarum arborum (vocant ipsi *Blau caü*) eosque semper paratos seruent. Ac nobiles quidem, & primarij famulos domi habent eius artis peritos, qui scitissime illos componant & condiant dùm autem domo egrediuntur marsupium aut sacculum omnes deferunt huiusmodi bolis plenum, vt amicis obuiis aperto, inter salutandum, marsupio eos offerant in signum amoris & fœderis. Quia verò non omnium est habere domi seruitia quæ hoc munus præstent, propterea multi sunt qui publicè in compitis diuendant huiusmodi delicias, numerabantur autem in solâ curiâ (vt certo audiui) horum opificum millia plus quam quinquaginta: vt videas quanto maior esse debeat numerus euentium.

Ex hac tantâ populorum frequentiâ duo potissimùm commoda Rex percipit, primum est quod ingentes nullo negotio conficiat exercitus. Nam præter eos quos semper sub signis habet facillimum illi est, si qua ingruat

gruat necessitas, centum millium copias conscribere. Id quod etiam sæpè facit, nam quo tempore in has ego primùm terrasveni, proficiscebatur cum delectis cohortibus aduersus Regem Cocincinæ, in quibus censebantur militum centum viginti millia. Quæ tanta multitudo etiam tunc illi obsuit, quippè cum tantis fretus copijs existimasset breui tempore debellari posse Cocincinensem. Resistente illo diutiùs, quàm sperauerat, re infectâ postea redire coactus est. Alterum præterea è tam populosa gente commodum Rex colligit, incredibilem vim pecuniarum. Nam exceptis paucissimis quos regni leges eximunt, omnes planè viri, ab anno ætatis 19. ad sexagesimum, annum Regi tributum pendunt. Sed eo tamen ordine, vt tribus illis Prouincijs, quæ semper steterunt in fide, tantùm singuli persoluant, quantus apud nos valor esset aureorum duorum. In Prouincijs verò illis quatuor quæ à Rege defecere quadruplò plura exigantur, in pœnam perfidiæ, ob quam plurimis etiam sæpè oneribus vexantur.

Et quidem, tributa hæc omnia, capitatim sic imponuntur, vt nihil nisi personas spectent, tantundem enim à pauperibus exigunt quantum à ditioribus, adeo vt qui nihil habeant præter manuum laborem, ad ea etiam paranda vectigalia vxorum, & familiæ totius operâ iuari debeant. Deinde præter certa hæc & stata munera, persoluantur etiam alia quædam è terræ frugibus, modica omninò, & arbitraria; quæ tamen nemo prorsus ausit omittere. Offeruntur porrò singulis annis ter aut quater, ineunte quidem anno semel; deinde in natali Principis postea in anniuersario Regis defuncti, ac demùm quando nouæ colliguntur è terrâ fruges. Verùm

ea dona non singuli homines offerunt, sed in commu-
ne pagi omnes, ideoque deliguntur præfecti è prima-
rijs, qui hæc à singulis exigant & totius postea pagi
nomine deferant ad principem. Nunc horum pagorum
quantus sit numerus, descriptum ego quidem habe-
bam in catalogo, quem postquam in manus Hollan-
dorum incidi, cum aliis pluribus scriptis meis periisse
dolui. Sed ex eo tamen quod subijciam colligi poterit.
Ex illis pagis quos dixi, nonnulli tributa pendunt im-
mediate ipsi Regi, alij vero ducibus de regno, ac de
principe bene meritis. In præmium enim virtutis, &
rerum recte gestarum huiusmodi oppida cum iure tri-
butorum Rex attribuit, quibusdam plura, alijs pau-
ciora. Sed ea tamen inter ipsos lex est, vt huiusmodi
ius patre moriente ad hæredes non transeat, nisi nouo
Regis diplomate confirmatum fuerit. Imò & ei cui vi-
uenti concessum illud est auferri potest, præsertim si
grauè aliquid crimen contraxerit. Vnum ego memini
me baptizasse cui donata iam erant à Rege oppida
quatuor supra quinquaginta: ijs autem qui cognati, aut
affines sunt Regis concedi solent, etiam longe plura.
Denique qui huiusmodi habent pagos sæpius quot an-
nis plurimam auri argentique copiam Regi deferunt.
Sin verò aliquis in ijs donis esset parcior, cum Rex
concesso statim munere spoliare posset. Cum autem
duces illi numerentur ad minimum mille colligit
omninò Rex etiam ex ijs immensam quandam vim
diuitiarum.




Tunchinensis militia stipendia, & ordines.

CAPVT VII.



VERUMADMODVM ducibus (vt dixi) dantur à Rege vrbes & pagi, vt præmia laborum; sic militibus saltem primariis, in stipendium concedi solent, sed pauciores quam ipsis ducibus. Cum enim vni sæpè duci plures concedantur, tùm pluribus militibus alendis vnus interdum sufficit. Imò & militibus gregariis duces ipsi vt plurimùm, persoluant stipendium Regis nomine, accipiuntque ab ipso Rege oppida, cum huiusmodi onere, vt designatus militum numerus alatur tunc autem illi milites, ita sunt in potestate ducis, vt dum vacant à bellis semper tamen utili aliquo labore occupentur domos enim extruunt; triremes reficiunt, vt vix vnquam illis liceat esse otiosis.

Quia verò præfecti omnes militum, & duces quotquot in vrbe Regiâ versantur quotidie semper tenentur matutinis horis venire ad Regem, eumque comitari dum egreditur ad ius dicendum. Sic etiam milites suo semper duci eodem tempore præsto sunt, & cum eo ad Regem veniunt, redeuntque; pulcherrimo sanè ordine ac ornatu coloris violacei. Deinde quoties ex vrbe Rex egreditur, vel voluptatis causâ, vt remittat animum à curis, aut ad nouas triremes probandas aut ad milites ipsos varie exercendos (quod bis quolibet mense fieri vidi) tunc Regi adsunt duces omnes cum suis singuli cohortibus, nec ab eo discedunt donec in




palatium redeuntem eodem ordine stipauerint. Sed neque vnquam prodit Rex in publicum quin eum partim præcant, partim consequantur plures equitum turmæ, imò & elephanti centum, adeo proceri, & validi, vt in turri, quæ supra dorsum ipsorum eminet sex aut septem homines vehantur; præter ductorem ipsum qui collo insidet: solent autem huiusmodi feris plerumque deferri Regiæ vxores, & cognatæ cum toto famulatio.

De lucta verò militari, quando incidit mentio; semel ad eam inuitatus à Rege, obseruabam eum quem aduersarius in terram dejecerit, nondum censi superatum, quandiu adhuc pronus est; aut incumbit in latus. Tunc autem dici planè debellatum, postquam utroque humero terram premente, supinus esse cogitur.



Militum Tunchinensium disciplina & moderatio.

CAPVT VIII.

 N hâc tantâ, tamque multiplici militum copiâ, vnum mihi sanè mirabile visum est, annis illis duodecim, quibus versatus sum in his regnis. Licet tam diuersis illi ducibus parcant, quotidieque conueniant in regiam, & toties prodeant in campum, vbi ab ipso Rege, aut ducibus ad epulas inuitantur: nullas tamen vnquam audiui rixas exortas esse, neminem ab altero sauciatum quod profectò Christianos omnes

omnes milites pudore afficere debet, quos ethnici ac barbari tanto intervallo superent: id autem ego solebam referre partim ad innatam gentis urbanitatem, partim ad eximiam observantiam erga Regem & duces. Nam Regem quidem tam religiosè venerantur, ut eum cœli filium prædicent, datumque à deo ut eos regat. Ideoque nihil vnquam audent committere, quod suspicentur molestum esse posse Principi. Quæ religio tanta ortum duxisse videtur à superstitiosâ ceremoniâ, quæ quot annis vsurpari solet in hunc ferè modum.

Sub initium sextæ lunæ quæ in nostrum ferè Augustum incidit, convenire iubentur milites omnes, cum tribunis, atque ducibus, ad obligandam nouo sacramento Regi fidem. Eriguntur in præcipuis vrbis Regiæ compitis, altaria tutelaribus regni dijs, magnificèque conuestiuntur, appenditur in illis, solèmnis iuramenti formula maioribus conscripta litteris: Et quidem iustissima, quatenus Regi fidem & obsequium pollicetur, sed iniquissima quod testes, & ultores sceleris inuocet dæmones, si fides ea violetur. Ad singula erant altaria, singuli adstant Doctores excepturi iuramentum. Atque ut vnâ die tanta illa militum copia iuramentum commodè præstare possit, multa etiam eriguntur altaria, & in quolibet aliquot duces cum cohortibus, à quibus hoc officium ritè perfoluitur. Iurant autem omnes in hunc modum. Sacramenti verba primus omnium Dux pronunciat, deinde milites cohortis ipsi subditæ clarissimâ omnes voce. Attenditque interim Doctor delegatus, quâ voce singuli formulam enuncient; atque ijs quidem quorum vox clara, & distincta fuerit schedulam tribuit approbantem cum nota *Min* idest clarescin aliqui

aliqui balbutient linguâ, vel timide verba sacramenti efferant illis in schedulâ signatur nota *batmiq*. Id est minimè clare, ac demum quorum vox mediâ cuiusdam claritatis fuerit, inscribitur eorum schedulæ vox *Thuan* hoc est ordinariè.

Neque verò inanes sunt hæ notæ absolutâ enim cæremoniâ singuli statim ducem suum adeunt, offerentes schedulam. Accipiuntque ab eo vestes Regijs impensis paratas. Sed quibus schedula suffragium claritatis dederit, optimæ dantur amplissimæque, breuiiores alijs & contractiores prout sua cuique fauerit schedula: dignoscunturque toto deinde anno, ex vestibus, quam quisque laudis, aut approbrij notam in præstando iuramento tulerit.

Non omittam referre hoc loco, quod memini contigisse vni è militibus qui Christum in baptismo profiteri cœperat. Ille cum ad prophanium hoc sacramentum citaretur cum socijs, accessit intrepidus; despectoque superstizioso altari, cōuersus ad Doctorem qui præerat, omisâque vulgari formulâ in hæc verba iurare cœpit. Testem inuoco verum cœli terræque Dominum Patrem, Filium & Spiritum sanctum, cœlestes omnes spiritus & curiam cœli vniuersam, fidelem me totâ vitâ futurum Regi meo *Thaüda Vran* sic sanctè spondeo ac iuro. Sin mentior vlciscatur statim facinus hoc verus cœli terræque dominator exercitus suos omnes in meam perniciem emittens. Hæc bonus miles alacri & sonorâ voce. Quod præsidi tantoperè placuit, vt primariam ab eo notam ex templo retulerit. Et hæc de militiâ quàm satis.



Politica Tunchinensium gubernatio.

CAPVT IX.



VM olim istud regnum portio quædam fuerit Imperij Cinarum, illius etiam gentis legibus diu stetit. Postquam autem excussere iugum, pauca tamen circa illas mutarunt, atque duntaxat ea quæ ad Regem spectare visa sunt. Potest enim ille nunc ad nutum omnia decernere; sed in grauioribus tamen negotijs, delectos habet consiliarios quorum suffragia exquirat; adeo ut ad ipsos prouocare liceat è Prouincijs, sed ab ipsis nulla sit vltior appellatio. Singulis porrò Prouincijs, vnicus constitutus est gubernator, cum potestate iudicandi de causis etiam capitalibus; sed vbi tamen à Regiâ vrbe propius ab-sunt, huiusmodi omnes causæ deferuntur ad consilium regium, cuius solius est damnare capitis reos.

Cæterum in Prouincijs duo vidi esse genera gubernatorum. Primum est litteratorum quorum est explicare leges & *Van* nominatur: togati illi semper incedunt & sine armis. Quoties Regem adeunt, violacea illis est vestis, aliàs nigra; pileo præalto & semper nigro capita regunt: alterum ducum militarium quod appellant *Vv*, illos nefas est esse sine armis, desumuntur ex primaria nobilitate, quippe vel præcipui exercitus præfecti, vel totius regni principes quales sunt filius aut frater Regis. Sed ijs semper vnus è doctioribus adiungitur, cuius consilio gerantur omnia.

Adhæc præter gubernatorem illum supremum, sunt
D etiam

etiam in quâlibet Prouinciâ duo tribunalia quorum authoritas in totam extenditur Prouinciam. Vnum *gna ti* dicunt, superius, & causas grauiores dijudicans, alterum *gna huyen*, decernens de minoribus. Vtrunque non constat viris nisi litteratis. Denique præter duplex illud subscellium, tria sunt alia minora tribunalia inuicem subordinata: eorum infimum singulis pagis proprium est constatque semper ex antiquioribus cuiusque loci accolis, qui dirimunt ciuiles controuersias inter ciues ipsos exortas, ab eo prouocare licet ad aliud medium tribunal, quod dicitur *gna huyen*, & constat ex decem aut duodecim oppidis quæ vocantur *huyen* ijs enim præsidet vnus aliquis horum pagorum præfectus, dictus propterea *Cahuyen*. Et rursus ab isto prouocatur ad alterum iudicem superiorem quem vocant *Caïphu*, à quo non est euocatio nisi ad vnum è communibus Prouinciæ tribunalibus.


Ad statuendas porrò tam multiplices istas exedras iudicantium, video coactos esse Tunchinenses, ob singularum Prouinciarum amplitudinem, eas si quidem diuisere primùm in plura membra, quæ vocant *Phu*. Præst illis semper aliquis nobilium quem nostris comitibus aut marchionibus comparari posse arbitrabar. Subdiuiditur *Phu* in plures *huyen*, quorum præfecti Baronibus nostris respondent postremò diuiditur *huyen* in plura *Xa* quorum præsidēs *Caï xa* nominatos possumus conferre cum ijs apud nos qui oppidi alicuius Domini dicuntur: sed eo tamen ab illis differunt, quod in locum mortui parentis non succedat filius. Imò & Prouinciarum gubernatores singulis vt plurimum mutentur trienniis.

Doctorem



*Doctorum apud Tunchinenses solemnis
inauguratio.*

CAPVT X.

 **Q**VONIAM soli vt nuper dixi Doctores, affir-
mi à Rege solent in consiliarios & iudices,
ideo magni fieri solet hic honoris titulus, &
magnis adhibitis cæremoniis tribui, quarum præci-
puas obiter hic attingere non erit iniucundum. Pri-
mùm igitur examina tertio quoque anno, solemnî ritu
indici solent ad quæ conuenire properant omnes illi,
qui satis doctrinæ se cõsidunt esse assequutos studendo.
Fiunt illa intra Regiæ domus septa, & præfente ipso-
met Bûa. Ibi autem varia parantur cubicula pro nu-
mero eorum qui ad examen concurrêre. Singuli enim
singulis clauduntur cubiculis, statque ad custodiam
singulorum miles vnus, qui ministret scribenti ne-
cessaria, & præsertim inuigilet nè à quoquam in re li-
terariâ iuuetur: datur autem cuilibet scribendi argu-
mentum à doctore constituto; clauditurque statim
conclauē, neque illi fas est libros deferre, sola permit-
titur charta pura, cum atramento & penicillo; com-
positioni dies integer conceditur quâ finitâ, chartam
recipiunt doctores sine nomine scribentis sed, speciali
notatam signo, vndè illè dignosci postea possit qui
præsidum iudicio probatus fuerit, istatim fillet bac-
calaureus, cum honorificis patentibus à Bûa ipso sub-
scriptis, & sigillo eius munitis. Atque illi deinceps per

D. 2

totam

totam vitam, dimidia tributorum pars remittitur. Idque primum examen est, à quo subeundo nemo vnquam excludi solet. Aliud autem postea examen celebratur non dissimili quidem formulâ. Sed ad illud ij duntaxat admittuntur qui facti fuerint antè triennium baccalaurei quisquis in eo probatus fuerit, gradu donatur licentiati, *huancon* ipsi nominant & cum eximio doctrinæ testimonio dimissus, ab omni deinceps tributo liber manet, & ex huiusmodi hominibus assumuntur postea iudices minorum tribunalium etiam in ipsâ vrbe Regiâ.

Denique tertium vltimo loco & celeberrimum examen instituitur, eorum qui postquam licentiati fuerint per triennium, candidati sunt doctoratus. Sed quia certus apud eos Doctorum est numerus, non continuò his insignibus ornatur, cuius doctrina in hoc examine probata fuerit. Expectatur enim donec in alicuius demortui locum sufficiendi sint alij. Nam tunc seliguntur excellentiores, reliqui ad triennium sequens differuntur, & interea delegantur à Rege ad varia tribunalia per Prouincias.

Ad illum vero supremum doctoratus gradum qui admissus, fuerit huic statim summa regni ornamenta deferuntur. Conceditur enim tum ipsi tum eius filiis omnimoda immunitas à tributis. Adhibetur ad grauissima regni negotia, ex his tertio quoque anno assumuntur qui solemnem legationem obeant ad Cinas ex his qui primarias iudicantium sedes occupent; ac tanto demùm apud Regem in honore sunt, vt neminem illi vnquam assidere viderim præter vnum aliquem è doctoribus. Quartus demùm isque omnium maximus dicitur olim fuisse

fuisse litteratorum gradus; sed ille iam pridem abrogatus est. Porro hi populi tantum cinicis litteris tribuunt, ut summi iuxta & infimi, filios ab prima pueritiâ in ijs erudiant, vix ut quemquam inuenias, qui earum sit omnino imperitus.



Quo pacto facinorosi à indicibus plecti soleant.

CAPVT. XI.

DIXI de iudicibus, nunc de iudicijs quæ ipsi exercent pauca subiicio, ac primum in huiusmodi causis si sint capitales vix vllæ adhiberi solent scripturæ. Nam vbi primum aliquis accusatus est de crimine, ad iudicem illico deducitur interroganturque coram ipso testes, qui si reum conuincerint, nihil expectatur aliud, sed conuersi ad eum iudices exquirunt, num supersit aliquid ipsi ad defensionem. Si supereffe dixerit, custodiendus traditur vni cohorti militum vt magis liquere possit de crimine. Sed innectuntur interim eius collo ligna duo crassa & oblonga in modum scalæ, quæ supra humeros æquali pondere librata, pluribusque hinc inde bacillis compacta, miseri hominis caput & collum sic constringunt vt ab ijs expedire se nullo modo possit. Neque apud istas gentes, aliud compedum genus est; quod ipsi etiam sæpe reo quando est pauper commodum esse solet. Non enim verentur custodes huiusmodi vinculis innexos producere in publicas plateas ad stipem erogandam. Quo fit vt in carceribus vix vllus vnquam careat

D 3 rebus

rebus necessariis ad vitam. Mulieres si criminis alicuius reæ factæ fuerint, alio modo coëcentur. Funis enim in earum collum iniicitur, cuius utraque pars per totam ligni oblongi & perforati longitudinem sic ducitur, ut una ligni extremitas collum fœminæ premat; ex altera datæ illæ funis partes emineant quibus misera mulier velut canis trahitur, & rapitur etiam ad supplicium.

Postquam de alicuius crimine omnino constat siue per testium affirmationem certissimam, siue per confessionem ipsius rei. (Solet autem illa extorqueri per genus quoddam torturæ valdè moderatum (tunc inquam iterum sistitur iudicibus, qui rursus omnes eunt in suffragia, atque ijs finitis sequitur sententia. Si capitalis illa non fuerit, mandatur siue mora executioni. Ut si latro, prima vice furti leuioris conuictus fuerit, præscinditur ei dextræ manus index, si rursus in simile crimen inciderit damnatur capitis; eodémque supplicio mulctatur quisquis furatus fuerit summam aureorum centum, & quisquis in siluis exercuerit latrocinia.

Cum ergo iudicum sententia morte aliquem damnauit, ducitur mox miser in carcerem à cohorte, cuius præfecto demandata est executio sententiæ, quæ ad vesperam semper rejicitur. Medio autem illo interuallo, cuilibet permittitur adire ac solari moriturum: ad eum enim cuiuscunque criminis compertus fuerit; veniunt vxor & cognati omnes, conanturque pro virili omnes condolere afflicto. Porro supplicium apud eos vltimatissimum, est capitis præcisio in hunc maximè modum. Horâ post meridiem quartâ rapi solet ad conditum locum, reus scalam adhuc baiulans, stipante militum

litum integra cohorte , ac duce ipso præeunte. Ad feralem illum locum vbi deuenere , scalam detrahunt milites, mensamque apparant lautissimè, inde ad epulas inuitant morituum. Sed vix quisquam in eo articulo inueniri solet cui non displiceant oblatæ deliciæ. Remouetur deinde mensa; datur signum à duce, pulsato lugubrem in modum grandi tintinnabulo: tum à milite ad id destinato eximitur machæra, humilique corporis inclinatione, ad quatuor orbis terræ partes facta, caput demetitur vnico ictu. Statimque cadauer sepeliendum traditur cognatis, nisi fortè ob criminis atrocitatem, Rex iusserit, vt aliquot diebus insepultum prostet in loco publico quod rarò euenit.

Si alicui Rex capitis pœnam remittat (vt sæpè facit) iubet tamen ei capitis loco abscindi comam. Itaque deinceps capite semper abrafo viuit; vt nimirum, neque sceleris neque beneficij illi excidat memoria. Deinde vero vt intelligat totam vitam se debere impendio obsequio Regis, à quo illam accepit.

Denique vt finis sit, hoc sanè in regnis istis duobus Tunchini, & Cocincinæ maxime proprium esse aduer-
ti, vt nemo adulterij conuictus siue vir fuerit siue fœmina, mortis vnquam supplicium euadat. Vbi enim manifestò tenetur crimen, rapitur in campum reus, vbi parati adsunt elephanti, ad repetendam hanc pœnam eruditi. Datur vni eorum à ductore signum, ille protinus, miserum proboscide quasi manu in aërem leuans, in sublimè proijcit, & cadentem acutissimis dentibus exceptum trafigit ac demum ægrè animam agentem pedibus proculcat, discerpitque miserum in modum. Eoque mortuo idem absque morâ de complice sceleris supplicium sumitur.



Terra Tunchinensis fructus præcipui.

CAPVT XII.



AMETSI nullæ hætenus fuerint in Tunchinensibus terris vites, nullum adhuc frumentum in eis seminatum, nullæ adhuc oliuæ; atque adeo careat prorsus hoc regnum tribus illis quibus stare maximè videtur vita frumento, vino, & oleo, atque non conueniat in eos illa psaltæ Regij benedictio à fructu frumenti, & vini, & olei multiplicati sunt. Alia tamen habent non pauca, non solùm ad necessitatem sed etiam ad delicias quibus hunc defectum abundè suppleant.

In primis autem plurima ibi est Oriza, ex quâ panem optimum conficiunt venditurque viliori pretio quam apud Cinas; eoquod bis quolibet anno seratur & metatur, mensibus nimirum Iulio & Nouembri distillatur etiam & liquatur in quendam humorem stomacho mirè vtilem, & gustatu in primis suauem. Nullum illi quidem ad iuscula & edulia oleum adhibent, sed eius loco habent pretiosissimos. quosdam passerum Nidos, quos inueniunt in rupibus præsertim maritimis reperitur intra eos liquor plurimus qui mixtus esculentis, incredibilem eis confert suauitatem. Neque putauerim eos vsquam terrarum inueniri nisi apud has gentes, à quibus externi mercatores præsertim Cinæ maximo pretio coëmunt. Hoc autem condimenti genus quod sit pretiosissimum non est in vsu, nisi apud primarios.

Vulgus

Vulgus ad obsonia humorem exprimit è quibusdam piscibus, qui eis instar aceti est, & olei, cibisque infusus non parum aspergit suauitatis. Appellant ipsi *Mam*, sine quo nemo etiam plebeius cibum vmquam sumit: Nunc vt veniam ad fructus proprios huius territorij. Primum quidem de ijs quæ cum Indiâ totâ, communia illi sunt nihil ponam, qualia sunt, indicæ Ficus, Pyra indica, Ananasia, Iaca Caramboba, Manga, & alia innumera quæ ab aliis scriptoribus sæpè sunt explicata. Præ cæteris autem excellere mihi visâ est mali aurei pulcherrima quædam species, omnibus aliis sine dubio præferenda quas ego in aliis terris me videre memini, ideoque fortassis coronam habent, non ad inanem solum speciem aut pompam, qualis est in malis punicis, sed dulcissimo & exquisitissimo succo plenam, prominet quippe in modum mammæ, fructumque magnopere exornat. Præter eam aliæ quoque multæ sunt maiorum aureorum species exquisitissimi saporis sed prior tamen illa longè inferioris, in ijs nihil est prorsus, quod rejici debeat præter externam quandam pelliculam aurei coloris, reliqua omnia, etiam internæ pelliculæ adeò sunt dulcia, vt putes vuas te gustare mellitissimas. Imò & aliud mali aurei genus est prægrande, è quo non tota detrahitur pellis quæ crassior est; sed modica tantum eius superficies, reliqua omnia sapidissima sunt, & malo nostro persico simillima nisi quod longè salubrius est; potest enim facillè quilibet ex ijs decem aut duodecim comedere, sine vllò dispendio. Abundantia verò tanta est vt vilissimo pretio vendantur: denique vt concludam de malis aureis, vltima eorum species longè pretiosior est & rarior. Sapor ijs.

E. apianis.

apianis nostris vuis simillimus moles magna, salubritas longè maxima vnde magni etiam vancunt, & locupletioribus tantum vſitata propter caritatem, & raritatem.

Aliud præterea mali genus est aurei coloris, sed figurâ, mole, teneritudine persico nostro haud absimile sapore sorbis bene maturis fere pari. Aduersus dissenteriae morbum præsentissima medicina est, non ipse solum fructus, sed cortex etiam, & folia ipsius arboris. Adhæc duo quoque sunt fructuum genera quorum cortex durior est, color candidus, figura quasi cæraſi, ex his liquor exprimitur vini suauissimi, qualè illud est quod Cinæ *Lechi* nominant.

Denique aliud genus est fructuum ficibus nostris simillimum, rubrum tamen postquam maturuit, tenerimum, & dulcissimum, sed perfrigidum: etiam quo tempore adhuc est viride iucundissimum gustatu. Plantauerant nostri Patres in horto domestico arborem vnam è nostratibus, ex qua ficus aliquas Rex Tunchinensis postquam degustauit, laudauit eam eximie, iussitque in hortum suum transferri. Sunt quidem in hac regione totâ innumeræ arundines, melle ac saccaro turgentes sed liquandi, & purificandi saccari artem homines isti non callent, est enim apud ipsos nigerrimum, sed cætera tamen optimum, & apud Iapones maximo in pretio.



Animantia quibus abundant terra Annamica.

C A P V T X I I I .

P O S T fructus recensitos, proximum est vt de animantibus quoque dicam. Abundat ergo Rēgio hæc tora equis generosissimis, atque ad equitandum aptissimis; boues quoque habet plurimos, ac pinguiissimos atque ad cibum maximè suaves. Suillæ carnis quotidianus vsus est; adhibeturque ad omnes mensas, quod secus quam apud nos existimetur valde salutaris. Adeo vt vix vllum etiam egentissimum inuenias; qui excepturus amicum conuiuio porcum non mactet. Bubali apud ipsos plures sunt & prægrandes, atque adeo robusti, vt ad sulcandam à ratro terram non soleat adhiberi nisi vnus: eorum caro in delicijs est. sed frequentior est vsus Bouinæ.

Elephantes maximos & fortissimos è vicino Laorum regno, magnis sumptibus comparant: Rex ipse semper trecentos alit, magis ad pompam quam ad aliud vllum commodum. Sed quoties tamen terrestre cum hostibus bellum gerit, omnium semper elephantorum agmen instruit, singulisque ductores fideissimos præficit cum maximis stipendijs ad istorum animalium pastum, quorum vni plus impenditur, quam ad alendos decem milites: sunt vero hi elephantes optimè docti ac sicures. Videas enim illos ludibundos discurrere per totam Regiam; neque vlli vnquam esse noxios imò vtilissimi sæpè sunt, in repentinis potissimum deflationibus.

grationibus quæ in vrbe Regiâ vbi domus lignæ sunt frequentissimè accidunt; tunc enim nè latius serpat malum, adhibentur elephantes, qui domos incendio vicinas continuò exturbent. Id quod etiam tantâ præstant celeritate; vt quam elephanti, domum ductor indicauerit, eius tectum videas elephantis proboscide apprehensum subito corruere, cunctâsque contignationes momento distractas penitus dissolui. Nunc de singulari eorum prudentiâ, & sagacitate plura scripserunt alij. Ego paucula hæc dicam, quæ sanè vidi, incedebat aliquando inspectante me supra pontem ligneum procerissimæ molis elephas; cumque vereretur tabulas haudquaquam tanto ponderi ferendo pares esse, explorabat, ac probabat singulas proboscide nùm satis firmæ esse viderentur, & siquidem, aliquas inuenisset nutantes aut minus solidas; tunc verò nullâ sui ductoris industriâ poterat adigi, vt progrediretur; sed diuertebat alio gressum, vbi tutiora essent omnia.

Alium quoque aliquando videbam in publicâ plateâ vinctum, quem puerorum turba importunè lacescebat, & lapidibus petebat. Sed ille vicissim lapides quibus erat percussus proboscide quasi manu arripiens, atque occultans, expectabat dum aliquis puerorum qui auferant, denuo rediret; simul enim temere aliquis prodierat, vibrabat elephas tanto impetu lapidē, vt graue infligeret vulnus nisi maturâ fugâ ictum præuerterent.

Abundat præterea Regio tota Rhinocerotibus (*Badu* Lusitani vocant) vnus ego recens occisi caput semel vidi, quod præualidi duo milites non nisi ægerrimè portabant. Erat autem haud dubiè duplò majus capite maximi elephantis. Carnis eius frustulum degustare aliquando

aliquando coactus ab amicis, tam suauem illam, & gratam expertus sum, vt nihil vnquam meminerim me degustasse dulcius, & palato iucundius; superabat enim profecto volucrum omnium carnes saporis suauitate. Dicitur nihil esse in eo toto animali, quod aduersus plures morbos præsentissimum non sit remedium. Carnes quippe, pelles ossa, suam habent salubritatem. Sed vnguium, dentium, cornuum præcipuæ quædam, & omnino eximiæ virtutes celebrantur.

Syluestres quoque quosdam feles, colore nigerri-
mos, mole admodum paruos maximi faciunt: censent-
que præstantissimum illud esse, ac dignum Rege mu-
nus, quoties venando eorum aliquem capi contigerit. Capras habent paucas, oues omnino nullas, sed neque
asinos quorum loco vrantur Bobus, aut etiam Bubalis
quoties onera grauiora fuerint quæ vero communiora
sunt ea plebeij tum viri tum fœminæ vestibus imposita
humeris deuchunt.

Volucrum omnis generis incredibilis copia est præfer-
tim gallinarū quas vilissimo vendunt pretio gallos au-
tem quosdam duplo nostris maiores præcipue habet in
delicijs, venduntque interdum decem aut etiam duo-
decim aureis, ex eis enim ludicrum quoddam certamen
instituunt, ad quod gladiolis eos obarniant, & ad om-
nem certandi disciplinam egregiè instruunt: Colum-
barum infinita quidem multitudine abundant. Sed
turturum tanti sunt globi vt quindecim ex eis, Iulio
vno nostro, vix vendi soleant.

Pisces præstantissimos, & quam plurimos alunt Maria
hæc & flumina, eos tam vili æstimat, vt sæpè videas piscē
librarum duodecim vix cōstare vno Iulio. Sunt enim in

his oris portus minimum quinquaginta, è quibus innumeri cum Scaphis, quotidie piscatores prodeunt: existimauerim ego diebus singulis exire ad piscandum è portubus illis Scaphas decies mille, nulla quippe ars in maritimis terris est frequentior quam piscatoria. Vnde communior etiam eis cibus est piscis cum Oriza.

Interrogauit me aliquando Rex quibusnam cibis Christiani vescerentur diebus illis quibus ieiunant. Vbi autem ex me audiuit, non interdici nobis esu piscium Ain? tu vero (inquit subridens) habebis igitur in hoc regno meo innumeros, quos ad ea ieiunia tua facile inducas. Celibem vero illam vitam tuam quam deprædicas, qui amplecti velit, arbitror sanè fore neminem. Ita ille, cui videlicet nota nequaquam erat fidei Christianorum gratiæque diuinæ vis eximia, quam deinceps in hoc regno experti quamplurimi, omnis ætatis viri ac mulieres, angelicæ puritatis æmuli, vitam duxere incontaminatam. Vidi ego, ex his catechistas centum qui solemnî sacramento se ad hanc cœlestem viuendi formulam deuouerint quorum etiam tres fuso propter Christum sanguine duplici virginitatis, & martyrij Laureâ insigniti sunt. Primus eorum in Cocincinâ, fuit Andreas. adolescens annorum nouendecim, Cui ego tam generosè morienti adfui die 26. Iulij anni 1644. eximiæ constantiæ adhortator & admirator.

* *
*

Tunchinensium.


*Tunchinensium mercimonia.*

CAPVT XIV.

Requentissima illa quidem sunt, sed ita tamen vt intra fines Annamicos omnes exercentur, ad exteras vero gentes nequaquam prodeant, cuius rei tres ego causas esse suspicabar. Prima est imperitia nauigandi, vix enim vnquam in altum mare audent vela facere, sed amica semper legunt littora. Altera quod onerariæ ipsorum naues, ad ingentes procellas ferendas non sunt idoneæ. Illarum quippe tabulæ non ferreis, sed vimineis solum compactæ sunt ligaturis, renouarique debent quot annis. Tertia demum quod Rex ne tributis illis priuetur quæ capitatim exigunt solent, seuerè mercatoribus prohibeat egressum ad oras peregrinas tametsi Rex ipse non raro in vicina Siam & Camboiæ regna, naues mittat onustas mercibus.

Sed intra eos nihilominus fines regni Annamici, quod vti (dixi) Tunchinum complectitur & Cocincinam, tam opportuna, & frequens est negotiatio, propter portuum multitudinem vt mercatores bis aut etiam ter in anno, summam capitalem pecuniæ duplicare absque periculo soleant. Cum enim ad octingenta circiter milliaria littus illud pateat, quinquaginta minimùm portus habet, vbi tutissimam naues stationem habent, adeo vt vix vnquam pernoctent in mari. Frequentissime tamen eo veniebant olim mercatores Iapones,

pones, & Cinæ vt lignum Aloës pretiosissimum, sericumque optimum inde asportarent, nunc autem frequentissimè huc Cinæ veniunt, ex Prouincia præsertim Cinceo, suisque mercibus implent hæc littora præsertim verò auehunt vasa illa quas vulgo Porcellanas dicimus, deinde telas etiam varij coloris. At Iapones cum multis veniebant pecuniis, ensesque afferebant, & lanceas armaque varia vicissimque sericum coëmebant à Tunchinensibus, imò & postquam cruenta illa in Christianos sæuire cœpit persecutio anno huius sæculi decimoquarto, veniebant tamen in Cocincinam Christiani plurimi, vt à Patribus nostris ibi tum agentibus, sacramenta susciperent tempore præsertim quadragesimæ. Id quod Iaponum Rex subodoratus capitali propositâ pœna edixit nè, quis è Iaponiâ nauigaret ad gentes exterar. Imò, & nè vllus sacerdos iam initiatus clam cum aliis surreperet. Interdixit reditu in patriam ijs omnibus qui tunc extra Iaponiæ fines agerent. Ideoque annis iam viginti quinque Iaponico auro carent Annamici, & majori etiam cum dolore Iapones sacramentis priuantur, & Christianis alijs subsidijs quibus iuuebantur in Cocincina.



Tunchinenses Monetæ.

C A P V T X V.

CVDVNTVR ex ære monetæ omnes, tum apud Tunchinenses, tum apud Cinas aurum enim & argentum adhibent illi quidem ad maiora, & grauiora mercimonia sed ea ramen nunquam signant, neque.

neque constant in monetam. Frustra duntaxat quædam metalli vtriusque, fusili arte præparata in usu habent, & argentea quidem crassiora sunt, æstimanturque nummis decem. Aurea certam magnitudinem nullam habent, sed pro cuiusque arbitrio, alias majora sunt, alias minora. In mercatura quoties argentum offertur venditori, ante omnia mos est probare illud ad cotem, deinde ad libram ponderare: factaque dein conuentione paciscuntur quot serici pondera pro æquali argenti pondere, dari iustum sit, quindecim, verbi gratia, vel viginti pro vno. Tum quâ libræ lancè merces ponderantur, eadem, argentum appenditur, sed æquato iuxta factam pactionem pretio. Quod si de argenti fide dubitent, in minutissima frustra illud fas est comminuere, ut ne vllus fraudi locus sit.

Monetæ vero signatæ, quædam apud ipsos maiores dicuntur, aliæ minores. Et maiores quidem certum æraturum toto regno valorem habent. Solentque à Cinis præsertim mercatoribus asportari, alias autem etiam à Iaponicis. Minorum, extra Regiam & adiacentes quatuor Prouincias nullus usus aut valor est, vnde videntur non fuisse usurpatæ, nisi à temporibus, cum tyrannus ille antea memoratus Regiam inuasit cum quatuor Prouinciis.

Earum omnium tum maiorum, tum minorum, figura semper est orbicularis politæ sunt, & quatuor signatæ characteribus, vnâ solum ex parte. In medio foramen habent, quo immitti solet funiculus; adhibita certâ quâdam distinctionis notâ, in singulas sexaginta. Donec decies ad sexaginta id est sexentas peruenia-

E tur.

tur: totidem enim funiculo illo vnico colligantur: vt sic facilius quilibet brachio, aut humeris deferre possit, habeatque paratas semper, pecunias ad ea quæ vel in foro emere, nullus enim apud eos est crumenarum vsus quarum vices suppleant huiusmodi funiculi, quos ipsi, *Thien*, Lusitani *Caicas* appellant. Denique harum Monetarum pretium constans non est neque semper idem, sed pro argenteæ pecuniæ copiâ, vel penuriâ crescit aut minuitur. Vidi ego paucis ab hinc annis cum in Tunchini Regiâ versarer; dari pro aureo vno, maiores Monetas centum supra mille: æquivalent porro minoribus quinque tres maiores solebamque comparare maiores Monetas Iuliis Romanis, minores autem superant aliquanto Romanos quatrinos.



Tunchinenses superstitiones, & prior earum secta.

·CAPVT XVI.



ALSA religiones sicuti Cinarum, sic & Tunchinensium, tres in sectas sunt distributæ, quas vocant ipsi *tam lau*, singulæ verò innumeris superstitionibus incredibiliter plenæ sunt; quibus imbutæ gentes illæ, licet alioqui dociles, & ingenuæ, viuebant in tenebris, & vmbra mortis. Donec oborta eis ante paucos annos Euangelicæ veritatis lux caliginem discussit, & in dies propagata magis, plurimos quotidie Christo parit, & filios lucis efficit. Ibitque (vti benè ominamur) vsque ad perfectam diem fauente iustitiæ sole Christo.

Prima

Prima igitur inter eos secta *Dau nhu* dicta authorem habuit, nobilissimum illum Confusium. Quem Cinæ omnes magistrum ingenij ac doctrinæ celebrant, feruntque illum vixisse annis ante Christum trecentis: eodem scilicet quo florebat inter Græcos Aristoteles, illum Tunchinenses omnes, & Cinæ passim sanctum vocitant. Sed immeritò sanè, vt ego in frequentissima coronâ semel manifesto quodam dilemmate demonstrabam. Vester (inquebam) Confusius supremum cœli terræque opificem, ac Dominum vel (vt decet) agnouit vel ignorauit si eum nesciuit qui sanctitatis totius fons est ac principium. Sanctus sanè non fuit, cum tota rationabilis creaturæ sanctitas aliud non sit, quam numinis illius supremi notitia & amor. Si autem cognitione illâ imbutus fuit quæso à vobis, nunquid? eandem etiam, ijs quos ad virtutem erudiebat, tradere debuerit, cum illa primum rectæ vitæ fundamentum sit. Cum autem ex omnibus eius libris constet id eum plane omisisse, & de primario illo principio vitæ & intellectu prædito verbum nullum fecisse quis? cum sancti nomine non indignum iudicet: audiebant me ita dicentem plurimî è sectatoribus Confusij, Christianis de more in ecclesia permixti, quorum vnus cōfestim ciurato Confusio, Christi lucem sequutus, & baptismo lustratus desiit amare tenebras. Reliqui tunc quidem rebelles lumini, maluerunt filij esse confusionis; & Confusij.

Sed in eius tamen impostoris libris, fateor esse sanè plurima, rectæ rationi valde consona, & ad mores optimos vtilissima: docet videlicet primum hominis munus esse, vt se ipsum ante omnia corripiat, cum

seipsum penitus introspexerit & curauerit. Tùm verò secundas illi esse debere curas, familiae totius rectam gubernationem, & institutionem: eo altero munere postquam perfunctus ritè fuerit, tum demum accedere illum tuto posse ad rempublicam regendam. Eiusdem generis plura sunt alia quæ partim ad priuatam morum disciplinam spectant, partim ad causarum forensium doctrinam, à quibus iudices Tunchinenses nè digitum quidem discedunt. Sed neque Christianis nostris interdendum putauimus omni usu, aut lectione librorum huius Confusij. Habēt multa de moribus hominum politicâque gubernatione nostris institutis valde affinia; quibus Christiana dogmata non parum confirmantur. Ait videlicet suum cuique tribuendum. Aliâque huiusmodi non pauca.

Verum ubi de supremo rerum Domino aliquid tanquam in caligine dicere aggreditur; incredibiliter profecto delirat. Facit videlicet illum corporeum sine intellectu & vitâ; vnde nec vllum eī cultum aut religionem decernit sed cœlestibus solum corporibus, quorum principium fatetur esse numen illud inanime. Imò neque ipsi cœlo religiosam deberi venerationem, sed eam omnem Regi deferendam esse constituit, quem etiam solum cōspectu cœlorum dignum esse fatuē garrit. Nec enim posse quenquam pro dignitate cœlestia illa spectacula mirari, & erectos ad sidera tollere vultus quo nihil dici potest insulsius. Caterum si attentius tota illius doctrina expendatur, nihil in ea prorsus reperias de vitâ aternâ, & animorum immortalitate. Totum quippe hominem corpus esse reputat, nullam in eâ partem expertem esse materiæ. Sed eam omnem
interueniente

interueniente morte ita dissolui, vt subtiliores partes sursum ferantur, crassiores suo pte pondere deprimantur deorsum: vt videas eam omnem sectam in turpissimum vergere Atheismum, atque inde asceclas eius omnes in omnia vitia ruere præcipites, solâ virtutum externâ specie contentos.

Tantæ verò authoritatis ac venerationis apud vniuersam hanc gentem fuit hætenus, hic concinnator mendaciorum, vt diuinus passim habeatur ac diuinis etiam honoribus dignus: eius cultum lactentes etiam pueri docentur: atque omnes ad eam obseruantiam à prima ætate imbuuntur: quippe quoties ad ludimagistros deducuntur pueruli ad prima Cinicarum litterarum rudimenta instituendi, nihil prius habet ludimagister quàm vt in ipso ingressu gymnasijsi alumno suo demonstraret, quibus honoribus prosequi deceat Cõfusum procedit nimirum ipse supplex in genua, docetque presertim quemadmodum ab eo facile ingenium ad Cinicas litteras rectè addiscendas omnes deposcant. Hoc autem ingenij acumen *Sangda* ipsi appellitant idest ventrem scientiæ, quod scientiarum omnium sedem stultissimè putent esse aqualiculum. Tolerabilius sanè etiam in eo errantes, quam in eo quod reputent, posse ab homine impio ac demortuo, viuam ac perspicuam ingenij vim obtineri.

Sed neque Doctores aut litterati agere videntur cordatius. Qui quoties ad examina illa solita procedunt, nihil habent antiquius, quam vt ad Confusum istum supplices recurrant. Cumque res successit pro votis, eo ipso tempore quo examinerum suffragijs se vident approbatos, procidunt illico in genua coram

illustri arâ quæ medio in illo conclauis erecta est ipsi Confusio. Atque ita quidem ethnici, Christiani verò longè consultius, vni Domino Christo Iesu, vnico veritatis & lucis dispensatori se ipsos ac sua semper omnia committentes, & studia, & consilia, exposcunt ab eo in addiscendis litteris ingenijaciem, & de prospero euentu gratias agentes, coram sacrâ eiusdem Saluatoris imagine ter in faciem venerabundi semper procumbunt.



Altera Tunchinensium superstitionum secta.

CAPVT XVII.

POSTERIOR horum populorum superstitione *dau shu* ab ipsis vocata, dicitur inuecta, & inuenta primum fuisse à quodam Regis Indiarum filio, quem dixere Iapones, *Xacam*, Cinæ *Xechiam* Tunchinenses nomine corrupto *Thiccam*. Viuebat is (vt Annales ipsorum ferunt) antè Christi natalem annis ferè millè, æqualis sine dubio, æuo Salomonis. Patrem illi *Thimpfam*, matrem *Mada Phugin* fuisse putant. Is enim inquit Thicca septendecim natus annos, Adudalam quandam alterius Regis Indiarum filiam, vxorem habuit vixitque cùm eâ annis duobus, quibus filiam vnicam suscepit nomine *haulam* caruitque deinceps liberis. Erat autem nequissimus, & in omnia scelera proiectus, vnde facilis ei statim lapsus fuit ad artes magicas, quibus cupidissimè adhæsit. Adhoc autem duo ipsi semper aderant spiritus nequam

nequam cum quibus ageret familiariter, & tanquam Magistros audiret. Atque ut eam pestilentem doctrinam hauriret facilius, secessit inscio patre ac vxore in remotissimam solitudinem, in quâ se totum nequissimis illis dæmonum præceptis tradidit imbuendum. Ibiq; commoratus annis quinque atque ad omnem impietatem egregiè eruditus, redijt ad suos, quos ad idem statim nequitix baratrum pertrahere conatus est.

At illi quibus naturale rationis lumen clarissimè ostenderat esse necessariò aliquem humanarum rerum gubernatorem, & totius opificem mundi Deum, qui vitiis supplicia reponat, virtutes autem in alterâ vitâ coronet, cum neutrum in hac quam ducimus vita præstet. Corruerunt scilicèt ad tam impiæ sectæ turpitudinem, neque vllus toto regno tam perditus inuentus est: ut se illi vellet adiungere. Id quod iniquissimè ferens Thicca, consultis illico dæmonibus magistris suis charissimis, ad alias conuersus est artes, mendaciorum egregius opifex, statim enim fabulosis quibusdam commentis, & confictis narratiunculis, & in speciem non iniucundis occultare probra doctrinæ suæ. Hinc enim Idolorum totam genealogiam, & potestatem, incautissimis animis instillans, annis quadraginta propinauit venenum, totamque Indiam dementauit, duplici, vsus præsidio ad incautiores decipiendos, & Magicæ artis, & Regiæ potestatis.

Fingebat videlicèt, ac palam profitebatur affirmare se omnino alterius vitæ præmia, & pœnas, ut sic facilius totam induceret idololatriæ improbitatem, quod & annis illis quadraginta pro votis assequutus est. Verum quia perniciosior humano generi atheismus dæmoni

moni videbatur, quàm Deorum etiam falſorum cultus, quod omni prorsus abiectò Deo, procliuor ad omnia facinora lapsus sit, eo impulsore miser Thicca mortiam proximus recantare omnia cœpit quæ de idolis dogmata tradiderat. Non ille quidem publicè coram omnibus quos priùs dementauerat. Sed ijs dūtaxat quos propter nequitiam nouerat fidiſſimos esse posse consilio- rum suorum dispensatores. Illis nimirum palam edixit totam illam Idolorum Neniā quam simplicioribus solum animis toto illo quadraginta annorum decursu, prædicasset referendam omninè esse ad quinque hominis sensus, & singula eius membra facilius explicanda, & ad plebeculæ captum accommodatius. Cæterum vanissimam rem esse totam Idolorum turbam, nullos prorsus timendos aut colendos homini esse deos, quorum inane nomen, ingeniose à sapientioribus adinuentum esset, ad populorum terrorem, vetularum somnia hæc esse, & vana planè delyria quibus in vocibus sceleratam animam impius euomuit, atque ad inferos detrusus duplicem etiam ipse viam Indiæ toti ad idem præcipitium aperuit. Alteram rudi populo qui fabularum inani specie captus innumera idola veneratur. Alterum longè peiorem illis ipsis populi magistris, qui palam simplicioribus animis aniles has fabellas & Idola deprædicantes, & coram etiam venerantes, interius ea omnia ipsi ridet, vitamque omnem futuram pernegant. Sed eo tamen fūco falsæ pietatis plebeculam emungunt, & plurimam ex ea pecuniam corradunt.

At enim quonam? inquires pacto, lues hæc ab Indijs Tunchinum vsque serpere potuit. Dignissima sanè scitu- res, & diuinæ prouidentie decretis consona. Vixerant absque

absque Idolis vllis, vsque ad Christi Domini tempora Cinæ omnes, atque adeo Tunchinenses qui vnico tunc Regi suberant. Sed innumeris tamen turpissimorum errorum laqueis implicati. Quorum, sicut & gentium cæterarum omnium, miseratus benignissimus Dominus, eodem ipso tempore quo vera lux Christus terris illuxit, sicuti ab Oriente tres magos nouæ ad se stellæ aspectu aduocauit, & in Occidente Cæsari Augusto sole toto amiæctus apparuit in sinu Virginis matris. Sic etiam Cinarum Regi *han min thi* visus est humanâ major specie vir (vt ferunt Annales illorum temporum à Cinis ipsis conscripti) & præcepit, vt è magni Occidentis partibus legem exquireret, vbi recens orta esset è cælo lux in totius orbis salutem. Eo spectaculo Rex territus magnates illico conuocat, exponit nocturna visa deque ipsorum consilio, solemnem ad Occidentis plagas legationem decernit, legatoque mandat, vt in longinquas has terras impigrè properet; atque ibi veræ illius ac nouæ legis præcepta sedulo exquirat, ac postmodum in patriam exportet.

Paruit Regi legatus, magnóque comitatu terrestre iter occidentem versus instituit (nondum enim nauigandi artem callebant.) Et principio quidem nauiter, & egregiè, sed postea molestâ longitudine viæ perterritus, & occurrentium difficultatum labore defatigatus concidere cæpit animo & cogitare de reditu ad suos. Cum enim post octo circiter mensium iter in Indias tandem peruenisset, minimamque adhuc imperatæ sibi viæ partem confecisset, in terras vltiores progredi plane renuit. Aperuitque statim Indis illis causam tantæ peregrinationis, exquirens ab ijs, num aliquam ipsi

G haberent

haberent legem, quam Cinarum Regi nouarum huiusmodi rerum cupido deferret. Molestum sibi videlicet esse ac intolerabile, tot adhuc terras, quæ usque ad occidentem ultimum supererant peragraræ. Immensa breuissimo compendio vitari posse pericula si ex Indijs peteretur potius optata illa lex, quam ex ultimi, & ignotissimi orbis oris. Nimirum pudendo improbissimi legati crimine, maxima quædam & saluberrima interuersa res est. Nam ecce tibi exiit statim gaudio tota gens brachmanum & opportunam venditandi nugæ suas facultatem nacta, inertem illum legatulum totâ illâ suâ impietate dementare incipit. Aperiantur illi omnia videlicet Thicæ quem ipsi Buddam hoc est sapientem appellant mysteria. Traditur liber in quo conscriptæ habebantur omnes illæ fabulæ, commendaturque vehementer tanquam pretiosissimum totius sapientiæ myrothecium.


Nihil fuit facilius quam amantem orij non veritatis decipere legatum, cum enim nihil nisi patriam & domesticos cogitaret hanc omnem mendaciorum farraginem avidus arripuit. Ac statim remeans ad Cinæ, venit ad Regem nouæ illius legis sitientissimum, propinatque craterem aureum sed toto illo veneno plenum. Fingit videlicet egregius mentiendi artifex se multis tandem terris peragratis, atque imensis Oceani tractibus superatis, venisse ab ultimis Occidentis oris; ibique reperisse auream illam, & Deo dignam legem, quam exquirere iussus esset. Credidit subito Rex parum prudens famulo nequissimo, & nullâ inquisitione præmissâ, pestiferum virus hausit quod offerebatur; ac suis etiam populis omnibus bibendum tradidit. Hinc
iam

Iam erigere Idolis vbique templa, cultum eorum latè propagare, sequutum est sine mora exemplum Regis imperitum vulgus, & ad hæc etiam tempora miserè seruauit. Sed litterati nihilominus & Doctores Idola omnia vt dixi derident, eorumque templa rarò adeunt in quibus tamen, morituri plurima dona offerunt & ex testamenti etiam tabulis plura legant, ad vanam scilicet gloriæ captandam auram, & præsertim propter pompam funeris; quam cupidissimè curant.



*Varij Tunchinensium ritus, circa cultum
Idolorum.*

CAPVT XVIII.

 PTABILE sanè fuerat vt quo tempore Tunchinenses Cinarum Imperium excusserunt, defecissent etiam ab erroribus; sed religionum etiam falsarum opinio vbi semel imbuat animos; accedente præsertim diuturnitate temporis, infixæ omninò hæret, neque vlla nisi diuina vi, extirpari radicitus potest. Ideoque hi populi etiam abjecto Cinarum iugo, sicuti priorem illam Confusij prauitatem retinere mordicus, sic & inolitam Idolorum venerationem non tantum retinuerunt sed multis etiam superstitionum accessionibus cumularunt. Quippè templis sic abundant vt nullus etiam vilissimus pagus sine aliquo huiusmodi templo sit. Sed illa tamen plerunque neque ampla sunt neque multis aucta donarijs. Nam ad omnem projecti auaritiæ sacrificuli, conuertunt in suos

vsus, sibique ac vxoribus suis vindicant quæcunque Idolis offerri solent.

Verùm neque illæ Idolorum & templorum sordes, miseros homines absterrent à superstizioso eorum cultu. Bis enim semper mensibus singulis, noua videlicet & plenâ luna, luridas illas templorum exedras religiosè adeunt, puluerulentâque simulacra tam piè colunt, vt nemo sit etiam egētissimus qui non eis supplex offerat aliquod donarium. Simulque illud coram Idolo statuit prono in terram capite, & si quidem solus sit precationem orditur à nomine suo, deinde patriam in qua natus est declarat. Nimirum Idolis suis, vsque eo diffidunt, vt putent ignorari ab eis nomina & patriam cultorum suorum.

Sin autem plures simul conueniant ad orandum. Tunc precationem omnium nomine init altâ voce, is qui habetur cæteris honoratior, tacentibus interim & orationem approbantibus reliquis omnibus. Tùm vero colligunt sacrificuli quæcunque fuerint oblata, & collecta recondunt pro libito. Imò & templis quibusdam celebrioribus, certa quædam assignata sunt prædia, quorum iidem (vt vocant) *Sai* fruuntur redditibus. Sed eorum tamen huiusmodi hominum simul degentium conuentus ac coëtus, nullos vnquam inueni apud Annamicos. Viuunt enim frè singuli seorsim cum ingenti vxorum, liberorum, ac famulorum cateruâ, quos omnes ad eandem erudiunt impietatem, atque illos præfertim qui falsâ quâdam religionis specie ducti se totos Idolis deuouent. Filius in patris demortui locum vix vnquam succedit, prouehitur enim ad aliquid sublimi, assumitur autem vnus aliquis è famulis, qui omnium

nium optimus iudicatus fuerit, deligiturque de iudicio sacerdotis primarij quem vocant *Saica*. Solent etiam ad honestanda potentiorum hominum funera, vocari huiusmodi homines, qui longas pro mortuis deprecationes balbutiant, erigunt enim magno apparatu grandia in medijs compitis altaria, coeuntque circa illa plurimi, ac tota nocte inconditas quasdam cantilenas ignoti nescio, cuius idiomatis alternatim vociferantur.



Tertia Tunchinensium superstitionum secta.

C A P V T XIX.



Ecce est omniū pessima & sceleratissima quæ dæmoni prorsus deuota, tota est in actibus magicis exercendis. Primus eius institutor, & author perhibetur fuisse, insignis quidam veneficus, *Lauzu* ipsi dicunt. Tantæ apud miseram hanc gentem authoritatis, vt sectæ ipsius adhærere innumeri solcant etiam primates atque ipse Rex qui nefarias istas artes palam profitetur.

Ac tametsi medicis periussumis abundant, ad ægros tamen curandos, præsertim si nobiles fuerint, vix vnquam eorum operâ vtuntur. Simul enim aliquis in morbum incidit, recurrit illico ad veneficos, qui suis cum sortilegiis dementant, mittitur videlicet aliquis è famulis in forum, aut etiam ægrotus ipse deferitur, ibique veneficus consulitur (prostant enim semper plurimi eorum greges ad mentiendum egregiè parati) quæriturque

riturque ab eo primùm quis morbi huius author, & causa fuerit. Inualuitque apud istos populos, stultissima hæc opinio, nullum cuiquam euenire posse malum, quod curatum non fuerit ab aliquo ex progenitoribus, aut auis demortuis cui debiti honores delati non fuerint. Rogatus in eum modum veneficus, paratas ad id officium monetas quasdam in altum iacit; quasi ductâ sorte cogniturus originem mali; quam asseuerantissimè statim pronunciat referendam esse ad aliquem ex arauis. Creditur autem sine morâ stulto nugatori, & pro mendacio merces etiam rependitur.

Neque hic finis, euocatur subindè aliquis è majoribus veneficis, duciturque in domum ægrotantis, vt ei, quem alter impostor authorem mali nominauit, sacrificia offerat, & munera. Eius iussu apparatur defuncto lautissimum conuiuium ex ijs dapibus, quæ ipsi ægroto acceptissimæ fore iudicantur: idest quas ille ipse parafitus expetat sibi ac suis: interim autem erigit altare, fortisque mittit vt de morbi exitu cognoscat. Porro sortis genus quod iacitur est istud. Occiditur pullus gallinaceus, cuius præscinduntur pedes, mittunturque in feruentem aquam, obseruatur vero attentissimè qualem situm vngulæ pedum interim habeant. Nam ex eo vno, certissima de morte aut valetudine ipsius decumbentis coniectura ducitur, & si quidem ex eo auspicio fortunatum aliquid veneficus polliceri velit, toto vultu ac corpore hilaritatem insolitam præfert. Sin tristitia portendar, mœstitiam etiam fingit in fronte atque interea de apparato conuiuiio securus, ad placandos demortui cuiuspiam manes festinat. Sub initium quippe noctis, incondito quodam campanulæ sonitu, cum
euocat

euocat ad epulas indeque oratione ad dæmonem conuersâ quem etiam Regem suum appellitat, opem exposcit aduersus morbi primum incentorem, quod si morbum ingrauescere perspiciat, furere incipit miserabilem in modum, dirasque in fictum illum ægritudinis authorem sæpius euomere: millies eadem repetens, & perpetuo illo campanulæ sonitu miserum ægrum diuexans. Ac postmodum omnia hæc edulia, quorum nidore defunctum abundè saturatum fuisse simulat, arripit ipse, traditque asportanda domum ad uxorem & filios, cum quibus epulatur sanè laurius, postquam miseros illos manes sic impunè ludit.

Sed neque hic modus ponitur præstigiis, sequenti die præcipit compingi cymbam quandam ex arundinibus, & papyro, in quam descensuros fingit iam placatos defuncti manes. Deportaturque postmodum à domesticis omnibus ægroti ad viciniore fluminis alueum, in quo & demergitur, vt cum ea noxij simul manes aquis hauriantur. Atque vt nè iterum redire præsumant, euocantur militum aliquot manipuli, qui crebro bombardarum fragore territos procul arceant. Quibus omnibus peractis, si meliùs habere cæperit ægrotus tùm vero exultare atque omnibus incedere lætitiis impostor sibi ac suis artibus mirificè gratulari. Si perseueret aut etiam ingrauescat ægritudo, noui subinde accersuntur venefici, qui pluribus etiam mendaciis, malè credulos homines deludant.

Non omittam hoc loco, quod non ita pridem filio Regis contigit, adultâ iam ætate viro, quem etiam in partem curarum suarum, regnique administrationem pater iam vocauerat. Is cum lethali morbo correptus esset;

esset; venefici ad eum curandum, omnes artes suas consumpserunt. Sed inutiles planè operâ; cum enim superante vi morbi ad extrema deductus esset, suaserunt histriones isti, ægroto Principi, ut Regiâ desertâ in ædes migraret alienas; aliamque interim vilem quampiam personam in Regio suo lecto collocet. Superuenturam scilicet mortem, nec inuento principe, quem vnum quæsierat, in alium illum protinùs raturam. Paruit prauis consultoribus cupidissimus vitæ princeps, alienam in domum delatus est. Sed mortis ictum nec fefellit, nec declinavit, non minus ei notus in alieno lecto, quam in suo.

Aliud est præterea delirium, in quod ingruente sæpe morte incidunt isti homines, vbi enim conspicitur quispiam animam agere, ingentem subito equorum numerum apparant, quibus mox ut egressa fuerit de corpore anima commodissimè vehi possit. Imò & morientis nomen magnis omnes adstantes clamoribus sæpius ingeminant. Rati se his vocibus posse amici hominis spiritum fugientem in corpus reuocare, vel per devia errantem reducere.

Ad extremum quod de illo auspiciorum genere nuper commemorabam, vbi de futuro euentu morbi, ex pulli gallinacei vnguibus certum omen sumi solet, ad alia etiam omnia negotia extenditur. Si enim suscipiendum est iter si vxor ducenda; si gerendum bellum, nihil habetur antiquius quam ut ex pulli vngula ducatur solemne augurium: nam quoties ritè illa posita videtur, alacres & securi de prospero euentu opus aggre-diuntur quod erant meditati. Si vero perperam illa sita fuerit mutant subito consilia, neque vlla vi possunt adigi,

adigi, vt suscepti negotia perficiant, estque id ipsis sapè perincommodum, sed inualuit supersticio quam ego Tunchinensium maximè propriam esse suspicor; quod in omnibus Orientis terris quas peragraui sanè plurimas nihil vnquam simile perspexerim. Aderant aliquando in portu non admodum tuto viginti ethnicorum naues expeditæ ad nauigandum, quæ antequam soluerent è portu, ad solita vectores recurrunt auguria; & gallinacei pedem consulunt, cumque sinistra putatur portendere, demittunt ex templo vela; iaciunt anchoras, negant cogitandum esse de discessu. Quam ego fabulam cum è meâ cymbâ tacitus riderem, cœlumque viderem serenum, & ferentes auras, nauarcho instare cæpi, maturaret discessum, explicaret vela, & fauenti cœlo, plus tribueret, quam vngulæ gallinacei. Paruit ille licet ethnicus piè consulenti, iam enim meliora voluebat animo. Soluimus è portu freudentibus nequicquam aliis omnibus, prosperoque cursu eodem die ad destinatam stationem appulimus. Postridiè vero tanta subito tempestas læuire cœpit, tenuitque totos deinceps viginti dies, vt eo toto tempore subsistendum fuerit nauibus illis in portu non sine risu

Christianorum, & pudore infidelium.

qui has etiam nugas inuiti
damnare cogebantur.

* *
*



Multiplex Tunchinensium veneficorum circa defunctos superstitio.

CAPVT XX.



Olerabilior sanè foret populorum istorum fatuitas, si postquam amicos aut parentes suos extinctos viderunt in manibus horum circulatorum, agnoscerent saltem eorundem artes, & ludibria. Atenim post suorum mortem augent etiam dementiam, quippè tunc maximè, huiusmodi nugatores aduocant, quod eorum artibus putent reuocari posse animas eorum quos lugent. Ad quod etiam simulandum egregiè docti sunt hi venefici. Pythonissas enim habent quarum vna statim ab obitu defuncti in ipsius domum accersitur eum venefico, ab ijs audiente ac circumstante familiâ vniuersâ demortui exorantur manes, vt afflictos agnoscere ac solari ne dedignentur. Ad has voces sapissimè adest euocatus dæmon, corpusque subit pythonissæ. Illa statim bacchari, agitari, frontem, oculos, vultum monstrosè torquere multiplicique colorum varietate deformare. Tum malus dæmon vocem ac gestus defuncti planè imitatus, vt miseros spectatores, irretitos vanissimâ istâ specie teneat euocat proprio nomine vnum aliquem è familiâ, ignotum pythonissæ, ac cum eo sermonem habet de secreto quopiam, & aliis prorsus ignoto negotio. Stupere hic omnes ad tam horrendum spectaculum, & defuncti amici hanc esse animam nihil dubitantes,

dubitantes, lacrymabundi, cum venerantur, eius nomen repetunt iterum & sæpius, amice multa interrogant. Ad quæ dæmon respondet quidem, sed obscurissimè, ac amphibologicè, ut plurimis eos dubitationibus multipliciter discruciet. Vnum autem est quod in gratiam ganconis venefici clarissimè ac sine verborum ambagibus, temper denunciat quænam videlicet sint dapes, ac bellaria quibus vesci expetat defunctus. Afferuntur illæ sine mora. Sicque miseri putant se maximè amico gratificari.

Quia vero sæpius etiam euenit, ut dæmon euocatus aduenire renuat, & subire pythonissam, illa nihilominus ad mentiendam probè instituta simulare non omittit gestus omnes nequissimi spiritus, & defunctum imitari neque tamen fraus ab adstantibus dignoscitur, creduntque nihilominus apertissimis mendacijs, & cum iisdem honoribus, easdem etiam Lurconibus illis exhibent epulas.

Aliud præterea incantationum genus est istis solemne pythonissis. Formam enim ac speciem ipsam defuncti exhibent in speculo, fallente sensus ipso dæmone ac imitante vocem & figuram omnem defuncti. Peragebatur aliquando huiusmodi cæremonia in domo ducis cuiusdam primarij, & in conspectu militum duorum Christianorum dæmon euocabatur. Quod illi scelus execrati, convertunt taciti animos ad verum Deum, precanturque ut possunt enixissimè, ut ne patiatur toties deludi miseros homines à spiritu nequitiae. Deinde comminantur etiam dæmoni, & objectâ cruce quam in manicis secretò gestabant prohibent accedere. Toram noctem tenuit hæc lucta perseverante, ac suis præstigijs

H 2 insistente


insistente pythonissa, Christianis ab oratione non desistentibus: sed vicere isti tandem, abscessere dæmones, desuit phanatica venditare malas artes, superante amorum malitiam humili ac fideli duorum militum prece.

Alteri quoque Christiano non ita multo post similis de incantatoribus atque dæmone victoria obtigit, Exercebat in publico quodam foro huiusmodi nequitiam insignis præstigiator; eratque in procinctu, ut statuatam quandam ex arundinibus, & stipulis confectam iuberet incedere. Ita enim sæpissimè solent facere ludiones impij, subeunte iniquo dæmone inane simulacrum, & saxa etiam ingentia mouente, non sine maxima imperitæ plebis admiratione, ingemuit ad hanc impietatem Christianus adolescens qui hæc spectabat, & scilicet suorum miseratus dementiam obfirmavit animum ut Dei auxilio fretus, nefario dæmoni se opposeretur. Habebat nimirum sub veste occultam sanctissimæ crucis imaginem ad quam animum piè aduertens, cœpit nefarium dæmonem secretis exorcismis impetere, atque illi sacrum saluatoris in cruce suffixi nomen obijcere, meminisset se ab eo victum, & inferno clausum. Contineret se præscriptis ab eo septis, ac tandem desisteret insontem turbam suis technis decipere.

Coactus tandem est improbus dæmon Matthæi votis & precibus cedere, dum interim discruciarer se omnem in modum turpissimus veneficus quem dum adstantes omnes meritò derident preces ingeminat, procidit supplex ad aram, mox erectus adorare incipit, tentatque omnia ut spiritum malum ad se vocet: sed frustra incantationes, licet in multam noctem extra-

ctæ.

Æt. Dæmoni enim tandem suo vehementiùs iratus, altare diruit, artem suam execratur, eiusque authorem à quo se misere desertum esse ingemiscit. Contra vero lætus tam prospero successu Matthæus conuolat ad patres nostros, eisque rem totam aperit, illi audito miraculo incredibiliter exultantes laudauere Deum & adulescentem bene animatum serio monere cœperunt, vt diuinum beneficium tacitus agnosceret. Caueretque illud euulgare, ne fortassis ethnici captatâ inde occasione aduersus Christianos grauius aliquid mouerent.



De funeribus & sepulchris Tunchinensium.

C A P V T XXI.



IX vllam orbe toto arbitror esse gentem quæ pluribus officiis prosequatur tum corpora, tum animas, defunctorum quam populi Annamici. Circa funera enim corporum tria religiosissimè obseruant primum quod Sarcophagum singuli suis comparant vt possunt magnificentissimum, & ditiores quidem plurimo nitentem auro, & variis picturis eximie ornatum. Alterum est funebri pompæ solemnis apparatus, ad quam cohonestandam, non cognati solùm, & affines conueniunt sed eius etiam pagi omnes incolæ cum magistratibus frequentes coeunt quoties intelligunt celebranda esse funera cuiuspiam Cuius sui. Quoties autem nobilis aliquis fato functus est, præsertim vero si Dux militiæ fuerit, aut gubernator. Tunc vero confluunt innumeri ex adiacentibus

H 3 vndique

vndique pagis, & militares quoque turmæ quibus præfuit dum viueret, omnes cum armis, & militiæ insignibus.

In omni autem huiusmodi pompâ præaltum semper & holosericum labarum præfertur, in quo grandioribus, aureisque litteris inscriptum est nomen defuncti deinde res omnes ab eo præclare gestæ, tituli-que omnes honorum ac magistratuum quos gessit, omnia paucissimis comprehensa verbis in modum epitaphij. Eius porrò altitudo labari esse solet palmorum minimum quinquaginta; cui ferendo quatuor homines robustissimi vix solent esse pares. Feretrum præcedunt, defuncti liberi & vxor, lugubri omnes ornatu, flebilique voce ac eiulatu laudes defuncti, & accepta beneficia commemorant. Interdum vero ad libitinam ipsam conuersi, sub pedibus deferentium concidunt, præbentque se illis conculcandos. Hoc ordine proceditur ad sepulchri locum, qui pluribus sæpè distat miliaribus. Præsertim in Regia vrbe, intra cuius muros nemo terræ conditur.

Tertium enim in quo profusissimi, & accurratissimi esse solēt Tunchinenses est delectus ipsius tumuli. Persuasum quippè hoc in primis habent, eâ vnâ re vniuersam familiæ totius contineri felicitatem, honorum, opum, omniumque bonorum copiam ac firmitatem. Quo fit vt nulli vel impensæ, vel labori parcant, vt commodum aliquem huiusmodi locum inuenire possint. Ad quem deligendum, insignes quosdam impostores habent artis huius vt ipsi putant peritissimos. (Quam isti artem *diali* appellant) veniunt autem egregij nugarum venditores, cum instrumentis pluribus mathematicis
quorum

quorum vnum semper est pixis nautica : finguntque se ita explorare quod tantopere optatur. Indeque post horas aliquot, sedulamque (vt quidem vafre fingunt) operam, exclamant inuenisse se tandem quo loco recondi defunctus maximè velit. Quemcunque vero locum circulator illi designauerit, quantuncunque remotissimus fuerit atque incommodissimus, exultare tamen ac triumphare gaudio solent stolidissimi haeredes, tanquam thesaurum eximium reppererint ac locum etiam illum ingenti sæpè pretio coëmunt. Neque defuncti corpus in eo prius recondunt quàm illum egregiè composuerint, & ornauerint ex arbitrio mendacis huius nugatoris. Is enim ad maiorem artis commendationem accuratè docet quâ tumuli parte iacere caput, quâ pedes vergere conducat vt defunctus sub terra placidè quiescens, nullam deinceps filiis inferat molestiam, ac quamuis plebeiorum hominum sepulchra in patenti, & publico loco esse soleant, nobiliorum tamen hominum tumuli, plerunque abditi, atque ab omnium oculis remotissimi esse solent. Quod vereantur sæpè filij nè si parentum corpora inimicorum iniurijs pateant in ipsorum deinde liberorum perniciem accepta mala, irati parentum manes vlciscantur.

Ita illi quidem insipienter omnino ac stolidè. At hoc vnum sanè cordatissimè cautum enim est vt qui sepulchri qualiscunque religionem violauerit, is patratum facinus, grauissimis pœnis luat. Deinde obseruatur etiam laudabiliter, vt quoties aliquis extra patriam diem obierit, eius filij, corpus illud referendum curent in natale solum. Atque id officium sine morâ; & maximis sumptibus ditiores obeunt. Pauperiores autem

tem nunquam ultra triennium illud differunt. Hoc quippè solemne spatium est quo luctum suum erga defunctos testari solent; quâ vestitu, & habitu corporis, quâ pluribus etiam cæremoniis quas supersticiosissimè semper obeunt. Præcipuum autem lugentium insigne in capillitio eminet. Nam filij quidem (quod apud Annamicos viri comam soleant nutrire, atque in longum promittere, sed in semicirculi tamen formam supra frontem cadere,) toto tamen illo triennio quod luctui destinatum est capillis frontem & oculos operiunt, non sine maximâ sæpè molestiâ. At vero viduæ in signum doloris, comæ quam impense amant, partem aliquam auellunt, nec toto illo tempore sinunt crescere. Imò & seuerè cautum est nè vlla prius conuolet ad alias nuptias quam triennium illud elapsum fuerit. Quo finito conuenitur iterum ad sepulchra, eaque religiose aperiunt & ossa pretiosis iterum vnguentis respersa nitidisque inuoluta pannis, in breuiorem transferunt sarcophagum, & eodem tumulo reponunt.

Imò & post hæc tanta, & tam accurata in defunctos officia, si qua deinceps ipsis aut familiæ calamitas obuenerit, eamque plateales illi (vt dixi) venefici retulerint ad demortuorum parentum iram. Adeuntur rursus, & aperiuntur sepulchra, cadauera curantur & componuntur scitissime. Id autem in primis cauetur vt ossa ossibus aptissime iungantur, capilli omnes amoueantur à sarcophago, ne qua forte res defuncti quietem perturbans, furorem ipsius prouocet in filios, dementes qui nesciant alia esse longe grauiora supplicia, quibus in alterâ vitâ miseri quiescere nullo tempore sinantur.



*De solempni conuiuio quod in honorem defun-
ctorum celebrant Annamici.*

CAPVT XXII.



D hæc tam vana, & impia accedit altera quo-
que ac stultissima obseruatio conuiuiorum
quæ lautissima, & splendidissima mortuis suis
apponunt *giæ* ipsi nuncupant, triplicique in his per-
agendis infantiâ laborant. Primum enim vanissimè per-
suasum habent, posse parentum suorum animas diuer-
tere pro arbitrio in domos filiorum, atque in ijs diu
commorari. Nescientes vesani quantum chaos inter
illos & nos interiectum sit. Alter error ille ipsemet est
quem esse perniciosissimum affirmat Augustinus, arbi-
trantur enim delectari nostris mensis illas animas, atque
ijs libentissimè interesse ac pollucibiliter etiam epulari.
Peculiarem itaque mensam ad id munus instruunt, &
dapibus onerant exquisitissimis, ad quam cum lacry-
mis inuitant parentes. O fortunatum (inquit omnium
nomine filius primogenitus) aduentum tuum. parens
amantissime in hanc domum tuam. Ecquid? eam tan-
diù deferis, aut cur? diutiùs auelleris à filijs. Nunquid
meministi authorem te esse vitæ, non ab alio nobis
quàm à te datæ. Tu nos ab infantiâ suauissimè nutritos,
in hoc ætatis robur feliciter perduxisti. Tu domum &
opes parasti, tu à puero disciplinis optimis imbuisti.
Nunc autem cur? rarissimè ad nos venis, nec te doloris
aut orbitatis nostræ miseret. Accede amabo ad paratas
I tibi

tibi epulas à filijs, nec dedignare impares meritis tuis dapes.

Hæc dum familiæ caput eiulabundum inclamat, reliqui quoque in lacrymas miserabiliter soluti, parentem ut præsentem proni venerantur, compellantque amicè ad discumbendum, & paratis dapibus vescendum. Id quod ab eo etiam fieri stultissimè autumant: cumque satis fuit lacrymarum tunc in tertium demum errorem incidunt eumque omnium impiissimum. Cum enim constitutum hoc & ratum omnino habeant prosperam omnem familiæ totius fortunam pendere solum ex eo quod parentem beneuolum habeant & nemini offensum. Sic cum iterum appellant, ne igitur parens suauissime, tuorum te capiat obliuio, sed longam omnibus vitam, prosperam valetudinem, opes copiosissimas impertire in quibus vocibus, procumbentes in terram omnes quater eam fronte pulsant præeunte semper primario familiæ capite, deinde cæteris sequentibus.

Neque verò huiusmodi conuiuium solo illo luctui destinato triennio instituitur sed toto præterea vitæ tempore, recurrente anniuersariâ die obitus paterni, rite instauratur; eâdem semper seruâtâ cæremoniâ, & quidem tantâ omnium religione ut si quis illud prætermitteret, accusatus statim impietatis paterna hæreditate certò priuandus esset. Imò si cui ante obitum aliqua data fuerint à Rege oppida, relinquuntur ea toto illo triennio filiis & vxori, ut perceptis eorum redditibus, sumptus necessarios facere possint ad huiusmodi conuiuia. Quibus interesse solent cum omnibus defuncti

functi consanguineis, milites etiam vniuersi quibus ille viuens præsuerat.

Atque ut de alijs nihil ponam, certè ipse Rex quem egomet vidi, hoc superstitionis genere maxime laborat. Habet quippè intra Regiæ suæ cepta, domum capacissimam, opere magnifico extructam, & ornatam, quolibet Tunchinensium templo longè maiorem, & præstantiorem. Veneratur in ea parentem suum, cuius etiam spiritum in ea commorari falso existimat, vnde perpetuos ibi adoleri iubet suffitus, præsertim ex aloë ligno pretiosissimo. Instruunturque quotidianæ mensæ, apparatu Regio, perinde ac si adhuc ille viueret. Atque ut rectè totum hoc munus obeatur, vnum Rex destinauit è primarijs Eunuchis, cum amplissimo redditu, qui nomine ipsius, inferat quotidie cibaria, præsentemque (ut ipse putat) spiritum pronus veneretur: neque id vni Regi proprium. Solemne id est omnibus nobilioribus, imò & multis etiam plebeijs ut intra domum conclaue habeant deputatum ad cultum parentum, in quo præsentem eorum spiritus religiosè colunt.

Habet autem hoc præterea Rex ut lautissimum quot annis instauret conuiuium ad quod è toto vndique regno vocantur procures, tenenturque subditi omnes aliquid vel ciborum, vel pecuniarum conferre ad eius apparatus, & quamuis mensæ apud eos vulgo rotundæ sunt ac, paruæ, pluribus sæpè distinctæ coloribus, & auro etiam ductili ornata, affabréque factæ, adeo ut inter nobiles, sua cuique mensa seorsim tribuatur. Plebeij vero terni aut etiam quaterni singulis mensis accubent. Attamen in conuiuium isto Regio quod commemoro, grandiores adhibentur mensæ duodecim aut

etiam quindecim pedum altitudine, in ambitu pedum triginta variè depictæ, multoque cælata auro. Fercula quibus non instruuntur, sed onerantur, plurima sunt & exquisitissima. Integri sæpè præpingues apponuntur tauri, sæpius etiam integri porci, sed elixi. Bellariorum ac dulciariorum congeries sanè incredibilis.

Sed hoc tamen risu, vel magis profectò lacrymis dignum visum est: quod ex maioribus illis mensis, una semper aut altera, pictis tantùm & inauratis instruitur cibarijs ex chartâ nescio quâ, pulchrè elaboratis. Conijciuntur illa postmodum in ignem atque ibi, asserrunt illa in verum mutari aurum parentibusque in alterâ vitâ reddi. Porro hæc omnia postquam rite parata sunt, aduenit mox Rex ipse cum prole ac totâ curiâ lugubri omnes cultu, eaque peragit, quæ ab alijs vsurpari filiis familias olim retuli. Et ita quidem usque ad sequentem diem, relinquuntur in mensis dapes, tunc enim satiato demùm (vt ipsi delyrant) spiritu, omnis ille ciborum apparatus distribuitur primùm in magnates, deinde sua cuique militi pars, postremò quod reliquum est etiam plebeijs. Sed ab ijs tamen sacrificuli omnes abstinent, quod oblata mortuis, immunda vulgo reputentur.

Ita omninò Rex semel duntaxat annis singulis. Sed sæpius præterea in ipso anni cursu, minùs solemnes indicit epulas (id quod primates etiam omnes peragunt) in honorem aui aut atavi omniumque maiorum ad octauam progeniem. Habent enim annotatam apud se diem obitus eorum, atque illâ recurrente obeuntur solita conuiuiorum officia. Vulgus autem quia vix proavos ita notos habet, propterea duo singulis annis men-

ses

ses publicâ lege sunt constituti, septimus nimirum & duodecimus; vt in eis omnium communiter defunctorum memoriam instaurent. Vt videas quàm pudenda sæpè sit Christianorum segnities, in iuuandis defunctorum pijs animabus. Cum hæc ethnici, tam accuratâ superstitione præstent ad solatium suorum.



*Plures alia Tunchinensium erga defunctos
observationes supersticiosissima.*

C A P V T XXIII.



Ncredibilis omnino est Tunchinensium erga defunctos amor, & effusa in eorum cultu liberalitas. Hæc enim sane superstitio est, in qua facultates suas omnes exhauriunt, multum etiam æs alienum contrahunt. Nam licet in ea quæ sæpius commemoravi conuiuia, ingentes semper expensæ fiunt, major tamen & damnabilior est altera illorum prodigalitas, dum plurimam supellectilem pretiosam misere consumunt, & mittunt in ignes, stulte reputantes, eam deinde omnem restitui defunctis in altera vita longè meliorem effectam, & pulchriorem. Imò & adiculas quasdam construunt ex arundinibus, & papyro, easque pingunt & inaurant; deinde absumptas flammis putant mirâ quâdam metamorphosi, in veras mutari, & cedere in eorum quos ipsi volunt defunctorum vsum. Ideoque semper exeunte anno plurimas vestes depictas coëmunt & comburunt, vt videlicet sub initium insequentis anni, nouis semper indumentis de-

functi vestiantur. Eamque consuetudinem toto regno vsurpari solitam omnibusque summis iuxta, & infimis communissimâ, multis adductis rationibus oppugnare necesse fuit, & ostendere quam vanum esset, ac fatuum, miserrimis animabus nihil mittere præter cinerem ac fumum, vtrumque superuacaneum, aut etiam noxium. Sapientiùs facturos eos, si quas illi vestes misere perderent, eas viuus potius pauperibus donarent. Sic profuturam defunctis pietatem, si qui fortè purgarentur adhuc in alterâ vitâ. Neque vana sæpe fuit hæc oratio, sed pluribus sæpe tum Christianis, tum ethnicis sane utilis. Accepi ego mendicum quendam Christianum retulisse, se vnus tantum anni spatio habuisse vestes viginti octo. Cui authores fuere nostri vt seruatis ijs quas in suos vsus arbitraretur esse necessarias, reliquas omnes distribueret pauperibus.

Neque verò huiusmodi officijs parentes solum, & cognatos colunt. Illud enim mirum est quod simili etiam pietate prosequuntur eorum animas quæ parentibus, & cognatis ac sepulturâ destitutæ, nemini prorsus curæ sunt. Vocantur ab ipsis *Cu hon*, ad quarum solatium, semel annis singulis sub initium sextæ lunæ quæ in Iunium nostrum incidit, plurimas vestes aliamque huiusmodi supellectilem flammis absumunt. Quin & Scholastici bis mense quolibet, in nouilunio nimirum & plenilunio pro ijs animabus, stipem turmatim colligunt, vt ex eâ deinde pulmenta quædam conficiant, quæ partim ipsimet comedunt, partim in varias domus partes effundunt præsertim super tecta. Rati coaduenire postmodum animas, & appositis illis dapibus vesci, & quod adhuc stolidius est. In ludimagistri cuiuslibet

iussibet gymnasijs aræ sunt animabus istis sacræ, ubi à discipulis religiosissimè coluntur eo præsertim animo, ut perspicax, & facile ad discendas litteras ingenium obtineant. Quæ omnia licet maximæ dementiæ sint plenissima, sunt tamen perspicua, impressæ cuilibet à naturâ, immortalitatis animorum argumenta.

Hæc quæ à me hætenus dicta sunt, ad omnes spectant, etiam plebeios. Alia vero quædam restant primariorum virorum propria. Simul enim extinctus est eorum aliquis, amplissimum, in aperto campo, ei palatium extruitur ex facili quidem ad comburendum materiâ; sed plurimis exterius ornatum picturis. Deinde multa in eo reponitur supellex domestica, mensæ abaci mantilia, cubilia, & plura etiam simulacra elephantum, equorum, felium, canum, omnia quidem vilia ex stipulis & chartis compacta, sed propter artis industriam eximia, quippè milleni sæpè aut etiam ijs plures expendantur nummi, ad tales nugas, tum solemnè parato conuiuio, aduocatisque musicorum, tibicinum, sacrificulorum, atque veneficorum choragijs, inter inconditos eorum clamores ac horrendas vociferationes ignem in hæc omnia subijciunt, sollicitè cauentes ne quid eorum, supersit incendio, putantque homines dementissimi, vera palatia, veros elephantès, cæteraque omnia reddi pro depictis verissima, ijs quibus parentant. Quam ipsi opinionem tam altè demiserunt in animum, ut nullo pacto euelli possit, difficillimum enim omnino nobis est illis suadere, ut ab ijs ludicris cæremonijs viui abstineant, & mortui quoque carere velint.

* *
*

De



*De caremonijs quibus Rex diem suum
natalem celebrat.*

CAPVT XXIV.



ACTENVS de funeribus plurima, sequitur vt de Regis natali dicam paucissima. Primò igitur paucis ante illum diebus, afferuntur ex omnibus regni Prouincijs præclara munera, vt ex ijs solemne paretur conuiuium, quod ducibus omnibus, vniuersæquè militiæ, lautissimum Rex instituit, quo peracto, illi fidem Regi sanctè iurant, nouisque omnes vestibus donantur.

Inter errores autem innumeros quibus excæcata hæc gens laborat, iste sanè crassissimus est, & vanissimus. Existimant tres in homine quolibet esse animas quas *Ba bon* dicunt. Vulgarem tamen illam ignorantes partitionem animæ in vegetantem, sentientem, & rationalem. Præter quas etiam septem spiritus inducunt quos appellant *Bai via*, neque tam sunt periti vt eos reuocent ad animales & vitales. Cumque aliquem subitaneo aliquo pauore correptum vident, aiunt amitti ab eo spiritum. Mulieribus autem nouem spiritus attribuunt *Chinuia* ipsi nuncupant. Partim quod videant eas esse timidiores, partim quod vitaliores: hoc igitur imbuti errore arbitrantur, Regem in natali suo, nouum semper haurire spiritum, consumpto prorsus priore, quem toto eo anno seruauerat. Ideoque primo diluculo huius diei, deducitur in campum remotissimum vnus è

Regijs.

Regiis curribus, magno comitatu militum, ac populi, qui pulcherrimis floribus, & ramis currum totum concinnissimè conuectiunt, eumque subinde in urbem magnificè reducunt, existimantes eo vehi spiritum illum quem Rex in totum annum est accepturus, Rex autem obuiam prodit è palatio præcelso, ac ornatissimo inuectus curru, proceditque in forum, occursum ibi spiritui suo, quem ut præsertim hauriat, conuolat alacris in curru ubi sedere illum autumat, exosculetur flores, & ramos, quibus contextitur, tanquam eo quasi flatu fictitium illum spiritum ebibat. Postmodumque in priorem curru regressus, magnis omnium acclamationibus & gratulationibus reuehitur in Regiam, quasi nouo, & meliore imbutus spiritu. Sequuntur conuiuia, pro more, apparatu Regio, & populi totius, plurima pro Regis salute vota.



*Varia Tunchinensium vanissimæque
observationes.*

C A P V T X X V .



PRIMA sit, quod cum diem naturalem in horas duodecim vulgo diuidant, earumque singulæ duabus minimum nostris æquiualeant; denominantur omnes ex signis cœlestibus, à quibus etiam dies omnes, & menses, atque annos distinguunt. Perenni & nunquam interruptâ reuolutione totam eorum seriem numerantes. Nam decem iterum characteribus iungunt hæc signa, sexaginta semper annis conuersio-

K nem.

nem quanlibet finientes. Has autem siderum ac dierum conjunctiones, studiosissimè obseruant, seque ipsos non rarò in extremas redacti angustias, eâ inuiti vanitate miserrime discruciant. Habent enim annos quosdam, menses, ac dies, à quibus sibi magnoperè cauendum putent, quod existiment eos esse infastissimos: obseruant videlicet sollicitè horam & signum in quibus sunt nati, & quidquid eo notatum signo vider, horam, diem, mensem, annum, ea omnia reputant esse pessima, & planè infasta. Maximèque horrent in ijs negotium vllum aggredi.

Vigebatur non ita pridem Rex Cocincinæ à numero & formidabili exercitu Tunchinensium, in regni fines irrumperè parato. Aderant tum perturbato Principi plures mathematici, vanarum illarum artium venditores. Habebantque rotati nescio cuius horologii, grádiorem machinam, quam vltro citroque conuercentes in omnem partem seuerè affirmabant abstinendum esse à prælio, illâ horâ, quæ infelici notata signo, mali aliquid certò portenderet. Ad quas nugas excandescens Rex, calce contemptim percussio delusorio illo, & composito ad fallendû horologio. Itanè (inclamat) fines nostros impunè hostis inuadet, cessantibus nobis ac quiescentibus. An vero euenire nobis aliquid potest infelicius, quam si hostium crudelitati obijciamur. Eia milites arma impigrè capeffite, cuneosque hostiles fortiter inuadite. Sic felicissima nobis, aduersariis autem fatalis hora hæc euenierit. Paruerunt imperanti Principi, milites fortissimi, & eâ ipsâ horâ quam mathematici affirmabant esse Cocincinensibus ominosam, ingenti victoriâ potiti, dupliciter triumpharunt, & de hostium audaciâ,

ciâ, & de vanarum artium dementissimâ fallaciâ.

Alia præterea sexcenta sunt huiusmodi somniorum genera, quibus ethnici tantum profectò tribuunt, vt ab eorum imposturis, miserè se diuexari patiantur. Si enim manè domo egressi, negotium aliquod grauius susceperint, priùsque in itinere obuia eis mulier venerit, quam masculus, referunt se illicò domum, stultè opinantes fieri non posse vt felicem exitum habeat negotium. Similiter si aliquem contigerit domo exeuntem, sternutare, aut alium quempiam audire sternutantem, cohibent subitò gressum, domoque se continent reliquâ totâ die, rati malum sibi graue imminere si prodeant. Et hæc pauca ex innumeris libasse satis sit, vt hæc legentes misereri tandem incipiant gentis excæcatissimæ, quam in tantis tenebris constitutam miserè dæmon ad inferna rapit, petantque à patre luminum vt discussis errorum tenebris, faciat ibi filios lucis, & dilectionis suæ.



*Matrimonia sua quo ritu Tunchinenses
celebrent.*

C A P V T XXVI.



GET quidem apud hos populos Polygamia, quæ proceribus præsertim adeo est vñtata, vt plerique retentâ priori vxore conuolent ad secundas nuptias, plebeij autem prioribus repudiatis aliam coniugem inducant. Ista tamen inter eos lex esse solet connubiorum.

Primum caput est vt de ijs constituendis tota penes ipsos parentes cura resideat. Illorum munus est pacta peragere, decernere de dote, ac demùm de circumstantijs omnibus conuenire. Idque faciunt etiam tunc cum impuberes liberi minùs adhuc idonei sunt ad coniugia. Et quidem masculi parentes mentem suam per amicos denunciant parentibus puellæ, exquiruntque nùm velint de ineundo inter filios matrimonio pacisci. Hac acceptâ facultate mittuntur ad puellam munera, quæ parentes vbi ritè acceperunt, iam non est illis integrum, sine grauiore aliquâ nouâ causâ, ab inchoatis illis sponsalibus, pro arbitrio resilire. Sed sæpiùs tamen postquâ designatus ille gener pubertatem attingit, euocatur in ades soceri, & in eâ probatur quam gnauiter rem familiarem videatur esse curaturus. Si enim piger, atque oscitans appareat, tùm verò satis putatur esse causæ, ad inita pacta irritanda, statimque restitutis muneribus in paternam domum ablegatur. Sin autem probè ab illo domestica gerantur negotia, tùm vero quod reliquum est matrimonij totius opus perficitur.

Monentur videlicet vtriusque partis cognati omnes, vt frequentes conueniant, ad festiuam solemnitatem. Inter fratrum enim duorum filios, etiam in gradu remotissimo, nusquam copulât coniugia: fratris & sororis nepotes, in tertio gradu iungi possunt: filij duarum sororum possunt in secundo. Post conuocatos ad nuptiale conuiuium cognatos, qui omnes deferre tenentur munera, inuitantur etiam, loci gubernator, & seniores, qui omnes conueniunt semper ad has epulas. Idque tam seuerè cautum habent, vt si quis eam cæremoniam omiserit, irritum habeatur connubium, atque ab eo iustè

Iustè resilire possit vxor, quod contractus receptissimâ,
& per leges omninò perscripta caruerit solemnitate. Vt
videas quantum ipsa naturæ lex quæ apud hos populos
sola viget à clandestinis abhorreat coniugijs. Ijs ritè per-
actis, sponsus dotem quam vxori tenetur constituere,
ad foceri domum mittere properat, quæ tota in nouæ
nuptæ vestes, supellectilem, muliebremque apparatus
sedulò impenditur & quamuis puellæ parentes nullam
obligantur dotem illi ex propriis facultatibus largiri,
quoties tamen in domum sponsi ducitur, plurima, &
præclarissima ei semper dona tribuunt. Tunc autem
vniuersa illa supellex in puellæ vsus comparata, præmit-
titur in domum sponsi, eadem quidem die si modica illa
fuerit, pridie autem, aut etiam maturius, si plurima
fuerit & copiosissima, qualis inter nobiles esse solet:
sequitur postmodum ipsa, vniuerso comitante pago,
magistratu, & cognatione totâ, migratque in ædes ma-
riti, in eas vbi primùm ingressa fuerit, venit ad aulam
primariam, vbi plurimæ ad coniugum colendos pro-
genitores extant aræ, in quibus multo thure aliisque
suffimentis ritè operantur. Tùm sponsi pater, si adhuc
est in viuis, vel in eius locum si iam viuere desijt, se-
nior patruus in genua supplex prouoluitur; conuersus
que ad demortui patris sui manes orationem in hæc
ferè verba præit. En parens optime, supplicem vides ne-
potem tuum, qui hâc sibi N. amantissimâ vxore ductâ,
nihil prius habuit, quam vt in sinum tuum se ipsum
conferret, ac sua omnia. Tu eas nuptias suffragio tuo
approba, & votis eorum propitius faue, vt felicem ac
diuturnam in coniugio vitam agant, filios suscipiant
viribus pollentes, moribus probos, opibus abun-

dantes paratum istic est conuiuium cui te tanquam primarium familiæ totius caput, iucundè accubiturum speramus omnes, & cupide à te poscimus.

Post hæc distinctè sic pronunciata, peractum censetur coniugium, à quo resilire nequaquam liceat maxime vxori. Nam illi fas nunquam est discedere à viro, cum tamen ipsi viro, grauioribus quibusdam ex causis integrum aliquando sit, coniugi dare libellum repudiij. Quod plebeijs quidem non est omninò insolens, nobilibus verò prorsùs inusitatum, eo quod plures vxores habeant, neque vlla vnquam de secundis nuptiis cogitare audeat. Cæremoniæ totius pompam claudit festiuium conuiuium plurimâ lætitiâ, & exquisitâ liberalitate. Neque ad totius huius contractus firmitatem, alius præterea exigitur partium consensus. Quem sanè silentium illud & incuruatio genuum vtriusque coniugis, abundè significat, eo ipso tempore, quo mariti pater coniugium illud solemniter denunciat.

Vnum hic attexam, quod mihi sane visum est mirabile, potestque argumento esse quod iam olim Tunchinensibus, aliqua saltem affulserit Euangelicæ lucis scintilla. Simul enim matris aluo prodit puer, cum statim obstetrix salutiferæ crucis signo in fronte notat. Pingitque illud aut atramento, aut colore quopiam alio quem maluerit, incidi ego aliquando in infantulum recens natum ex ethnicis parentibus. Cuius mediam frontem cum pulcherrimâ cruce signatam inspicere, rogare statim cœpi ab ethnicis adstantibus, quale tandem esset illud signum aut quamobrem illud sic puerulo inurerent: respondere illi, eo signo infantem muniri; ne illi nocere valeat malus villos genus.

Ego.

Ego instare, quidnam vëro virtutis inesse posset isti signo aut vnde illam accepisset. Ad quæ illi nihil profectò habuere quod reponerent præter receptissimam, & antiquissimam longissimi temporis consuetudinem, quæ ante omnem hominum, memoriam apud illos vigeret. Vnde ni fallor argumentari licet, prædicatum iam alias in his terris fuisse Christum, cuius salutare signum adhuc retineant atque vbi primum veniunt in lucem, in fronte gerant. Utinam & à fronte ad penetralia cordis peruat, operante in eis, & se ipsum manifestante Christo crucifixo, seruatore nostro.



*Varij ritus Tunchinensium sub anni finem,
& initia.*

CAPVT XXVII.



ETVS est & constans horum omnium populorum cōsuetudo, vt sub exeuntis anni finem, senes omnes tum viri, tum etiam fœminæ, domo egressi, confugiant ad templa, tanquam ad asyla quædam tutissima, & intra ea sese contineant per dies aliquot, vt sic ab improbi cuiusdam dæmonis iniuriis recti esse possint, cuius officium esse putant, vitæ senum, & vetularum, insidiari ante initium insequentis anni. Quod periculum vt euadant, dies totos, & noctes intra sanā illa commorantur; donec nouo appetente anno, rursus securi remigrent ad proprios lares. Quo tempore nihil sibi metuendam putant dæmonum petulantiam.

Reliqui

Reliqui omnes, si familiæ cuiuspiam capita fuerint, ultimo anni die, in vestibulo domorum, præaltam erigunt trabem, in cuius vertice cauea est capacior, plena nugatoriis illis quas sæpè dixi picturis auro, argentoque plurimo illusis. Putant videlicet egere proavos suos sub finem anni subsidio aliquo ad soluenda debita. Nam viget apud hanc gentem consuetudo ista sanè laudabilis, & populorum omnium digna imitatione ut quisquis ære alieno grauatùs est, ab omni eo se prorsùs, exeunte anno liberet, nefas graue ducentes, manere inchoato iam anno nouo, debitum aliquod anni anterioris. Hoc autem tamen dignissimum est laude, videtur tamen ex duplici ortum superstitione. Prima est quod pessimum esse reputent, si creditor ob dilatam solutionem, offensus debitori aliquod in eius proavos probum iaciat, quod illi grauius ferètes, anno ineunte, in nepotes furorem conuertant. Imò & quoties alter alterum afficit contumeliâ, quæ maiorum ipsius famæ obesse possit, grauibùs subjacere solet pœnis, si ad iudicem res deferatur: altera superstitio est, quod magnopere quisque horreat aliquid domesticæ rei, sub anni principium distrahere; aut extra familiam ipsam à se alienare. Ideoque nemini, etiam Regi hoc tempore de rebus suis quidquam tribuunt, sed illud duntaxat omni adhibitâ operâ tunc curant, ut nouas ac plures opes domum referant, idque si præstare valeant faustissimum arbitrantur: vnde fit ut prius semper, quàm in exitu sit annus, æs omne alienum dissoluant, ut ne postea sub initium anni cogantur à creditore aliquid largiri quod ipsi ominosum putant.

Præter cæteras autem, hæc vna superstitio, est omnium

nium communissima domesticos quosdam Deos habent (quos vocant *Thien su*, idest veteres magistros) hos tanto, & tam accurato colunt studio, vt vix apud Annamicos domum vllam reperiās, cuius in vestibulo ara non conspiciatur in honorem huiusmodi larium, ad quam manè ac serò vniuersi, supplices accedunt, & quodidianos suffitus adolent. Artis quidem quam quisque proficitur, author ab eo tam impense colitur, vt serio statuunt, totam artis huiusmodi peritiam, prosperosque successus omnes, ab vnico eius præsidio, ac propitio fauore prorsus pendere. Proptereaque perpetuas fundunt ad ipsum preces, tanquam ad primarium vitæ suæ, ac fortunæ totius præsidem. Habent videlicet medici, mercatores, milites, imò, & quod certò comperi, ipsi etiam latrones, suum singuli *Thien su*, à cuius cultu, nullis se vnquam rationibus abduci patiuntur.

Conualueram ego aliquando ex grauissimo morbo, medici cuiusdam sedulâ, & beneuolentissimâ operâ. Huic ego vt præstitæ beneuolentiæ vicem eximiam rependerem; magnopere laboraueram, vt Christi fidem suaderem. Neque difficile mihi fuit aliorum Idolorum ei contemptum, aut etiam odium inducere. Cum autem ad *Thien su* ipsum deuenimus, cum vero vt abijceret obtinere nullo modo potui. Sed in errore turpiter obfirmatus, magno meo dolore paulò post interiit. Alterum quoque militiæ ducem, provinciæque gubernatorem octogenarium adduxeram, vt Christo, ac fidei nomen daret. Iamque linteatus ego eram, & omnia parata vt sacro cum lauacro expiarem, cum ecce suum, mihi aliâ omnia cogitanti opponit *Thien su*, negatque se illum abjecturum, quod milites eo carere nequaquam possint

L

aut

aut velint. Idque tam constanter, imò pertinaciter asseuerare perrexit vt abrumpenda necessariò mihi fuerit tota hæc baptismi cæremonia; donec mentem miser mutaret; & sapientius consilium susciperet.

Concludam longiorem hunc de Tunchinensium erroribus sermonem, vltimâ istâ, & perniciosissimâ dementiâ. Nullus siquidem pagus est; qui deum suum, aut magis dæmonem tutelarem non habeat. Eius in honorem templa vbique magnificè ornata sunt, ad quæ superueniente publico quolibet negotio, seniores omnes, ac primores totius pagi, frequentes conueniunt, vt consilia capiant, communemque procurent salutem. Statur quoque annis singulis decernuntur festorum dierum solemnitates duorum, aut trium mensium, quibus quotidiana conuiuia cum cantibus & choreis agitant. Est enim communis hæc omnium opinio, dæmonem hunc, arbitrum, & dispensatorem esse publicæ totius, priuatæque felicitatis. Pendere ab eo prosperam hominum, & iumentorum etiam valetudinem. Ab eo agrorum lætam fecunditatem, & secundam omnium fortunam effici. Vnde illum incolæ loci, *Regem*, vulgò dicunt. Rationem autem tantæ huius obseruantie hanc esse comperi, quæ sanè ludicra est aut magis pudenda. Si enim latro quispiam, aut homicida, iudicis sententiâ, extra ciuitatem, morte plexus fuerit, casuque fortuito accidat, vt bubalus aut bos, aut porcus iuxta cadauer illud, aut sepulturam, in qua conditum est; decadat, vel graue aliquid patiatur, toto confestim pago ingentes excitantur turbæ, conclamare omnes, accurrere, omnia facere ad auertendum grandè hoc ostentum. Idque vt faciant securiùs, consecratur sine morâ.

morâ maleficus ille in Deum pagi tutelarem. Extruitur ei templum, eriguntur aræ, diuini honores decernuntur. Imò, & quod narrare magis horret animus, si quis huiusmodi casus, iuxta foetidum canis alicuius, aut iumentum cadauer contigerit, illa etiam (proh pudor) animantia assumunt in Deos, & pagi Reges, communi omnium suffragio inaugurant.

Fertur in annalibus harum nationum, fuisse quondam Cinarum Regi nescio cui, filiam adeo turpem, & sceleratam, ut incredibilem eius improbitatem non ferens pater, proijciendam eam curauerit in mare, putridum eius cadauer diu per immensa Maria iactatum, expulere tandem fluctus ad Tunchini littora. Eodemque tempore vni alicui contigit è portu vicino, ut graui aliquo fortunæ casu percelleretur. Quæ res circumjacentium omnium pagorum accolæ adeo terruit, ut vnanimi omnes consensu, eam sibi Deam, & præsidem Reginam in sequentes omnium temporum ætates assumpserint, portumque de illius nomine, deinceps *Cua Cua* idest portum Reginæ appellauerint: atque hic cultus ex eo portu ad alios omnes ita sensim propagatus est; ut nullus in eâ omni orâ, sit portus, in quo turpissimæ huic mulierculæ templum erectum non habeatur. Neque vlla vsquam nauis è portu soluere audeat, nisi petito prius auxilio eius ad felicem navigationem. Speramus autem breui fore, ut impio illo sceleratoque cultu in sacrum veri numinis honorem immutato, veram quoque cœli Reginam, & stellam maris, Mariam Tunchinenses omnes venerentur. Et supplices vbique in vota vocent, id quod à plurimis eorum iam factum cum incredibili gaudio videmus, & gratulamur.



Toni & accentus lingua Annamica.

CAPVT XXVIII.



Lurimùm quidem differt ab idiomatè Cinen-
sium Annamica lingua, sed accentus tamen, &
tonos habet omninò similes. Nisi quod lex ac-
centus, Cinenfes habeant, Annamici quinque, quibus
vtrique, nostram in loquendo, imitantur musicam.
Nulla quippè, inter eos vox est, quæ non vno aliquo
huiusmodi accentu specialiter signetur, adeo vt ex ijs
tota earum vis, & significatio distingui videatur: sed
eos tamen, pronunciatio solum vocalis designat, scri-
bendo autem nulla specialis nota exprimit, ex quo
magnopere accescit eorum labor qui huic linguæ ad-
discendæ operam nauant aut eorum libros perlegunt.
Cuius disciplinæ labor, vt deinceps minor esse posset,
statuimus, in omnibus ijs libris, quos hâc linguâ con-
scriberemus apponere certam ac propriam specialis ac-
centus, & toni notam.

Primus igitur apud eos tonus ille est, quem depressio
vocis exprimit, diciturque grauis, & in arte musicæ vo-
catur bassus. Vt *Dò* id est decipula: secundus, est quasi
grauis, quod ad eum plurimùm accedat, profertur enim
cum vi quâdam & conatu ex imo pectore, notaturque
puncto vno sub vocali, quale apud Græcos dicitur jota
subscriptum vt *re* idest radix. Tertius est circumflexus
grauior qui pronunciatur, cum modulatione quâ-
dam, & inflexione canorâ vocis, vt *mî* familiæ cuius-
dam

dam nomen apud Annamicos. Quartus est æqualis, atque ideo nulla ei specialis affigitur nota, vt *Pba* idest immiscere. Nam *F.* in hoc idiomate locum non habet, sed *P.* aspiratum. Quintus item circumflexus, sed lenior, eam vocis inclinationem referens, quam habet apud nos tonus, quo inuicem interrogamus, eandemque prorsus notam infert, vt *Sô* catalogus. Sextus demum acutus est qui similitudinem habet iracundiæ, pronunciatum enim acutâ voce, habetque notam acuti accensus. Quibus sex vocibus imitati videntur Annamici solemnes illos tonos nostræ musicæ *Dò, rè, mi, pha, sô, là.*

Alterum præterea in hâc linguâ est operosissimum, quod in eâdem sæpè syllabâ omnes illæ tonorum differentiæ sic inveniuntur, vt per eam significantur res prorsus diuersæ. Sicque affirmare verè possumus, totam vocis ipsius animam, esse tonum pronunciantis, id quod, vel ex hâc vnâ vocolâ *Bà* liquere potest. Si enim accentu graui notetur *Bà*, dominam significas vel auiam. Si cum iota subscripto *Ba* est conglutinare, vel res derelicta; si cum circumflexo grauiore *Bâ*, illud designat quod reliquum est ex herbis expresso succo, cum circumflexo leniore *Ba?* est alapa. Denique cum acuto *Bá* principis alicuius viri concubinam notat. Sicque repetita quater; cum diuersâ vocis inflexione vna hâc syllaba *Ba, Bà, Ba? Bá*, significabit, tres dominæ colaphizant concubinam Regis. Eadem est ratio alterius huius item syllabæ *Ca* quæ mutatis accentibus significationem quoque ita immutat, vt significet insanam, cantilenam, magnum, & piscem.

In hâc accentuum notitiâ, tota fere constat huius lin-

guæ peritia, quâ sanè quisquis caruerit, in multos eam, & pudendos errores incidere necesse omninò est. Sic enim aliquando vni è patribus nostris contigit, vt, cum famulo cuidam Annamitæ significare veller comparandos esse in foro pisces, vteretur voce *Ca*, sed grauis accentus tono, cum efferri debuisset accentu acuto. Famulus autem nihil attulit nisi poma, legitimâ vsus excusatione, quod sic imperatum esset: alia perspexi huiusmodi frequentissima exempla, in quibus narrandis non immorabor.



Varia Tunchinensium nomina.

C A P V T XXIX.



Ix credi potest, quanta Tunchinensium, in nominibus imponendis vanitas sit. Si moriatur eis filiorum aliquis, studiosissimè cauent, nè alteri liberorum idem postea imponatur nomen, nè fortasse idem ille dæmon, qui primo illi filio necem intulit, audito deinceps eodem illo nomine offensus, simili concepto furore, secundum enecet stultissimâ siquidem opinione illâ imbuti sunt, singulis infantibus, vbi primùm sunt nati, malum statim adesse genium, qui omnium eis morborum per totam deinde vitam causas procuret; & ad extremum mortem etiam ipsam inferat: atque vt cum procul abigant, turpissima sæpè nomina liberis suis imponunt, vt eorum pudore dæmon territus abscedat. Nescientes miseri nullâ re fordidissimum spiritum, magis delectari, quam his turpitudinum suffitibus.

Deinde

Deinde ab hâc vanissimâ opinione, in summam devenere crudelitatem, si filiorum aliquem præmatura mors eripuerit, ac postmodum alter è liberis postea susceptis incidat in morbum, ex quo non sperent illum posse conualescere, devehunt illum in remotum ab vrbe campum, ibique innocentissimam victimam gladio concidunt, & dissecant in partes duas, rati nihil posthac in eâ familiâ tentaturum dæmonem, tantâ & tam horrendâ territum crudelitate. Sic videlicet demerente credulas mentes deterrimo spiritu, vt specie quâdam pietatis delusos, in pudendam carnificinam pertrahat. Sed ab eo tamen furore adeo abhorrent nostri omnes neophyti, vt non solum ab eo ipsi procul absint, sed omni etiam studio, ac conatu, à popularibus suis illum arceant. Si quos autem adeo confirmatos in tanto errore videant, vt nullo modo possint eos vincere, id certè magnopere laborant assequi, vt saltem innocentes has victimas, salutaribus baptisimi aquis, prius tingant, quam crudeli parentum manu mactatæ moriantur. Vnum ego reperi Antonium nomine piissimum neophytum. Cui adeo cordi erat istud officium pietatis, vt abjectâ domesticâ omni curâ, in eo solùm negotio totus esset; discurrebat videlicet, per vicinos pagos & sollicitè inquirebat, pius venator animarum, num aliquos huiusmodi puerulos parentes morti destinassent. Si quos inuenisset, protinus baptismo studiosè lustrabat, nobisque absentibus vnico anno, ducentos huiusmodi transmisit in cælum, quorum nomina descripta, postmodum ad nos latus detulit.

Alius præterea mos est inter has gentes vsitatissimus, vt nato eo filio, qui familiæ totius futurus est caput,

put, vbi primùm ei nomen imposuit pater, eodem scilicet natiuitatis eius die, omnes in eâdem familiâ nomen mutant (adeo vt si filio) verbi gratia, nomen imponatur *Dum*, quod significat æs, pater proprio nomine deserto, deinceps honorificè appelletur *Dum pater*, contumeliamque inferre censeretur, si quis antiquo cum appellaret nomine. Idem etiam præstant auus, mater, auia. Sed ita tamen vt auus atque auia, totâ deinceps vitâ nomen nunquam mutant, pater autem & mater nomen illud duntaxat seruent donec ex primogenito illo filio, nascatur ipsis nepos, tunc enim aui, & auia assumunt nomen, quin etiam patruus & amita si nullos adhuc susceperit liberos, ex eo etiam nepotulo appellari solent. Putant enim honorificum vocari *Dum*, patrinus *Dum* amita. Imò ipse puer primò impositum non seruat nomen, nisi quandiu infantulus est, & minore natu fratre caret: nam vbi frater illi natus est; deposito priore nomine, ab eo incipit denominari; si enim frater eius *Thien* fuerit dictus, tum maior natu honoris assumet nomen *Thien*, frater major, seruabitque nomen, donec filio suscepto, denominetur ab eo pater.

Verum ita quidem plebeij, alia nobilium ratio est, quos nemo appellare vnquam audet eo nomine, quod à parentibus primum accepere, vocarique ab ijs solet nomen turpe *Ten touc*, esset enim hoc genus contumeliæ molestissimum. Imò & magnopere cauent ne loquendo cum personâ primariâ excidat ipsis nomen, quod illa infans acceperat, sed quantuncunque illa fortasse res in sermonem venerit, abstinendum est semper ab eâ vocabuli appellatione, imò & idem commendatissimum habent quicunque in alterius domo loquuntur, etiam
absente

absente domino, nam coram eius filiis turpissimum esset efficere hanc vocem, cuius potius ratio immutanda est. ut si vocatus fuerit *tien* quod quatrinum significat, incidat autem sermo de quatrinis, tunc omittenda erit vox *tien*, & altera ista synonyma usurpanda *toan* idemque intelligetur ab omnibus, ac si diceret *tien*, atque idem de reliquis omnibus iudicium est. Denique ubi quis fato functus est, nouum ipsi à filiis imponitur nomen, eius præsertim dignitatis, ad quam viuens aspirauerat, tametsi nondum eam erat adeptus, huiusmodi sunt nomina regis, ducis marchionis, illaque maioribus expressa litteris deferunt in vexillo quod in funebri pompâ præferri diximus.

Atque hæc hæctenus dicta sint de moribus huius gentis, & genio loci, quæ ut opinor mouere Cordatissimum quemque possunt ad misericordiam, quis enim sine dolore videat gentem verè ingenuam, & ad omnes virtutum satus excipiendos egregiè natam, tamdiu tamen viuere in errorum tenebris & rucere in exitium æternum. Speramus autem affuturam breui diuinam opem, & vincente diuinæ gratiæ virtute, dæmonis malitiam, perucnturos hosce omnes populos ad Euangelij plenam lucem. Cuius primordia quo pacto illis affulgere cœperint reliquum est incipiam commemorare.

Finis Libri primi.

HISTORIÆ
TVNCHINENSIS
LIBER II.



DE INTRODVCTA
IN REGNV M
TVNCHINENSE,
Christianâ fide , & felici
eiusdem progressu.

Primus Euangelij in hoc regnum ingressus.

C A P V T I.



PATER Hieronymus Rodericus
genere lusitanus Prouinciæ Iapo-
nicæ, ac vice Prouinciæ Cinen-
sitis Iesv visitator, vir om-
nibus virtutum ornamentis inter
nostros Clarissimus , postquam
in Iaponiâ Collegium Nanga-
racniense, annis aliquot, summâ prudentiâ, & pietate
gubernasset ; coactus tandem est cum aliis pluribus
Christi confessoribus ex eâ insulâ discedere, persequu-
tionis procella in diem magis increbrescente ; ac
Amacuum remigrare. Qui Cinen-
sitis regni portus, licet admodum inclutus sit in prouinciâ Cantonensi,

A a 2 nume

numeratus tamen hætenus fuerat inter Iaponicæ prouinciæ Collegia, & adhuc est missionum omnium nostrarum, in eas terras præcipuum, & sæcundissimum seminarium. Ibi optimus pater, cum tacitus secum sedulò perpenderet, quanta damna Iaponicæ vineæ, ferus aper intulisset, haberétque ad manum delectissimam eximiorum operariorum turbam, quibus præclusâ Iaponiâ nihil esset optatius, quam ad alias regiones quæ albæ iam viderentur esse ad messem, operam suam omnem, curasque conuertere. Cogitare cœpit de illis in vicina Circunquaque regna dimittendis in quibus diuinam sementem impigri spargerent, & Christi nomen nouis illis gentibus annuntiarent.

Id Consilium postquam sibi diuinitus iniectum esse iudicauit anno huius sæculi 24. Patrem Gabrielem de Mattos Lusitanum qui procurator olim Iaponiæ Romanam aduenerat, mittit, cum quinque sociis in Cocincinam, quod accepisset à Patribus ibi iam gnauiter laborantibus, vberriam inde messem certò sperari posse. Eodemque tempore Patrem Cæsarem Margicum Italum destinat in regnum Siami, cum eximio Sanè fructu, nisi mors præmatura strenuissimo Christi pugili, per apostatas quosdam illata felicem Euangelij cursum miserè inhibuisset, & demùm anno 1626. P. Iulianum Baldinotti Pistoensem, addito illi fratre vno adiutore Iuliano Piani Iapone Lusitanam nauim conscendere iussit, quæ opportune tunc ad Tunchini regna, vela faciebat, vt tentaret num qua spes esset Euangelij gentibus illis prædicandi. Soluit ille vti iussus erat secundâ die Februarij omnino commodè ac felici-

ter

ter in festâ luminum solemnitate, magnæque virgini-
sacrâ, vt iam inde ominari fas esset quanta lux è Mariæ
benignissimo sinu illis terris se aperiret, felicissima fuit
nauigatio stellâ illâ duce, paucisque post diebus ad
Tunchini portum, læti omnes appalere. Lusitanæ na-
uis aduentum vbi accepit rex Tunchinensis, incredi-
bili cum gaudio summâque humanitate aduenas ex-
cepit, & veritus ne quo forte casu Lusitanæ naues de-
flagrarent, eo quod in amplissima illa ciuitate lignæ
sint domus omnes, atque adeo etiam incendia fre-
quentissima; iussit in suburbiis capacissimam domum
extrui, vt in ea merces illæ omnes tutò reponer-
entur, datâ insuper integra militum cohorte qui
dies noctesque starent in excubiis domumque to-
tam sedulo custodirent. Hinc statim maxima
vtrinq; data munera, cum insigni testificatione
beneuolentiæ. Et prior quidem legatus Lusitanus pro
more gentis eximiâ in donando vsus munificentia,
accepit etiam vicissim à rege dona pulcherrima &
principe tanto digna: eodemque tempore P. Baldi-
notti religiosa quædam obtulit munuscula quibus
rex se mirificè delectari testatus est: sed quod Patriæ
linguæ bonus pater peritus non esset, neque satis ido-
neum interpretem nancisci potuisset magno suo dolo-
re coactus est de Christianæ religionis thesauris nihil
prorsus gentibus illis impertiri. Sed in eo tamen hu-
mili silentio, decorâque modestiâ id omnino assequu-
tus est: vt Rex & proceres aduerterent latere in eo
sublimius aliquid, & diuinius, quod eos ad summam
erga patrem reuerentiam inuitaret.

Accedebat præterea singularis Lusitanorum erga

Aa 3 patrem

patrem obseruantia, quæ intuentium omnium, ac regis præsertim ipsius oculos rapiebat: admirabantur videlicet ducem ipsum auro fulgentem, & purpurâ, præclaro semper stipantium militum satellitio incedentem, tanto nihilominus honore ac reuerentia prosequi patrem Iulianum, qui religioso id est tenuissimo, & humillimo corporis habitu, & cultu, nihil præse ferret magnificum præter insignem modestiam, ut primas ei semper deferret partes, loco etiam ipsi cederet, atque in omnibus se inferiorem illo profiteretur unde sapientissimè rex argumentabatur, latere in illo viro sublimius aliquid, quam quod externa illa, & contemptissima species oculis exhiberet. Ideoque mirificè illum ubique veneratus est; mittebatque crebrò ad eum, vnum quendam è præcipuis suis *Say* (sic illi religiosos appellant suos) quem ipse ut magistrum impensissime amabat. Eum sibi Pater Iulianus arctissimò quidem beneuolentiæ nexu obstrinxit, sed non ita tamen ut ad fidem Christianam perduceret, quod careret interprete, per quem nostra cum mysteria edoceret.



Operarij Euangelici Tunchinum euocati è Cocincina.

C A P V T I I.



QBSERVABAT nihilominus interea pius pater; mores optimos Tunchinensium, indolem ingenuam & amabilem, paratamque proculdubio regionem ad amplam messem, si modo adessent operarij qui linguam Callerent gentis

gentis, neque diutiùs differendum ratus negotium in quo tot animarum salus ageretur, statuit euocare socios aliquot è Concincinâ, quos sciebat strenuam ibi operam ponere in salutem multorum. Cum autem intelligeret, quantæ inter vtrumque regem inimicitia intercederent, veritus statim est, ne Tunchinensis audito eo litterarum commercio, veniret in suspicionem secretæ cuiusdam conspirationis, in caput suum, & perniciem regni sui. Quippe qui nosset Lusitanos optimè iam pridem erga Cocincinensem esse animatos. Commendatâ itaque Deo re totâ, vt potuit secretissimè magno conductum pretio tabellarium misit in Cocincinam cum litteris ad P. Gabrielem de Mattos, qui eius tunc missionis visitator erat in quibus monabat eum, de optimo statu Tunchinensis agri, ad Euangelij satus excipiendos, si modo aduenirent operarij qui eos iacerent. Singularem esse regis Tunchinensis erga nostros beneuolentiam, eximiam procerum omnium voluntatem, populi totius mores suauissimos & ad omnem virtutem addiscendam egregiè factos. Operariis solum opus esse: mitteret ergo sine morâ vnum aut alterum, è pluribus illis quos haberet in Conincinâ. Habituros ibi amplissimum ad labores Campum, & lauros plurimas ad Coronam. Sed quoniam periculi plenissima res erat rectâ viâ Tunchinum è Cocincina venire propter bella tunc ingruentia, consultiùs fore Amacaum versus iter flectere, inde faciles aditus futuros esse ad Tunchini terras.

Fœliciter aduenit tabellarius in Cocincinam cum epistolis, quibus perlectis exarsimus illico vniuersi cupiditate

cupiditate adeundi noua hæc regna, & diuinam lucem in illa inferendi. Ac cum ego duos circiter annos in addiscendâ linguâ illâ elaborassem, cogitare statim de me patres cœpere; licet omninò immerente, nec laboribus tantis pari, & ex templo dimiserunt Amacaum vt inde Commodum expectarem tempus Tunchinensis nauigationis. Dimissus sine morâ est tabellarius; ad P. Baldinotium cum responso per breui, sed periucundo, factum esse, vti erat postulatum, expectaret adiutorem curarum suarum & laborum socium, affuturum eum breuissimo vt fieri posset interuallo. Longa fuit tabellarij mora in reditu, quod maximam Patri Baldinatio iniecit curam ne forte interceptæ à rege Tunchinensi essent litteræ, imò & nos postea suspicati sumus, audiuisse illum aliquid de his litteris. Cum enim sub idem tempus timeret sibi à Lusitanis quos bellicâ virtute clarissimos esse nouerat exegit ab eis iuramenti solemnem fidem, cuius religionem sanctissimam apud illos esse intelligebat.

Præfuit sacramenti huius Cæremoniæ P. Baldinotius, ne quid fortassis Ethnici obtruderent quod à Christianis institutis esset alienum. Peractum autem est coram venerandâ saluatoris imagine, atque in eo professi sunt Lusitani, nihil se aduersus Tunchinensem regem, aut regnum eius machinatos vnquam esse, aut deinceps etiam machinari velle; appellare se sinceræ huius suæ mentis testem, supremum cœli & terræ dominatorem, vnum, verum Deum. Quo iuramento regi Tunchinensi omnis abstersus est timor; & suspicio, si qua eius animo infederat, deposita.

Sed

Sed quoniam toto eo tempore propter exortas turbas, parùm de negotiatione totâ curatum erat, duobus mensibus qui reliqui erant, ad tempus præstitutum nauigationi, nihil ferè aliud agere licuit præter negotia mercatorum, sicque paulò postquàm ego Amacaum è Cocincinâ deueneram, eodem etiam regressa est lusitana nauis atque in ea P. Baldinotius, nullum aliud totius huius laboris sui referens operæpretium quam paratam nobis viam ad strenuè ibi laborandum.



*Euangelicorum operariorum felix ad portum
Tunchinensem appulsus.*

C A P V T III.



SV illud idem tempus commodùm venerat ex Indiis P. Andreas Palmerius Lusitanus prouinciæ laponicæ, ac Viceprouinciæ Cinenſis viſitator, quod idem munus in indicâ gesserat annis octo. Et plures secum duxerat è ſocietate noſtra ſtrenuiſſimos dominicæ vineæ operarios. Cum ecce, nouæ ſubitò exortæ difficultates, Tunchinenſis expeditionis conſilia ferè diſcuſſerunt. Veniebat quippè in mentem luſitanis, primùm quidem ſe non ita pridem ſuſpectos fuiſſe regi Tunchinenſi, deinde antiqua cum Cocincinenſibus neceſſitudo, & beneuolentia, ac demùm nouerant vnum è proceribus eſſe in aula regia familiariffimum principi, cique in paucis Charum, qui luſitano nomini

B b

eſſet

esset infensissimus, vnde sibi meritò timerent multas insidias, strui posse: obstabant præterea mercatores qui prioris anni nauigatione, conquerebantur se nihil prorsus fecisse, lucri, proptereaque vix vllus erat, qui se ipsum ac merces suas exponere vellet periculo, & de instauranda nauigatione cogitare.

Aliunde verò P. Iulianus licèt superioribus nostris magnā spiritualis profectus spem ostenderet; ipse tamen cum totus iam esset in paranda expeditione Iaponicā ad quam cupidissimè inhiabat, Tunchinenses omnes Curas posuerat, quod idiomatis Tunchinensis esset inscius, Iaponicum autem optimè calleret; vnde nec potuerat adultis Christum annūciare, sed quatuor infantes morti iam proximos, lustralibus expiatis aquis transmiserat in cælum, velut primos manipulos Tunchinensis agri, horreis Cœlestibus inferendos: atque illorum quatuor infantium, stantium ante thronum Dei & agni, precibus factum esse arbitrarus sum, vt ad prædicandum in hoc regno Euangelium rebus triremis omnibus necessariis instructa fuerit, & ferentibus vsa, ventis portum feliciter tenuerit.

Cum enim spes prope nulla superesset, inueniendi hominem, qui nouam hanc expeditionem suscipere auderet, inuentus tandem Amacai est nōbilis Lusitanus opibus pollens, sed pietate clarior, cui nomen Ioannes Pintus de Fonseca. Is negotiū totum cupidissimè aggressus, onerariam parauit, & magnificè instruxit, quin & nobis comiteum vltro parauit pietatis, maiori accensus studio quam lucri: ratus nequaquam defuturam sibi mercedem tam eximij operis in cælo, si emolumentum temporalis tunc copia minor esset, ea

re

re auditâ P. Palmerius, duos statim ad id munus obeundum designat P. Antonium Marquez Lusitanum, ætatis iam prouectæ virum, & maturæ prudentiæ, scientissimum missionum earum Orientalium, sed Tunchinensis tamen linguæ parum peritum, ac me quoque illi socium itineris adiunxit, & consortem laborum.

Anno itaque sexcentesimo 27. supra millesimum 4. idus Martias Magni videlicet Gregorij sacro die soluimus Amacao, & secundissimis ventis in Insulam Sanchoam delati, ex itinere inuimus nobile Apostoli nostri Sancti Xauerij sepulchrum, ac deinceps Pelagus Gainamicum ingressi, placidissimè nauigauimus per ea maria, quæ cum pluribus procellis plerunque horrida esse soleant, tum eo tempore pacata & plene lactea fuere, fauente opinor, & ventis imperante Tunchinensis regni præside Angelo postmodum autem nauigationis die 7. cum propè iam esset ut læti portum ingrederemur; exortâ sub noctem repente tempestate in altum repulsi, luctari cœpinus cum fluctibus, & spectris quorum horresco aspectu, nauæ terrebantur. Durauit autem procella vsque in 19. Martij Sancto Iosepho festum diem. Tunc enim magni illius Patriarchæ iussu, posuere venti, & euanescentibus dæmonum latus, totoque maris furore placato, per commodum portum subiimus, quem Tunchinenses dixere hætenus *Eua bang* nos ex patrono dici quo ad illam appulerat nauis, Sancti Iosephi portum deinceps nominandum censuimus, præparabat videlicet Dei prouidentia nutrix Optima Ecclesiæ Tunchinensi mox

B b 2 nascituræ,

nascituræ, eundem illum nutririū, cuius curæ ac fidei filium suū vūigenitū crediderat. Explorauit itaque Nauarchus primū stationis opportunitatem, deinde cum extensionem commodissimā ibi fore iudicasset, direxit eo vela, & latissima omnium gratulatione portum inuecti sumus.

Vix terram attigeramus cum ecce tibi frequens, & & gratulabunda, è vicino pago Tunchinensium turba plenis ad nos scaphis accedit, cupidēque interrogat quinam & vnde simus; quidve nouarum mercium asportemus. Quibus ego statim, omnium nomine, quorum interpres tunc erā, nauim hanc esse Lusitanorum, quorum gloria omnes orientis terras, latissimè peruagata esset; tum propter bellicam eorum laudem, tum propter pretiosissimarum mercium raritatem quas nauibus importabant suis. Nunc autem ea naui margaritam deferri pulcherrimam, & exquisitissimam, quam qui Coemisset, is proculdubio tota reliqua vita diues, & in æuum etiā omne beatissimus futurus esset: neque vero debere quemquam de pretio esse sollicitum, neminem esse adeo egentem, qui ad eam comparandam satis diuitiarum non esset habiturus. Ad has voces exultare omnes gaudio, atque auidè expetere, magnæ illius ac nouæ gemmæ saltem conspectum, tum ego negaui esse illam huiusmodi, vt corporeis oculis conspicua tanta eius species esse posset; non patere illam nisi mentibus, & intelligentiæ, cuius esset ratio & sagacitas, verum discernens à falso. Illam enim non esse aliud quam veri Dei certam, & ratam legem, omnibus Indiarum gemmis, mercibusque pretiosiore, quod sola illa sit ad
æternam

æternam & felicitàssimam vitam via. Eam nos edocere ac palam proponere paratos esse : non alio consilio ingentia emensos maria Tunchinum aduenisse.

Vbi audiuit multitudo auida ; legis nomen , quam litterati , *dau* , plebeij *dang* , idest viam nuncupant , exquisierunt confestim quæ nam vero sit noua illa , & tam sancta lex , quam annunciare pararemus. Hic ego peropportunam occasionem dicendi nactus sermonem exorsus sum à primario rerum principio & authore Deo. Cum enim torâ illâ linguâ vocem vllam vix inuenirem , quæ satis idonee Deum optimum maximum exprimeret , statui non aliud mihi vsurpandum esse nomen quam supremi opificis vniuersorum. Quod enim ipsi *Phat* & *But* nominant , id nomen est potius Idoli nescio cuius , quàm veri ac summi Dei. Cum itaque scirem quàm malè apud primarios quosque ; ac præsertim Doctores audirent Idola , abstinendum mihi prorsus duxi ab eâ nominis appellatione , atque illud solum vsurpandum , quod à magno Apostolo assumptum memineram Athenis in Areopago. Hic Cœli & terræ cum sit Dominus. Eo enim mihi similiter vtendum putaui , vt magnum aliquid , & tantâ dignum magni Dei Majestate conciperet animo hi populi quibus Deum annunciabam. Neque me spes fefellit. Cum enim in primo illo introitu sermonis assererem veram illam legem , in eo potissimum sitam esse , vt verus Cœli ac terræ Dominus ritè colatur , duo ex primariis , & nobilissimis in illo cœtu auditoribus Christi fidem amplexi sunt , ac paucis post diebus , de necessariis rebus eruditi cum familiâ quisque suâ baptismum susceperunt : primo

Iosephi nomen est inditum, ad memoriam Sancti Præsidis cuius auspiciis, & festâ solemnitatè Tunchinum appuleramus; secundum diximus Ignatium ex optimo & suauissimo Patriarchâ nostro.



*Multorum ad Christi fidem conuersio, in pagis
vicinioribus.*

C A P V T I V.

INTERIM dum de aduentu nostro perferuntur ad regem nuncia, quindecim diebus commorandum nobis necessariò fuit in oppido Sancti Iosephi, id autem tempus nobis commodissimum visum est vt Circuniacentibus latè populis, viam salutis edocendis sedulò insistere-
mus. Cum ergo ex pagis omnibus frequentes ad nos fierent concursus hominum quorum Deus tetigerat corda; prima nobis, imo magis Christo, eaque sanè opima præda fuit ludimagister quidam celeberrimus, & vicinis circumquaque pagis notissimus. Is enim cum priùs litteras Cinenles cum plurimis erroribus pueros docuisset, seriò ad fidem animum adiecit. Et cum familia omni amplexus est Christum, ex magistro erroris, repente factus discipulus & Doctor veritatis. Tradidimus enim ei statim ex scripto quotidianas Christianorum preces, vt eas ipse addisceret, & doecret cæteros diebus maximè dominicis, atque in eo munere vicarium illi adiunximus filium, indole optimâ iuuenem & Cincnsibus litteris egregiè imbutum.

Venit

Venit ad me, illo eodem tempore sortilegus quidam, in alterâ fluminis parte omnibus notus; qui domi vigintiquinque aras dicatas habebat dæmonibus, vexabaturque ab illis crudelissimum in modum. Venit igitur ad me **vt** exquireret vtrum ab eo tam feroci Domino liberari meâ ope posset. Si eriperetur tam infesto carnifici, totum se statim in potestate meâ futurum; nos illum confestim omni metu liberum esse iussimus, crederet tantum in Christum, & salutare ipsius signum; crucem scilicet, obiicere auderet hostibus, eo viso abscessuros improbos spiritus, neque ipsi vsquam molestos futuros, actum quidem, armatum illum cruce; sed baptismo tamen dilato ad aliquod tempus, dimisimus, vt interim aras illas omnes prophanas dirueret; diruit autem quam primum, & domum totam benediçtâ respergens aquâ, liberatus ab omni molestiâ infestorum Læmurum in numerum filiorum Dei per baptismi Lauacrum adlectus est.

Verfabatur in eodem Pago Ethnicus alter, domi nobilis, & magnæ inter suos authoritatis. Ille hætenus tam impenso cultu idola veneratus erat; vt eâ superstitione superare reliquos omnes vulgò putaretur; sed eorum tamen vana mendacia, vbi accepto cœlitus lumine agnouit, damnare illicò cœpit priorem vitam, & Christianis imbutus sacris, prophana dimisit templa, quin & reliquorum etiam neophytorum doctor constitutus quâ verbo, quâ exemplo ad omne pietatis officiû quoniam nium animos mirabiliter incendebat: Agebantur eo tempore, maioris (vt Christiani vocamus) hebdomadæ sancti dies quos pro eo vt decet, cum celebrare cuperemus deuotissimè, author fuit P. Marquez
vt

vt sanctissimæ crucis signum, quantâ maximâ possemus Cæremoniâ, & apparatu à nobis, & à Lusitanis omnibus erigeretur, in præcelsi montis vertice, vnde toto latè mari conspicuum esse posset, placuit omnibus consilium, quibus æquissimum visum est toto eo tempore passionis Christi Domini memoriam peragere: vt agnoscerent neophyti quantâ veneratione prosequi deinceps deberent sacrum illud vexillum. Tum etiam vt eo solemniter erecto ac consecrato dæmon ipse intelligeret, nihil sibi reliquum esse in illis terris, à quibus Christi victoris potentiâ depelleretur. Christum enim solum posthac ibi regem ac supremum gubernatorem futurum. In eo enim monte templum erat, nefariæ illi meretrici sacrum, quam à Cinen-si rege patre suo demersam ob turpissima scelera, olim reruli. Quoniam vero integrum nobis non erat prophanam hanc ædem solo æquare, id saltem ad pudorem dæmonum perficere constituimus, vt dedicatâ Christi cruce, in eminentiori montis vertice, qui etiam templo dominabatur; territus nequam spiritus loco cederet.

Igitur exsecta primum est è vicino nemore arbor Procerissima, atque in crucis figuram scitissimè conformata: tum sextâ feriâ hebdomadæ illius sanctioris, frequentes conuenere fideles omnes ad solemnem pompam, & imposito humeris suauissimo illo crucis onere, processere ad destinatum montis cacumen, atque in eo trophæum Christi seruatori securi defiximus. Præmissaque Christiano ritu benedictione proni omnes, & adorabundi, procubuimus, venerantes in eo Christum, & dæmonem execrantes. Accepimus deinde
regem

regem ipsum, cum per maria monti subiecta; cum exercitu vela faceret, conspectâ eminens cruce quâ-
fuisse, quidnam hoc esset rei, & num illud esset
signum quod Lusitani tantâ veneratione colerent.
Reposuit vnus è proceribus Christianorum amantis-
simus. Huiusmodi esse labarum illud, vt in quâcun-
que regione scirent Lusitani erectum illud esse, in eam
libentissimè cum omnibus diuitiis, atque pretiosissimis
mercibus conuenirent, eo audito rex aduertit at-
tentius ad ipsam crucem, defixisque diu in eam ocu-
lis de illâ ibi erectâ sibi, ac regno toti gratulatus est,



*Primus nostrorum in regiam ad regem ipsum
ingressus.*

C A P I T V L V M.

INterim dum hæc agimus, & in toto eo por-
tu Christum pro virili annunciamus, cui duo
& triginta nomen dant in Baptismo, adest tandem
expectatus à rege nuncius, significatque illum è re-
giâ ciuitate iam egressum; magnis itineribus aduer-
sus regem Cocincinæ cum exercitu proficisci; sed
ab eo tamen expectari, & euocari Lusitanorum dele-
ctam manum, cuius conspectum cupidissimè deside-
raret. Nihil potuit nobis eo tempore iucundius con-
ringere. Ideoque omnibus statim in portu valere
iussis, ac confirmatis neophytis in fide, nauim con-
scendimus ab Eunuchò prepararam, & biduò post,
deuenimus in amplissimum quoddam flumen, latitu-

C c dine

dine vt ego quidem coniiciebam sex milliarium Italicorum. Per illud nauigauimus dies aliquot, ac tandem regem inuenimus cum naualibus copiis numerosissimis & eximiè instructis, hoc fere ordine.

Antecedebant regem triremes ducentæ, affabrè factæ, multoque auro, ac picturis egregiè ornatae, militum in his plurimæ cohortes, omnes in armis vestituque, quem aliàs descripsi, sed pileo purpureo, & rotundo, procedebant triremes tanto cum ordine, vt terrori simul, & voluptati esset ille tam multiplex & varius aspectus; sed nihil tamen mirabamur magis, quàm remigantium eximiam industriam. Mouebantur enim tam iustâ, & æquabili concordia, vt vnum omnes viderentur esse corpus, & eâdem virtute agitari. Sequebantur triremes aliæ viginti quatuor, in quibus rex ipse cum prætorianis cohortibus vehabatur. Nitebant illæ auro plurimo, carbasinis prætentæ velis, funibus sericis, ac purpureis. In medio earum vnâ vidimus cæteris capaciorem, ac locupletiolem, atque in eâ regem, ad quem humanissimè admissi statim sumus cum incredibili significatione beneuolentiæ.

Primum autem obtulere Lusitani munera, temporè accommodata, arma scilicet præclarissima, quibus vteretur ipse rex in præliis, & nos quoque modica quidem sed religiosa quædam dona dedimus, quibus maiorem in modum delectari visus est Rex, qui sua vicissim singulis munera rependens, omnes incredibili beneuolentiâ deuinxit. Neque verò tunc potuit diu cum Lusitanis colloqui, quod in belli cogitatione torus esset, ideoque dimissis illis, iussit tamen vt
seque

sequeretur exercitum oneraria nostra, donec ipse decerneret portum, in quo commoda nobis esset statio, usque ad exercitus reditum è Cocincinâ. Itaque regium illum exercitum, aliquandiu sequuti, reliquum omnem apparatus bellicum opportunè vidimus, & ingentem illam navium copiam, quæ primo agmine maior erat præter quàm Cymbarum & Myoparonum multitudo, erat sanè innumerabilis ad vehendas sarcinas, & mulieres etiam ipsas, quarum pars maxima, in viciniore prouinciâ *Thinboæ* dimittenda erat, eo quod tutiores ibi essent futuræ ab hostium incurſibus. Ad hæc quingentis quoque aliis onerariis portabatur necessarius ad tantas copias commeatus: numerabantur enim in exercitu partim terrestri; partim maritimo, pugnatorum millia ducenta, elephanti trecenti, qui bellica traherent tormenta.

Interim autem dum regem sequimur, opportunissima sæpius sese obtulit occasio, benè de plurimis merendi, ad eos enim qui ad nos vndique conueniebant frequentissimè de diuinis rebus loquebamur; & de Christi lege palam dicentes audiebamur attentissimis auribus, & animis. Sed nemini tamen in tantâ illâ rerum perturbatione persuasum est vt Christum fusciperet. Cùm autem in amplissimo quodam Campo, non procul à pago cui nomen *ambuc* rex exſcendiſſet, ad solemne sacrificium peragendum, è regione altissimi cuiusdam montis, cuius in vertice supremo templum eminet idolis dedicatum, casu accidit vt miles ex Elephanto in proximi fluminis alueum propè mergeretur: atque sine morâ ex aquis extractus pro mortuo diù habitus est, donec ad eum

nos accedentes, fufis coram ingenti circumstantium coronâ multis precibus, medicamento etiam aliquid adhibuimus, tam felici fuccellu, vt miles repente surrexerit incoluncis, & ad folita etiam munia redierit. Obftupere ad tam repentinam valetudinem fpectatores omnes; atque paulò poft auditâ eâ, Rex factum magnopere approbavit, & noftros etiam laudibus ornauit.

Cum autem commodiffimam eam iudicaret effe ftationem, Lufitanam nauim fubfiftere iuffit in eo portu, ex quo deinde illam fecum reducturus effet: eius ergo cuftodiæ præfecit Eunuchum quendam notiffimæ probitatis, magnæque apud omnes famæ; cui Lufitanos omnes impenfiffimè commendans imperauit, vt in fidem fuam, & Clientelam illos fufeiperet, atque omni periculo eximeret. Præftitit id ille uti potuit cumulatiffimè, primumque percommodam nobis è ligno extruxit domunculam in quâ dedicatum ftatim eft facellum, vbi folemni ritu, & summâ Lufitanorum omnium gratulatione, fagra faluatoris imago ad omnium venerationem expofita eft.

Hic ego, antequam ad ea quæ poft eâ fequuta funt deueniam, obiter dicam de caufis belli huius quod Rex tanto ftudio geffit. Superiore libro narrata eft *Ciua on*, primi regis Cocincinæ nefaria proditio. Is enim cum à Tunchini rege cognato fuo miffus effet gubernator illarum prouinciarum, excuffit ipfe Iugum ac tyrannicè dominationem omnem inualit. Plurima dehinc fequuta bella; demùm fancita inter vtrunque pax eft cum onere tributi annui, à Cocincinæ rege perfoluendi. Religiofe id pluribus annis feruatum eft, do-

nec

nec pertæsus seruitutis, atque impatiens Iugi tertius ab illo primo inuasore rex, cogitauit de negando vetigali debito, præsertim cum ex Lusitanorum crebro in Cocincinam commeantium amicitia, & sociorate factus esset animosior, Atque ad arma promprior: hanc autem exequendi huius consilij sui rationem iniit, legatum solito more destinauit ad Tunchini regem, duasque illi Cistas tribuit egregiè ornatas, & pretiosissimis plenas donis, quæ partim acceperat, à Lusitanis, partim ex Cinis, aut etiam Iaponibus Coëmerat. Mandat autem legato, vt nouum Tunchini regem primùm salutet. Vnamque illi è Cistis offerat, & alteram eodem tempore cæteris regni proceribus, rege ipso præsentente ac inspectante.

Id cum legatus accuratè peregisset, odoratus rex id quod erat, & vehementiùs iratus, itànc? vero inquit tuus me ludit herus, & in parrem imperij subditos meos vocat, Quos æqualibus mecum donis afficit. Age inquam, & ad illum properè aduola, suas sibi Cistas habeat, & munera omnia: ego ipse tributum ex prouinciis illis meis citò reperam, bellum sedulò paret, & certas tantæ temeritatis expectet pœnas. His dictis legatum cum allatis muneribus remittit, & ad bellum de quo diximus, cogitationem omnem ac curam adiicit.



*Magni Ethnicorum concursus ad audiendum in primâ
Tunchinensium Ecclesiâ verbum Dei.*

C A P V T V I.



BI primùm ad ministeria nostra ritè
obcunda locum satis idoneum nacti su-
mus, maximi statim vndique facti sunt
ad nos concursus. Atque in his plurimi
avidissimis auribus excipientes verbum salutis, ba-
ptismum susceperunt, quorum plerique sacrificuli erant
idolorum. Primus omnium reliquos exemplo suo
docuit, vir eximius, & Saiorum antiquissimus. Quem
in eà regione omnes alij observabant vt patrem. Age-
bat ille tunc ætatis annum quintum, & octogesimum,
cum salutaribus baptismi aquis in vitam novam re-
stitutus ac plurimos omnis sexus, & conditionis
homines secum Ecclesiæ matri aggregavit. Nihil au-
tem erat in optimo illo senex quod mirarer magis,
quàm incredibilis quædam, & perpetua cupiditas ad-
discendi fidei mysteria, quorum amore sic tenebatur,
vt à nobis auelli, nullâ vnquam ratione vellet, voca-
ueram ego semel adolescentem quendam neophy-
tum, ad pias orationes describendas, quibus Christia-
ni nostri vterentur, venit ille horâ postmeridianâ quæ
senioribus vulgò, ad quietem concedi solet; id ubi
bonus senex expectatus a somno didicit, iniuriam
sibi factam interpretatus, grauissimè conqueri cœpit,
postpositum se in eo gratissimo munere fuisse iuveni-
Equum

Æquum enim omninò videri, vt qui tandiù erroris venena tradidisset is ad veritatem edocendam, aliis omnibus præferretur. Eâ ego tam piâ delectatus querimoniâ, cœpi polliceri, daturum me operam deinceps, vt sanctishuiusmodi officiis, feruentem eius zelum sæpe satiarem.

Sed neque satis ei erat, hunc tam assiduum laborem pro vtilitate Christianorum suscipere. Cum enim videret arctiora esse nouæ huius Ecclesiæ spatia, quam vt confluentem ad nos vndique multitudinem possent capere, vicinum campum lubens obtulit, vt in eo capacior extrueretur Ecclesia, quod & statim fecere Christiani, ad cuius solemnem dedicationem omnes conuenere Lusitani, cum neophytis, & pulcherrimâ pompâ totum munus obierunt.

Accidit eo ipso tempore, vt quidam regiæ cohortis miles, graui, & subito correptus morbo, morti proximus videretur: neophyti, vt eum in tanto salutis æternæ periculo videre constitutum, venere statim ad nos, obsecrantes, vt miserum hominem adire, ac certæ damnationi eripere conaremur. Factum est, vt expetebant, adimus decumbentem, monemus de instante postremo die, in quo ad diuinum tribunal deducendus esset; & in eo seuerè iudicandus, nisi priùs Christum seruatorem agnosceret, ac per eum à peccatis elueretur. Audit ille sermones nostros aure attentissimâ, baptismum postulat, suscipitque deuotissimè moriturque paulo post inter pia gaudia, & perpetuas de agnito Christo gratulationes. Nos eius funus quantâ maximâ potuimus pompâ publicè peragendum curamus, comitante Lusitanorum omnium, arque

atque neophytorum frequenti turbâ. Quo spectaculo plures è paganis delectati, ad fidem etiam amplectendam subito inducti sunt.

Aderat eodem in loco regis soror. Quæ auditâ Christianorum erga militem illum pauperculum tantâ charitate, magno quodam exarsit desiderio videnti nostros, atque de nouâ hâc lege aliquid audiendi Euocari nos iubet: & venientes summâ beneuolentiæ significatione accipit, quærítque multa de religione, quam ex peregrinis terris inucheremus. Nos oblatâ câ tam præclarâ facultate Christum annuntiandi, dicere cœpimus ad frequentem coronam ducentorum militum, qui regiæ mulieris stipatores erant, & fidei nostræ præstantiam exposuimus. Obiecit fœminæ huic ante menses paucos, maritus, vnicè dilectus, atque inter primarios regni proceres celeberrimus. Rogauit ergo ante omnia, quonam nos egentissimi militis merito permoti, tantis eum & uiuentem, & mortuum officiis curare dignati essemus. Respondi ego nihil nos spectasse illius merita, gratuitum prorsus fuisse illum hominis miseriamorem, sed Christo tamen Deo nostro maximè debitum, per quem ille baptismo lustratus adoptatus in hâc vitâ fuisset in filium: in alterâ verò vocatus etiam in partem æterni regni.

Ad hæc illa, incredibiliter obstupescere, cumque de se nihil admodum sollicita, tota in maritum intenta esset; multo cum fletu interrogare, num religio illa nostra tam præstans, & sancta subsidij aliquid marito suo defuncto præstare posset. Nihil esse quod vel optaret magis, vel iucundius audiret. Ego inclinato

inclinato paululum capite, prophetæ vnus è nostris oraculum illud fixum ac ratum esse pronunciaui in quancunque partem arbor ceciderit ibi erit siue ad austrum siue ad aquilonem. Missos nos esse à summo cœli, ac terræ Domino, vt viuentibus certam salutis viam indicaremus, eorum esse neminem, quem, si vellet ab æternâ morte non eximeremus. Semel in infidelitate mortuis nihil omnino spei vel præsidij esse posse ad veram illam vitam. Audiuit hæc illa multo cum gemitu, sed sibi tamen, ac saluti suæ parùm prospexit. Longè verò prudentiùs, ac cautiùs pleræque aliæ mulieres, his sermonibus commotæ, statuerant sibi ipsis ante obitum prospicere, quarum vna sic secum ipsa cogitare cœpit. Si homines isti quos audimus, regiæ sorori afflictissimæ adulatoriè magis placere studerent quam vera dicere, nihil sanè nunc esset vel gratiæ, vel beneuolentiæ quod ab ipsâ non possent sperare. Si autem duntaxat spondere se affirmarent aliquod auxilium defuncto illi principi, æquis mendacij conuincere posset ita pollicentès. Cum igitur illi tantam vim opum pro nihilo habeant, quam nullo negotio possent assequi, prædicant haud dubiè nobis vera, & certa, eaque nos si amantes sumus salutis, amplecti seriò debemus. Sic illa primum quidem apud se tacita statuit, ac postmodum cum aliis pluribus quas illa Christo lucrata erat, fidem & baptismum cupidè suscepit Monicaque nomine donata est.

Soror autem illa regis tamen si neglexit monita salutis, neque sibi per baptismum consuluit; sollicitè tamen curans, vt viri sui mater vetula, & morti

D d

proxima

proxima Christiano baptismo ablueretur, id quod à nobis enixissimè illa postulauit. Felicissimâ sanè moribundæ fœminæ sorte, quam vbi Christo aggregatam, Annam nuncupauimus, eam Deus breuissimo interuallo postea defunctam beatorum suorum numero (vtri speramus) adscripsit.



Alij plures ex pagis vicinis fidem amplectuntur.

C A P V T VII.



Æc dùm aguntur, latè per vicinos pagos, nouæ huius fidei ac religionis fama volat; plurimosque quotidie Christo aggregat. Id quod vnus è primariis prouinciæ gubernatoribus postquam audiit, exarsit cupiditate addiscendæ tantæ rei, nosque ad se accersitos cupide interrogat, ecquid tandem esset noua illa lex quam ex orbe vltimo adduxissemus. Nos hic Christum prædicare studiosè aggressi, fidei nostræ dignitatem & mysteria exponimus. Quæ omnia ille placidissimè quidem audiuit, sed quod abundans opibus, & terrenis affixus, fastidiret cœlestia, nihil illis commotus est ad viam salutis incundam, sed aliis tamen quam plurimis fuere vtilissima, quorum corda hac data occasione, cœlestis aura benignius afflauit, & ad veram fidem perduxit. Præter cæteros autem, celeberrimus quidam sayus, conuersione mirabili ad Christum fideles omnes magnopere delectauit. Præerat illi templo Idolorum, quod olim dixi in modum pyramidis, emi-
nere

nere conspicuum in supremo montis cuiusdam vertice. Tantum verò apud regem valebat gratiâ, & apud Tunchinenses omnes autoritate ut in Cocincinensi expeditione rex preces ab eo postulauerit, & à populo passim tanquam sanctus haberetur: at ille ubi melioribus sacris est institutus, idola statim cœpit detestari, & totum eorum cultum ut prophanum reiicere: suscepit autem piissime baptismum cum familiâ vniuersâ: Ioannes in eo dictus, & vxor Anna quorum exemplo multi ex eodem pago postea incensi, magistrum cum habuerunt salutis, quem sæpe ante Doctorem erroris audierant. Domum quippe suam, conuertit in domum orationis & Ecclesiam in quâ ipse in edocendis diuinis mysteriis totus erat, virumque impigrè iuuabat in eo munere pia coniux, quæ mortuo etiam marito idem vitæ institutum tenens, innumeros homines præsertim consanguineos Christo adiunxit.

In altero quoque pago, qui situs in altera parte fluminis *vanno* dicitur vetula quædam erat Idolorum superstitionibus mirè dedita, illa ubi fidem amplexa est tantum feruoris concepit animo, ut omnes ad baptismum continuò vocaret. Angebatur tamen intimis sensibus quod virum deuexa iam ætatis hominem illicitis adhuc irretitum amoribus, nondum posset ad, Christum, & pietatem traducere. Sed vicere tandem Linæ preces (id enim piæ mulieri nomen erat) depon-tani senis improbitatem, passus enim demum est, eripi sibi nequissimam pellicem, & sacro baptismi lauacro expiatus, vnâ cum liberis omnibus etiam ex adulterâ susceptis duplici victoriâ coronatus est, & superatâ

infidelitatis, & compressæ turpissimæ libidinis. Exultabat in hac mariti sui tantâ felicitate, coniux deuotissima, & per opera pia quotidie satagebat, vt plurimû ad eandem baptismigratiam accederent. Imo & in egentium neophytorum subsidium curauit erigi domum, quæ peregrinis hospitium esset, & ægrotantibus xenodochium. prope aberat ab Ecclesia nostrâ, Ethnicorum Elephantiacâ lue laborantium habitatio. Affluxit statim ad eos rumor de nouâ quâdam doctrinâ quæ sectatoribus suis certò sponderet æternam, post vitæ huius ærumnas, salutem. Nihil miseris optatius poterat contingere, quàm remedium tot malorum. Excepere audis animis nuncium adeo salutare : atque omnium primus agmen duxit Simon quidam Cinesis littererarum doctrinâ excultissimus, deinde verò Christianæ pietati adeo deditus, vt preces omnes nostras cum præceptis decalogi, aliisque omnibus Christianis officiis, primùm ipse sedulò addisceret, deinde sociis omnibus accuratè traderet, ac diebus etiam omnibus festis publicè recitaret, vt quos morbi tabes, Ecclesiæ ingressu prohiberet, ij saltem priuatim munia omnia obirent homine Christiano digna.

Sayorum



*Sayorum inanes conatus , & plurium ad fidem
conuersio.*

C A P V T V I I I



Vm autem adeo prosperum res nostræ
cursum tenerent , non poterat se ulterius
continere dæmon , quin per impios emis-
sarios , profanorum sacrorum ministros
conceptram in seruos Dei rabiem effunderet. Cum
enim viderent Sayi quotidianos fieri ad fidem susci-
piendam multorum concursus , die quâdam cœpere
omnes facto agmine ad nos conuenire , nouam hanc
doctrinam nostram traducere ; iactare minas , ex-
poscere à nobis vt disputatione factâ , errores nostros
publicè conuellere liceret. Nos mirari dementium
hominum temeritatem , & optatissimam facultatem
naçti , conuincendæ impietatis , annuere nihil esse
quod iamdiu magis expeteremus. Effecturos nos
breui , vt vel auditâ veritate resipiscerent , vel negle-
cta , Pœniteret eos proiectissimæ audaciæ aggredimur
ergo demonstrare quam essent vera quæ de religione
nostrâ diceremus , quam fatua , & inania quæ illi pro
superstitione suâ opponerent. Applaudebat dicere
volentibus , frequentissima gentilium corona , opta-
batque audire hinc inde disputantes. Sayi contra ni-
hil timentes magis , quàm errores , palam cum supinâ
ignorantiâ prodere , concertationem abnuebant , &
chartulam tantum quandam , confectis in nos ple-

D d 3 nam

nam contumeliis recitare contendebant. Nos verò, totaque concio, ridere nefarios impostores, & vanarum calumniarum confarcinatores, conuicturos nos facillimè inania mendacia, quibus fama nostra perebatur. Audirent tantum quæ nos de Deo nostro dicturi essemus: aures & animos ad mysteria tanta panderent, occluderent ad nugaces fabulas, & prophana somnia.

Tum ego inspectantibus omnibus, aperire atque in altum tollere cœpi sacra biblia; & quantâ potui voce illud ex primo Genesis distinctè intonare in principio fecit Deus cœlum, & terram. Siluere omnes etiam Ethnici ad hæc verba; & prolata sententiæ, declarationem patriâ sibi linguâ fieri expetentes, damnauere Sayos, qui strepitu factò, & clamoribus inconditis omnia miscebant; donec tandem potentissimi cuiusdam Eunuchi aduentu territi, deposuere audaciam, & inter minas, ac probra, furibundi abcessere. Reliquere autem nobis liberum spatium opportunè dicendi ad frequentem turbam de propositis scripturæ sacris verbis, quod & magno cum gaudio ac approbatione plurimorum, accuratè fecimus: constititque operæ fructus, nam maiores deinceps ad nos facti sunt concursus, & plures, agnito errore, damnauere tenebras suas, & Euangelio credidere.

Fuit autem alia quædam occasio grata in primis nobis, & fidei prædicandæ opportunissima: adiacebat habitationi nostræ, publica platea, frequentissimo semper plena populo hic nos aliquando dicere aggressi, & futuræ vitæ magnitudinem explicatiùs proponere, tantos repente vidimus existere motus animorum,

morum , vt plurimi meliora cogitantes, capeſſere decreuerint viam ſalutis quam videre cœperant. Præter cæteros autem litteratus quidam iuuenis , moribus etiam nobilior, quàm ſcientiâ , vix finitâ concione, totum ſe deuouit Chriſto, atque optabat etiam adiungere ſe nobis ſocium laborum, niſi vxori paucis antea menſibus mancipatus fuiſſet ; neque tamen deſtitit poſtea , omni nos operâ ſuâ , & opibus impenſè iuuare.

Idem in aliis plerisque pietatis ardor accenſus eſt, inter eos erat neophytus quidam prouectæ iam ætatis & virtutis , qui cum ex *Haïam* pago vicino-
re veniſſet ad fidem , tanto flagrare cœpit deſiderio reuocandi ſuos ab errore, vt in eâ vnâ cogitatione dies nocteſque defixus hæreret. Audiuit autem aliquando , ſcœminam nobilem ciuem ſuam malè à dæmonio vexari quod ille non ferens inſtantiffimè ſtatim monuit , vnum illi remedium ſalutis eſſe ſi Chriſtum vellet profiteri , abſceſſurum illicicò iniquum hoſpitem, audito Chriſti nomine.

Paruit illa , & fidem cum baptiſmo ſuſcipiens
corpore ſimul ac mente libera euasit à
malo dæmone, quem vt totâ etiam
domo , exire cogeremus , ad
eam nos quàm primùm
acceſſit.

Regis



*Regis Tunchinensis é Cocincinensi expeditione
reditus.*

C A P V T IX.

DVos iam menses in expeditione Cocincinensi, Tunchinensium rex consumpserat, eoque tempore nos in prouinciâ *Thinh hoa* eius iussu commorati, ducentos circiter Christo adiunxeramus Neophytos. Cum autem videret difficiliores esse, quàm sperauerat, aditus in hostile regnum, ac suorum etiam insidias metueret, cogitare coepit de reditu, copiasque partim fractas, partim fatigatas reduxit in patriam. Non deerant qui dicerent offensum esse, atque alienatum à Lusitanis, regis animum, quod certò comperisset visos esse in Cocincinensi exercitu plures Lusitano habitu, vulgoque iactaretur aduënisse in Cocincinam auxiliares eorum copias, quod Tunchinensi regi erat haud dubiè molestissimum. Verum resecitum postea est fraudem eam, & stratagema fuisse Cocincinensium, qui ut hostes arte vincerent, quibus robore inferiores erant, stramineas quasdam statuas Lusitanico habitu in præcelso montis vertice collocauerant, oblongo armatas baculo instar catapultæ, quorum specie obiectâ decepti Tunchinenses prælium detrectarunt.

Altero præterea, & Tunchinensibus copiis acerbiori stratagemate Cocincinenses ingeniosissimè vsi sunt. In primis Cocincinæ iuxta Tunchinum finibus,
portus.

portus est, quem dicunt incolæ *Cua Sai* per quem necessè omninò erat transire naues Tunchinenses priusquam in terras hostium appellerent. In eo ergo portu, imò & in toto amplissimi fluminis alueo, Cocinenses Crassissimos ex utrâque rippa subtendere funes præacutis intextos clavis, & pluribus implicatostribulis, ut nimirum triremes secundissimo vento in portum delatæ, quo inueherentur celerius, eo funestius in occultos illos laqueos impactæ, mergerentur: neque spes ipsos fefellit, cum enim velis remisque expeditissima illa Classis, hostiles triremes adorirerur, incidit repentè in latentes pedicas atque iis miserè impedita, deuoluitur in fluctus, & naufraga obruitur; milites vero ac remiges, luctati aliquandiu cum aquarum vorticibus, incidunt in funes & clauos & fœdum in modum lacerantur: ferunt periisse illic, absque vlllo conflictu Tunchinensium ad tria millia, spectantibus ex aduerso, & otiosè triumphantibus aduersariis.

Non defuere tamen plures è Tunchinensibus, quibus in tantâ suorum clade, intrepidus fuit animus. Ausi enim sunt adhuc, plerique inter eos laqueos periculum contemnere, easere in terram, aciemque ex hostium aduerso instruentes, vlcisci parabant prælio fraudem illatam. Sed rex præsentis periculi specie deterritus, & vltiores etiam insidias reueritus repressit impetum suorum, receptaque in naues imperato, maluit re infectâ in patriam regredi, quam experiri deteriora.

Aduentu igitur regis vulgato, magna Lusitanis omnibus iniecta est cura; quoniam ille modo in ipsos ani-

E e matus

matus veniret. Ac nos totâ primùm re Deo enixissimè commendatâ, in ancipiti eo negotio statuimus præire Lusitanis viam ad ipsum regem, venire ad eum, & felicem gratulari reditum. Libellum tunc habebamus de Sphærâ Euclidis, Cinico idiomate conscriptum à nostris patribus apud Cinas degentibus, & figuris etiam Mathematicis pulcherrimè ornatum. Summâ cum voluptatis significatione rex illum excepit, euoluit, perlegit, nosque humanissimè vocatos, propiùs ad se accedere iussit, statimque rogauit, vt de oblato libello aliqua explicare & tam recondita hæc arcana recludere ne moremur: hic ego in concessu illo regio, confestim aggredior. Cœlorum magnitudinem exponere; de astrorum periodis, motibus, & statidnibus pauca quædam, & iucundiora prælibare, affectâ enim iam die, optabat quidem, quamuis lassus de viâ, rex protrahi sermonem, sed rogabatur à suis, vt fatigato corpori quietis aliquid daret. Instaurari posse iterum doctissimam disputationem, postquam recreatis viribus ad audiendum regressus esset. Annuit rex suorum votis, postulauit breuissimum ad quietem, tempus, moxque rediens, iussit vt de pulcherrimo argumento iterum dicere ne grauer. Multa ego igitur primum de cœlo, & omni siderum ordine loquutus. facillimè deflexi, orationem ad supremum cœli conditorem ac Dominum, & infinitam eius potentiam sublimius exaggerans, deueni etiam ad æterna supplicia & præmia. Cumque multam in noctem, duas iam horas dicendo tenuissem, attenderentque taciti omnes aulici, atque vix, ipse immotus, & subridens incredibiliter delectari videretur; Satiùs
tamen


tamen tunc iudicavi ponere orationi modum, postulatâque veniâ discedere; applausere omnes, & multis laudibus extulere quæ audierant, atque in primis rex ipse incredibili humanitate prosequutus abeuntes, eximiis donatos muneribus, in diem alteram, valere iussit.

Constitit sanè, congressus illius nostri, fructus eximius, nam tametsi regem ipsum non satis permouit, ut Deo vocanti obediret; primarium tamen aulae totius ducem, militum prætorianorum præfectum, usque adeò immutauit, ut finito statim sermone, in rempestâ illâ nocte ad nos accesserit, baptismum omni obsecratione postulauerit, Christumque palam quem paulò prius audierat palàm professus sit. Sed dilata in tempus opportunius res est, eximiâque deinde pompâ matri Ecclesiæ, cum amplissimâ familiâ filius adscribi voluit.



Summâ regis voluntate in Tunchini regno, morari iubemur.

C A P V T X.

 Vm igitur eâ nos humanitate, ac beneuolentiâ rex quotidie comprehenderet, & crebro etiam ad se venientes in Colloquium honorificè admitteret. Nemo tamen ex iis qui amicissimo erant in nos animo, audebat adhuc ab eo postulare, ut nos, abeunte Lusitanâ naui manere in regno suo pateretur. Grauiissimi huius negotij

Ec 2 cura,

cura, cum nos dies noctesque vehementer augeret, tum nihil in eo videbatur melius, aut certius, quam recurrere ad exposcendam in retam ancipiti, & ambigûâ diuinam opem. Neque frustra fusæ preces, quippe casu factum est, vt in peruigilio Sancti Ioannis Baptistæ, ad regem salutandum admissi vltro in triremem ab ipso vocaremur. Hîc statim horologium illud rotatum proferri iubet, quod ei ad bellum proficiscenti oblatum à nobis erat. Obscecratque vt artificium eius omne, atque vsum aperire aggrediamur. Hactenus enim, machinam huiusmodi tantâ elaboratam arte profitebatur se nullam vidisse eodemque tempore clepsydram horariam, ex puluere dono à nobis acceptam proferebat.

Nos facillimo statim negotio, illud horologium opportunè ad horarum pulsûm componimus, inuersâque simul clepsydrâ regem monemus, in horologio illo rotato alteram haud dubiè horam pulsatum iri, eodem ipso articulo quo totus clepsydræ illius puluis in inferiorem vitreæ sphærulæ partem èfluxisset: hîc verò rex mirari, & expectare cupidissimè finem horæ; vt dicti comprobaret fidem. Medio autem illo interuallo volumen illud Cinicum proferret, quod paucis ante diebus obtuleramus, rogatque vt interim dum spatium horæ præterit, subtilius aliquid ex more differamus. Auditque libenter dicentem, & subinde audiendo intendit oculos ad clepsydram, monet autem ad finem horæ fluxisse totum puluerem in clepsydrâ; neque tamen alterius horologij rotulas dedisse pulsûm alterius horæ. In ea regis voce, ecce tibi opportunissimè datur
hora

hora mirante rege , atque incredibiliter singulare artificium prædicante.

Vnde postea factum est ut munusculis illis nostris magnopere captus, eximie de nobis, ac rebus omnibus nostris sentiret: tunc autem ad me conuersus, video inquit excessuram propediem è finibus regni mei Lusitanam nauim vestram: nùm vero sustinebitis ut per annos aliquot vos ego hic mecum habeam. Si annuitis, erit mihi sanè iucundissimum, frui conspectu isto, & congressu vestro, & in publicis etiam negotiis vestra consilia exposcere. Nos quibus nihil magis in votis erat, quam ea regis voluntas, reponimus humillimè. Fore nos in regis potestate, decerneret tantùm quidquid vellet nihil esse nobis posse vel honorificentius vel optatius quam principi potentissimo non ad breuis temporis moram, sed in omnem reliquam vitam, exhibere gratam operam & beneuolentissimam fidem probare.

Hic ille iterum exquirere, nùm ego vnus qui patrium sermonem callerem, mansurus essem an vero molestum esset vtrique disiungi à socio, respondi ego acerbissimum mihi sanè fore in alienà terrà diuelli à dimidiâ mei parte: alterum illum socium mihi ut pote iuueni datum esse patrem, & vitæ ducem. Tum rex ambos igitur habebimus & amicos, & curarum consortes. Nostri eritis, accingite vos maturè ad iter atque in regiam nobiscum venite. Eo nos nuncio incredibiliter lætati, beneuolentissimam Dei prouidentiam demirati sumus, quippe ut totam sibi beneficij huius vindicaret gratiam, passus non erat ut vllam eius partem, quisquam è primoribus posset

præripere, cum fuisset nemo qui deprecator pro nobis apud regem accedere ausu esset.



Profectio nostra in urbem regiam.

C A P V T X I.

PAUCIS igitur post diebus dedit se rex in viam cum exercitu, quo eodem comatu nos profecturi, Christianos omnes aduocauimus, impensèque commendauimus constantiam in susceptâ fide. Fuit iter illud, perpetuæ navigationis diebus nouem, quibus per continentes fluminum, alucos arte præclarissima dispositos vela fecimus, semper extra ipsum mare ad quod ingressi nequaquam sumus. Toto autem eo tempore, cum triremis qua vehebamur, regiæ naui sæpius occurreret: commodum accidit, ut quadam die, coram rege celebriores cantus haberentur, ad quos audiendos humanissimè acciti ab ipso sumus. Ut nos vidit, tametsi defixus erat, in huiusmodi voluptate musicæ, conuersus tamen ad nos, assidere iussit, amantissimèque multa interrogauit, præsertim de concentibus nostris, totoque modulationum vsu apud nos, qualis ille, quàm multiplex, atque frequens esset, cum autem huiusmodi multa quæreret; & ex me vicissim audiret, aduertit pendente è zonâ meâ, precatorium B. V. coronam, rogauitque illicò quid significarent lucentiores illi globuli, aut quem in vsum ira penderent è latere: exposui ego Christianæ pietatis

tatis totam rationem , atque ille statim postulat eam sibi coronulam dono dari , acceptamque collo imponit neptis cuiusdam triennis, quam infirmam blandè fouebat in gremio. Certamque spem concipere animo cœpit posse hoc adhibito amuleto , pelli omnem à puellâ ægritudinem. Quo spectaculo nihil mihi hoc tempore accidere poterat iucundius. Stuidique pro virili , regem in eâ mente ac sententiâ firmare.

Verùm interim dum gratà illâ cautionum voluptate aures mulcet , tibi nuncium audit molestissimum, quod animum abstrahat à musicâ , & ad belli curas euocet. Addiscit nimirùm *Ciûa Cham*, illum iamdiù rebellem , qui latuerat hæctenus inter prærupta montium, quod præsentem regem extimesceret ; audito eius in Cocincinam discessu , descendisse secundo flumine , cum ingenti ducentarum nauium classe, omniaque latè populari. Percutit regis animum nihil tale suspicantem , inopinatâ illâ perduellis hominis audaciâ, statimque ad vindictæ curas conuersus , de hoste opprimendo cogitare cœpit. Sed ille audito aduentu regis , quem adhuc longissimè à regno abesse arbitrabatur fugam illicò capeffit , sed tardius sanè quàm putauerat : insequuntur enim à tergo Tunchinenses , cum velocissimarum triremium duplo maiori numero, coguntque illum dimissâ classe , aufugere per deuia , & per noctis intempestæ tenebras deploratæ saluti prospicere. Cum autem primo diluculo vacuæ triremes apparuere, iubet rex suis, insequantur fugientes, & captos male perdant. Verùm illi quod totâ nocte citatissimo cursu quæsiuissent latebras euasere,

eualere fere omnes. Quinquaginta solùm in manus regionum militum venerunt, quos è vestigio iubet rex, iisdem in illis campis, miserè necari, acerbissimum mihi tunc profectò visum est, spectaculum, cum viderem eos omnes vno tempore diuersis in locis raptari ad mortem, neque posse me adesse nisi paucis. In hoc ergo animi æstu, oculis vnum aliquem designo, quem proximum morti video ad eum vt possum velocissimè, priusquàm ei caput demetatur. Huic ego pro breuissimâ morâ temporis quæ supererat, Christum annuncio & vitam æternam polliceor, si modo credere illi velit, & baptismo eius expiari. Annuit ille, ac tam salutare monitum audius arripit. Sed dum tingere illum Christiano ritu paro, nihil prorsus suppetit aquæ ad baptismum. Remotius enim flumen erat, quam vt miles necem illaturus reditum meum expectare vellet, in his angustiis totum me refero ad preces, & dum anxius omnia vndique perlustro, video tandem non procul à designato supplicij loco, scrobem exiguam pluuiâ aquâ plenam, quam nocte præcedenti, modicus imber effuderat, diuinitus immissus, ad salutem noui huius floris, cœlestibus viridariis statim inferendi. Quid plura manum ego vtramque hâc aquâ impleo, effundo in caput mox demetendum, Petri nomen morituro impono, cuius solemnis agebatur dies. Vix formulam absolueram, cum miles vtrâque manu ensen librans vnico ictu caput à trunco diuidit, animâ vt confidimus in cœlum etiam velocius receptâ. Inde ad alios citatissimo cursu aduolo, sed inutili labore. Inuenio enim omnes iam exanimis, truncatis capitibus, & inter luctus

ac

ac lacrymas tantæ calamitatis, diuina etiam iudicia profundius demiror, quibus effectum esset, ut eligeretur vnus ad gloriam, aliis omnibus in tartarum detrusis.

In hoc mœrore animi, gaudiis mixto, cum ad regiam triremem regrederer; video parari à regis famulis eximio quodam ornatu sacrificium, in quo litare cœlo rex cogitabat, & de victoriâ tam insigni gratum animum exhibere. Quod pro eo ac debui ferens ægerriam, venio ad regem, & triumphi magnitudinem, ac velocitatem verbis ut potui amplissimis gratulatus, subiungo, satiùs omninò fore ac consultius, non cœlo quod experts esset animæ ac sensus, sed supremo cœlorum ac terræ Domino, bonorumque omnium authori Deo, pro tanto & tam singulari beneficio gratias habere quantas maximas capere posset animus. Ad hoc tam salutare monitum respondit Rex humanissimè, sibi quidem tunc fas nequaquam esse, patrium in referendâ gratiâ ritum deserere, inquisitum se postea diligentius, de ritibus illis nouis quos prædicarem. Cum igitur prophanum sacrificium impedire nequaquam valerem, ad triremem me retuli, donec reliquum iter cum regio comitatu conficeremus.



*Auspiciatus nostrarum ad aulam regiam accessus, & prima
Euangelij promulgatio.*

C A P V T XII.



Rimum nobis in Tunchinì terras aditum, eadem aperuit dies, quæ triumphalem D. Iosephi abitum in cœlos, annuâ recolit pompâ. Vt suo est obseruatum loco. Qua verò die grauidam de cœlo sobrinam, inuisit officij causâ, virgo mater vniuersitatis regina, eadem nobis in aulam regiam, liber atque expeditus patuit accessus. Illius numine atque consilio qui tempestatum periodos arbitrio suo moderatur, & sub augustis tantæ reginæ auspiciis dies eadem, illibatum Euangelij lumen, Tunchinensem in aulam inucheret, quæ filium Mariæ lucem primigeniam illam quidem, in cognatas Elizabethæ ardes secum induxerat. Secundâ igitur Iulij die, anno 1627 in urbem Checensem, atque adeo in aulam regiam primum intulimus pedem, ipso vfi comitatu regis, à Cocincinensi bello reducis, aut à fugando potius, continenti trium dierum spatio, Ciûachancho, quem insigni opportunissimâque fuderat victoriâ: quippe constat, si longiores in hoste insequendo traxisset moras, vsurum fuisse illius absentia rebellem subditum, vt in quatuor illas, florentioribus regni copiis per id temporis spoliât, prouincias inuaderet, quas aliâs armis rebellibus suo subegerat iugo. Cum nec idoneus qua triremium apparatus,

apparatus, qua exercituum instructus ad inuasionem deesset, ingens minimùm regioni, totius regni florentissimæ, in quam irruptionem fecerat, ab eo vastitas imminebat. Crederes certè publicam vnà cum rege laticiam, desperabundas in plagas remigrare, quæ populares plenis ex vrbe portis euocaret, aliorum manus ad pompam triumphalem, victori principi adornandam expediret, dum omnium ora gratulatorios laxaret ad plausus, quibus vici, plateæ, compita ad ipsum vsque palatium personabant

Secuturis ergo fidei victoriis quasi præludente cœlo, eâ triumphi pompâ, comitatuque regio inuecti sumus. Cui tandem succederemus hospitio, cum adhuc esset in vrbe ne vnus quidem Christianis initiatus sacris, qui suas accommodaret ædes, mouit tamen arcanum, numen primæ notæ Ethnicum, cui nomen *Mari tui*. Is cum nos ac nostra omnia curiosius obseruasset, suam vltro, nec vllâ prouocatus prece domum prolixè obtulit, tùm ad commorandum, tùm ad obeunda societatis munia, donec alias nobis ædes accurasset regia liberalitas, cuius quidem munificentia spem nobis fecerant, multa nec dubia, charitatis eximie argumenta. Res fuit prodigio penè similis, quanto ardoris impetu, in ritus nostros ac cæremonias vir Ethnicus propenderet. Aras cœlesti victimæ aptabat ipse, doctrinam Christianam enucleantibus, aut pias habentibus cohortationes aderat frequens, suamque demùm coniugem, vniuersamque familiam Christianis imbutam præceptionibus, suâ potestate feliciter vsus, in eorum salutem, aquis piacularibus lustrari voluit. Ipse quibusdam retardatus impe-

dimentis ad quæ expedienda satis in præsentiarum animi non erat, tantibeneficijvsuram in aliud tempus præpostero consilio distulit. Spem interim suam, & communia amicorum vota; sanctissimâ hac asseueratione fallens. Daturum se operans scilicet, vt ab iis breui absolueretur vinculis, quæ captiuam libertatem opprimebant. Nec prius è viuis abiret quàm aquis illis salutaribus tingeretur. In quantum certè discrimen suam salutem intempestiuus hisce moris, adduceret, non ignorant ij qui sciunt, ex humano arbitrio non pendere diuinæ gratiæ dispensationem, iusto plerunque iudicio procrastinantibus, ac de diuinâ bonitate plus æquo præfidentibus ad libidinem, suamque cum irato numine, reconciliationem futuro committentibus, illud salutis pignus denegari. Auertère periculum continentia vxoris, ac liberorum vota; imò ausim dicere, singularis illa, in nobis hospitio excipiendis charitas, Dei in vindictam intenti, patientiam per decem annorum spatium ità fefellit, vt in reum non sæuierit nisi in salutem. Emenso siquidem illo tot criminum ferè quòt dierum curriculo, morbum immisit, medica dei manus, eò salubriorem quò grauiorem. His excitata curis Agatha eius vxor, matrona piissima, domum nos euocat, nos verò veterum beneficiorum non immemores, postremam hanc viro de nobis, ac de re Christianâ benè merito, tam prolixè quam alacriter præstare, idoneum baptismo, quippe domesticis solum impedimentis, Christianisque iam dudum mysteriis informatum, aquis lustricis expiare Ioannis nomine indigetarum. Nec diù post suis expiata sordibus anima, ex aquis illis

illis salutaribus in cœlum vt speramus emerſit.


Quum primum in aulâ ſpargi cœpit, de noſtro aduentu, deque hoſpitio rumor ; tantus ſubitò omnium ordinum concurſus domum factus eſt, vix vt omnium votis facere poſſemus ſatis. Eos inter omnes qui ſacris aſperſi laticibus fuere, longè primas obtulit ipſa ſoror Regis, cui ob Cinenſium litterarum, in primisque poëſeos ſingularem peritiã, imponi placuit nomen Catharinæ, vt defœcatam tanti nominis integritatem, & infractam in propugnandâ fide, illius heroinæ conſtantiam æmularetur, quam eximiis ingenij dotibus, & generis ſplendore tantum non æquabat. Nec verò quidquam habuit à baptiſmo antiquius, quam vt acceptam gratiam impertiret matri, eamque ab idolorum cultu ad Chriſtum traduceret, Ingens cum ea Chriſtianæ rei facta eſt acceſſio in myſteriis quippe Cinenſibus, non mediocriter verſata erat, idolorum verò cultui ſic addita ; illi vt apud Sayos *Tay* nomen quod magiſtrum ſonat, conciliauerit, qua intempeſtius zelus, qua cæremoniarum ſcientia. verum mutatus cum religione zelus, ardorem omnem ſuum conuerſit, in matronas nobiles ſanioribus imbuendas præceptionibus, & ad Chriſtianam pietatem inſtituendas. Catharina verò eius filia, noſtrorum dogmatum notitiã tam auidè arripuit, piarumque meditationum delicias ſic hauſit, vt in numeros poëticos contulerit totam Catechiſmi hiftoriam, ab ipſis mundi primordiis, ad Chriſti aduentum, mortem, aſcenſionem, ſtylum eruditè deducens. Subiunxit ſacro poëmati, noſtri ad regnum Tunchinſe appulſus hiftoriam, atque ipſa vulgati primum

Euangelij initia. Ex tam pretiosâ operâ fructus extiterere pereximij. Fuere siquidem versus illi argumentum vnicum cantiuncularum, quibus, laborem, aut tædium domi, foris, in vrbe, viri recreabant neophyti. Imo & Ethnici, cantus huius suauitate capti, eos vnos, ad concentuum delicias, cum adhiberent, sensim ac sine sensu, potiora fidei mysteria volentes, nolentes hauriebant.



*Sai quisdam celeberrimus, fidem amplexus, multos
Christo lucratur.*

C A P V T XIII.

 Vriosâ multorum annorum obseruatione compertum habemus, Ethnicorum omnium quorum mentes Christianis excoluimus mysteriis in Tunchinensi regno, nullos fidem suscepisse, vel facilius, vel auidius, nec susceptam retinuisse Constantius, quàm qui superstitiosis idolorum cultibus pertinacius adhæserunt. Istius rei fidem cumulatè faciet vnus Sai fictitiorum numinum cultor, in paucis superstitiosissimus, incola pagi cuiusdam, cui nomen *Vn xa* vnus aut duorum fermè dierum spatio ab vrbe remoti. Singularem hominis probitatem, ex regiis pellicibus vna pagi domina, dignū reputauerat præfecturâ templi prophani, quod in eo construi curarat: in parte illius templi remotissimâ, assurgebat ara cui innitebatur tabernaculum, operæ non elegantioris quam ditioris, auro vestitum, picturis

ris

ris illustratum suis post vitam manibus, sedes ut stultè putabat accommoda. Verum statim atque primus fidei Christianæ, saniorumque dogmatum radius illuxit Saij animo, ille nullâ interpositâ morâ, annuorum redituum quos ex prophanorum rituum administratione colligebat, imò & autoritatis apud regiam pellicem paræ, iacturam præ salute parui pendens, in priuatam cum vxore se recepit domum à pestiferis illis ædibus, animo ad baptismum comparando, liberio rem operam daturus. Inditum ei Antonij nomen in baptismo, vxor Paula dicta. Cuius rei certior facta pagi domina, tam illustrem defectionem, suorum Deorum ignominiam interpretata, sic excaudit, ut fratri qui per id temporis imperitabat pago, per internuncium mandarit, transfugam in pristinam dignitatem per vim restitueret; si præfecturam iterum capessere recusaret obstinatiùs, publicis subiiceret virgis. Optionem pœnæ, præ opimâ præfecturâ facit inuictus Antonij animus. Nullâ morâ nudatur, columnæ in medio foro defixæ religatur, flagris ceditur in totius ciuitatis oculis quæ ad spectaculum conuolauerat. Auxit Antonij animos datus fidei sanguis, adeo non infregit sæuitia tortoris. Incessabat lætitiis defluente vndique cruore, velut hostilibus spoliis tumens, non suis, ac perinde quasi suam constantiam sanguine sanxisset suo, ad disseminandam Christi fidem, animum longè quam adhuc acrius adiecit. Viros ipse non tam in suas, quàm in Christi partes, modis omnibus pellicere conabatur, dum paula, nec zelo, nec virtute minor, in fœminas ritè instituendas, & ad baptismum componendas, indu-

striam

stiriam conuertebat. Quæ quidem omnia cum ad pellicem publica detulisset fama, contineri vix potuit quin conceptum virus, in infontis Antonij caput euomeret, cum effusam sauiendi libidinem repressit nota viri sanctitas, inuiolataque integritas: tantum dignam meliore solo probitatem exilio damnat, bona illius addicit fisco. Sed ea nimirum iactura leuiter perculit animum, qui iam dudum eam nobili neglectu præuerterat, nec piguisset solum vertere nisi à tenellorum adhuc, atque ideo imminentium tentationum iniuriis obnoxiorum Christianorum quos cælo pepererat centuriâ diuelli debuisset. nec certè sui doloris, vim immodicam ferre potuisset tenellus grex, qui videret vnâ diem duo tam pretiosa capita quæ parentum habebant loco, sibi per summam iniuriam abripere, nisi illius acerbitatem commodum leniisset, oblata opportunitas, in pagum proximum alterius ditioni subiacentem ad consulta pietatis officia conuolandi.

Impotentem mulieris iracundiam, iniustumque Antonij exilium, suum fecit quæstum diuinæ pronæ, quæ gressus illius direxit in terras diuinæ sementis accipiendæ capacissimas, nec verò in eas prius peruenit quam Catechistici Apostolici partes sibi assumpsit, nunc Euangelij mysteria disseminando, nunc piis cohortationibus, salutare concitando motus in auditoribus, nunc errorem impugnando, & à Satanæ castris ad Christi signa, generosos transfugas abduciendo. Certè in urbem regiam remigrabat nunquam, quod tamen frequenter factitabat, fructuum inanis. vidisses candidatorum fidei aprâ baptismo coronâ

coronâ circumdatum, nunc viginti, nunc triginta, octoginta, quandoque numerauimus, inter quos eminebant non pauci Cinenſium Cæremoniarum ſcienciâ ſpectabiles, cum iis ipſe non niſi leuiter tinctus eſſet, & eiufmodi hominum genus, ob earum inſcitiam magno non ſit apud Tunchinenſes loco. Verùm qui de cœlo afflabat hominem Deus, ita linguæ motus attemperabat omnes, niſi ut ipſi excederet, quam quod eius orationibus ſummam attentionem, iuxta ac reuerentiam conciliaret. Vim dictis addebat, eiufque ſermonem ſic incitabat, ut efficacior ac penetrabilior gladio ancipiti, inaccessos obſtinatiſſimorum animos ſubiret, & inuietam eorum contumaciam expugnaret. Neophytum vnum aliquem cum ſemel obſeruafſet, non niſi à priſtinâ pietate deſciſcere, ac ſine legitimâ cauſa diebus Dominicis relictis piis Chriſtianorum, cœtibus ſe ſubducere, cum clam conuenit, exitiali animæ ſtatu, certâque malorum voragîne in quam ſe committebat, vtrò ſub oculos poſitâ, ita perculit, ut priſtina exercitia incredibili ardore reſumpſerit, animumque ad propitiandum numen ſeriò intenderet. Longini centurionis exemplo ad id allato motus, qui ex inſlicta Chriſti lateri plagâ, vberes cum ſanguine gratiarum riuos expreſſit. Quo verò pædagogo uſus Antonius,

illud longini didicerit exemplum
præter ſanctum ſpiritum,
aliud nouimus
nullum.



Ethnici non pauci Baptismo lustrantur.

C A P V T XIV.

A Best ab vrbe regiâ non procul , pons celeberrimus *Caugiensis* dictus, qui circuniacenti prouinciæ nomen dedit. Incolis idolorum cultui deditissimis frequens est ea regio, viri pariter ac fœminæ, solemni voto obligati, reficiendis pontibus, ædificandis xenodochiis, aliisque ejus generis piis operibus, ac reipublicæ commodis incumbunt. Viris eam pietatem profitentibus, *Sai* communis est appellatio, mulieribus *Vai* consensionem verò quæ inter ipsos intercedet compositâ nomenclaturâ significarunt *Sai Vai*. Quæ quidem appellatio in Idolorum cultores addictissimos quosque, ac piorum huiusmodi operum studiosos est propagata. Abundabat religiosis hisce *Sai Vai* Caugienſe oppidum, ab vrbe regiâ semileucam circiter distans. Qui cum de nostro aduentu inaudiissent: arcano spiritu moti, non imbrium desuper inguentium vorticibus, non cœnosarum viarum aquis dilutarum, & vestigia subinde fallentium iniuriis, retardari poterunt, quo minùs ad nos turmatius confluerent, fidei nostræ mysteriis aures daturi, ac tanta eos tenuit deinceps, illius cognoscendæ, perdiscendæque cupiditas, vt quocunque cœlo, horâ Catechismo enucleando attributâ, in templum diebus singulis conuolarent, velut ex condicto, successu tam fœlici vt paucos intra

intra dies ex eo numero duodecim, qui maiorem nostrorum mysteriorum notitiam probauere sacro fonte fuerint expiati, qui rem deinde Christianam promouere non mediocriter suamque non modo operam ad condendum in regno Tunchinensi Nosocomium omnium primum, sed & ad ipsum annuis redditibus instruendum fortunas suas liberaliter contulerunt.

Nec vni duntaxat ex Ethnicorum, rudisque vulgi grege aliqui succedere fidei. Non defuerunt eximie litterati, qui ad prima fidei rudimenta cum magnâ modestiæ significatione domum accederent. Ounghus inter alios quidam (honoraria est illa appellatio, virorum litteratorum magistratu publico, vel defunctorum, vel in præsentiarum tunc defungentium) ad annum ætatis septuagesimum prouectus, cum vxore iam deponentâ, ad nos accedit supplex enixè rogans, vt sibi copia fieret, earum præceptionum, quas aliis tradebamus vtrò, fieret & lustralium aquarum, quibus ambo humiles canos subiecere, cum incredibili lætitiæ testificatione & prodigâ gratiarum actione diuinæ bonitati, quæ eos tandiù sustinuisset, & actam inter tot discrimina vitam, primis hisce nascentis fidei luminibus reseruasset illi verò vt acceptæ gratiæ, gratiam aliquam rependerent, plures consanguinitate sibi coniunctos, è variis collectos prouinciis, domum adduxere, eo afficiendos beneficio, quod in terris maximum reputabant. Eos excepit recens laureâ donatus adolescens, qui nihil admodum cunctatus, baptismo caput dedit, Ioannes, lustricum illi nomen fuit. Hic altè concepta pietatis senfa, tam scèliciter,

in totam familiam transfudit, ut matrem, atque adeo familiam vniuersam Christianis mysteriis non leuiter tinctam ad baptismum demum pertraxerit; annuente non illibenter patre, quanquam ipse animo minor, in tanti beneficii partem impræsentiarum venire recusauit. Exempla tam illustria, magnam ædibus nostris, peperere celebritatem litteratorum virorum, quos explorandi cupiditas ducebat potius, quam lucrandæ salutis zelus. Et vero fructuum vacui redibant, sibi nimis mirum tribuente superbiâ excæcati.



Rex Tunchinensis non procul à suo palatio, hospitium, ac templum construi iubet, in quo nostra munia obimus.

C A P V T X V.

PRope erat ut solueret Lusitana naus, quæ nos Tunchinum aduexerat, cum Rex concessâ nobis subsistendi licentiâ, insigni humanitatis exemplo Eucharisticam scripsit epistolam ad Patrem Andream Palmerium, qui tunc provinciam lustrabat eamque remeanti naui commisit transportandam, in eâ, post actas patri gratias in regnum suum socios, prolixè exponebat. Quàm gratus sibi fuisset, eorum aduentus, argumento esse illam ipsam chartam, cui suum commiserat animum. Lamina erat argentea, scitè explicata, sum stylo exarata & demum in multa volumina replicata: nec enim placuerat sua credere senla, vulgari papyro, quanquam pulchram

pulchram adhibent Cinæ, picturâ & aureis cum arte bracteis illustratam. Verum epistolam hausit cum naui Oceanus ad insulam Ainam; eamque cum rescisset, Palmerius, in insulanorum manus incidisse, qui reliquias naufragij collegerant, curiosè conquisiuit, ac tandem redemptam Amacauim transmisit.

Interim longo vsu, ædium nostrarum angustias experti, concurrentis multitudinis minùs capaces; ad Regem adimus, arctiores hospitij sinus quàm nostra ferunt munia exposuimus. Locum attribuat opportuniorē suppliciter obsecramus. Rex postulata non probauit modò, sed vltro etiam adiecit, secum statuisse se iam pridem in suo palatio ædes nobis excitare, proinde aream nostris muniis opportunam, designaremus ibi se ædes, nostros ad vsus, opportuniore curaturum. Hic certè non defuere, homines etiam amicissimi, qui suaderent regiâ vtendum munificentia, excitandum in ipso palatij sinu hospitium, tum ad frequentes ædium conflagrationes, quibus est obnoxia ciuitas, tum ad direptiones publicas, quibus maximè patet, anteuertendas. Tamen quod neophytis, non ita liberum fore palatij aditum suspicaremur; placuit extra palatij pomærium, solum hospitio destinare, quanquam à palatio non ita procul vt Regi euocanti adesse citiùs possemus: itaque paucos intra dies, quippe vrgebant Regis imperia, excitatæ nobis ædes, eo quem optaueramus loco omnibus instructæ commodis, quæ nostris vsibus visa sunt conducere: ex mero constabat ligno ædificij moles, cætera capax, nec à nobilium ædibus abludens.

Sub vertentem igitur Nouembrem, mense post

G g 3 nostrum

nostrum in urbem Regiam aduentum quarto , nouum in hospitium commigrauimus , cuius partem alteram Deo dicauius,qua die adieramus ædium possessionem, tanta in eas vndique confluit hominum multitudo , vt matutino tempore tres, vespertino totidem habere conciones necessum fuerit , ne auditorum alternis accedentium & recedentium votis deesse videremur. Par erat labori fructus, ac tantus è iacta se mente prouentus redibat , duos vt in hebdomada dies dicandi fuerint expiandis Baptismo cathecumenis, quorum numerus ad 40. excreſcebat aliquando, vicinos minimum vulgo censebamus, & nobiles quidem non paucos, è regiâ verò familia nonnullos. Initio quidem subeunda fuit non semel alea certaminis cum captiosis quibusdam, qui nostris concionibus aures dabant, eo tantum consilio vt audita refellerent. Quæ contentiones non tantum concionum ordinem perturbabant, pretiosum tempus auertentes in quæstiunculas enucleandas, in soluenda dubia; sed in religiosioribus paulo mentibus intempestiuos mouebant scrupulos, itaque progressum Euangelij retardabant. Præsens huic malo remedium visum, cum nemine in arenam descendere, quin dies octo solidos dicentibus adfuisse. Quo factum vt nonnulli, morarum ferendarum impatientia victi, abstererent, aliorum dubiis continuata doctrinæ series planè fecerit satis, atque adeo os obstruxerit. Ita consultum tempori, & auditorum ab vanis illis altercationibus periclitantium securitati efficaciter cautum.

Doctenda

*Doctrinæ Christianæ tradenda methodus.*

C A P V T XVI.

E Tſi Euangelicæ doctrinæ præcones bene multi, qui in tentatis aliâ Ethicos terris fidei myſteria promulgarunt, cenſuerint non imprudenter, vel innatos vel inſitos Ethnicorû animis errores reuellium, ſuperſtitioſaquè dogmatum commenta confutari debere prius, quàm Chriſtianæ fidei rudimenta tradantur, iuxta methodum afflatam Prophetæ diuinitus his verbis; Poſui te vt deſtruas, & euellas, vt ædifices & plantes; Auguſtiſſimum vero Trinitatis myſterium humanis inacceſſum mentibus ſub ipſum dumtaxat Baptiſmi ſuſcipiendi articulum candidatis proponi debere, ne tardas ad capiendum mentes, vel implicarent, vel ab amplectenda fide labyrinthæ deterrerent myſteria; longo tamen experimento doctus, viam mihi tutiorem, quia mediam, in hiſce regionibus propoſui ineundam. Viſum igitur mihi Sectarum Tunchinenſium ſuperſtitiones non prius apertè aggredi bello quam principiis quibuſdam ingenitæ mentibus luci non prorsus imperuiis, decretorio præluſum fuiſſet certamini, puta de Mundi ortu, quem rerum ſed ratione in vrentibus finem vltimam præſcripſerit communes vniuerſitatis Architectus, quam multis ſibi nominibus in ſervitutem perpetuam deuinxerit; tum vt eæ veluti ventilationes, alte in eorum animos certa deiicerent fundamenta

menta, quibus adificanda fides, adstrui commodum posset, tum ne damnatorum primis congressibus cæremoniarum, superstitionumque rituum pudor, auditorum animos exacerbaret potius, quod vsuenerit non raro, quam docilitatem conciliaret. Certæ si qua euentui fides, cessit mihi sæliciter locata primum opera in bene afficiendis. Erga rerum omnium conditorem ac Patrem auditoribus; tum in percellendis eorum animis metu magistræ ac dominæ illius mentis eluuiæ perpetuæ, quæ scelestos homines obruit dum expiauit, & confusionis Babylo-nicæ commemoratione ab iis demum prolusionibus, ad refellenda Ethnicismi deliria ventum, opportuno quidem loco; quippe idololatriam, post Eluuiæ illam publicam, tantum in orbem, Dæmon inuexit. Sentio tamen cum aliis Arcanæ Verbi corporati, & in crucem suffixi, Augustissimæ quoque Trinitatis misteria, quæ lucem habitat inaccessibilem, & probatos Aquilarum visus hebetat, oculis vix dum lucis patientibus non prius obtrudenda, quam ingentis, acceptisque iam pridem tenebris fuerint per-purgati. Ne primos eorum conatus, vis luminum im-mensa exhauriat.

Mihi tamen probari non potuit illorum sententia, qui ad ipsum suscipiendi Baptismi articulum, reiciendam censent vnus ac trini numinis Enucleationem, ab eo putem auspicandum mysterio. A quo pronus est ad incorporationem verbi decensus, ab ista rursus ad exhaustos patientissime pro restauratione hominum labores. Christo passo, & mortuo, ad Christum à mortuis vi propria excitatum, & ad alia
Christianæ

Christianæ Religionis mysteria ; quam præiuere nobis viam, illi ipsi Apostoli, qui allata dogmata tradidere. Mihi quidem toto illo bene multorum annorum spatio , quos in Ethnicis instituendis posui , ne vel vnus occurrit , quem à nostræ fidei complexu, incomprehensum illud Trinitatis mysterium abalienarit. Corporatæ diuinitatis fidem ægrè magis admittunt non pauci. Cui enim mirum videatur , Deum illum quem vel ingenitâ vi satis capiunt, capi non posse, sed supra cognoscendi facultatē rebus creatis omnibus concessam assurgere , supra dicendi facultatem esse, nec ambitiosis periodorum anfractibus colligi posse, attributorum, personarumque, quas in eo credendas, & adorandas proponimus, amplitudinem, quæ omnibus capacioris animi conatibus comprehendendi non possit. Quod autem immortalis & æterna mens illa cœlorum domina , gloriæ non prius filias quam hæres, ad humanæ naturæ, temporis filiæ, dolorum, ac mortis victimæ, non commercium modo, sed & coniugium , gentilitij splendoris, velut oblita se se demiserit, is vero scopulus est , ad quem oblita, plerumque frangitur sinarum fides quare non temerè sunt proponenda Cathecumenis Passionis mysteria, sed paulò secus, quam Christianis nostratibus enunciari soleant , & in iis propalandis , hæc maximè obseruanda. Primum est. vt ea prodigia quæ Christi mortem cohonestauere , verbis magnificis attollantur; describatur composito ad terrorem stylo, cohorrescentis ad tam ferale spectaculum naturæ strage; solis refugit , consuetaque radiorum auxilia. Deicidæ terræ subtrahentis pullata facies,

Hh

tumulorum

tumulorum mortuos eructantium fragor, Saxorum obstinatum duriciem disrumpens dolor; traducatur orbis vniuersus luctu squalidus, digna rerum omnium conditore funebris pompa; Ea demum afferantur omnia quæ planum faciant vel mediocriter oculatis, non violento sed voluntario cessisse fato illum hominem Deum, vsosque potestate, quam ipsis fecerat, carnifices, mortem ipsis consciuisse, quæ vitam hominibus peperit immortalem. Quod secundo loco obseruandum monuimus, istud est; vt post exag-geratum incarnati in nos Numinis amorem, & virtutes eximias, quæ agonem illius ornauere proponatur adoranda morientis de cruce pendente effigies, frequentibus ad maiestatem cercis illustrata, & aliis huiusmodi pietatis incentiuus coronata. Tertio sermonem de Christo vita functo statim excipiat sermo de Christo rediuiuo: quemadmodum vi propriâ è sepulchro emerferit de morte triumphabundus; vt procliuè sit cuilibet colligere, penes illum esse vitæ ac mortis imperium, qui mortuum se vitæ restituit, & potuisse viuum, tyrannidem mortis euertere, qui mortuus euertit. Demum crebro repetitiis hisce sermonibus inflammari debet magis ac magis eorum in Christum amor, quod quotidiana discamus experientia eos omnes, qui erga patientis Christi agonem afficiuntur vehementius in Christianorum virtutum exercitationem acrius iuxta constantiusque incumbere. Nimirum idoneas sufficit vires deficiens Christus.

Euentus



*Euentus quidam insignes, ienellam adhuc Neophytorum
fidem magnopere confirmant.*

C A P V T X V I I.

HOs inter qui ad Christianam institutionem diebus singulis in templo nostro doceri solitam conueniebant assidui, frequens aderat Saius quidam quem ex idolorum templis facile Principibus vni, Regiis ædibus contermino, præfecerat Regis Mater, fidem nondum amplexa. vir ille, diebus quinque solidis, quo tempore nostros celebrauit conuentus, singulari in excipiendis Christianæ disciplinæ rudimentis patientiâ, spem magnam conuersionis certissimæ concitabat in spectatorum animis; iam quinto die pios illos cœtus frequentabar, cum ecce, illius vxor, in templum inuehitur truci vultu, alte conceptis furiis stimulata. Proserpinam iuraret aliquam, & ad coniugem ferocibus oculis diu tota æde quæsitum impudentissimè conuersa, hæccine, inquit, illa Sapientia, digna Deorum etiam curandorum prouincia visa, in eam degenerauit insaniam, vt in peregrinos, in steriles, atque ignobiles ritus, Deorum ac templorum desertor, sacrilege conuertaris. Age sane, scelerate transfuga; Deorum curam abiice, Templorum Magistratum abdica; at quâ tandem opera hærentem in penitissimis familiæ tuæ visceribus rerum omnium inopiam, vel ablegabis, vel leuabis? an mendicus ille Deus, illud

Hh 2 virga

virgarum pabulum , vxoris , ac liberorum nuditati abundè consulat , quem in ipsum nuditatis gremium luctantem animam efflasse , sectatores illius intelligentissimi gloriantur. Vide quod tuas in ædes inferas Numen , illud nempe , quod victimas refugit omnes , nisi quas Sacerdos immolat paupertas , quod clientes auersatur , nisi miseros , quod indigno planè fastidio cultores reppuit nisi nudos : huncine quæris tuæ familiæ tutelarem patronum , coniux & pater. Incitatum orationis impetum hic abruptit verborum indigus furor ; perorauit vberima lachrymarum eluui , ex illius oculis vndatim in vultum , ac sinum effluens ; Os Saio præcluserat , amor ergo nil cunctatus , domum ex æde protinus se recepit , ingemifcente ad illius casum corona , spemque quam de illius conuersione maximam conceperat elusam dolentem.

Iuuit tamen Neophytorum constantiam tam insignis ignauia , adeo non infregit , & illius fugam in aliorum salutem Diuina pronæa , hac maximè ratione. Saius siquidem , qui cum salutis studio , Christianas præceptiones ex animo non planè deposuerat , die quâdam dominicâ , templum ingressus nostrum , quâ horâ , ad augustissimum Missæ sacrificium sese componebant Christiani , librum produxit Cinenci incisum stylo , cuius prima quidem pagina IESV nomen , maiusculo charactere exaratum , præferbat. Accessi ego videndi studio ductus ; nec difficile mihi fuit , librum à Sinis auctum , atque adeo vnus è nostris Patribus manum agnoscere : Hærebam tamen dubius. Nec assequi satis poterat mens tardior , qua
tandem

tandem ratione in illius venisset manus. Ipse meo dubio facturus satis, hæc narrauit. Patrem olim suum, legato, qui tertio quoque anno, tum ad fidem præstandam, tum ad clientelare vectigal pendendum ad Sinensem mittitur, comitem adiunctum, ex Aulâ Pequinenſi, librum hunc aſportasse, quem tanto, dum vixit, in pretio habuit, vt iam iam moriturus in hæredem: tanquam theſaurum præ fortunis aliis omnibus longè pretioſiſſimum tranſmiſerit, illud præterea ſubiicientem ſe legati comitem, librum illum muneris loco accepisse ab occidentis Doctõribus, ſanctiſſimè teſtatis, certum è terris in cœlos receptum eos manere omnes, qui & ſcriptis adhibuerint fidem, & ea fideliter obſeruarint, quæ pauculis hiſce paginis continentur. Subdebat à Patris obitu, quo orbatus fuerat decennio nondum maior, ſibi librum hunc ſingulari cutæ fuiſſe, eum ſe capſulâ clauſiſſe, toto triginta annorum ſpatio, illius paginas identidem euoliſſe ſe tamen hætenus aſſecutum nihil; ad hæc vſque temporaria, quibus auditæ conciones noſtræ, imperuiorum myſteriorû intelligentiâ planiorem fecere. Ad hæc quærenti mihi, caperetne, quid ſibi vellent characteres, illi maiuſculi, quos præferēbat ipſum libri initium, ingenuè reſpondit, non capere ſe. Protinus ego productum è noſtris voluminibus vnum explico iisdem informatum characteribus, IES V ſcilicet nomine inſignitum, Ad illius nominis conſpectum explicare ſe ſpectatorum omnium vultus geſtire lætitiâ nouellum gregem, ſuam ſibi ſortem inuicem gratulari omnes, crederes nomen illud auguſtiſſimum, illum inquam lætitiæ theſaurum,

saſurum, per ſpectatorum oculos, tantam cœleſtium gaudiorum vim eorum in pectora transfudiſſe, vt in ipſa etiam ora efflueret : Nec verò recreauit dumtaxat tenellam fidem tanti nominis aſpectus , quod exercitatos vt cum Bernardo loquar , lenit & reparat ſenſus. Sed cœleſtis cuiuſdam roboris acceſſione muniit, idem illud nomen , quod ſi Bernardum eundem audimus virtutes roborat ; maximè poſtquam, ipſis eorum oculis patuit , Saij volumen , doctrinam Catechiſmo noſtro nulla re diſſimilem, imo ne quidem ordine, aut ipſa tradendi methodo à noſtra diſſonam complecti. Contendère vi precum maximè Neophyti, ſuum vti librum exſcribendum ſaltem ad tempus, aliquod relinqueret , ſed exorari ſe non paſſus , domum retulit , tanti theſauri pretium ignorare ratus , qui alienis committi poſſe manibus putarent. Non prius abſceſſit tamen, quam publicè faſſus fuiſſet , vltro nec vllis ad mentem aperendam laceſſitus precibus, comprehenſam hoc tantulo volumine fidem Chriſtianam, cui planè conſona vulgabamus , viam ad ſalutem expeditiſſimam aperire , eam quo minus amplecteretur , obſtare inclinanti conſcientiæ , vnas rei familiaris anguſtias, nec etiam aliunde , quam à nauata templo opera, tum ad vitam ſuſtinendam, tum ad alendam familiam idoneos cenſus ſuppeterere faxit Deus, vt ſuæ ſalutis diligentior aliquando , ab iis ſe vinculis expediat, quæ ſuperſtitioſis idolorum cultibus irretitum tenent.

Acceſſit ad conformandam Neophytorum fidem, augendamque quam de Chriſtianis concepere myſteriiis

riis opinionem opportuna prodigiorum copia, tum ad latentis in cruce virtutis ostentationem tum ad aquæ faustis precationibus dicatæ commendandam efficaciam diuinitus patratorum, cum maxime vel energumenis, vel in suprema lucta versantibus apponerentur. Et certè quoties accersebamur, ad piam hanc operam rogantibus impendendam, euocabamur autem tam frequenter, vix ut euocantibus omnibus adesse possemus, tantus Ethnicorum Christianis se promiscuè immiscetium muneris properantes comitabatur, ut publicos occuparent vicos, tanto ducebantur studio videndi, nunc manus agris imponentes, nunc aquas lustrales energumenis aspergentes, euentu sæpissimè tam felici, ut quandoque sanitatem cumulatissimam subito recuperarent ad postremam sollicitudinem iam adducti, & ab importunis exagitationibus energumeni liberarentur.

*Complures*



*Complures agros diuinitus curant Neophyti admota
malè affectis corporibus cruce, & aqua
lustrali,*

CAPUT XVIII.



E primis Ecclesiæ Tunchinensis, velut cunabulis illud dicere auisim, quod de Catholica exordiis à Magno iactatum Gregorio accepimus: Nimirum, si qua tanto Doctore reuerentia, quemadmodum arbuta tenerrima solorecens defixa, frequenti irrigatione foueri solent, donec altas in terram deiecerint radices; ita diuinæ prouidentia fuit nascentem Ecclesiam miraculis velut pascere, lactare prodigiis, donec iustis virium incrementis aucta, confirmataque, de suo stare aliquatenus posset iisdem confirmanda, stabiliendaque fuit miraculis recens implantata Neophytorum Tunchinensium animis fides, eam ut admittere, admissam excolere non grauarentur homines, quam manifestis hisce, nec dubiis comprobasset suffragiis cælum. Nec vero Tunchinensium infirmitati paterna defuit prouidentia prodigis liberaliter edendis, ope præsertim aquarum Ecclesiasticis precationibus consecratæ quæ vel affectis aspersa corporibus, vel in laborantium ora guttatim infusa, sanitatem secum præsentissimam inferebat. Tantam certè venerationem illis conciliauerunt euentus illi mirabiles, eam ut domi non solum curiosè habeant Tunchinenses, sed quocumque ipsos

vocent

vocent Kegotia, cistis inclusam secum deuehant, opportunum viarum subsidium, & aduersus pericula præsens vtrique remedium Miles quidam, à Baptismo Simon dictus. in natale solum, leucarum satis multarum interuallo ab vrbe Regia disiunctum, profecturus, vasculum à nobis, eâ refertum aquâ suppliciter postulatum impetrauit. Eo tandem petuenit ad patriæ salutem; quippe multos inibi morbis multiplicibus afflictos nactus. Salutiferum expedire vasculum, & modicas probatæ tot experimentis aquæ guttulas in morientia ora infundere, ægros ad spem salutis certissimam excitare; nec eorum spem exitus fallebat: quotquot aquam hauserant salutarem, vnâ valetudinem hausisse dixisses, tantulo præbatur interuallo, Quâ re vulgarâ, adeo sitientium, ac medicas aquas, implorantium numerus creuit, vt breui vasculum ferme exhauferit, tamen vel vnâ guttulâ donatos singulos dimitteret Archiater miles paucis adhuc guttulis inia madebat capsula, quod conspiciens, ne laborantium vndique eum accersentium spei deesset ac votis, crediderim hanc mentem afflante cælo, ad fontem se contulit è vicino monte fluentem: ibi quantulumcunque supererat aquæ dicatæ in vas capacius effundit, tum fontanis aquis illud complet; super ingenuâ simplicitate, Ecclesiasticas recitat precationes, quas memoriæ mandarât, sale in eas commisto, quod à nobis factitatum meminerat. Res mira, in ægros ferme innumeros dispersitæ deinceps aquæ, persanarunt omnes, conspirante cum aquis Deo, & eam restituente corporibus sanitatem, quæ salutem pareret animorum.

Gener Regis , primariæ dignitatis adhuc Ethnicus , animaduertens in Pago suæ ditioni subiacente, infestam in subditos grassari-lem , populari omnia , atque adeo census annuos vnâ cum ciuium numero non mediocriter imminuisse , enixè flagitauit , nostrorum remediorum copiam sibi fieri , aquæ maximè lustralis , quæ violentum morbi popularis omnia vastantis impetum coërceret , eam in rem famulis duobus, vasa maioris amplitudinis duo afferenda præceperat , iis quibus benedixerimus aquis oplenda. Petitioni eius prolixè concessimus , diuinæ sapientiæ factum agnoscentes; & è Neophytorum grege Sex diuinæ gloriæ zelo inflammatiores in Pagum illum destinauimus , qui laborantibus omnia Christianæ charitatis officia exhiberent. Eo conuolant omnes, non animo quam fiducia pleniore suam cum rosario crucem præferens quisque; vbi in pagum ventum est in illo ipso ; in quod diuertunt, hospitio, aram excitant , piam super imponunt imaginem , ante eam prouoluti, breuem quidem sed ardore plenam orationem fundunt : ternas sibi confici cruces curant, quarum vnâ & alteram in extremis pagi partibus, in umbilico tertiam , totidem triumphalis victoriæ signa erigunt. His cum alacritate incredibili perfectis, pagum inter se ex compacto distribuunt ; Lue corruptas domos obeunt bini, locoque ædium maximè sublimi crucem affigunt , quæ demones abigat, iniquos earum inuasores ; non tulere diutius triumphalis ligni conspectum nefandi hospites , & eorum fugam, queruli fremitus prodidere vno verbo.

Nondum octauus fluxerat dies , cum vis morbi

bi

bi cecidit omnis , siue crucis contactu sopita , siue aquæ lustralis , ægris ad potum adhibitæ hauſtu ſalutifero fugata , ægri ad 270. perſanati, quotquot exitialis corripuerat lues , vno excepto , quem cum morte iam luctantem naſti, poſt breuem myſteriorum fidei explanationem, baptiſmo , ad quem præuia peccatorum deteſtatione ſe comparauerat, expiatum cœlo tranſcripſerunt , certâ filiorum Dei teſſerâ inſtructum. Obſeruatum curioſè, omnes, quotquot ab eâ lue conualuere, poſt ſorbitam luſtralem aquam, aliam fœtidiffimam euomuiſſe; certum incantationis Diabolicae, & recuperatæ valetudinis argumentum.

Ab copago reduces Chriſtiani, reportatas de hoſte tartareo victorias, cum ſingulari lætitiæ teſtificatione vulgabant; ſed eam lætitiæ tantum non corrumpit inſœlix caſus illius , quem aliis præſeceramus, paucis ſiquidem à reditu diebus improviſo, & omnem induſtriam anteuertente ſublatus eſt fato. Concepta verò de illius tam repentinâ morte triſtitia, cum in vultus etiam noſtros exundaret, & animi luctus in oculis, in ore, in verbis, ſe ſe oſtenderet; Parcite dolori inquit, è victoriæ confortibus vnus, & iuſtum Dei vltoris iudicium , in illius hominis fato præpropere agnoſcite; Expugnauit auarities illum charitatis non tam pugilem, quam victorem, ille ſiquidem contra iterata præcepta, de piis Chriſtianæ charitatis officiis gratis exhibendis, pretioſam veſtem, mercedem laboris ſacrilegam à Pagi Domino accepit. Hæc in aliorum oculis atque auribus dicta , ſtragem fecere animorum. Nobis vero rediit in memoriam leprâ Naamani; quem Propheta curauerat, in auaritiæ non diſſimilis pœnam,

multatus Giezi, turpes Naamani maculas non discutiente penitus, aut extinguente, sed in auarum discipuli corpus auertente; Crediderim pariter in huncce nostrum alienæ salutis nundinatorem, Deo mortis impetum regente, conuersam, quam ab aliis amouerat, lucem; iustum venditæ sanitatis pretium. Eo casu docti cæteri, tantam deinceps adhibuere cautionem, vt religioni ducerent cibum capere in iis ædibus, quas mortiferâ lue purgassent, ne fugatam pestem in venalem eorum stomachum, dispositi mercedis nomine cibi reuocarent.



Nonnulli Neophyti suam nobis operam in reliquam dicant vitam.

C A P V T XIX.



Væ consuetudo apud Tunchinenses inuauit, vt nonnulli, adumbratæ pietati indulgentes, imperiosorum Dæmonum cultui perpetuo planè mancipem addicant vitam; eadem in melius mutata pium militem mouit iam Christo initiatam, cui nomen Antonius, firmum corpore, annum ætatis trigesimum iam prætergressum, vt à Ducetametsi Ethnico missionem, facultatemque peteret, à Tunchinensis Regis insignibus, ad Regum Régis, ac cælorum Domini Iesu Christi castra se transferendi. Impetratâ missione, arma sua omnia, in profundum abiecit lacum, cui tutiùs, & ad hominum salutem conducibiliùs ea committeret, hominem ignorans;

rans; Ab his in nostras ædes aduolat in seruitiorum nostrorum numerum adscribi suppliciter rogans: obsequentem se in omnibus fore sanctissimè adpromittens, mercedem de cætero suam in vnius Dei manibus reponens. Tam pronam Antonij voluntatem probamus domum illam accipimus; in qua strenuam nobis & inuictam operam præstat, aquâ præsertim ab ipso inde fluuio, ad nostras vsque ædes humeris subuehendâ, cuius vim immodicam exhaurit, non tam rei familiaris necessitas, quam frequens, atque assiduus aquam sacris precationibus dicatam poscentium concursus. Et certè diligentiam Antonij accelerabat ea cogitatio, quam nimirum conuehebat aquam fugandis dæmonibus, ægris persanandis, amplificando Iesu Christi nomini non mediocriter inferuire. Solidos viginti annos stetit tam sancti propositi tenax, omniaque humilitatis munia, quamquam difficillimis temporibus, pari tamen alacritate obiuit inuictus, vt suo dicetur loco.

Nec domestica tantum seruitia prouidit nostræ necessitati inuigilans Deus, sed ad instituendum quoque populum, cui muneri par esse non poteram vnus, aliis quippe occupationibus, puta concionum habendarum, doctrinæ Christianæ, quater quinquies, de die, aliquando sexies tradendæ distractus, auxilia submisit. Suam tanto muneri dicauit operam primus Franciscus quidam, qui suam cum vberissimo fructu, zeloque maximo prouinciam getit. Is Christo adiunctus fuit hac fermè ratione. Die quadam contigit, vt in frequentissimâ cum Neophytorum, tum Ethnicorum coronâ perorans, præcipuum orationis impe-

tum exererem in pietatem impiam Xacæ , aut Thicæ, de quo alias nobis sermo , qui primus in Tunchinense regnum sacrilegum idolorum cultum inuexit. Aderat dicenti Franciscus, qui Saij partes per id temporis agebat: is execrandæ superstitionis quam publicè professus fuerat, argumentis efficacibus conuictus, sub ipsum statim orationis finem in pedes se erigit, & in me conuersus, his verbis affatur. Annos ætatis 17. fidelem atque assiduam idolis seruij seruitutem, eo consilio, vt genitoris mei, prius ferè fato functi, quàm primæ vitæ limina salutassem, manibus, mea idola propitiaretur seruitus, & ad eos molliusculè habendos, voluntaria filij officia, gratos inclinarent Deos. Verum nisi tua nostris auribus illudit oratio, lusi operam, & in meam perniciem, nimis magna de vanis illis atque vmbartilibus Deorum simulachris sensi. Ecquid mihi tentandum putas, quo præteritos labores possim, vel redimere; vel compensare: Ego bene sperare iussu Saij, reposui, præpotentem illum rerum dominum, omni creaturarum omnium obsequio dignum, aspernari neminem, qui se ad ipsum ex toto corde recipiat. Idem sibi putaret agendum quod viatores solent, quos viarum ignorantia, bonam dici partem in flexus, erroresque varios abduxit: illi enim quamprimum ab errore se collegere, & rectam iniere viam, acceleratâ pedum diligentiam compensant, quod error absumpsit. Ipse pariter, si tot annorum tam male collocatorum iacturam refarcire vellet, à Deorum sacrilego cultu sine mora descisceret, in veritatis agnitæ partes concederet, certissimam impetraturus peccatorum veniam, si dicto audiens esset,

esset, & rectè factorum mercedem vberriamam collecturus. Non libentius consulentem audiit, quam audita celerius perfecit: Ergo idolorum templo, magnisque quos ex eo percipiebat, redditibus, nuncium remittit, prono animo vocanti Deo obtemperans; ac Spiritus Sancti gratiæ morem gerens, quam Ethnicis non paucis tam cumulatè postea impertiit, vt ad Christum adiunxerit bene multos, illius authoritati plurimum tribuentes: ipse Sacro fonte lustratus eodie, qui Sancto Xauerio est sacer, Francisci nomen à Baptismo tulit. Post paucos à Baptismo dies domum nos conuenit, & in communem earundem ædium vsum admitti suppliciter est obtestatus. Annuimus postulatis non illibenter, tum vt insigni teste nostra priuatim viuendi ratio non careret, tum vt eum erudiremus commodius ad omnes Christianæ disciplinæ præceptiones, quas ei diebus singulis per horæ spatium exponebamus: apprehendit verò memoriâ tam fœliciter vniuersas; vt è discipulo, magister, ex auditore, doctrinæ Euangelicæ explanator peritissimus, magno cum prouentu, paucos intra menses euaserit. Tum vero ingenuè fassus est, nostrum se conuictum captasse, eo consilio, vt explorare otiosius posset, nostrane cum dictis consentirent facta, & vita doctrinæ responderet, ac nunquam sibi constituisse clarius, de enunciata fidei veritate, cum religiosiora, sanctioraque apud nos obseruasset omnia, quam nostra verba præferrent, nosque vitam viuere multo sanctiorem quam hactenus consuluissemus. Post annos à Baptismo 15. Societati nomen dedit, in quâ, ne vel ipse quidem Nouiciatus decursu, quòd operarum inopiâ

inopiâ laboraremus , doctrinæ Christianæ cum animarum incredibili fructu fradendæ , finem vllum fecit.



Abalienatur à nobis Rex Tunchinensis.

C A P V T XX.



Lorebant , & successu supra spem omnem prospero utebantur res Ecclesiæ Tunchinensis , quippe à die Natalis Domini sacro , ad paschales vsque ferias quingenti censebantur Christo aggregati ; inter quos eminebat vnus è primariâ nobilitate , cuius exemplo moti alij complures , numerosarum pellicum consuetudine ante baptismum abusi , à cæteris omnibus , vnicâ eaque legitima domi retentâ , missionem dedere : quæ tanta tam insignis victoria , Deum in terris remuneratorem habuit ; vim siquidem non paucorum precationibus tam præsentem concessit Deus , vt importunos corporum exagitatores dæmones nullo negotio abigerent.

Tot cladibus exacerbatus Dæmon , dedecoris impatiens, nihil non molitus est, vt à nostris cæremoniis, propensum , saltem non infensum Regis animum abalienaret. Eam in rem amandarum à Christianis pellicum operâ primum est vsus, illæ ad coniugium cum deterioris conditionis hominibus iucundum descendere detrectantes, tantos vrbe tota concitauere tumultus, vt ad ipsum vsque Regem peruenerint , qui
numerosum

numerofum Pellicum gregem cum alat in aula, domesticam ſibi exprobari ignominiam, generoſo ſubditorum conſilio ratus factum ægerimè tulit. Quippè putabat Regem cum eſſe debere, qui ſanctitatis exemplo præluceret ſubditis, non qui à ſubditis vitæ ſanctioris exemplum acciperet, ergo ſtimulante ira nuncium ad nos deſtinat grauè admodum, ac durum, iis que conceptum verbis, quæ tam multis aliàs teſtatam experimentis beneuolentiam non ſaperent. Ea ferme erant huiusmodi. Quænam illa Patres, quo authore lata lex, quam toto vulgatis Regno Subditos meos plurium quam vnius vxoris conſuetudine interdicitis, cum eos velim cum pluribus habere commercium, vt ex iis quot liberos, tot mihi fideles ſubditos ſuſcipiant. Abſtinete igitur ab ea lege promulganda deinceps; quod ſi iuſſis obſequi detrectatis, at ſcitote ad meos nutus contumacia capacia præſcindi poſſe; & rebellem aduerſus imperata prohibitive audaciam cum ſeditioſis capitibus amputari. Hæſimus aliquandiu ancipites ac dubij, veniretne tam durum nuncium, à Rege, qui nos hætenus tam molliter habuiſſet; loquereturne tam graua per internuncios, qui coram tam blanda locutus fuiſſet. Subiit animum ſuſpicari inuentum illius, quem obſcænis numeroſarum pellicum amoribus implicatum noueramus. Confirmauit ſuſpicionem nuperi caſus recordatio. Fur quidam de nocte clam in ædes illapſus cum ſenem offendiſſet, adhuc ſomno liberum; ei in aurem dixit, vt os illius vociferationibus occluderet, ſubmiſſum ſe à Rege, vt incautum me opprimeret in lecto. Com-

K k

preſſit

pressit vocem boni senis debita regis voluntati reuerentia, ergo cum se meum in cubiculum fur insinuas-
set à sene securus, obuia quæque secum abstulit, de
cætero vim mihi attulit nullam. Itaque pendebamus
animo, quid certi ea de re statueremus ignari; Animi
certè non fuit satis in præsentiarum, ad Regem ea de
re conueniendum; tantum mulierum multitudinem
concionibus de more carpere pergimus, non tam in-
tentatæ mortis periculum reformidantes, quam illam
vnam laborum nostrorum coronam votis ambitio-
rioribus expetentes.

Gum primæ artes non omnino processissent ex
sententiâ, novos hostes nobis adornauit in aula re-
gia infernus hostis. Eunuchos nimirum Pellicum cu-
stodes. Isti longo usu, propensam in nos Regis be-
neuolentiam experti, subuereri cœperunt, amplifican-
te metum Dæmone, ne Rex Christiana susciperet sa-
cra, & è Christianis sanctionibus, amandaret pellices,
quarum authoritate nil non impetrabant. Ergo Ma-
giæ peritissimum me criminantur apud Regem, soli-
litum me Lenocinantibus verborum præstigiis fasci-
nare faciles mentes, fascinatas omnem in partem pro
arbitrio inflectere, & homicidâ, si quando liberet, ha-
litu necare. Hæc eo iactabant consilio, ne pestiferum
deinceps hominem Rex ad familiare colloquium vel
admitteret vel euocaret. Harum technarum & con-
flatæ mihi apud Regem inuidiæ planè inscius, mira-
bar ad priuatas colloquutiones in palatium me non
euocari de more, ad mensam non adhiberi à Rege,
qui sibi alias assidere iusso, dapes appositis au-
gustis manibus ministrabat. Si quando me digna-
retur

retur alloquio, raro vero dignabatur, è minus verba facere iubebar, atque adeo, cum minus acutarum aurium esset, per Interpretem Eunuchum, qui verborum meorum integritatem, pro arbitrio corrumperebat. Et hæcenus quidem me latebat tam subitæ mutationis causa.

Tota disseminatus Aulâ, de meâ magiâ pestiferisque halitibus rumor sic inualuerat, vti die quodam, cum prætorianæ cohortis centurio vnus aliquis ad templum nostrum accessisset, qua solebam hora ad populum habere concionem, in ipsis templi foribus substiterit: Ego consilij ignarus, ad subsellia suggestui viciniora, tum honoris causa, tum vt dicenda commodius exciperet, quantâ possum humanitate compello, sed meticulosum auditorem fugauere meæ compellationes; abcessit ergo, & si qua aliorum dictis fides, ideo abcessit, ne nimia vicinia mortiferis meis halitibus opportuniorem præberet. Vbi subiit admirari, non tam credulam hominum simplicitatem, quam perniciosas Satanæ technas, quibus faciles illorum mentes à pijs concionibus audiendis auertit.

Baptismum etiam ipsum in eandem suspicionem atque inuidiam vocare modis contendit omnibus hostis idem vafferrimus. Die si quidem quadam dominicâ, pomeridianis horis, cum omnem apparatus instituentem ad lustrandos Catechumenos supra 80. iamque ad ipsam Salis, quam in disco habebam, caeremoniam operando progressus fuisset, instigatus à Dæmone Ethnicus, furioso impetu inuectus, attendite (exclamat voce horrendum in modum,) contenti, miseri ad veneficium in disco latens, attendite his

dictis euolauit. Ad hæc ego meam circūstantibus probaturus innocentiam, discum propono, in eoque salem patrium, dumtaxat piis dicatum precationibus contineri; vel ipsis oculis iudicibus euinco. Credidere visis omnes, nec fictitius venefici timor, vel vnum quidem à sacris fontibus auocauit.



Quibus lenimentis exacerbatum Regis animum, & artificiosè confictis hostium criminationibus occupatum placauerimus.

C A P V T XXI.



Vb hoc ipsum tempus quo nec aula, nec ipse Regis vt olim animus patebat nobis, deliquium passa est luna, cuius figuratam descriptionem fideliter adumbratam, in chartâ, quæ breuem præterea principij durationis, & finis explanationem complectebatur, paucis ante ipsum deliquium diebus, in publicum dedimus. Adiecimus, ne vel vnum quidem de duratione minutum detrudere posse tormentorum omnium toto factam imperio explosionem; Nec vero, maiorem ea quam notaueramus, partem ab infesto dracone haustum iri, tametsi ad leuandos illius labores, hostemque deterrendum, nihil planè non moueant Cinenfes. Omnes ad Regem aditus nobis præcluserat semper erecta vigilque hostiū nostrorum inuidia; sed inuidiam vicit industria, breuique perfectum est à nobis, vt in Regis manus descriptionis tabula veniret. Ille circumspectâ curiosius chartâ

chartâ graui pœnarum interminatione prohibet explodi tormenta , aut aliud quidquam fieri eorum, quæ Cincensium superstitio , ad leniendos lunæ labores , ea nocte solebat adhibere. Cumque adumbratis Lunæ discriminibus, veri respōdissent labores, & eandem pugnam cœli arena dedisset , quam anteuenterat charta, Rex ipse verbis magnificis cohonestatâ nostrâ peritiâ, nostrum aduersus obrectatores patrocini-um in se suscepit. Non tamen omnis congressus nostri timor excussus, nec pristinarum consuetudinum eadem vel frequentia, vel facilitas erat : quippe illius animam curis ac cogitationibus variis duo maxime hominum genera distrahebant.

Primi erant venefici & incantatores, qui tam commodum audiendis calumniis , quam stultis ; Dæmoni-aciisque superstitionibus opportunum Regis animum experiebantur. Hoc hominum genus in nos exacerbauerunt edita à Neophytis vbique terrarum, in ægris ad sanitatem restituendis prodigia, vnde non de veneficiorum autoritate, duntaxat , sed de fructuum quos è veneficiis colligebant , amplitudine non parum decessit. Ergo sua vlturi damna, cum obseruassent. Vitâ functos esse nonnullos ex iis, ad quos sacro fonte purgandos euocati fueramus , cum iam in supremo discrimine versarentur, legem Christianam, gem mortis per deridiculum vocitabant ; Regique passim obtrudebant, venisse, nos vt fideles subditos, vt exercitatos quosque milites tolleremus , ac demum nudatum viribus Regem hostium manibus committeremus , quam certè calumniam tum quoti-
diana satis diluebat experientia , tum acie ac

viuax in primis Regis ingenium refellebat:

Subiere altius illius animum Laicorum obtreccionones: Illi non tam desertorum idolorum, quam imminutorum censuum dolore commoti, vt idolis addictissimi Regis animum à nobis auerterent per id temporis vir nobilis cum totâ familiâ sub Christianæ fidei iugum concessit. Is adhuc Ethnicus, suis impensis domum ædificauerat prophanis idolorum cultibus addicendam, aram tamèn adhuc in ea nullam crexerat, nullum collocauerat idolum, vt sacro fonte lustratus fuit, mutato cum religione consilio, statuit apud se, sanctiores ad vsus, ad Dei nimirum ac Christi IESV cultum eam traducere. Demum igitur ultro nobis offert, solemnem Xianorum rituum pompâ Deo dicendam; Tametsi prolixam Neophyti voluntatem laudauimus, eam tamen accipere non placuit, nec tentare quicquam prius, quam locum otiosius recognouissemus; ne eadem esset illius conditio quæ templi cuiusdam, extra vrbis pomeria conditi quorundam Ethnicorum sumptibus qui post data Christo nomina, nobis illud, in Ecclesiam conuertendum obtulerunt: sed cum prophana omnia, superstitionis polluta ritibus, superimpositaque altaribus idola reperissemus, visum est nobis oblatum non accipere sed sibi omnibusque tempestatum iniuriis permittere, lenta periturum ruina, ne Idola comminuentes cultorum in nos inuidiam atque odia conuerteremus quæ causa Canonum conditores mouit, vt illud intentatâ poenarum grauissimarum multâ prohiberent. Verum postquam nostri Neophyti domum lustrauissemus, sicut illius peropportunum recognouissemus,

uissimus, sancta omnia, nec dum prophano idolorum conspectu corrupta animaduertissemus, eam accepimus non ægrè & solemni ritu Deiparæ Virgini dicauimus; aræ imposuimus illius imaginem, natum amantissimum, in materno sinu placidissimè con- quiescentem, qualem scilicet adorauere Magi, præfe- rentem: Eâ in arâ cœlestem victimam Deum in- cruento sacrificio mactauimus. Demum sacris opera- tionibus ritè perfectis, piam cohortationem cui di- candarum ædium ritus argumentum suffecit accom- modum ad numerosam quâ Neophytorum quâ Ethnicorum qui aderant stupore ac veneratione de- fixi coronam habuimus.

Ad hæc exarsit scilicet triumphatus Dæmon, & tar- tareis iustigatos facibus sacrificulos in aulam traxit ad instruendas nobis coram Rege calumnias & adorna- uere quidem liberaliter, nunc comminuta templi idola nunc violata Deorum iura furiosè vociferan- tes; Regias partes esse Deorum saluti consulere, ho- dieque statuere, an peregrina lex illa, idolorum culti- bus exitialis, patriæ, & ipsis adeo cum Cinis natæ Re- ligioni præhabenda videretur. His incitatus furiis Rex, inconsulta temeritate præceps adhibitis pœna- rum grauissimarû minis edicto sancit, ne subditorum quisquam in posterum posthabitis patriis sacris Christianos indueret ritus, idolorum, quæ Ci- nenses ab æuo coluerant. Protinus ad nostrarum ædium foras, in nostris ac complurium Neophyto- rum oculis edictum affixere satellites Regij. In ma- gnam enim uerò sollicitudinem ille nos casus addu- xit; sed languescentem suorum constantiam excitante Deo,

Deo , quasi de cœlo moniti , ad Regium aduolamus palatium , repræsentandæ causæ copiam nobis fieri postulamus ; facit non ægrè Rex. Ergo vetera hostium nostrorum odia nouas quot diebus calumnias nobis adornantium nouas struentium technas exponimus, quas procliue esset oculatissimæ suæ Majestatis sapientiæ retegere : Regiam in nos munificentiam, cumulatamque liberalitatem innocentiam nostræ tot accusatorum calumnias conflauisse. Eum denique obtestati sumus, ne tātum tribueret effrenæ calumniatorum nostrorum petulantia, vt ne ante causam cognitam præiudicatos nos damnaret. Eam in rem dum causæ nostræ otiosius cognoscendæ incumberet , edictum si liberet rescinderet, quod pro nostris foribus regio iussu pependerit.

Incredibile dictu quam suauiter efferatum Regis animum mitigauerint preces nostræ , illum certè nobis ita placauere , nihil vt nostris non concesserit postulatis ; amplissimam toto regno promulgandæ fidei Christianæ potestatem indulserit, ea tamen lege vt à comminuendis idolis abstinere-mus. Egimus vt par erat immortales pro tanta humanitate gratias , sanctissimè testati Neophytum nos hætenus nullum ad idola comminuenda induxisse interdicto potius seuerissimo , ab eorum violandorum mente quantum in nobis fuit abduxisse , & in pacifici IESU verba iurantes ad amica pacis consilia inclinasse. Hisce responsis mirè recreatus Rex cum bonâ tandem veniâ dimittit , iussis subsequi ministris cum liberali cibariorum copiâ , quæ in Neophytos dispersimus , toto nostræ allocutionis tempore in

eo consilio , vt precibus Regem Regum nobis placarent , interea dum Regem illius subditum eius cultoribus conciliare modis omnibus niteremur , illi igitur vt videre ab Aulâ reduces ; tam piæ causæ , regiæque insuper beneuolentiæ victores , humanorum cordium triumphatori Deo, non tam Eucharisticum, quam Epinicium cecinere.



*Neophytorum zelus, ac pietas in festis per annum
recurrentibus celebrandis.*

C A P V T XXII.



Acram Natali Domini diem , apparatus, quam nostræ ferebant vires magnificentissimo cohonestaueramus : puta Carhecumenorum complurium publicâ lustratione, qui fœlici piacularium aquarum partu, nato Christo renati sunt ; piis insuper , ac festiuis cantuunculis ad sanctam alacritatem compositis sub eam noctis horam, quâ in terras prædiit Deus infans , canorè & cum incredibili triumphantium animorum gaudio recitaris. Quia vero iustas ob causas nocturno ædium nostrarum aditus interdictæ fuerant mulieres : in templum confluxere, atque adeo illud compleuere, tam matutinæ, vt ipsum dici ortum antegererint : Christi recens nati imaginuculam , tum ad adorationem, tum ad piam suauiationem produximus, tanto ardori obsequentes: Adorauere igitur omnes, & religiosa fixere oscula, eo pietatis sêsu, qui capi facilius, quâ dici possit.

Et

Seque

Sequebatur ordine celebrandum anni incuntis exordium. Solemne est Ethnicis annum totum prophanis dicare superstitionibus, trium primorum illius dierum publicâ temeratione; nos sanctioribus ceremoniis consecraimus pietati. Illius capsulæ loco, quam summæ perticæ, ad ipsa domorum limina depactæ illigatam ostendant Ethnici Crucem sanctissimam moniti præfixere Christiani. Vidisses in omnibus fere ciuitatis regionibus, salutare illam arborem, super editissima palatiorum tecta, sese efferentem magnificentius, illustre Dæmonum terriculum, Beatorum mentium delicias: Vidit Rex ipse dum per vicos vrbs principes eâ quam alibi descripsimus pompâ, circumferretur: Et, en, inquit, Christianorum vexillum. Tres igitur primos anni instantis dies, sanctis hisce, exercitationibus, quas indixeramus, æquauere. Et primum quidem conditori conseruatorique Deo, secundum humani generis restauratori Christo, tertium Spîritui sancto, gratiarum largitori, suæ ad Euangelium vocationis auctori, tam insignium beneficiorum memores, dedicauere. Atque uti ne vel vnus quidem zelus ac pietas desiderata est, ita nemini consolatio cœlestis defuit.

Tam fausta anni exordia excepit Purificatæ Virgini sacra dies, quam ut debita ornaremus pompâ, ex solemni Ecclesiæ ritu, appositis benediximus cereis, singulos & accensos illos quidem, cum singulari lætitiæ pietatisque sese prodentis in vultu significatione, per totum templi ambitum singuli circumtulere Neophyti: Moniti insuper singuli, circum vnum domum secum asportauere, tum, ut, si quid humanitus
contin

contingeret, ad mortem fœliciter prælucérêt; tum vt imminētis ad momenta singula mortis memoriā oppōrtunè refricaret : Tametsi enim mentionem mortis auersantur Ethnici, nec illius nomen, coram viro dignitatis aut nominis alicuius vsurpare audeat quisquam, sed, si qua vrgeat necessitas, liceat tantum variis tectum ambagibus indicare, ne pronunciatum, meticulosas lædat aures; Nostri tamen Neophyti, & inter eos nobilissimi, qui adeo formidabile non auersantur nomen, vt frequentes gaudeant, de morte, deque illius fortiter obeundæ ratione sermones ingeri: Cereas vero faculas ad hostem animarum infensissimum tenebrionem inquam illum fugandum valere non mediocriter putant.

Aberamus propius à quadragesimali ieiunio: laborandum nobis non fuit, vt piā illam in sua corpora crudelitatem Christianis Tunchinēsis probaremus. Cum enim eos non lateret, quam seueram Ethnici nonnulli; pietate in Deorum cultum fictitiæ mori, sibi metipsis indicant abstinentiam, non ab vna dumtaxat carne, aut ouis (de lacte nihil dico, nec enim in hisce regionibus adhibetur) sed ab omni quoque piscium genere, nec in vnum tantum aut alterum mensem, sed in reliquam vitæ periodum, eamque tam religiosæ colant, vt brutæ animantis, & alitis cuiuscunque cædem, eidem plane crimini, atque hominis cædem ducant; hæc inquam omnia, cum ipsos non subterfugerent; indictumque ab Ecclesia ieiunium ab eâ seueritate longius abesse viderent, repertus est eorum nemo, quos quidem à sua lege non absoluit pia mater Ecclesia, qui in saluberrimam illam sui corporis

indicta abſtinentia macerandi legem non conſenſerit dubens, ſanctiſſimeque eam coluerit. Imo cum ſub ipſum aduentus initium, innuiſſemus nonnullos, pro religioſâ ſuâ conſuetudine, tempus illud ſanctiſſimum, ad Chriſti natalitia voluntario tranſigere ieiunio, Chriſtiani omnes, ſi paucos, excipias, eam ſibi abſtinentiam indixere.

Vertente quadrageſimâ, palmarum ramos ſolemni precationum ritu dicauiſus; cum enim Oliueta non ferat Annanenſe regnum, palmis vero ſcateat nobiliſſimis, eas ad hancce cæremoniam adhibuiſus. Tam frequens fuit, non Neophytorum modo, ſed etiam Ethnicorum dicatas palmas expetentium, concurſus, vt non ipſum cum ſacris ædibus hoſpitiū, non area quæ templo præjacet, tametſi capaciſſima, conſluentium multitudinem amplecti poſſet. Aſſeruere domi religioſè quas abſtulerant palmas Chriſtiani, iſque velut armis victricibus Dæmonum inſidantium conatus fregere, moleſtoſque vexatores ab Energumenum corporibus eiecerunt. Expiauerunt peccata ſub hæc tempora vniuerſi; cœleſti tamen pane refici non potuerunt omnes, quippe præparatas ad id hoſtias, infernus credo ignis abſumpſerat. Quanto cum pietatis ſenſu, quanta cum lachrymarum eluuiōe ad Chriſtum de cruce pendentem adorandum acceſſerint, ſatis aſſequi verbis non poſſum.

Cum ad celebranda tenebrarum myſteria non ſufficeret paucitas noſtra, nec ſubuenire paucitati poſſent Neophyti, quippe librorum noſtrorum non intelligentes; ne tamen conſolatione careret illorum pietas, in capita 15. Præcipua, Paſſionis myſteria diſtribuimus,
ita

ita vt pòst-recitatam decies non interrupto ordine salutationem, (prælegeretur aliquid, quod ad vnum è præcipuis illis capitibus pertineret, brevis meditationis argumentum;) succederet lectio, brevisque meditatio, cui vnum è præcipuis illis capitibus argumentum daret. Ardentium Romano ritu cereorum vnus extinguebatur. Tanta vis, per hæc cæremonias, lachrymarum fuit, tantæ complorationes, Christo compatiens animi testes, vt à tota vicinia, missi gemitus exaudirentur; monendique fuerint de moderatione adhibendâ suspiriis, ne damnanda propinarent Ethnicis mysteria, quæ ipsi non caperent.



Christianorum quorundam non felicissima.

C A P V T XXIII.



Elebrauerant hoc anno Christiani, quantâ maximâ potuerant religione, solemnia saluatoris resurgentis mysteria; sed ab eâ festâ celebritate, vix euoluta erat octaua dies, cum nobis tres viros, eximiè pios, notissimæque inter omnes virtutis acerbissima mors eripuit, perpetuam vti speramus acturos in cœlis festiuitatem.

Primus omnium ante septem omninò menses Christianis sacris expiatus, Thadæi nomen adeptus erat; ac tametsi corporis viribus erat infirmissimus, animi tamen robore prorsus infraçto, Domini legem, dies, noctesque meditabatur. Cum autem grauissimo afflictus morbo, intellexit imminere sibi diem decre-

toriam, quâ æterna salus vertitur, vocari nos absque morâ iussit, vt ad tantæ rei negotium strenuè obeundum, opportuno subsidio iuuaretur: nos ad eum è vestigio accurrentes, ante omnia, peccatorum vnicum remedium, confessionem ritè faciendam, subiicimus. Ille alacri statim voce querere, num expediret ea etiam peccata quæ baptismo suscepto anteriora forent, in hoc pœnitentiæ sacramento omnia exponere. Id cum audisset negari, peccata enim omnia baptismi aquis piacularibus ita deleri, vt nullum deinceps eis curandis remedium queri debeat, nisi doloris ea crebrò retractantis, & intimis sensibus detestantis. Deo igitur laudes sint, (inquit exiliens gaudio Thadæus,) paucis enim mensibus illis, cum baptismum suscepi, vix aliquid me habere sentio, in quo me reprehendat cor meum: nam tametsi ante illud tempus, memini sanè, plurimis ac nefariis sceleribus fuisse me inquinatum, at ab eo tamen articulo quò Christo per fidem transcriptus sum, Dei legem tam altè in animum demisi, vt quâ re illam violauerim, equidem non inueniam. Atque hæc cum incredibiliter gestiens, secum ipse ac Deo diceret, libellum orationum in quo exaratus erat decalogus, impositum habebat capiti, & subinde multa suspirans suauissimè deosculabatur: ego hîc ægrotantem multis sermonibus solatus, post piissimas ad Deum preces, recedendum ab eo putaui aliquantulum, vt spatij aliquid haberet ad quiescendum, habuitque omninò, quippe cum breuissimo interuallo, suspensio vestigio ad eum propiùs accederem, exanimem reperi, exhalarat videlicet purissimam animam in osculo Domini, pium illum
libellum

libellum precationum , & diuina præcepta supra pet-
ctus deuotissimo affectu stringens.

Alia sub idem tempus duos Neophytos acerbissi-
ma mors extinxit , genere nobiles sed virtute clario-
res, vtrique Petri nomen inditum erat in baptismo,
atque ambos illo ipso die morientes vidimus, quo so-
lemni Ecclesiæ ritu Euangelium prælegitur de Petro
in Christi monumentum introeunte. Tristissimus
videlicet nobis , & Ecclesiæ Tunchinensi luctuosissi-
mus illuxisse visus est ille dies , in quo duas illius co-
lumnas ruere conspeximus. Primus eorum regiæ
cohortis dux erat primarius, quem habebat claris-
simum, multisque ornatum beneficiis ad grauissima
regni negotia crebrò adhibebat. Ille vbi primùm
Christo se addixit, euocauit sedulò filios omnes, se-
riòque monuit, constitutum sibi omninò esse nemi-
nem habere loco liberorum, qui supremum rerum
omnium conditorem Deum , & filium eius Christum
Iesum , ritè non agnosceret, quâ oratione omnes per-
moti, salutari lauacro expiati sunt, inde concubinis
omnibus domo eiectis, reliquos domesticos Chri-
stianis mysteriis paulatim imbuuit, & per sacrum etiam
fontem, gratas manubias Christo duci obtulit. Neque
his erga suos officiis contentus, in aliorum etiam om-
nium salutem impensissimo excubabat studio. Nullus
enim dies erat, in quo, postquam in aulâ regiâ omni
officio suo defunctus erat, non conuolaret illicò ad
Ecclesiam, cœlesti regi meliorem operam nauaturus.
Atque vt id faceret vtilius, interim dùm ad proue-
ctiores solita concio haberetur stabat ipse; ad fores
tanquam Doctor, & apparitor, indoctiores enim eru-
diebat

diebat sacrorum nostrorum scientiâ, & tardiùs venientes prohibebat, ne importuno strepitu turbarent audientium quietem. Quæ res, & Christiani iuxta, & infidelibus curiosè hùc accedentibus pro miraculo erat, continebatque omnes modestissimè in officio, quod notissimum vulgo esset, quantum ille apud Regem valeret gratiâ, & autoritate.

Cum igitur vir eximius huiusmodi virtutum radiis Ecclesiam nostram illustraret, probare adhuc illum, atque in fornace tribulationis expurgare, Deus voluit, immisiss in domesticos eius ferè omnes morbis acutissimis. Sedecim sub finem quadragesimæ, in eius domo decumbebant, partim liberi, partim famuli, quibus ipse subleuandis, quâ curis, quâ laboribus semper aderat. Vnde breui debilitatus, in lethalem etiam ipse incidit ægritudinem, cuius periculo statim cognito ad negotium salutis omnem cogitationem cœpit conuertere, aderamur nos ei, atque omni Christiano præsidio iuuabamus laborantem. dici vix potest quanto mœrore nostro exeuntem è vitâ optimum virum prosequeremur. Optabamus, atque omni prece à Deo etiam etiam postulabamus, relinqui adhuc nascenti huic gregi pastorem adeo necessarium atque salutarem. Sed aliter summo pastori ac principi vrsus est: eripuit nobis illum, & cœlo iam idoneum placidissimâ & sanctissimâ morte defungi voluit, & cœlestibus pascuis inferri. Nihil nobis eâ morte luctuosius poterat contingere, quâ Christianis omnibus parens optimus est ademptus, & ipsis Ethnicis data impiæ obtreccationis materia, per quos vulgò iactatum est, atque ad Regis etiam aures perlatum, nos
illius

illius mortis reos esse, non aliunde tantum illum virum quam à nobis necatum fuisse. Quâ stultissimâ calumniâ magnam sensimus nobis apud vulgus credulum conflatam esse invidiam, atque apud Regem ipsum odij materiam quod breui postea exarsit.

Huic acerbissimo dolori nostro eâdem prorsus die, maximus accessit cumulus, alterius etiam Petri obitu præpropere, atque luctuosissimo. Erat autem is ipse à quo paucissimis abhinc mensibus, dono acceperamus eximiam illam domum, quam idolis colendis extruxerat adhuc infidelis, deinde vero susceptâ fide melioribus auspiciis Christo Saluatori consecrari voluerat: amabatur in paucis à regis fratre, atque ab eo in prouinciam *Thinhua*, negotiorum causâ missus periculoso morbo laborare cœpit. Id autem in tanto malo gravissimum sibi esse palam profitebatur; quod nostro conspectu alloquioque frui nequaquam posset, neque fortasse fruiturum, priusquam excederet è vitâ. Postquam ergo cognouit nihil ampliùs in medicorum præsidiis, spei superesse, voluit statim militum inmeritis in regiam urbem deportari, centum quinquaginta milliaribus distantem. Corporis utique fatigationem, morbi vim acerbissimam, imò & mortem ipsam pro nihilo habens, modò suauissimo patrum suorum (ita nos ille compellabat) authorumque salutis suæ, viuus adhuc subsidio iuuaretur. Concessit optimo viro Deus, id quod omnibus votis expecterat. Delatus est in regiam spirans adhuc, sed extremo ferè impetu animam adhuc ægrè trahens, nos autem ut conspexit, audiuius illico erumpentem in pias gaudij lacrymas atque illud Simeonis Canticum

Mm

inge

ingeminantem nunc dimittis Domine seruum tuum in pace, id enim optabat vnum, ac nos amantissimè complexus, voluit supplex in genua erigi, vt deum etiam morte suâ adoraret, atque in eo pietatis munere diem clausit. Conuenere ad eius exequias frequentissimi Christiani omnes, quotquot in regiâ eâ vrbe tunc agebant, easque summo quidem animi mœrore, sed pompâ tamen maximâ concelebrarunt.



*Prohibetur nouo Regis edicto, Euangelica predicationi
ulterius operam dare.*

C A P V T XXIV.

DVo Christianorum primariorum funera incredibilem rebus nostris, & toti Christiano gregi attulere cladem. Quippe aduersarij in omnem nocendi nobis occasionem intentissimi, eximiêque facti ad calumniandum, nacti quod maximè optauerant, innumeris mendaciis populum in nos commouebant, adeo vt ad Regem etiam ipsum, tetrum virus serperet. Totum videlicet tempus paschale, quod Christiani vbique gentium tam effusâ piâque lætitiâ concelebrant, nos in mœrore, ac perenni gemitu peregimus. Nam tametsi suum semper cursum Euangelij promulgatio teneret, plurimique, ac primariæ notæ quâ viri quâ mulieres ad Ecclesiæ, sinum conuolarent, censebantur quippe anno illo 1628. nouæ huius Christi vineæ læta germina mille sexcenta. Imò & tantum

tantum in eorum plerisque feruoris erat & diuini zeli, vt non pauci, ex variis vndique prouinciis in patriam vltro remearent. vt suos Christo lucrarentur. Insignis per eos dies extitit Petri cuiusdam militis zelus, is enim in patrio solo, ducentis circiter à regiâ vrbe miliaribus vxorem ac filios, adhuc teneros deportari curauit ad nos, & Christianis sacris initiari.

Neque tamen interea dormitabat nequissimi Dæmonis furor, sed totus ad impediendos adeo lætos Euangelij progressus excubabat, suscitauit enim in perniciem nostram, perditissimi cuiusdam hominis rabiem ex prouinciis memorati sæpius rebellis. *Ciua Chan*, cui etiam longo tempore adhæserat. Is Saij munere aliquandiu perfunctus cum videret, lugerétque squalentia iam templa vbique deferi, & Idola contemptui haberi, confluere turmatim populos ad Ecclesiam, & Christi nomen toto regno latè celebrari, conuertit impius veterator ad alias fraudes animum, cœpitque sub signis perduellis illius Reguli exercere latrocinia, & in subditos Tunchinensis Regis incursiones facere. Sed à Regiis comprehensus cohortibus, atque ad Regem deductus, vbi satis intellexit nullam sibi, esse posse reliquam acerbissimæ mortis vitandæ viam, cogitari tamen cœpit noua scelera, quibus eam saltem in aliud tempus reiiceret. Et altissima vt poterat voce inclamare, parcite inquit infortunatissimo capiti, ciues amantissimi, differte pœnas atrocissimas quas commerui, erit indulgentiæ vestræ in me fructus vobis opratissimus, totique Regno vestro admodum salutaris. En refero vobis, si annuitis, iniquissimam in vos Regemque vestrum

Mm 2 coniu

coniurationem, modum edissero, authores patefacio. Videtis Europæum hunc sacerdotem, fraudes vbique suas, & noua mendacia omnium auribus impunè ingerentem, En ille est qui cum Ciüachan Rege meo, & Cocincinæ principe, pacto fœdere; regiam propediem vniuersam cum Christianis suis ferro ac flammis vastare meditatur. Dùm interim cum infestis copiis ab aquilone inuolabit Ciüachan, Cocincinensis autem ab austro irruet Sic inter eos coniuratum, sic haud dubiè perituri breui estis, nisi malum imminens sapientiâ vestrâ, & prudenti consilio meo vsi, præuertatis.

Hæc vbi asseueratissimè ab impio impostore pronunciata fuere, exiire statim in vulgus atque ad regem etiam ipsum sunt perlata. Nos autem à Christianis nostris de tota re maturè moniti, nihil donec à Rege vocaremur, intereà mouendum duximus, sed conscientia nostræ testimonio freti, atque in diuino præsidio totam spem reponentes procellæ ingruenti animum parabamus. Cum ecce Rex tam assiduus atque tam atrocibus aduersariorum nostrorum criminationibus fatigatus, postquàm nutasset aliquandiù, erupit tandem atque in nos huiusmodi edictum iratus intorsit.

Nos Rex tametsi perspectum habemus, ab Europæis hisce hominibus, quibus in vrbe hæc nostrâ regia liberò habitare concesseramur; saluberrimam adhuc doctrinam populis nostris fuisse traditam, quia tamen non satis comperimus quid facturi deinceps sint, vel quænam consilia taciti animo voluant, seuerè prohibemus ac capitis propositâ pœnâ subditis omnibus nostris interdiciamus, vt ne quis post hac ad ipsos adeat, aut sermones eorum audiat, neve legi huic no-

uæ

uæ suscipiendæ ac profitendæ animum adiiciat. Hæc fuit summa regij rescripti, quod non chartæ vt mos est voluit inscribi, sed in altissimo stipite grandioribus exarari litteris, atque nostrarum ædium vestibulo insigi.

Agebatur tunc fortè dies Augustissimæ Trinitati sacer, cum tota in nos repente visa est commoueri ciuitas, & domus nostra miserabili vndique horrore concuti. Confluebant turmatim ad nos frequentes Ethnicorum bacchantium manipuli, miscebantque omnia risu, furore, vociferationibus. Iactabant videlicet supremam nobis haud dubiè futuram illam diem, nihil nobis certius morte per Regis ministros statim inferendâ, quo nuncio nihil sanè suauius atque optatius audiri à nobis poterat, iucundissimum quippe erat, qua die iubebamur à Christo Domino docere omnes gentes, & baptizare in nomine Patris, & Filij, & Spiritus sancti, eadem, fidem illam nostram veræ sempiternæque Trinitatis, fuso sanguine obsignare.

Hâc cupiditatis flammâ incredibiliter animati, quâ voluptate intus in animo fruebamur, eandem ore toto constanter præferentes, Christianos primum amantissimè dimittimus, ne quid nostrâ causâ incommodi paterentur; deinde supplices ad altare prouoluti è quâ, pulcherrima Christi effigies appensa cernebatur, expectamus optatissimum illum ensen qui salubri vulnere coronam Martyrij effingat. Cum ecce, infert se in interiora templi petulantissimus quidam ganeo, fuste armatus, furorem toto vultu, ac sermone præferens, audacterque imperat dirui continuò altare, amoueri effigiem prophanam, vestigia omnia scelerum.

aboleri. Nos quantâ maximâ possumus suauitate ac constantiâ, impudentem repellimus. Erectum esse nobis, annuente, atque approbante Rege, templum illud, extructam aram, imaginem appensam, neque fas vlli esse, nisi de mandato Regis illa dirui. Tum furcifer, ego (inquit) ego iubeo, ac mando, hanc totam superstitionum sentinam expurgari, atque in his vocibus, ad altare sacrum petulanter insilit, inuolat in sanctissimam imaginem, eamque impacto fuste sacrilegus impetit, & venerandam Christi manum impiè percutit, ac infringit. Diceres voluisse optimum Dominum, obiectâ manu suâ, vt scuto firmissimo, amoliri à nobis impetum hominis sacrilegi, atque in suâ imagine omnem contumeliam potius suscipere, quam nobis aduersi aliquid contingeret. Quippe dolores nostros ipse semper portare paratus est, & cum in suo ipse corpore nullius iam sit mali capax, in suâ saltem effigie tolerare iniuriam non detractat. Nos tam acerbo spectaculo statim territi, in amplexus ruimus sanctæ imaginis, stringimus, osculamur, deinde in hominem sacrilegum conuersi, obsecramus etiam atque etiam, furem totum in nos expleat, cruciet, dilaniet, exterminet, abstineat tantum temerario ausu, sacre imaginis religionem violare. Non impunè tulit facinus tam atrox, iniquus Satanæ minister, quarto ab hinc mense furti conuictus atque iudicum sententiâ damnatus pœnam tulit, sceleri suo parem, præcisi sunt ipsi, manus vtriusque digiti eundem prorsus in modum, quo prius munificentissimam Christi manum in suâ imagine ipse læserat.

Quanti us



*Quantus Christianorum omnium maior fuerit in
acerbissimo illo casu.*

C A P V T XXV.

Iruta altari sacro, stabat tamen adhuc domus, quæ regis autoritate constructa fuerat, sed ad nos venire, aut nos alloquio solari, Christianorum licebat nemini, excubabat enim ad fores, aditumque omnem intercludebat lecta militum manus, cauebatque sedulo, ne cuiquam irrepere ad nos secretò liceret: imò nec nobis, ad placandum Regem vlla via relicta erat: obstantibus iisdem illis vigilum manipulis, in hâc igitur rerum nostrarum perturbatione, nihil tunc quidem visum est opportunius, quam in silentio, & spe, optimi præsidis, ac parentis nostri opem præstolari, atque in eius sinum curas omnes, deponere: Cum enim perpetuum illum septem mensium laborem, quo à concionibus, aliisque ministeriis obeundis, nunquam vacaueramus, interrumpere necesse fuit, tunc vero experiri cœpimus fractas vires, & quam in ipso feruore occupationum, non aduerteramus, prostrati corporis lassitudinem persentiscere. Quamobrem opportunissimâ illâ occasione vtendum rati, ad reficiendas continuâ 15. dierum vacatione, corporis, ac præcipuè spiritus vires, salutare nobis otium indiximus, in quo spiritualia de more societatis exercitia obire instituimus. Fuitque consilium illud diuinæ in nos prouidentię maximum beneficium, si enim quâ mentis contentio-

ne;

ne; adhuc in quotidianis laboribus versati eramus, eandem non interrupto cursu tenere fas postea fuisset; defecissent omninò vires, & contracto languore vel moriendum, vel cessandum erat in omne reliquum vitæ tempus.

Post illam autem paucorum dierum quietem ad pristinas restituti vires, atque in diuinæ gloriæ propagandæ cupiditatem ardentius intenti, explorare cœpi-mus, quid tandem consilij turbidis in rebus capi expediret. Cum ergo toto illo anni, vnius, ac paucorum insuper mensium spatio, publicè hætenus ac palam ad fidem & pietatem omnes insonante veluti classico, essent euocati, tunc tamen consultius visum est priuatim, ac occultè per domos plurimas discurrendo, inuitare ad regnum cœlorum, & compellere intrare: licet enim Christiano nulli fas erat penetrare ad ædes nostras, aperiebat tamen ingeniosus ardor aliquando aditum, atque in nostra occultè penetralia succedebant. Et nonnulli quidem interdum piâ fraude, mendicantium induti habitu, veluti stipem petitori adrepebant, quidam vicinas ingressi domos viam sibi muniebant in nostras, alij demum nocturnis tui tenebris, per deuia ventitantes custodum fallebant vigilantiam. Quæ omnia quia periculi erant plenissima, statuimus deinceps ad Neophytorum potius ædes silentio adire, quibus id futurum esset commodissimum atque in iis omnia consuetæ pietatis officia religiosi obire.

Primus ad cuius conuenimus domum, Ignatius fuit dux equitum nobilissimus qui cum veniendi ad nos, coramque colloquendi, maximo iam diù teneretur desiderio,

desiderio prohibitus tamen adhuc erat , mittebatque crebrò famulos , per quos de rebus nostris certiora disceret , inter eos vnus erat eximiâ indole , ac singulari animi candore adolescens , quem etiam Ignatius , cum propriis caueret liberis , habebat charissimum , atque in filium adoptauerat. Is ex amplissimâ hâc familiâ primus omnium Christo nomen dedit , cæterosque omnes deinceps , atque ipsum quoque ducem Ignatium Christianæ militiæ signifer aggregauit. In eâ itaque domo , amplissima nobis parata est exedra , in quam conuenire plurimi commodè possent , ac nos salutaribus eos monitis ad fidem erudire , tenuit nos aliquot dierum spatio , hic labor , multi eo in oratorio per baptismum lustrati , multi ad illum suscipiendum accensi , plures eo iam suscepto , ad pietatem benè sunt animati. Sed alio nos statim vocare cœperunt , vicinorum circumquaque pagorum incolæ , atque ad messem amplissimam colligendam compellere. Plures in iis erant Neophyti , quorum in domos incredibili beneuolentiæ significatione recepti , statim quæ nostri erant instituti propria impigrè obiuimus ; fuit in iis insigni animi pietate , fideique zelo Petrus quidam , pater familias clarus in paucis. Qui cum liberos omnes , ac famulos Christianis imbutos mysteriis ad fidem adduxisset , tum etiam ad extraneos omnes Christo lucrandos porrigebat se optimi viri charitas. Euocabat studiosissimè passim omnes ad sacram Catechesim , tantique ad capacissimam eius domum fiebant concursus , vt illis qui conuenerant capiendis esset angustissima.

Mihi sanè præstantissimi ac verè Christiani ho-

Nn

minis

minis digna videtur pietas quam insigni exornem encomio, & proponam in exemplum exquisitissimæ in familiâ piæ instituendâ sedulitatis. Surgebat ille semper constantissimè primo manè, ac statim domesticos omnes iubebat somnū excutere, atque ad preces conuenire. Accedebant autem omnes ad aram in intimo conclauī decorè instructam, pulcherrimâ supellectile ac imagine appensâ egregiè ornatam. Tum ipse Christianas preces clarissimâ voce piissimè pronuncians, iubebat subinde à singulis etiam puerulis accuratè repeti quæ dixerat, donec solemne orandi pensum per dimidiam horæ partem persoluerent, instaurabatque sub noctem eandem pietatis formulam, ad quam dato signo domestici omnes frequentes aderant, finitæque prece taciti exhibant, vel ad somnum, vel negotia domestica.

Memini ego sanè, non sine voluptate quâdam animi suauissimâ, conspicerē me aliquando cum forte prece consuetæ interessē, puerulum quinquennem, eximiâ formâ & indole amabilissimâ, orationi cum aliis dantem operam. Is quod primo diluculo ad id cum prouectioribus pensum accitus euigilasset, & serò etiam antè cubitum prouolutus in genua piissimè oraret, ægrè tamen continebat se tenellus puer, sed somno identidem oppressus deprimebat decorum caput. Sed instabat tamen à tergo pater, & flagello fugabat somnum iterum & tertio. Puppulus autem, nullo vnquam singultu edito erigebat se confestim, tenerasque attollens manus, preces vocetremulâ sollicitus recitabat, donec ingruente iterum somno durus etiam instaret monitor, virgaque; continenter percuteret.

cuteret. Tùm ego miseratus innocentissimi pueri constantissimam patientiam, qui toties flagellatus, nihil vnquam mutiuerat, finitâ oratione, patri author fui, vt mitiùs deinceps ageret cum infantulo, atque vt orarent domestici, tum alacriùs, tum attentius, vespertinæ orationi ante cœnam daretur opera; quo tempore pueros, & adultiores etiam vix vnquam sopor obruit.



Quomodo Christiani ad Ecclesiam sensim iterum conuenerint.

C A P V T XVI.



Oto eo interuallo, quo Christianis aditu in Ecclesiam nostram interdictum fuit. Dominici tamen omnibus ac festis diebus, conueniebant illi semper in priuatas domos atque in sex vrbis regiones turmatim discreti, solemnem habebant precationem, ad quam constitutâ omnes horâ frequentissimi aderant, nos vt in eo præclaro pietatis stadio decurrentes, magis etiam quotidie animaremus, singulis illis diebus nouam ad eos epistolam, sedulò conscriptam dabamus, piissimis præceptis plenissimam, ex Euangelicis præsertim oraculis, vel ex sanctorum tunc occurrentium rebus præclare gestis. Mittebatur subinde ad singulas congregationes exemplar vnum, atque ibi publicè prælectum, incredibiles in omnium animis excitabat pietatis flammæ, & ad religiosa officia mirificè afficiebat.

Nn 2

Post

Post quatuor autem menses quibus institutum id tenuimus, nouo quodam casu, iterum neophytis aditus patere cœpit in Ecclesiam. Cum enim in magno illo flumine; quod magnam hanc urbem alluit, festi quidem ludi agerentur spectante Rege, casu accidit, ut cum Christianus quidam Regis famulus, plures simul exploderet bombardas, ignis scintilla importunè in subiectum tormentarium puluerem excussa, Funestam cum immenso fragore flammam excitans, vicina omnia incenderit, & miserum etiam illum qui bombardis præerat consumpserit. Percussus est inopinato eo casu Rex, iussitque ut famulo illi, quem impensissimè amauerat, noueratque Christianis fuisse initiatum, funus Christiano more, magnificè suis curaretur sumptibus. Conuenere ad illud ex templo fideles omnes, atque eadem operâ, venire iterum ad nos ausi, iusta persoluerunt defuncto, prosequuti eius corpus ad conditum in campo sepulturæ locum. Vbi & ego ad frequentem coronam publicè in ea verba dicere aggressus sum, iam hyems transiit imber abiit, & recessit id conatus ostendere, propterea permissas à Deo esse persecutiones omni tempore in Ecclesiâ, ut eorum qui verè fideles essent probata virtus palàm innotesceret. Alios qui ad tempus duntaxat credunt, & in tempore tentationis recedunt esse veluti paleas, quas leuissimus venti flatus iactat, atque à purissimo grano separat. Persecutionem quâ Tunchinensis adhuc Ecclesia vexata esset salutare ipsi fore, non enim passurum optimum dominum ut tentaremur supra id quod possemus, sed facturum cum tentatione prouentum. Cœpisse illum iam misereri, & imperare

ventis

ventis ac mari, vnde iam tranquillitas postliminio redire videretur : ad hac voces exultare Christiani omnibus gaudiis , & in lacrymas, lætitiæ indices, liquefcere. Sed ne tamen vlla nouis criminationibus via pateret, monere illos cœpi etiam atque etiam, vt modum feruenti zelo ponerent, neque ad ædes nostras tam crebrò ventitarent.

Vnum porro erat quo Christianorum pietas in primis alebatur; Cum enim omnes domus quæ nostris ædibus & Ecclesiæ adiacebant, Christianos haberent Dominos, perfacile nobis fuit, Christianorum vndique accurrentium cœtus in iis secretò cogere, vbi ministeria nostra sine strepitu ac pompâ sed fructu sanè vberiori obiri possent. Cum autem ex prouinciis longè distitis exciti plurimi, ad capeffendam fidem conuolarent, insignis sanè præter cæteras fuit vocatio vetulæ cuiusdam octogenariæ, quæ cum existens in patriâ, centum circiter ab vrbe regiâ milliariis, plura inaudisset de Christianis moribus, vitæque sanctitate, maiorem in modum illis delectata, statuit vitæ suæ rationes ex illis dirigere, ac baptismum postulare. Deique protinùs impulsam sequuta dedit se in viam, vt quæ non nisi confusè, imperfecteque acceperat, ea per nos certius addisceret. Quæsiuit igitur cupidissimè illos per quos salutem sperare poterat, iisque adiuuentis totam se tradere cœpit audiendis atque addiscendis diuinis mysteriis tantâ contentione animi, vt breui sufficienter illis imbuta, baptismo suscipiendo idonea visa fuerit, cumque audiuisset neminem ad eum admitti solere, quin symbolum apostolorum, orationem dominicam, & decalogi

præcepta expedire recitare posset, non despondit tamen animum, neque propter ætatem deuexam eximi ab eâ lege voluit, sed incredibili conatu adhibito, ea omnia quatrIdui spatio rectè didicit, summâque tûm suâ, tûm omnium Christianorum exultatione ad sacrum accessit fontem, Annaque nominata patriam diuino læta dono repetiit.

Aliam item Annam eodem tempore vidimus, eximîâ pietate fœminam, gubernatoris prouinciæ *Chedum* coniugem nobilissimam, quæ ante aliquot iam annos Christianis initiata sacris, maritum sæpè conata erat ad eiusdem veritatis diuinæ fontem adducere, sed irritò semper labore; quod eum carnis adhuc vincula irretitum tenerent, & improbis mancipatum amoribus procul arcerent ab amplexu Christi, sed reliquam tamen omnem familiam felicius ab impiis erroribus abduxerat, imò & in totam vndique prouinciam diuini suæ subiectam præstantissima eius pietas sese protulit, plurimos ex eâ quotidie, diuinâ perfundebat luce, neque veniebat vnquam in urbem regiam, quò eam sæpissimè grauissima vocabant negotia, quin plures secum deduceret manipulos omnis ætatis hominum, quos diuinis imbuendos mysteriis, & baptismo lustrandos, fructum nobis laborum suorum offerebat, adeo vt frequentissimas in eâ statim prouinciâ, necesse fuerit extrui Ecclesias, vt capiendæ tantæ multitudini sufficeret, ad quam etiam quotidianis augendam incrementis maximus accessit cumulus eximæ diligentæ & laborum Ignatij, cuius crebra postea erit mentio.



Nouo Regis edicto in exilium tandem amandamur.

C A P V T XXVII.



Ompertissimum Regi erat criminationes illas omnes, quibus famam nostram aduersarij miserè prosciderant, nequissimè confectas esse ab hominibus impiis, abesse nos longissimè, ab omnibus illis sceleribus quæ iactata erant: sed certissimis tamen authoribus postea comperimus, ipsum quo tempore nos in regno suo morari passus est, vnum id spectasse, vt Lusitanæ naues ad suos portus frequentius alliceret, ratus manentibus nobis facile illas ad frequentiore nauigationem inuitari posse. Cum autem miserando postea casu contigisset, vt navis illa quâ Tunchinum deuecti eramus, ad insulam Ainam iactata fluctibus & ad scopulos allisa sceleratissimè periret, omnibus quidem hominibus periculo ereptis, sed mercibus tamen omnibus in mare merfis, neque redirent naufragi Amacaüm nisi anno iam exacto, vnde sanè importunissimè factum est, vt nulla toto eo tempore navis ex Amacaënsi portu aduenerit Tunchinum, id quod pessimè Rex interpretatus decreuit omninò, vt è regni sui finibus pedè referremus, oblatâque commodissimâ nauigiorum Cinensum occasione quæ reditura erant in patriam, misit ex suis aliquem qui exquireret, nunquid opportunum nobis videretur eâ vtî oblatâ facultate optimarum nauium, quibus

quibus facile nobis futurum esset in patriam reuer-
ti, respondimus, paratos nos quidem esse, ad omnia
Regis imperia, sed nihil tamen nobis commercij vel
Societatis esse cum Cinis, imò & timendum esse, ne
quid in eâ nauigatione incommodi eueniret, quod
suspecta videretur eorum fides, beneuolentia vero in
nos admodum incerta. Retentos nos esse magnâ Re-
gis voluntate, tunc cum Lusitanam nauim conscende-
re parabamus, postulare nos modò supplices, vt fas
esset aduentum alterius nauis præstolari, non potuit
Rex licèt maximè cuperet, æquissimæ voluntati no-
stræ oblucri, concessit quod petebatur, differremus
discessum ad illud tempus quo nauis breui ventura
putabatur.

Cum autem nullam etiam eo tempore anno scili-
cet huius sæculi vigesimo nono, vidit aduenisse nauim,
statuit dimittere nos citiùs in Cocincinam, vbi plures
huiusmodi essent naues. Mittit itaque vnum ex aulicis
qui præcipiat vt ad profectionem Cocincinensem ex-
pediti simus, non posse regem ampliùs pati, vt na-
uim illam expectaremus maturandum esse discessum,
sic omninò ipsum statuisse. Præsertim quod audiuisset
complures ex his quos baptismo nostro tinxissemus,
breui post tempore obiisse, molestissimum id esse prin-
cipi, illius enim omnes accusationes, iam pridem exo-
leuisse & vanitatis conuictas esse, vigere adhuc istam
in multorum animis, quam nec longa dies deletura
esse videretur: nos vero reposuimus, facillimum
etiam nobis esse hoc mendacij nequissimi telum re-
tundere: nihil enim mirum esse, si ex baptizatis aliqui
sæpè morerentur, cum nos plerique non prius voca-
rent,

rent, quum spem omnem abieciissent recuperandæ valetudinis, tunc enim plures animæ consulere, cum deposita prorsus esset salus corporis.

Hæcaudians, prudens ille Regis nuncius, sortem nostram iniquissimè ferre videbatur; multâque cum miseratione ecquid? tandem est cur ad deuota morti corpora sic acceditis, vt in vestra postea capita, omnis ex eorum obitu inuidia referatur; nunquid vtilius rebus vestris consuleretis, huiusmodi cadauera fugere, atque iis onissis, omnem operam impendere ad curandos alios, ex quibus nulla huiusmodi nota timeri posset. Nos humanitati tantæ actis benignissimè gratiis, respondemus, ita quidem facturos omninò nos esse vti consulebat, si solius corporis ducendam rationem, animam autem negligendam esse putaremus. Nunc verò cum commissæ præsertim nobis commendatæque sint animæ, improbè sanè impièque facturos, si quo tempore salus earum æterna periclitatur, eam, vano quodam infamiæ metu perterriti, nihili faceremus. Laudauit ille pietatem, sed imperia tamen Regis, vrgere discessum, nihil amplius posse illum differri, accingeremus nos ad iter, maturandam esse regij edicti executionem.

Persuasit illicò exilij huius nostri, regique mandati fama ciuitatem vniuersam, atque vbi ad Christianos etiam peruenit, accurrere confertim ad nostras aedes, implentes omnia gemitu & clamoribus. Quin & plures Ethnici quibus mysteria nostra placere cœperant cupidè petebant baptismum, adeo vt paucis illis diebus quibus profectio nostra dilata est, nullum omninò nobis tempus vacuum esse potuerit à labore.

Constituto autem ad discessum tempore , venit Regis sui nomine, vnus è primariis Eunuchis, qui 20. nobis aureos, pretiosumque ad vestes conficiendas pannum afferens imperauit, vt in paratam triremem sine morâ conscenderemus. De hinc plurimo vndique milite circumfusus, custodiendos tradidit proposito triremis. Nos autem in eâ calamitate, id vnum omni obsecratione postulabamus, vt ad Regem salutandum, agendasque ipsi pro acceptis per biennium beneficiis gratias, breuis aliqua temporis mora concederetur, sed frustra preces, circumstabat enim densa petulantissimorum militum cohors, omni que ad regem aditu prohibebat; imo & Christianos vndique aduolantes, atque ad nos accedere propius conantes, pertinaciter arcebant, stabant itaque ad exitus viarum, & quâcunque transitori eramus vicos, & compita eiulatibus, & lacrymis miserabiliter implebant; donec tandem erepti ab eorum oculis, delati sumus in triremem. Sed neque tunc posuere illi dolori, & amoris modum. Immisere se plerique in ipsum flumen, atque ad ipsam nauim intrepidè adnatantes, instaurabant gemitus, & postremas abeuntem excipere voces cupidi lacrymabiliter mœrebant. Ego hîc intimis dolens sensibus, inter lacrymas amore plenas, breuissimam ad eos pro tempore orationem habui, de constantiâ in susceptâ fide, ac pietate, de certâ in Deum fiduciâ, qui dilaturus non esset opem, sed in se sperantibus opportuna praesidia breui missurus esset.

Cum autem poscerent omnes poenitentiae sacramento sua elui peccata, neque possent in illis angustiis singuli peccata confiteri, erant quippe mille quingenti,

quingenti , ego interpretatus eam extremam esse necessitatem vsurpandum mihi remedium illud existimaui, quod in naufragij periculis prudenter adhibetur. Omnibus igitur edixi , vt conceptum animo dolorem de peccatis, signo aliquo exterius dato , præsertim pectoris tunsione testarentur , subiecique clarissimâ vt potui voce in hæc verba solemnem formulam ego vos absoluo &c. postremumque tandem inter mutuos fletus, & incredibilis beneuolentiæ signa , gementes vale diximus.

Vnus ex confertissimâ illâ piissimorum hominum turbâ erat Ioachimus cuius olim memini , litterarum Cincensium scientiâ nobilis, auditoris magistratu plures annos perfunctus in Regis Curiâ, eximius sanè vir, meritis venerabilior quam annis, erat autem septuagenarius, sed exilij tamen nostri orbitarem tanto eiulatu prosequutus est, vt factus videretur è depontano sene puerulus, ad parentum funera ingemiscens. Venit ille ad ripam fluminis , pretiosissimis indutus vestibus, ibique ter in terram prostratus, discedentes supplex venerabatur veluti parentes ac magistros suos (sic enim vsurpare solent Tunchinenses) cum autem crepti

sumus à conspectu , recessit ipse tanto mœrore

oppressus, vt per dies aliquot nihil omnino

cibi valens sumere , solo senio , &

intimo animi dolore confectus

sanctissime obierit.



Exilij nostri varij Casus, & circumstantia.

C A P V T XXVIII.



Nno itaque sexcentesimo 29. supra millesimum, exeunte martio discedere iussi fumus ex vrbe regiâ, & naui non incommodâ quidam sed exiguâ remorum 30. per varia flumina vehi cœpimus. Dux ipse qui triremi cum imperio præerat, tametsi principio seuerior extiterat, vbi tamen suis ipse vidit oculis eximiam illam Christianorum in nos venerationem, quorum plerique longè illo erant nobiliores, factus ipse mitior, eodem etiam nos honore ac reuerentiâ prosequutus est. Primarium quoque in triremi locum vbi sedere ipse consueuerat, vlrò nobis detulit, & secum etiam esse voluit, è Christianis autem qui nos in exilio sequi expetierant duos tantum voti compotes esse passus est. Primus erat Ignatius ante catechista, alter Antonius ille nuper memoratus, qui post diuturnam militiam, tradiderat se nobis famulum, ante annos fere duos. Catechistis autem aliis duobus Andreæ ac Franciscò Christianos omnes commisimus, quotquot in vrbe regiâ, imò & toto regno, fideles erant Christo quem in baptismo induerant.

Interim autem dum nauigamus singulis diebus sub vesperam de Christianæ fidei mysteriis, ad ducem, & milites custodiæ nostræ præpositos verba facere nunquam prætermittimus, quibus illi fiebant in dies, nostri amantiore,

amantiores, & audiendarum rerum diuinarum cupidi-
diores. Promouebat autem hoc studium vehementer
Ignatius, qui sacris cantionibus ad Idolorum Tunchi-
nensium contemptum ingenerandum accommodatis,
noctes ferè totas insomnis exigebat, & sensim in om-
nium animos mysteriorum nostrorum amorem inspi-
rabat. Mirabilis autem in omnibus tunc Christianis
pietatis zelus enituit, illi enim ubi de nostro exilio au-
dierunt, in suos quisque statim pagos se contulere quâ
fama erat nos transituros, vt ciues suos ad baptismum
suscipiendum eâ datâ occasione seriò inducerent, ac
præsertim nobilissimi cuiusdam Neophyti, singularis
fuit religio, qui cum iam antea vxori ac filiis familiæ-
que numerosissimæ viam præiussset ad fidem in regiâ
vrbe suscipiendam, non potuit tamen quiescere donec
pagi cui præerat incolas omnes ad eiusdem beneficij
societatem traduxerit. Cum igitur intellexit triremem
nostram ad illius pagi cui nomen est *Chebo* oram præ-
teruehi centum fere ab vrbe regiâ miliaribus, prodiit
ipse obuiam nobis, cum frequentissimâ militum co-
horte, acceptâque à duce nostro facultate, deduxit ho-
norificentissimè in domum suam. Vbi plures iam
Catechumenos rite ad baptismum parauerat: quâ nos
pietate magnopere delectati, accingimur illicò ad tur-
bam illam, mysteriorum nostrorum scientiâ imbuen-
dam, priusquam sacris lustraretur aquis, quod vt cõmo-
dissimè posset fieri deuotissimus ille Paulus (hoc enim
optimo viro nomen erat) cum vxore Luciâ ducem ac
milites pulcherrimis muneribus deuinctos, inuitat ad
moram diuturniorem quam designauerant postquàm
verò satis vniuersæ huic multitudini erudiendæ, ac

expiandæ posuisse , temporis visi sumus , nouo etiam officio , insignique demissæ animi argumento , prima beneficia cumulauit. Venit nobiscum in nauim , ac cum plurimo vndique luto tam inquinatæ essent vndique viæ , vt laboriosissimum esset per eas incedere , non suos modo milites adhibere voluit , sed suis etiam ipse humeris inuitos ac repugnantes vsque ad triremem detulit , nihil sibi vel iucundius vel honorificentius accidere posse palam prædicans quàm Deo etiam in seruis suis , aliquod licet humile ac laboriosum officium impendere.

Ex eo portu continuâ vnius diei nauigatione deuenimus ad pagum illum *Cheno* vbi ante annos duos primum Tûchini templum crexeramus , statim autem in illud ingressi , reperimus illud eximiè auctum ac ornatum , adiectumque illi amplum Xenodochium , vbi & Christianis egentibus , necessaria subsidia , & paganis etiâ ægrotantibus baptismumque poscentibus opportuna remedia parabantur : huc sine morâ conuenere Christiani omnes , ad sacra mysteria obeunda : eorum honoratissimis templi vniuersa procuratio demandata est ; quam illi cupidissimè amplexi , omnem in coexcolendo , atque amplificando operam sunt polliciti. In iis Anna quædam erat ætate vetula , sed animi vigore vegeta , & medendi etiam arte in paucis clara quæ totam se pio huic muneri ad omnem vitam reliquam consecrauit.

Verùm haud diu à discessu nostro , stare templum illud potuit , quippe Ioachimo illo seniore defuncto ; qui fundum ædificando templo concesserat ; liberi eius omnes à fide Christianâ , & paternâ pietate alienissimi,

nissimi, adiecere statim animum ad vindicandum iterum fundum illum, cumque valerent autoritate plurimum inter ciues suos, templum etiam ipsum miserè incenderunt, Christianosque omnes in eiusdem calamitatis periculum incluserant, nisi celeri fugâ flammâ iam grassantes euasissent. Post aliquot autem dies cum iam incendium omne desisset, Anna illa mulier piissima mouebat, tristissimas reliquias consumpti ædificij, atque inter cineres studiosè scrutabatur num aliqua forte res ex tantâ calamitate superesset: inuenitque inter ustulata ligna & lapides tabefactos, integrum & intactum sanctissimæ crucis titulum, quæ eo in loco erecta fuerat; cuius pars vna nostris, altera Ciniensibus exarata characteribus hæc habebat voces signum sanctum veri Dei cæli & terræ. Quas omnes litteras omnino integras non sine admiratione vidimus, post reditum nostrum ab exilio. Optimamque in partem omen illud interpretati, certò coniecimus, facturum posthac omnipotentem Deum, qui mediis ex ignibus, titulum hunc, victoriæ suæ testem subduxerat, ut perseveraret in toto regno, ac in ea speciatim prouinciâ, illibata & constans Christiana lex scripta & sculpta in animis fidelium digito Dei viuæ. Constititque oraculo fides, quod nullibi latius ac vberius quam intra prouinciæ huius fines, fides & pietas propagata fuerit, atque in eo etiam oppido in alteram ripam fluminis, longè magnificentior erecta est à Christianis Ecclesia in quâ conueniunt vndique Neophyti ac nostri etiam habitant commodissime in domo Ecclesiæ adiunctâ, vnde opportunis temporibus totam facile regionem obeunt.

Ex

Ex Prouincia igitur *Thinhoa* continuatis itineribus deuenimus in adiacentem illi prouinciā *Gheam*, celeberrimo portu nobilem, quem linguā patriā *Cua Cūa* nuncupant. hoc est portum Reginæ, quod præcipuo in honore apud eum habeatur meretrix illa perditissima *Cinensis* Regis filia, quam propter petulantem luxuriam à patre ipso deiectam in mare olim exequuti sumus. Cum igitur triremis nostra necesse omnino haberet portum illum præteruehi, angebatur animo vehementer, *Ethnicus* adhuc, dux noster, & sibi ac triremi timens, quid potissimum consilij caperet non habebat: solet enim sæpissimè dæmon ex eo loco, variis obiectis terroribus, infideles percellere, atque horribili spectrorum specie propositā incredibiliter dementare, quæ omnia dux ille noster ut à se auerteret parabat vanā sacrificiorum suorum superstitione malos genios placare. Quod ego ut aduerterem, omni statim conatu aggressus sum tantam à nostrā triremi pestem auertere. Monebam scilicet illum atque omni prece obsecrabam, spem omnem collocaret in Deum dominatorem marium, in cuius manu procellæ sunt, sub tanto patrocinio tutos nos haud dubie futuros, & ad optatum portum feliciter preuenturos. Paruit ille quidem bene monemi, sed dubio tamen adhuc animo fluctuans, rogabat etiam atque etiam, ut à Deo igitur nostro, quando à reginā illā portus dominā sperari nihil posset, prosperam nauigationem, consueti nobis precandi more depreceremus: ad orandum illicò nos retulimus breuique postea intervallo, voti compotes facti, appulimus ad portum *Cūa* quo triremem dux direxerat.

Non

Non procul ab eo portu habitabat Simon ille , cuius memorabam incensam in Deum pietatem , & ad curandos morbos omnes solâ benedictæ aquæ aspersione , vim quandam insolitam ac planè mirabilem prædicabam. Is ubi audiuit de aduentu nostro incredibiliter recreatus , aduolauit ad triremem amplexusque amantissimè vitæ suæ duces ac parentes dulcissimos, impetrauit à triremis nostræ duce veniam , ut nos domi suæ aliquandiu haberet, fruereturque pro votis, optatissimo conspectu nostro. Obtenâ ea facultate venimus domum in quâ primùm ingens erat turba hominum quos ipse vndique congregatos ad baptismum suscipiendum optimè animauerat. Deinde ad aquam lustralem solemnî benedictione conficiendam , vasa quam plurima parauerat , nos eximix viri optimi religioni fecimus cumulatè satis. Selectam hanc turbam sacro fonte lustrauimus. Aquam benediximus , precationem peregrimus , adstantibus accommodata monita impertiuimus , tum multâ iam nocte venit nobiscum Simon in triremem , uti pactus erat cum duce nostro.

In altero quoque pago versabatur Christianus miles Andreas nomine, qui eo ipso tempore quo in exilium pulsi sumus , festinauit ex vrbe regiâ se recipere in patriam, ducentis dislitam milliaribus , eo solum consilio , & transeuntibus nobis , per baptismum expiarentur mater, vxor, & focrus. Sed cum citius quam ille sperauerat sub nocte excessisset è portu nauis ; doluit vehementer præreptâ sibi è manibus summâ omnium votorum, sed confirmatâ tamen mente statuit cum vxore, matre, focru vetulis, & infirmis mulieribus

torū illud iter quod nos mari emensuri eramus, pedes ipse conficere per deuia & prærupta montium, nauigia enim nulla tunc aderant, quibus insequerentur abeuntes. Et quoniam perpetuæ Tunchinensium cum Cocincinensibus, ad quos ducebamur simultates, metum homini piissimo iniecerant, ne prohiberetur Cocincinæ ingressu, & optato conspectu nostro, multâ omnî orizâ tanquam eam diuenderi pararent, onusti venere per multos dies, tandemque post octoginta confecta milliaria, labore quidem fracti, sed vegeti animo, assequuti nos sunt citiùs etiam & propiùs quàm sperauerant, baptismoque ut optauerant potiri, alacres in patriam sunt regressi, laborum obliti omnium, eorumque sensum absorbente cœlesti animi voluptatè.

Postquam igitur extremos attigimus regni fines; cum triremis quâ vecti eramus hætenus, tuta satis non esset, quæsitum nobis est aliud nauigium, superandis scopulis, & ventis frangendis accommodatum. Parabant verò milites, quorum custodiæ commissi fuæramus, reditum in regiam, sed auditis toto eo tempore sermonibus de lege Dei, & æternâ vitâ, meliora cœpere meditari, octodecim ex his cum iam in procinctu essent ad discessum, fidem quam conceperat animo, palam professi, postulare cœperunt baptismum. Credere se in Christum, constitutum sibi esse per sanguinis eius merita mercari vitam æternam. Nos insperato eo gaudio attoniti, vtrò in amplexus omnium ruere, opportuna impertiri documenta, baptismum & cœlestes thesauros dispensare. Tantâ exultantes animi iucunditate, ut non esset facîle statuere utrâ partem maior illa esset, ac vberior, nostri, an illorum, sed in omnium sanè

nè vultu, ore, oculis, liquidissimè se prodebat. Discesse-
re igitur postea in regiam cum litteris, quibus Chri-
stianos in eâ degentes ad omne virtutis officium
hortabamur, & Neophytos etiam istos impensissimè
illis commendabamus.



*Reliqua itineris nostri ratio, & ducis ipsius ad Christi
fidem conuersio.*

C A P V T XXIX.



Ducenerant iam tum hebdomadæ sanctioris
dies, in quibus tamen ab omni pietatis
Christianæ munere cessare necesse fuit. Qui
enim aderant, omnes à Christi fide alieni abhorre-
bant à sensu, & amore tantorum mysteriorum. Cum
autem sub noctem paschalis festi, secundæ affarent
auræ, visum est duci explicare vela, & è portu solue-
re, nos id vnum ab eo statim enixissimè postulamus,
vt omissis consuetis superstitionibus à solo vero Deo
ferentes ventos, & mare tranquillum expectaret, pa-
ruit ille quidem tunc conuictus experienciâ priorum
temporum. Verum postea ortâ tempestate, turbato-
que maiorem in modum mari, adeo vt naus agrè
scopulos vitaret. Commouit iracundiam præsens
timor, & atrocius Christianos qui aderant, ac in pri-
mis catechistam compellans, mortem & supplicia
minatur, quod soluenti ei è portu authores fuissent,
abstineret prophanis illis cæremoniis, quibus placarum
iri Deos stultè iactabat. Ad has irati hominis

P p 2 voces,

voces, & acerbissimas querelas nos statim exprobrecti, amantissimè ad ipsum accedimus, metum omnem abstergimus, beneuolèque querimur, quod dormientibus nobis nihil in tanto periculo cogitatum esset de propitiando Deo. Affuturam nobis haud dubiè quam primum diuinam opem, visuros omnes pacata maria; & furentium ventorum rabiem mitigatam. Tum inuitamus omnes ad orandum cum fiduciâ & feruore Deum, primique in genua prouoluti Diuum Laurentium, in patronum assumimus sedandæ tempestatis. Mira sanè res, & mihi quoties in memoriam redit semper stupendâ, vix semel orationem Dominicam precando expleueramus, ecce tibi, mare subito quiescere, contrarij omnes venti silere. Spirare fauentes auræ, quibus secundissimo statim cursu, ad optatum portum triremis appulit.

Ad eam tam repentinam, & mirabilem maris, & ventorum immutationem dux ille noster attonitus, primum obstupuit, deinde vero lætitiâ admiratione miscens, prædicare cœpit miraculum, & præsentissimam inuocati numinis benignitatem palàm exaggerans omnes ad eam agnoscendam impellere, placuit autem tunc misericordî Deo qui cum sibi habere famulum destinauerat, altiùs etiam in animum eius descendere & immisso lucis suæ meliore radio collustrare. Quippe sine morâ frequentem hominum coronam monuit statutum sibi omninò esse Christum ducem profiteri, atque illius militiæ per baptismum nomen dare, sex ex totâ cohorte reliquos adhuc habebat milites cum quibus solemni admodum pompâ in amplissimam proximi pagi plateam progressus, spectantibus

stantibus omnibus Christiano lustratus baptismo, singulari, tum suâ, tum nostrâ voluptate Augustini nomen suscepit.

Ab eò autem tempore totum se nobis permisit, è duce nostro atque patrono factus Christi discipulus, & filius charissimus, fuitque hominis tam illustis conuersio, rebus etiam nostris percommoda. Maximi enim tum Patrum nostrorum in Cocincinâ degentium tum Christianorum etiam Tunchinensium intererat, vt ne regni huius finibus pelleremur, perfacile verò fuit nobis Augustino nostro suadere vt quando gubernatori prouinciæ Bochinicæ, regio nos mandato tradere tenebatur, per quem amandaremur. Postcà in Cocincinam, cum commoda naus suppeteret; exoraret ab ipso hanc gratiam, vt liceret nobis nauim a ribitrio nostro quærere ac parare; neve tùm cogeremur in Cocincinam incommodissimo tempore proficisci, quo nulla Lusitana naus eò venerat.

Erat Bochinicæ huius prouinciæ gubernator prosectæ iam ætatis, & virtutum omnium famâ nobilis. Erga nos autem adeò beneuolus, vt in quotidianas expensas copiosissima daret munera. Quam nos gratiam maioribus etiam officiis rependere satagentes, dare cœpimus omnem operam, vt in extremâ illâ vitæ periodo, (octogenarius enim erat,) æternæ salutis certissimam viam iniret. Eam vt nescienti ostenderemus Catechismum Christianum Cincensibus exaratum litteris, eleganti compactum artè tradidimus crebros de mysteriis nostris habuimus sermones, nihil non tentauimus, vt senem depontanum præsentissimo perennis pœnæ periculo eriperemus. Sed frustra semper,

nam ad oblatam à Deo gratiam aures, & animum occludens, salutaria monita neglexit, & sexto ab hinc mense viuere desiit.

Eundem exitum habuit, hospitis cuius fidei à gubernatore traditi eramus, pertinacia cum enim propter senectutem vergeret iam ad exitum illi vita, omni quoridie, prece cupidissimè instabamus, vt viam salutis audacter capesseret, venturam breui noctem in quâ nemini fas est tam salutari negotio incumbere. At ille concubinæ quam domi habebat infano amore præpeditus, vxorem quidem, & filium susceptum ex pellice, lubens passus est Christianis sacris initiari, sed suæ, ipse animæ nihil prospiciens, oblatam à Deo gratiam obstinatè neglexit, & breui postea defunctus, magno nostro dolore, meritis libidinis turpissimæ pœnas, miser luit.



*Ex Bochinicâ Prouinciâ in Gheanicam iterum
regredimur.*

C A P V T XXX.



Ic p̄functus officio dux noster; magnum nauatæ nobis operæ præmium referens, fidem & gratiam, latus ad regiam magnis itineribus regressus est; cum litteris, quas nos tanti viri pietate dignissimas, dedimus ad Christianos ibi commorantes. Toto autem eo paucorum dierum interuallo, quo in eâ regione detenti sumus, vt ne vllum nobis tempus vacuum esse pateremur à labore,

labore, in amplissimo primùm foro, deinde in ipso maris littore, ad frequentem turbam quotidie verba fecimus, Christum vbique, ac vitam æternam annunciantes, neque fructu suo labor ille caruit, quinque supra viginti, ex sacro fonte suscepimus, eorumque vni litterarum Cinenſium ſcientiâ clariffimo, & fidei doctrinæ ſtudioſiſſimo, erudiendos tradidimus, poſtea vero in prouinciã Gheam, quo nos Chriſtianorum omnium, ac plurimorum etiam Cathecuménorum preces vocabant, properè diſceſſimus.

Primi nos hoſpitio ſuo lætiſſimi excepere Andreas & Petrus, quorum labore, ac cuiâ perfectum erat, vt toto illo pago quem incolebant, vix vllus reperiri poſſet, qui myſteriorum noſtrorum rationes edoctus non eſſet: ac plures etiam preces, omnes memoriâ tenebant. Vt neceſſe nobis nihil fuerit vllam in tradendo catechiſmo nauare operam, ſed triduo toto, quo illic fuimus, centum duodecim, ſacro intinximus lauacro. Tum ad Simonis illius, benediſſe aquæ amantiſſimi, ædes excepti plures etiam luſtrauimus, indeque ad primarium portum, & gubernatoris ipſius ſedem cui *Ruum* nomen eſt, vela fecimus.

Cum autem toto iam regno, Latè increbuiſſet, regio nos ediſto proſcriptos, & in exilium pulſos eſſe, vix vllus in ampliffimo illo pago inuentus eſt, qui nos ſuas in ædes excipere animum induceret. Ac tametiſi gubernator, quem conueneramus omni nos humanitate ac beneuolentiâ proſequutus eſſet, peruaſerat tamen mentes omnium hæc opinio, nobis omninò debere tribui quod iis locis, nulli iam diu imbres fluere, vnde ſummâ omnes vbique campi ſiccitate laborant,

rabant, vnde tanta in nos odia exarserant, vt de nobis procul pellendis, consilia palam agitentur. Sed opportunè tamen benignissimus Dominus, copiosam de cœlo pluuiam effundens, temperauit aliquantulum irarum flammæ. Quippe omnes cœlesti eo rore maiorem in modum recreati, auidi accurrere ad diuini verbi purissimos latices, atque plurimi ex his diuinitus irrigati, fructum illicò fidei tulere fiebatque concursus quotidie maior, præsertim vbi vulgatum est, optimè in nos & res nostras prouinciæ gubernatorem animatum esse.

Deuinxerat autem in primis illius animum, eclypsis cuiusdam solaris, opportunè facta prænunciatio. Quatuor enim antè diebus quam illa fieret, totam eius descriptionem ad amussim in libello exaratam offerendam, putauimus vbi accuratissimè horam eius, & durationem, & quantitatem designatam dedimus. Quæ omnia postquam verè dicta esse probauit euentus, obstupuit ad industriam adhuc inauditam, nostrique factus amantior, aduersus obrectatorum calumnias, nos & traditam à nobis doctrinam constantissimè tuebatur: hâc vnâ semper argumentatione omnes eorum eludens conatus. Si res (inquebat) cœlestes, quas tamen si vsurpamus oculis, animo tamen non assequimur, homines isti, tam verè ac certò præuident & prænunciant, Ecquis? sapienter dubitet, & omnia rata & fixa esse, quæ de supra cœlestibus, & mentem, & oculos superantibus, affirmant etiam asseuerantiùs quam illa quæ nostris aspectibus subiiciunt.

Hâc tantâ, & tam propensâ in nos gubernatoris voluntate dici vix potest quantum & rebus fidei, ponderis accesserit,

accesse- rit, & nobis famæ apud omnes, ac authoritatis. Conueniebant ad nos vndique populorum greges, atque in his plurimi ad Christi ouile adiungebantur. Sexcentos nostris ipsi manibus baptismo tinximus, multò plures à Catechistis lustrati sunt, quibus ea cura, in necessitate mandata erat. Quo in genere Ignatij præsertim enituit eximia industria, & sedulitas, quippe idolorum cultores omnes acerrimo bello petens, ex propriis eorum libris depromptis armis, occludebat cunctis ora, plurimosque Christo, & cælo lucrabatur. Cõposuerat quoque Tunchinensi metro poësim elegantissimam, in quâ ingenioso scommate præcipui sectarum errores sugillabantur, eamque subinde suauissimâ vocis modulatione, ad confertos christiano- rum, & paganorum globos decantans, mire afficiebat omnes, confirmabatque alios in suscepâ fide, alios ad contemptum, & odium idolorum sensim alliebat.

Sed non defuere tamen aliqui, patriorum rituum quam salutis amantiore, qui ad tanta, & tam atrociam Deorum suorum probra excandescens, agitari ceperunt furore, atque cum in nos, & Ignatium vix sequi possent, quod ille in alterâ prouinciâ natus, eorum iudiciis plecti non posset, in hospitem illum optimum tota furentium rabies incubuit, qui nos in suas edes benignissimè admiserat. Ab iis ille spoliatus fortunis omnibus, domo etiam hac suâ, & pago toto expulsus est: Summo quidem acerbissimoque dolore nostro, sed incredibili tamen eius triumphantis animi gaudio.



*In summas omnium rerum Angustias redacti misericordissimè
à Deo liberamur.*

C A P V T XXXI.



N ea igitur rerum perturbatione , licèt Neophyti , omnibus subeundis periculis constantissimè se obijcerent, nobis tamen consultius visum est, ab amantissimis hominibus omnia malorum imminenrium incommoda in nos deriuare : & carere potius omni domicilio , & per fluminum alueos exiguâ cymbâ vltro citroque commcare,quàm Christianos fortunis omnibus euertere. Cum enim compertissimum vulgò esset regio nos mandato è totius regni finibus amandatos esse, neque vllâ authoritate publicâ editum illud rescissum fuisse, simul nos aliqui Neophyti admittebant in domos suas, ij tanquàm perduelles, & voluntatis regiarum contemptores , seuerissimis statim mulctabantur pœnis, præsertim iacturâ bonorum omnium. Imò & nobis tametsi Ethnici nihil palam inferre audebant molestiæ,sæpiùs tamen domos vbi morabamur ; ac nos etiam impunè lapidabant. Quæ mala vt prohiberentur,nobis habitatio ipsa fluminum,tametsi ob frigora & procellas eo anni tempore ingruentes , erat perincommodâ optabilior tamen videbatur.

Huic tam acerbo, incommodo , accedebat etiam cumulus maximus,ex summâ inopiâ , & rerum omnium necessariarum penuriâ. Cum enim de com-
meatu,

meatu, ad annum duntaxat vnum, nobis, Amacai admodum parçè prouisum esset. Annus autem ab hinc ageretur tertius, in extremas deuenimus angustias, nam à Christianis quamuis eximiè beneuolis, & ad oculos etiam ipsos eruendos paratissimis, hætenus nihil prorsus petitum erat subsidij, atque ad nihil deinceps postulandum, mentem obfirmaueramus apostolicum illud ipsis sæpe occincentes nolumus vestra sed vos. Id quod etiam mirabantur tantopere, vt eo sæpius adducto argumento fidei nostræ sanctitatem Ethnicis ingererent, vera omninò esse quæ ab hominibus illis prædicarentur; qui nullus commodi sui causâ, nullius lucri spe, aduenissent è regionibus adeo diffusis, per tam difficiles terrarum & marium tractus suis semper expensis, atque iisdem, etiam apud ipsos tenuissimè victitassent. Id quod audientes non rarò Ethnici, ad fidem amplectendam adducebantur.

Sed ne tamen omnia illa summæ beneuolentiæ, ac charitatis in nos videremur despicere argumenta, atque illorum fructu alios egentes priuare, eximia quædam multis in locis, amplissimaque nosocomia erecta erant, in quibus catechistæ ipsorum gentiles alerentur, & pauperibus agrotantibus ministrarent. Cum enim aliqua sæpè offerrent Neophyti, omnis generis donaria, hortabamur eos etiam, atque etiam, vt ea ipsa in vsum pauperum erogarent, nobis Amacai vnde veneramus, sufficiens comæatum allatum iri. Atque hoc sanè institutum nostrum, alendi Catechistas ex huiusmodi Eleemosynis vniuersæ huic Ecclesiæ, ac nobis etiam ipsis fuit percommodum, quippe hæte-

nus centum huiusmodi operarios eximios habuimus, qui se totos Deo, & Ecclesie huius commodis deuotentes, strenuissimè cum nostris ad hanc diem laborant, & animarum negotium eximie promouent.

Eo igitur tempore, cum exhausto penitus viatico, rerum omnium egestate premeremur, neque tandiu expectata Lusitana naus aduenteret, nihil dubium nobis fuit, quin à Christianorum in vire regiâ degentium charitate, aliquod summae inopiæ nostræ remedium querendum esset, Antonium cum epistolis eò mittimus in quibus exposita inopiâ illâ nostrâ, postulabamus aut eleemosynæ aut mutui nomine aliquid subsidij, properauit illi eò Antonius, redditisque literis hortabatur etiam ipse Christianos, quos nostri amantiores esse probè nouerat, vt petitam opem ferre maturarent, darent prolixè de suis diuitiis, ad alendos eos à quibus cœlesti gratiæ thesauro ditati essent, illi verò ad miseriæ huius nostræ commemorationem piè illacrymantes, collectâ confestim paucorum nummorum stipe, redire ad nos Antonium iubent, pollicenturque se venturos postea, cum copioso ad longum tempus com meatu. Enituit autem præsertim tùm temporis eximia monicæ cuiusdam pauperulæ pietas, quæ de suâ etiam penuriâ decem aureos, ad nos dono misit.

Verùm quo interuallo profectus in regiam est Antonius, tantæ tempestates, pluuiæque obortæ sunt, vt Cymbam illam nostram satis alioqui fragilem, & annosam vndique quaterent, & nos in eâ conclusos, molestissimis afficerent incommodis, atque ad extrema etiam pericula deducerent. Sed nemo tamen in omnibus

bus

bus illis pagis reperiebatur qui nos in suam domum
 auderet euocare, quod male sibi metuerēt ab Ethnicis,
 qui nostrā necdum calamitate satiati, augebant mœ-
 rorem quā minis, quā contumeliis, imo & creberrimā
 lapidum grandine impetebant. Cum autem exunda-
 darent è suis alueis vndique flumina & totam, qua la-
 tissimè patet, opplerent regionem, ibat Cymba sine
 arte, sine duce, per incertos tramites, & in ipsis campis
 tantum non naufraga fluctuabat. Versabatur tunc in
 tuguriolo ad radices montium, Simeon quidam, exi-
 miæ virtutis thesauris ditissimus, sed rerum aliarum
 omnium egentissimus. Ille vt audiuit quam afflictæ
 tunc essent res nostræ, misit ad nos illicò fratrem qui
 domunculam hanc suam offerat, tenuissimam illam
 quidem esse, ac vilissimam, sed commodiorem sanè
 fore quam medios illos fluctus in quibus iactaremur
 potius quàm habitaremus. Nihil sibi ab Ethnicorum
 furore metuendum esse, quem sua paupertas ab omni
 eorum impetu defenderet. Nobis hospitalitas illa viri
 humanissimi fuit prout sanè debuit iucundissima; rece-
 pimus nos ex imbrum & fluctuum incommodissimo
 habitaculo in exiguum illud mapale, quod nobis, pro-
 pter mala quæ præcesserant, eximij cuiusdam
 palatij speciem habere videbatur. Integrum
 autem illud nobis Simeon
 relinquens, secessit cum
 totâ familiâ.



*Adueniente tandem Lusitanâ naui, ab exilio
liberamur.*

C A P V T XXXI.

INeo igitur pauperrimo quidem, sed iucundissimo certè diuersorio, postquam nos continuimus diebus quindecim, commodum aduenit Antonius ille noster; collatam à Christianis stipem deferens, & quod iucundius sanè fuit, Epistolam Patris Gasparis de Amaral renunciantis appulsum Lusitanæ nauis, in portum huic prouinciæ vicissimum, ad hoc tam optatum, sed tam parum speratum nuncium, omnium statim obliti malorum, suauissimo perfusi gaudio exultare cœpimus. Sed nihil in eo negotio visum est iucundius, quam diuinæ in nos curæ, ac prouidentię clarissima significatio. Cum enim ad hunc portum nusquam hactenus Lusitanæ naues appellere solerent, tunc tamen ista eo aduenisset cum nulla nobis aliundè spes salutis affulgere poterat.

Exiimus ergo quantocius ex angustâ illâ Simeonis domo, & ad portum ubi cum patribus nostris erat naus, aduolauimus: ad eorum autem aspectum quis in nobis lætitiæ sensus fuerit, quæue significatio mutæ beneuolentiæ, facilis coniectura est, ruimus videlicet illicò in amplexus, & manantibus, hinc inde lacrimis vix adhuc cedebatur à nobis, quod oculis, ac manibus tenebamus, plurimæ de hinc redditæ nostrorum litteræ, de quibus toto triennio nihil prorsus audiera.

audieramus. Mox plurima vltro citroque sciscitati, noctem insomnes traduximus, simul autem illuxit, prima nobis de peragendo sanctissimo missæ sacrificio cura fuit, octo enim mensibus carendum eo fuerat, ob defectum materiæ consecrabilis. Curamus igitur commodum statim parari locum in ipsa nauī, atque in eo post longam tot mensium esuriem, datum tandem est diuinâ illâ escâ satiari, quæ ipse etiam saturitate famem acuit.

Aduenit paucos post dies missus à Rege cum amplissimo commeatu Eunuchus, iubens vt Lusitana nauis in regiam contenderet, negabat autem vehementius fas nobis esse illo regredi, prohibente regio edito, sed obfirmabant in contrarium Lusitani animum constantissimè asserentes nunquam se hinc discessuros, donec patres omnes secum deducerent, reluctabatur aliquandiu Eunuchus, sed fixam & ratam Lusitanorum voluntatem perspiciens, cedere tandem coactus est, & quamuis à rege nihil dum acceperat, redditum tamen nobis in regiam permisit. Venerat id temporis ad nos Andreas ille sæpè memoratus, eximiâ virtute iuuenis, & tradendi diuini verbi minister clarissimus, quem nos in articulo nostri è regiâ discessus grauitè ægrotatè, Christianorum charitati commendatum, inuiti reliqueramus, vix autem conualuerat, cum tanto nostri desiderio teneri cœpit, vt continuo ad nos migraret; nihili faciens incommodam anni tempestatem, & exilij nostri summam inopiam meliorem ducens omnibus vrbs regię deliciis.

In eam itaque nobiscum regressus, quâcunque transiret, accendebat vbique diuini amoris flammâs, vnde
odium

odium etiam incurrit quorundā impiorum, qui cum ex insidiis crudelissimè aggressi, fustibus cæsum semianimem in viā reliquerunt. Andreas autem paulò post, vires colligens, animique robur in corpore vulneribus fracto integrum seruans, orabat pro suis illis carnificibus Deum, & incredibiliter exultans, quod dignus habitus esset pro Christi nomine pati contumeliam, agrè tandem ad nos rediit.

Iterum autem dum nauigamus, Ignatium illum Catechistam nominatissimum, ad Christianos in regiam præmittimus, vt de reditu nostro certiores faciens Neophytos, moneat illos etiam atque etiam, vt ne vllā beneuolentiæ in nos testificatione, infestissimos nobis Ethnicos offenderent, neve turmatim obuiam venientibus prodirent, sed conceptam animo lætitiā omnem continerent in sinu, fuerunt videlicet hæc monita isto maximè tempore pernecessaria; vbi enim de reditu nostro apud illos percubuit, incessere statim omnibus lætitiis, sibi que

inuicem gratulantes, expectabant cupidi-
 -ssimè diem illum cum nos postli-
 minio redeuntes, iterum videre
 possent, & salutis monita
 excipere.





*In Regiâ Tunchinensi nostris iterum ministeriis
operam damus.*

C A P V T XXXIII.

REdiimus ergo tandèm, cum Lusitanis omnibus nostris in urbem regiam, octauo post exilium nostrum mense. Accurrere illicò atque in amplexus suauissimos ruere Christiani, sed occultè tamen, quod nondùm constaret, quo rex in nos futurus esset animo. Postquam autem satis placatus visus est, ad solita nos extemplo retulimus ministeria; sed moderate tamen quod suspicaremur premere illum animo iracundiam, nunquam enim deinceps ad colloquium admissi ab eo sumus. Sed per internunciorum dumtaxat fidem sæpè incertissimam, dabatur cum ipso congregari. Adiecit igitur sedulò animum ad iuuandos omni ope Neophytos, & præsertim ad, confessionis Sacramento, expiandos omnes. Id ut sine ullâ offensione infidelium ritè fieret (vix enim ferunt secretas illas cum mulieribus colloquutiones quantumvis patenti ac publico loco fiant, & interpositâ ut fieri solet crate) duas elegimus domos, nostris quidem ædibus adiacentes, sed distantiſſimo ambas aditu, in eas conuenire cœpere Christiani ut poterant occultissimè, & per Sacramentum hoc expiati, diuinam gratiam auidi hauriebant.

Atque ut occultiores etiam conuentus fierent, duæ præterea diuersissimis locis Ecclesiæ constitutæ sunt,

R r in

in quibus tutò Neophyti omnia pietatis munia obibant, afficiebantur autem in primis ad Sacramenta Confessionis & Eucharistiæ. Nam confitentium quidem tanti concursus erant ut in iis audiendis totas sæpè noctes sine somno ducerem. Audiebam enim eas omnes ego solus, & mirificè delectabar cum viderem illos adeo seueros esse iudices defectuum leuissimorum, ut grauissimas de illis pœnas à se repeterent; statimque conuolarent ad confitendum, si quam maculam contraxisse se dubitarent, verbi causa, si cui contigisset omninò inscienti, esurialibus diebus carnis aliquid degustare, tum nulla ei quies erat donec homologesi, hanc qualemcunque maculam eluisset. Ad sacram verò mensam tantâ pietate ac reuerentiâ veniebant, ut quoties ad eam admitterentur, compararent se primum per multos dies, & postmodum cœlestes eas delicias cum incredibili voluptate degustarent, atque ut tanti sacramenti altiùs in eorum animis memoria hæreret; quo die immaculati agni sacrâ carne pasci erant, dabatur eis aliqua ex bullis illis piacularibus, quas vulgò dicimus Agnus, Dei, ut collo appensas illas gestarent ad memoriam tanti muneris. Sed quoniam tanta erat copia communicantium, ut pia hæc munuscula nulla iam suppeterent, adiecit animum piissima illa regis soror D. Catharina (de cuius virtutibus olim dixi) ad conficiendas nobis huiusmodi sacras opes, tantâ sanè artè, ut eas æquarent, aut etiam superarent, quas in Europâ elaboratas detuleramus. Vnum præterea in optimis illis Neophytis erat iucundissimum, tantâ enim religione ac diligentia Dominicæ passionis mysteria relegebant,

recolebant, vix vt vnquam sine lacrymis vberrimis, in pendentis è cruce Christi effigiem oculos intenderent. Neque segnior erat eorum pietas erga Missæ sacrificium, cuius amore sic tenebantur, vt quibus integrum esset his mysteriis interesse, illi semper venirent. Domīnicis verò, ac festis diebus, quantumuis distarent ab vrbe regiâ spatio leucarum quatuor, primo tamen semper mane, ante lucem se dabant in viam, properabantque adeò impigrè, vt tempore venirent, ad concionem & totam sacrificij cæremoniam. Qui verò habitabant remotiùs, quàm vt totum illud iter manè possent emetiri, illi pridie in regiam intendebant iter, atque in eâ pernoctantes è primo statim diluculo, ad meridiem sacris dabant operam, tùm alacres redibant ad sua quisque domicilia; interim autem dum expectabantur remotiores, spectaculum erat iucundissimum, reliquos omnes videre in Ecclesiâ sacris meditationibus, & piis precationibus operam dare per multas horas.

Hæc quippè omnia exercitia, tantâ semper sedulitate obeunt sparsi per totum Tunchinense regnum Christiani, vt quo tempore sacerdote carent, illa tamen festis diebus per duas minimùm horas ritè peragant, vel publicè in Ecclesiis, vel si ex desint, priuatim domi, conuocatâ in intimum penetrabile familiâ, vel etiam soli cum agunt in campis, aut in nauibus, eadem semper officia religiosè obeunt. Ad dignoscendos verò dominicos, aut festos dies, parata ferunt Caledaria, in quibus egregiâ sanè arte festi signantur dies, & ieiunia: mandant illa typis Catechistæ annis sin-

gulis in vrbe regiâ, & toto postea regno in Christianos dispensant.



Christiani aliquot miserè à dæmone vexati, magis tamen in fide susceptâ confirmantur.

C A P V T XXXIV.



Abitabat in primariâ regni ciuitate piissima quædam mulier Nomine Monica, quæ priusquam baptismo lustraretur, malis dæmonum artibus dedita, vel etiam vt ferunt Pythionissa fuerat. Arripiebat illam eo toto tempore sæpissimè nequam spiritus & miserum in modum exagitabat, adeò vt maritum atrocibus probris, & contumeliis afficeret, & sæpius etiam pugnis & fustibus dirè impeteret. Id quod arreptitiæ istæ mulierculæ facere ferè solent, tanto viros suos despectui habentes, vt nunquam illi earum se meritos dicere audeant, sed famulos solùm, ac nutritios.

Monueramus ergò istam sæpissimè, atque alias omnes quæ huiusmodi præstigiis addictæ fuissent. Cauendum magnopere ipsis esse ab hoste infensissimo, facturum illum omnia vt quâ domo, per summam ignominiam depulsus esset, in eandem baptismo iam mundatam, & ornatam reuerti posset, in primis autem darent operam vt quoties ex ædibus pedem efferrent, frontem prius, signo crucis deuotissimè munirent, & aquæ benedictæ aspersione, infestum spiritum abigerent. Omiserat id aliquando facere Monica, vix autem

autem exierat domus limen, inuadit eam repentè hospes teterrimus, fœdissimèque vexat, sternit humi, clamoribus inconditis, & furore os illi, oculos, totum corpus turpissimè deformat.

Conuolant ad eam extemplo Christiani, ac præsertim Ioannes mœstissimus, eius coniux, furentèmq; referunt domum, hortantur, constringunt, & Christianis etiam exorcismis ravidam coërcere satagunt. Cum autem nihil remedia illa furorem compescerent, ad nos ocius accurrit Ioannes, opem exposcit, exponit dolorem. Ego ad Energumenam sine morâ propero, fœdissimum ibi statim obicitur spectaculum, arreptitia mulier, dæmon tumultuans, sed confirmato tamen animo, atque in Deum spe repositâ, post precationem, vt potui feruentissimam, compressumque Solitis exorcismis dæmonem, Monicam appello, & amicè quæro, num peccata sua, per sacram ex homologesim expiare velit. Ad has illa voces, solamque tanti sacramenti appellationem expergiscitur, sui compos esse incipit, abscedente dæmone, atque ad ipsum etiam confessionis nomen diffugiente: respondet placidè Monica, nihil esse quod optaret magis, confiteretur, surgit, conualescit, gratias vindici Deo agit, ac nos cum ipsâ stupentes gratulamur tantam salutare huic sacramento vim esse inditam, vt non purgandis solùm animabus valeat, sed corporibus etiam curandis.

Neque tamen hic quieuit sæuissimi hostis rabies, sed longius etiam progressa nouo miraculo locum dedit. Cum enim domesticos omnes Ioannès haberet iam Christianos, vnicus supererat adolescens adhuc Idolorum cultor, is dum ea fierent, quæ commemo-

raui, versabatur in alterâ domus eiusdem aulâ, atque alia cogitabat omnia; inuadit eum repente, spiritus è Monica pulsus corpore, proditque se statim intus latens furor, personare nouis clamoribus domum audio, agnosco Satanæ insidias, adducitur miser iuuenis, toto corpore spirans dirum hospitem, opitulamur consuetis remediis, sed irritò labore, donec Baptismi salutare aquæ, fugarunt vnico momento impurum dæmonem ostendente Deo, vno tempore vtriusque Sacramenti vim mirabilem, pœnitentiæ quæ Monicam, Baptismi, qui famulum eius præsentissimo remedio curauerat.

Neque dissimili miraculo alterius, Christiani quidem, sed tran fugæ calamitatem depulit misericors Deus. Lusitano ille quondam homini aliquandiù famulatus, cœco quodam impetu animi herum deseruerat, Ethnicosque homines sequutus, meliorem etiam Dominum impiè prodiderat, totum enim se addixerat idolis, & Christianas virtutes omnes exuerat. Sed misertus tandem illius Deos excruciantum tradidit turpissimo duci, ad cuius castra transfugerat. Vexabatur autem adò crudeliter, vt ab Ethnicis etiam ipsis, iniquissimè sortem eius ferentibus, adductus sit è vicino pago, vt in tantâ calamitate remedium aliquod miser inueniret, nos ad consueta statim remedia confugimus, & præsertim ad confitenda peccata impensè hortamur; obsequitur ille, confitetur, oculos aperit, à dæmone liberatur. Ei autem adeo repensè diuinitus curato, suademus vt relictis idolorum cultoribus, ad antiquum Dominum Amacai agentem se referat.

Ad extremum superest vt stupendum diuinæ in amicis

cos suos eximix prouidentix iudicium hic cominemorem. Erat inter Christianos matrona quædam religiosissima Elizabethæ nomen, & pietatem inuitata, illa priusquàm transiret ad Christum, prophanos idolorum cultus magnoperè promouerat, sed malam ei pro impensis officiis improbus dæmon vicè reddidit. Cæpit enim horrendè illam vexare, ac cum impio illo cultu neque dum absisteret, augebatur etiam dæmonis in ipsam furor: donec tandem, adeò ferocem tyrannum vltra non ferens, eo ipso tempore quo in regiam Ecclesiam primùm ereximus, ad nos lugens confugit auditoque Catechismo mirificè immutata, per baptismum dæmoni eripi voluit, atque ab eius dirâ tyrannidè liberari. Sed aliter visum Deo est non enim proptereà excessit ab eâ dæmon, cui tamen adeo formidanda erat, vt eum ex alienis sæpe corporibus depelleret, per quem in suo cruciabatur. Ferebat autem æquissimo animo hanc calamitatem, & tota diuino incumbens operi, non maritum modò, & familiam vniuersam, sed plerosque alios, ad fidem vocauit, & plures etiam Ecclesias extruxit.

*E toto*



*E toto tandem Tunchinensi Regno , cum Lusitanâ
navi exire cogimur.*

C A P V T XXXV.



Ic Tunchinensis Ecclesiæ status erat , in quâ fundandâ , & erigendâ triennium totum abierat. Excreuerat Christianorum numerus ad quinque millia ; & latiora in posterum incrementa , initia spondebant ad eò prospera. Verum vbi Rex intellexit discessuram esse propediem Lusitanam nauim, misso legato seuerè denunciavit ut eâ nos quoque Amacauim repetamus. Eo tristissimo nuncio perculsi, statim iudicauimus conclamatam penitus rem esse , quod præclusi nobis essent omnes aditus ad Regem , agentibus id præsertim regiarum vxorum custodibus Eunuchis , quod vererentur ne si diutius illi retineremur , Christiana sacra rex ipse amplecteretur , vxorumque abiectò grege, ipsi aulâ pellerentur. Cum ergo ad discessum quinque aut sex duntaxat superessent dies , totum hoc tempus in expiandis pœnitentiâ peccatis ponendum duximus. Tantique ad remedium hoc salutare fiebant concursus, ut neque diu, neque noctu vacare vnquam licuerit, vnius etiam horulæ spatio ad quietem.

Cum autem lugerent inconsolabiliter Neophyti, ac discessu nostro ruituram putarent , tot laboribus erectam Tunchinensis Ecclesiæ molem præclarissimam , statuerunt tamen suæ singuli salutis prospicere,

ac

ac quando nostrorum copia deinceps nulla futura erat, per quos de diuinis rebus erudirentur, adiecerunt animum ad Catechistas affinibus, ac cognatis suis tradendos in matrimonium, vt hâc arte paratos semper haberent homines, à quibus diuini verbi pabulo nutrirentur. Quo consilio nihil poterat Tunchinensi Ecclesiæ accidere perniciosius, quippe auulsis columnis ruere statim ædificium totum necesse erat. Huic autem tam graui malo, vt viam omnem præcluderemus, vnum tunc occurrit remedium, vt Catechistæ illi omnes vt erant optimi, & piissimi, publicè in Ecclesiâ iurarent vxore se carituros, donec aduenirent iterum patres, qui Christianorum curam susciperent, idque postquam ipsis significauimus, & totam consilij nostri rationem exposuimus, lubentissimis, illi animis exceptere, nihil sibi esse posse optatius, nihil gratius. Quàm Deo & Ecclesiæ suam omnem, & vitam, & operam deuouere.

Illo igitur die, quo postremùm Christianos in Ecclesiâ eramus alloquuturi, accessere ad altare, finito missæ sacrificio, primarij tres Catechistæ, Andreas Franciscus, Ignatius, piissimèque ingenua procumbentes, & manu ad sacrum Euangeliorum volumen apposita, spectante, ac stupente vniuerso cœtu, solemni iuramento se obstrinxerunt, cuius triplex erat caput. Primum quod saltem donec haberent Tunchinenses Christiani sacerdotes per quos iuuarentur, ipsi ab omnibus prorsus nuptiis abstinerent. Alterum, quod nullum ipsi deinceps habituri essent peculium, sed quidquid, à fidelibus vsquam oblatum esset, id semper totum in communes vsus conferrent. Tertium, obtemperaturos se

Ss deinceps,

deinceps, illi quem nos ad id munus elegissemus, in hæc verba primus omnium Franciscus clarissimâ voce formulam totam pronunciauit, deinde Andreas, agmen clausit Ignatius, tantâ omnes constantiâ, orisque, ac vultus totius hilaritate, vt in lacrymas vniuersa corona solueretur: quartum etiam illis adiunximus temporalium rerum curatorem, Antonium illum fidelissimum, & strenuissimum sanè hominem, qui toto triennio in summis rerum, ac temporum difficultatibus nobis semper amantissimè adhæserat.

Quæ iurandi cæremonia solemnî ritu celebrata tantam in omnium animis ingenerauit erga Catechistas reuerentiam, & amorem, vt eos deinceps tanquam patres & magistros, summi æquè ac infimi coluerint, ad omnes eorum nutus obsequi parati, & ad suppediandas res vitæ necessarias liberalissimi. Hanc autem auctoritatem & beneuolentiam ipsi præclarissimis virtutum omnium exemplis mirificè confirmabant; imò & plures etiam alios ad idem vitæ institutum postea traxere, adeo vt nunc temporis centum huiusmodi numerentur operarij, qui totâ Tunchinensi ditione varîè dispersi, rem Christianam hætenus incredibiliter promouent.

Quibus omnibus sic ritè constitutis, supererat vt Tunchinensibus nostris optimis postrema daremus mandata, vltimumque illos salutaremus, atque id sanè, quibus vtrinque lacrymis, quoque sensu animi perfecimus non est difficile coniicere. Commendauimus illos in primis optimo parenti, ac tutori Christo, cuius in sinu, ac amore omni reliquâ vitâ suauissimè con-
quiescerent. Deinde Catechistarum etiam nostrorum

curæ,

curæ, ac vigilantia, demùm postulauimus vt nostri memores, & amantes viuerent, precesque pro nobis aliquas funderent ad Deum. Illi autem intercludente quidem vocem dolore, sed amore tamen ora referante, agebant pro tot susceptis laboribus gratias, quantas maximas capere poterat animus, solitudinem suam lugebant, pollicebantur æternam acceptorum bonorum recordationem. Id quod tam sincerè ac ex animo sunt polliciti, vt ab annis iam viginti, morem illum commendandi nos Deo, nullâ die intermiserint. Semper enim mane, ac vespere, domi priuatim, & Dominicis, ac festis diebus publicè in Ecclesiâ, constitutas fundunt pro nobis preces, in eo igitur articulo expectabant vniuersi atque à nobis cupidissimè postulabant vt liceret, vsque ad nauim exeuntes comitari, sed vni hoc Francisco visum est concedere, reliquos, imperitâ benedictione amantissimâ, valere, ac abire iussimus.

Nos autem postquam discessimus, ex itinere sapissimè à multis euocabamur, quorum audiendis confessionibus danda erat opera, multi baptismo tingi exoptabant. Deduxit nos videlicet in hospitium, atque omni humanitatis officio prosequutus est Paulus ille *Chebo*, tories ob insignem pietatem à me nominatus, multisque oblati quos ad Christianam fidem imbuebat, locum etiam in domo suâ designauit, in quo edificaturus statim esset Ecclesiam, & venturis Patribus habitationem commodissimam. Expectabant nos præterea cupissimè, in oppido *Chebec* quod mari adiacet Thomas & Elizabetha. Parauerant videlicet 80.

Catechumenos quos baptismo expiari voluere, ac

Si 2

demùm

demùm post alios plerosque, vbi commodum erat, opportunis monitis confirmatos, deuenimus tandem ad portum Reginæ, in quo aderant Lusitani parati ad nauigandum. Sed plurimi nos hoc etiam in loco Christiani operiebantur, qui ad expiandas confessione conscientias huc accurrerant, imò & non pauci baptismum postulabant, quos ad fidem amplectendam Neophyti duo, Paulus, & Antonius, eximiâ vitæ sanctitate, ac salutaribus præceptis induxerant.

Cum igitur necesse iam fuit nauim conscendere, vltimum erat vt Franciscum etiam, qui nos huc vsque per milliaria circiter ducenta innumeris officiis deuinxerat, à nobis auelleremus. Tùm vero quibus ille lacrymis, imo eiulatibus, orbitatem suam deslere cœperit non dicam. Nobis sanè tam sincerum animi dolorem intuentibus similes ex oculis fluebant amoris fletus. Erumpebat videlicet in voces mœrore plenas, & miserandum in modum vociferabatur, cui amâtissimi patres miserum filium relinqueremus, obtestabatur, vt Amacaüm vsque illum venire pateremur. Grauius morte supplicium esse, auelli à nobis. Nos autem vicissim blandissimè illum consolati, ostendebamus quantopere necessarius tunc esset nouello gregi, quem discedentibus nobis, totum ipsius curæ Iesus Christus supremus pastor committeret, affuturam benignissimam eius opem, ac nos omni curâ prouisuros, vt breui nouos in eâ vineâ cerneret operarios. Sicque dimisso illo, vela fecimus.

Christia



*Christianorum Tunchinensium data in discessu nostro
littera ad Urbanum VIII. Pontificem
Maximum.*

C A P V T XXXVI.

Prius verò quàm ad reliqua veniam, quæ dis-
cessum nostrum proximè subsequuta sunt,
non erit abs re apponere huc Epistolam,
quam omnes communi consensu Tunchi-
nenses Christiani scriptam ad Urbanum VIII. totius
Ecclesiæ pastorem supremum, dedere, in ipso articulo
nostri ex vrbe regiâ discessus. Sic autem habet. Nos
Tunchinenses omnes Christi Domini sectatores, in
gratiarum actionem capitibus defixis, verum cœlorum,
ac terrarum Dominum veneramur, atque ad sanctita-
tem vestram Christi Iesv Domini nostri vices geren-
tem hæc litteras audentes damus.

Sanctitas vestra ex honoris Dei zelo per sacerdotes
omnes, iubet omnia regna in viam dirigi veritatis.
A primis sæculis ad hæc nostra tempora, regni nostri
Tunchinensis angulo remotissimo nullus veræ legis
splendor affulserat; hæc tandem extremâ ætate, vidimus
ex magno Occidente duos è Societate Iesv patres, qui
formidabiles pelagi fluctus, atque horribilis oceani
procellas despicientes per difficiles ac, dubios viarum
anfractus, regnum nostrum permearunt, veram legem
promulgarunt, veri cœlorum ac terrarum Domini ve-
nerationem, & cultum piis cohortationibus, & concio-

nibus palàm omnibus suaferunt, persuaferunt autem non paucis, adeò vt sanctæ legi obtemperarint adhuc quinquies mille, breuique multo plures obtemperaturos speramus. Et quanquam supremus regni moderator, eiusque principes viri, nonnulli veritatis adhuc ignari, Patribus aduersantur; atque in hunc modum pertinaciter obiiiciunt, hætenus nullum nostris factum fuerat de hac lege verbum: à quibusnam verò, aut à quo tempore sancita est. nos tamen Christi affectu sine vlla dubitatione in veritate persistimus, atque in susceptâ fide constanter perseverare decreuimus. Igitur ad voluntatis nostræ robur & firmitatem, hisce litteris à sanctitate vestrà, tanquam à Christi fidelium parente, opportunum nostro regno subsidium audemus implorare, obtestamurque vt vigiles pietatis vestræ oculos, ac paternæ prouidentię obtutum, & aciem in nos intendatis, qui licet inculti ad sacros sanctitatis vestræ pedes prouoluti ac supplices, multam Euangelicorum Doctorum copiam fidentissimi, atque auidissimi præstolamur, quorum cœlesti doctrinâ nostri omnes, excelsi & humiles ab erroribus reuocati, veræ legi sese subiiciant. Æternos caueant cruciatus, atque æternâ beatitudine perfuuantur.

Nos Christi milites Tunchinenses, capitibus solo hærentes hanc epistolam vestræ sanctitati exhibemus anno salutis 1630.

Huc vsque Tunchinenses Neophyti. Hanc autem epistolâ simul cum nostrâ misimus ad R. P. Generalem nostrum Mutium Viteleschi qui de illâ sic ad nos rescripsit anno 1633. Tunchinensium Christianorum Epistolam ad summum Pontificem datam ego ipse
illi

illi obtuli, qui eam magnâ lætitiæ spiritualis significatione accepit. Responsum curabimus illas ut in oras mittamus, in quo patefaciet summus Pontifex probis illis fidelibus, effectus eximiæ charitatis, & benevolentia, quâ illos complectitur, atque Catholicæ Ecclesiæ ouili annumerat; summo cum gaudio, & exultatione. Hæc R. P. Generalis responsum tamen summi Pontificis, ad Tunchinenses Neophytos non peruenit.



Redeunt in regnum Tunchinense iterum Euangelici operarij.

C A P V T XXXVII.



Nno igitur huius sæculi 30. ex Tunchinensi expeditione redeuntés Amacaüm, inuenimus opportunissimè P. Andream Palmerium agentem in eo seminario post missionum omnium Cinesium inspectum statum, noua semper in Dei gloriam molientem. Audiuit ille singulari cum voluptate florentissimæ huius Ecclesiæ statum, ac miseratus nouelli huiusce gregis solitudinem quem nullus tunc pastor regebat, designauit protinùs animo, missionem hanc iteratò instaurare, priusquam ardens illa Neophytorum pietas deferbuisset. Ad hoc autem munus, cum nos non possemus deligi quos edictum regium proscripserat, magis idoneum vidit esse neminem, quam P. Gasparem de Amaral, virum eximiâ pietate, ac diuini honoris zelo singulari, fuerat quippe iamdiu missionis Iaponicæ cupidissimus, atque ad eam votis omnibus

omnibus aspirabat. Linguam enim gentis sedulò didicerat. & sepius etiam eò penetrare conatus erat, sed operarium adeo strenuum, & solertem, Tunchinensi procuratori reseruabat Deus, ad quam etiam ipse suas omnes cogitationes, & consilia seriò conuertit. Nam præterquam quod intellexit eò se vocari à Deo, Christianorum quoque Tunchinensium candor, & pietas, in vltimâ illâ paucorum mensium nauigatione, incredibiliter eum deuinxerant. Comites illi adiuncti sunt duo, præstantissimi ambo viri, & maximarum rerum capaces P. Antonius de Fontes, qui sex annis Cocincinensem vineam excoluerat, & P. Ant. Cardin, qui Laorum expeditionem diu meditatus, ad eam accuratissimo, cum versaretur apud Siamos, idiomatis studio se accinxerat.

Ad Tunchinensem igitur profectiorem, sub initium anni 1631. parata fuit nauis in quam die Februarij 18. conscendere tres illi patres, & paucarum hebdomadarum nauigatione placidissimâ, optatum tenuere: Tunchini portum 7. die Martij. De illorum aduentu: postquam audiêre Christiani, præsertim Catechistæ, tum vero quantis omnes gaudiis exultare cœperint, vix assequi possum dicendo. Gratulabantur Ecclesiæ toti, ac sibi, res suas curæ Deo esse, aduenisse sibi magistros, per quos viam salutis edocerentur. Neque minor Patrum omnium nostrorum animis se infundebat voluptas, cum perspexere hominum illorum tam alacre ad diuinas res studium, & firmam adeo in susceptâ fide animi constantiam. mirabantur autem potissimum tria hæc, primò Catechistarum incredibilem pietatem & solertiam, quippe à discessu nostro, id est mensibus

mensibus omninò decem, tres illi, Andreas, Franciscus, & Ignatius præcipuis regni totius prouinciis lustratis Christi gregem anxêre, 3340. nouis Christianis quos baptismi aquis, & sanguine agni dealbauerant. Atque illi, licet initio (vt dixi) duntaxat iurassent, si vsque ad patrum reditum vxore prorsùs carituros, postquam tamen genus illud vitæ amplexi sunt, instaurauere denuò solemne iuramentum, & perpetuum cœlibatum sub obedientiâ patrum promissêre Deo; atque ad illud idem incontaminatæ vitæ genus plures alios pertraxêre.

Deinde mirabantur patres incredibilem Neophytorum zelum qui breuissimo eo interuallo 20. minimum Ecclesias erexissent. Accedebat etiam ætissima omnium inter se charitas, mutuaque consensus. Amabant enim inuicem, nullo discrimine summæ nobilitatis, atque infimæ paupertatis, adeo vt qui valerent opibus, & splendore generis clari essent, versarentur familiarissimè cum egentibus, atque despectissimis hominibus, quos ante baptismum, ne verbo quidem dignari voluissent. Emicabat denique in illis eximius morum candor, vitæque puritas ad eò immaculata, vt Lusitanus quidam postquam aliquandiu, omnes inspexit eorum vitæ rationes, dicere attonitus soleret posse illos haud dubiè, diuinæ legis religiosissimâ obseruantia, & reliquis vitæ Christianæ officiis conferri, non cum iis duntaxat Christianis nostratibus, qui piissimè viuerent in sæculo, sed cum accuratissimis etiam & maximè feruentibus, religiosissimarum familiarum tyronibus nouiciis. Id quod statim nostri comperêre

T t

patres

patres ex confessionum experimento , in quibus mirabilem eorum vitæ innocentiam , in dies maiorem demirabantur.

Postremum denique quod hisce patribus visum est maximè mirabile, fuit vnus ex illis robur incredibile in tormentis, de cuius constantiâ æquum est dicere diffusius.



*Neophyti cuiusdam Tunchinensis præclara fidei confessio,
& mors constantissima. Cum pluribus
miraculis.*

C A P V T XXXVIII.

Magnanimo huic Athletæ Francisco nomen erat. Dederat Christo nomen, ante annos omninò duos, atque ab eo tempore sic virtutum omnium officia coluerat, vt nullum ei tempus vacaret à pietate. Sed in sepeliendis tamen fidelium corporibus ita erat diligens, vt suis illa humeris sæpè importaret, mandaretque humi, vt posset amantissimè. Id postquam innotuit Regis fratri, feroci viro, & Christianis parum æquo, cuius lecticam humeris deferre solitus erat Franciscus, accersit eum, increpatque vehementer, quod mortuorum corporum tactu contaminatus, non sit reueritus, vehiculum principis contingere. Abiiciat ex eo momento Christianam fidem, & deinceps turpissimo illo curandorum defunctorum ministerio prorsus abstineat. Cui Franciscus

Franciscus modestissimè iuxta & constantissimè, se verò Christianum esse, neque ab eâ Christi Domini sui fide, ac amore, ullis tormentis posse dimoueri. Commendari autem impensissimè, illâ lege officia omnia virtutum, quibus etiam solis cœlum emi posset. Sibi quidem curæ fore ut omnia ea diligenter obeat quæ sui erunt muneris erga principem, quidquid ab iis obsequiis sibi reliquum erit temporis, id totum se Deo, & Christianæ pietati dicaturum.

Excanduit ad has voces Regis frater, & ex templo Franciscum ex aulâ iubet facessere, obsequitur ille sine morâ, egreditur palatio, totum se operibus misericordiæ studiosè deuouet. Sed fremens adhuc irâ princeps, & fortissimi pugilis constantiam non ferens, iterum eum ad se vocat; atque ut Christo prorsus nuncium remittat, seuerè præcipit, negat Franciscus se id facturum, moriturum se priùs acerbissimâ millies morte quam ut tantum admittat scelus, Princeps rapit eum imperat, vinculis constringi, fustibus caedi. Cum autem in tormentis nihil de animi constantiâ remitteret; sed Christum alacriùs semper profiteretur, augetur etiam tortorum furor; laniantur ei crura; totum corpus dirè cruciatur, ac demùm volenti, & cupienti, sanctissimum caput, impiâ securi demetitur. Fuit hæc prima victima quam Christo Domino regi suo dilectissimo Tunchinensis obtulit Ecclesia, quæ illius irrigata sanguine, vberiores deinceps videtur fructus polliceri.

Ad hanc inuictissimi militis eximiam constantiam, miracula quoque accessere plurima. Inuenere patres postquam cò aduenerunt tantum illorum esse

T t 2

numerum.

numerum, vt cum exigerent accuratiùs à testibus probatissimis, quot certò scirent languentes curatos, quot pulsa è corporibus dæmonia, ingenuissimè responderent illi, numerum eorum iniri nequaquam posse, quotidiana videlicet illa esse atque vulgaria, vnus certè Petrus vir primarius, & à publicis negotiis nunquam vacans, omni tamen asseueratione affirmabat Energumenos triginta suis precibus à dæmone fuisse liberatos.

Præter alia verò prorsùs innumera, quæ Prouinciæ Gheanicæ, incredibile attulere fidei augmentum, istud sanè fuit illustrissimum, atque omnium notitiâ & sermone celebratum. Vetula quædam Ethnica languebat iam annis duodecim, totoque corpore, paralesi stupefacto, membris omnibus capta erat. Notus erat toto pago languor, vulgòque deposita salus eius habebatur. Sed diuino tamen acta consilio, postquam remedia omnia frustra experta fuerat, baptismum denique poposcit, eoque suscepto ita repentè conualuit, vt quo momento tingebatur stupentia membra solui cœperint, quid plura? euauit subitò paralisis, surrexit, in omnium oculis sana mulier toto pago ambulauit, exiit statim, lateque vulgata est. Tanti fama miraculi, atque omnium animos peruasit admiratio, prædicantibus palam Ethnicis baptismi vim mirabilem, atque ad eum etiam suscipiendum seriò accurrentibus.

Ad hæc, Christiana quædam mulier Maura nomine, filium in eadem prouinciâ piissimum habebat, & re, ac nomine Benedictum, qui diu expetierat, se Deo dicare, aliisque Catechistis adiungere; sed nobis tamen
aliter

aliter visum fuerat ut viduæ matris, & egentis necessitati filius prudens succurreret. Incidit illa in gravem morbum, ex quo etiam iudicarunt adstantes omnes illam planè decessisse. Diriguerat quippe corpus, extincti oculi, sensuum vigor omnis emortuus. De sepultura, & funere cogitare cœperat mœrens Benedictus, iamque omnia parauerat, cum ille inter singultus reputans animo, quam acerbo casu mater defuncta esset, sine sacerdotibus atque sacramentis, ingentem subito, & sanè diuino instinctu spem concepit, victuram iterum matrem, exoratum iri Deum, atque id suis lacrymis, & adstantium precibus concessurum. Res mira, inuitat omnes ad precandum, præit ipse supplex orationem, atque inter fletus, & preces, guttulam aquæ benedictæ ori defunctæ admouet; vix admouerat, reuiuiscit defuncta, oculos aperit, surgit è lecto, amanti, & stupenti filio redditur, beneuolè appellat, & salutat turbam præsertim Christianorum, qui ad funus conuenerant, inuitat exequiarum loco ad diuinas

laudes Ethnicos autem, qui ad idem etiam officium concurrerant, ad suscipiendum baptismum, id quod plures continuò

fecere.





Ethnicorum complurium conuersiones mirabiles.

C A P V T XXXIX.



Rima omnium sit, notissimi cuiusdam venefici, artiumque vetitarum publici Doctoris eximia mutatio. Abhorruerat ille diù à nostris mysteriis, & Christianæ legi ab initio fuerat infensissimus, sed vbi tamen operum adeo mirabilium, certus ad eum rumor affluxit, meliora paulatim cogitare cœpit, adiecit animum ad audiendum serio Dei verbum, librum Catechismi qui fortè in eius manus venerat, totum legere decernit, vt quid tandem rei, noua hæc ferat doctrina sedulo intelligat. Sed vix exorsus erat lectionem, intumescunt ei repente oculi tanto cum dolore, vt volumen ei excidat è manibus. Malo scilicet dæmone fores atrij sui quod tandiu tyrannicè occupauerat, occludente, ne per oculos veritatis lux ingressa illustraret animum, atque ab errore reuocaret. Imò & totum alumni sui corpus hospes impius fœdè agitabat, sed non concidit tamen animo Christi miles, ad cor enim rediens retractabat prioris vitæ scelera, quonam pœnas meritò à se repeti, tacitus reputans, vocari iubet Christianos, ac pro salute suâ supplices orare. Illi vbi aduenere dæmonem laceessere, incipiunt, imperantque cum autoritate, abscedat procul ab homine qui ad Christum confugerit, eique militare paratus sit: Nec morâ obsequi cogitur turpissimus spiritus, & liberum hominem dimittit,

tit, sed vxorem subito inuadit, quæ veneficiis etiam erat debita, hospitemque nequissimum in proximo venerabatur cubiculo: aduolant Christiani, & eiectis, ac contractis omnibus superstitionis cultus instrumentis dæmonem in hoc altero etiam hospitio prouocant, & fugant. Sed necdum tamen remiserat venefico dolor oculorum, quod baptismum differret suscipere, donec humanâ maior specie matrona, eum admonet in somnis, vt si ex hac oculorum molestiâ velit cōualescere; sacris baptismi aquis ablui festinet, hoc medicamento malum omne depulsum iri. Neque vana fuit prænuntiatio, vix obedierat abscessit dolor oculorum, penitusque cum vxore conualescens hoc vnum deinceps cœpit agere, vt quâ oratione, quâ vitæ sanctitate omnes ad fidem alliceret, quos improbis prius artibus ab eâ reuocauerat.

Deinde rem Christianam mirabiliter eodem tempore auxit nobilissimis ducis conuersio, is cum gratiâ plurimum valeret apud Regem, auditâ iamdiu Christianâ sanctitate, in eius capeffendâ studium cœperat incumbere. Imo & vxori, ac filiæ quæ regis fratri iuniori nupserat, potestatem fecerat vt eam susciperent ac Christiano etiam more viuerent; sed hæcebat tamen ipse adhuc in vinculis, multorum tunc quidem hominum Dominus, sed carnis tamen suæ seruus miserimus. Abnuebat quippe Christo nomen dare, quod dimittere nollet concubinas, donec è tanto eum eripere barathro volens Deus, vt spiritum saluum faceret, corpus eius grauißima percussit ægritudine, atque ad extrema deduxit, adeo vt domestici omnes abiectâ spe valetudinis acerbissimè lugerent. At vxori prudentissimæ

tissimæ ac constantissimæ fœminæ, maior de viri æternâ salute quam de morbo depellendo iniecta est cura, obtestatur eum vehementer, atque omni obsecratione postulat, vt ne ad Dei voces obsurdescat miser, baptismi salutare remedium ne adhuc differat, instare supremam diem, ac statim nisi sapiat morte peiores inferni pœnas. Emolliuere tandem durum animum, piissimæ vxoris preces, baptismum postulat, pellices dimittit, & conuocatâ familiâ vniuersâ solemniter vouet, ædificaturum se omnipotenti Deo templum opere magnifico, si ex eâ conualuisset infirmitate, aderat etiam tùm ægroti gener, Regis frater homo Ethnicus qui socerum in tanto lugens periculo, adhæc pia opera impensius hortabatur. Quid plura? baptismo lustratur, lustrico Ioachimi nomine ornatur vt fiat æquale coniugum par Ioachim, & Anna; statimque piis vtriusque votis benignissimè Deus annuens, morbi vim imminuit, & Ioachim paulo post plenæ reddidit valetudini.

Ad extremum vt alia omittam, sunt enim innumera quæ per Christianos fiunt quotidie miracula; erat in regiâ ciuitate infantulus, cui certa mors imminabat, toto enim rigeat corpusculo, & spiritum ægrè trahebat: vt hoc videt Christianus miles, baptizat secretò puerum, vt cum de corpore actum sit animæ saltem medeatur. Sed contra quam ille animo præceperat, vix lustratus erat puer; subitò mutatâ in melius facie, arridere incipit, nullaque prioris status seruans vestigia, prorsus conualescit.

Neque per Christianos duntaxat velut filios amantissimos opera hæc adeo mirabilia patrabat Deus,
Carechu

Catechumenis etiam eadem sapè gratiæ vis inerat. Vnus ex eis orationem Dominicam cum Angelicâ salutatione vix, integrè didicerat, casuque transiens per syluam, inuenit hominem humi iacentem, & morti proximum, cui vt opituletur, accurrit subitò ad flumen, aquam haurit, & salutifero crucis signo benedicit, dein semel Dominicam orationem & angelicam salutationem, optimè vt potest recitat, ægrotum vix infusâ stillâ tinxerat, redire illi cernit vitam, & vires integras, Deumque ambo laudantes mirabilem fidei vim deprædicant.



*Quanta fuerit Regis erga nostros humanitas vsque ad
discessum Lusitanæ nauis.*

C A P V T X L.



Hic Tunchinensis Ecclesiæ status erat, quo tempore nostri eò appulere, audito autem eorum aduentu tantus repente venientium ad fidem Ethnicorum factus est concursus, vt duobus illis mensibus quibus ibi cum naui suâ fuere Lusitani, baptismo lustrati sint tres supra mille. Concitata enim & accensa eorum studia etiam augebat regis erga nostros eximia humanitas, quòd eorum interuentu speraret copias auxiliares à Lusitanis, quales audierat missas esse Cinis aduersùs Tartaros. Quippe hâc spe ductus, plenissimam patribus potestatem fecit Christiana mysteria palam edocendi, & baptismum conferendi, prohibetâ tamen semper contra-

Vv ctione

atione idolorum. Verùm vbi postea perspexit dimo-
 ueri non posse Lusitanos ab antiquâ Cocincinensium
 amicitia, cœpit etiam ipse statim ab illa priori erga
 nostros beneuolentiâ paulatim deficere, cumque na-
 uim paratam vidit ad discessum, nostris etiam enun-
 ciari iussit vt exirent cum suis. Ad quod adeo acer-
 bum mandatum Christiani omnes perculsi egere
 confestim omnia, vt Regis animum immutarent, con-
 siliumque illud discuterent. Neque tamen obfirma-
 tum animum prorsus euicere, assequuti duntaxat sunt
 vt duobus, potestas esset manendi, sed interdicti peni-
 tûs eis, ac seuerè prohiberi, omnem vt hætenûs fece-
 rant diuini verbi prædicationem.

Non fregit hæc procella fortissimorum hominum
 constantiam, sed parendum ventis rati, aliam sibi
 viam ad Christianos excolendos ineundam putarunt,
 quâ & regem ipsum mitigarent, & animarum negotia
 sedulò promouerent. Statuerunt videlicet vt eorum
 vnus veniret in aulam quotidie, atque in conspectum
 regis se daret, vt Rex eo tam assiduo ipsorum conspe-
 ctu piè deceptus, facilè crederet, nostris in regio pa-
 latio adeo frequentibus, nihil superesse posse tempo-
 ris & otij ad Christianorum conuentus faciendos, qui-
 bus tamen edocendis indefessam interim dabant ope-
 ram. Commodum autem id temporis altera Lusita-
 na naus aduenit, atque in eâ duo è nostris strenui
 operarij, Pater Hieronymus Maiorica, & P. Bernardi-
 nus Regio ambo Itali, & ad laborandum in eâ vineâ
 optimè animati. Conuenere igitur deinceps faciliùs
 in aulam, ex quâ in priuatas Christianorum domos se
 proripiebant, vbi ad frequentissimos fidelium cœtus,
 diuina

diuina per otium myſteria peragebant, ſine vllâ Ethnicorum querelâ & offenſione, qui ad eos occultos conuerſus vix poterant aduertere.

Sed ad feſtum tamen natiuitatis Chriſti, non ſe continuit fidelium pius feruor, cum enim graphica quædam præſepij, ac totius huius myſterij, ſubiecta oculis palam eſſet delineatio, confluxere vndique cum Chriſtianis etiam Ethnici tanto numero, vt in iis edocendis, & expiandis confeſſione peccatis, octo dies integri abierint, baptizandorum autem tot manipuli, vt ſeptem menſibus quibus in portu nauis ſubſtiti, Initiata ſint Tunchinenſium omninò tria millia. Quantâ verò vitæ ſanctitate, virtutumque omnium laude, iſta floreât Eccleſia, ex hoc vno colligi poteſt. Pridiè ſemper, quàm ad confeſſionis ſacramentum veniant, ieiunium præmittunt, & flagellationem, quam etiam ſextâ feriâ cuiuſuis hebdomadæ religioſiſſimè inſtaurant, ſiue domi apud ſuos agant; ſiue in viam ſe dederint, aut etiam naui vehantur, nauigabat aliquando Luſitanus, eâdem cum aliquot Neophytis cymbâ, ecce ribi nocte intempeſtâ ſtrepitum audit quaſi decidentis magno impetu pluuiæ. Miratur tam ſubitò mutatam eſſe cœli faciem, quæ pridie tam Suda & ſerena fuerat, ſed continuò tamen videt pluuiam illam totam eſſe flagellorum, ſuper Neophytorum humeros perpetim crepitantium, mirari ſcilicet & laudare cœpit tantam illam pietatem & inertiam ſuam dammare.

Neque minori ſanè dignus videtur præconio arctiſſimus ille nexus beneuolentiæ quò couſtringuntur inuicem, & extraneos etiam omnes, ac miſeros ſuauiſ-

simè complectuntur , sed nusquam est sanè mirabilior, quam erga eos quos iudicum sententiâ sciunt morte damnatos esse. Aduolant enim statim ad carcerem , morituum hominem blandissimè adeunt, Christiana edocent mysteria, baptismum suadent , & credentem omni præsidio ad mortem parant. Conueniunt demùm turmatim ad locum patibuli, neque deferunt donec extremum Deo spiritum tradiderit, corpusque demùm tumulo condiderint.



Virginum multarum eximia pudicitia & constantia.

C A P V T XLI.



Vod de persecutione à Nerone in Christianos excitatâ, quæ prima omnium nascenti Ecclesiæ incubuit, narrant annales Ecclesiastici, ortum illam duxisse à projectâ principis libidine , idem sanè de Tunchinensi Ecclesiâ verè affirmari potest; multa illam , & grauissima incommoda passam esse, propter magnatum aliquorum sædam turpitudinem. Christiana quædam puella nomine Daria , speciosissimo in corpore formosiore adhuc gerebat animam. Eam pagi Dominus vbi nata erat , insanè adamabat, optabatque habere concubinam, quod casta virgo non ferens, & vim etiam aliquam ab homine impuro metuens, vt periclitanti pudicitie consuleret , occultissimâ fugâ in Christianorum ibi degentium tutelam se contulit. Id ille vbi vidit, impudicitie, ac iracundie actus tædis ardentibus, furere cœpit in Christianos.

Inquiri

Inquiri præcepit Dariam, & ad se deduci, ni facerent, experturos eos quid offensi principis ira possit in facinorosos. Ad quæ constantissimè Christi milites, quos habebat pagus ille omninò 60. Dariæ postquam Christi sponsa esse cœpisset, nefas prorsus esse tradi alteri concubinam, & sibi quoque fidem eam profitentibus, prodere ubi delitesceret, grauissimum scelus fore: quo responso accensus tyrannus exarsit, atque iræ impotens, militum petulantium turbæ Christianos illos cruciandos tradidit. Illi turpissimi principis mandato audito, inuolant cæco impetu in paratas victimas, & totum in eas furorem euomunt, verberibus lacerant, discruciant tormentis, fortunis omnibus euertunt. Sed aduersus hæc omnia impauidi, fortissimi Christi pugiles, solemnè primùm omnes sacramento sanctissimè spondent, se neque vi vllâ propositâ pœnarum, neque acerbissimo vllò mortis genere, dimotum iri à fide, deinde statuunt, dimissis domibus, atque fortunis omnibus, in regiam confugere ubi propter tantam vrbis capacissimæ amplitudinem latebræ illis essent futuræ faciliores. De hinc scriptâ statim ad nostros epistolâ vehementer obsecrant vt ad ipsos in tantis angustiis constitutos eorum aliquis venire ne grauetur, apud quem expiare prius peccata possint, quàm aliò iter intendant. Accurrunt ex templo nostri, & piissimos homines inueniunt, in Christiani cuiusdam domo, gaudio triumphantes, quod digni habiti essent pati pro pudicitia contumeliam. Gratulantur eis, & ad maiora etiam accendunt certamina. Sed eorum miserata tolerantiam matrona nobilis etiam Christiana; Da-

riam apud se retinere statuit, & Christianos ab eâ totâ vexatione liberare.

Alterius quoque Neophytæ cui Piæ nomen erat periculosior pro pietate, pugna fuit, & victoria gloriosior. Mancipata illa iam pridem erat sponso Christo, cui se totam deuouerat, sed insciis tamen parentibus adhuc idolorum cultoribus, & primario quodam viro, qui eam ab infantiâ domi aluerat, & in concubinametiam designauerat. Tunc autem facta iam nubilus iubebatur & pudicitiam & fidem deferere. Quod illa cum negaret constantissimè, certoque affirmaret sibi facile posse vitam eripi, pudicitiam & Christum nunquam auelli posse, furens lasciuiâ intemperans procus, omnia tentat, vt insanæ libidinis machinis expugnet pudorem. Et nunc blanditiis, nunc minis, sæpius verberibus innoxia membra discruciat, ac tandem amore, vt fit, in odium conuerso decernit etiam innoxiam crudeliter mactare. Id quod illa subodorata clam aufugit, atque in domo vetulæ cuiusdam piissimæ victrix Pia delitescens, præsidium inuenit vitæ, atque pudicitie.

Infinite sum si omnia Christianorum cum Ethnicis certamina commemorem, sed vnum tamen Ignatium adolescentem fortissimum præterire nullo modo possum. Fuerat ille vnus ex illis qui primi è Tunchinensibus, Christi fidem amplexi sunt. Quo nomine à parentibus male vexatus, alacri semper animo inuictus stetit, instabant quippe atrocibus minis, & verberibus etiam crudelissimis constantiam iuuenis laceßebant, cumque constantissimè ille semper neque minis neque plagis cederet; illi ardentes furore,
domo

domo filium extendunt , detractâ veste optimâ, lace-
ram offerunt penulam, inscriptisque demùm tabulis
publice coram magistratu profitentur, nolle se illum
habere filium qui Deos suos colere renueret: spe-
ctabant fortissimi Athletæ constantiam Ethnici om-
nes cum stupore, augebantque oppugnantium pa-
rentum conatus suis etiam ipsi machinis, sed cum au-
gerent potiùs Vincentis coronas, toto pago eum
extrudunt. At ille omnibus incedens gaudiis, &
paternâ domo & patriâ eiectus, ad ædes nostras di-
uertit, atque in his domestica lætus obit ministeria.



Laënsis expeditio per nostros frustra tentata.

C A P V T XLII.



VM Christianæ religionis negotia tam pro-
sperum Tunchini tenerent cursum, eiusque
rei fama increbresceret, quotidie magis,
peruenit etiam ad legatû Laorum regis, in
Curiâ Tunchinensi negotiorum causâ tunc agentem,
is arctissimâ cum nostris necessitudine iunctus, ac be-
neuolentiâ, cogitauit de illis in patriam suam intro-
ducendis, atque ad id operam suam vltro detulit. Pla-
cuit P. de Amaral tam præclara propagandæ diuinæ
gloriæ opportunitas, eamque cupidissimè amplexus
monendum priùs de aduentu suo putauit Laorum
Regem, per Epistolam quam Catechistis duobus An-
dræ, ac Thomæ deferendam tradidit, cum pulcherri-
mâ Christi Saluatoris Imagine. Litteras Rex accepit
cum

cum eximiâ testificatione beneuolentiæ ipsamque imaginem cum magnatibus suis supplex veneratus est, authores illi omnes fuere, vt nostros omninò aduocaret in terras suas, nihil vel ipsi regi honorificentius, vel toti regno vtilius suaderi posse. Rex verò prolixissimè id pollicitus, conscribi statim iubet epistolam, in quâ patrem humanissimè inuitat, gratissimum sibi fore aduentum eius, ac iucundissimam etiam nouæ illius legis promulgationem, eam epistolam legato ferendam tradit, illique comitem viæ Thomam designat, retento interim apud se Ioanne, cum mandatis, vt veniente patre redeat etiam ipse Thomas, & vno aut altero die præeat, vt Rex intellecto aduentu patris, mittere possit obuiam primarios aulae suæ viros, qui honorificentissimè eum in aulam introducant.

Audierant Laënses procures differentem aliquoties de rebus diuinis Thomam, & tam eximiam nouæ illius legis speciem mirati, vtrò profitebantur se audito patre illo quem expectarēt, fidem illicò suscepturos, id sibi omninò fixum esse, ac constitutum. Accepit regis epistolam & reliqua etiam audiuit omnia latissimo animo P. Amarallius, expetebatque omnibus votis ad illam præclarissimam expeditionē se accingere, sed tres cum potissimum causæ retardabant. Prima erat quod cum Tunchinensium omnium missionum moderator esset constitutus, difficillimum putabat inconsultis Amacai superioribus officium illud suum alteri committere. Deinde diuturnis etiam ipse confectus laboribus, fractas omninò habebat vires, atque oneri tanto impares. Obierat quoque percos dies, magno
omnium

omnium dolore. P. Bern. Regius, continuis illis exhaustus curis. Accedebat denique inopia operariorum, cum enim tanta tunc in Ecclesiâ illâ florentissimâ spes esset vberriamæ messis colligendæ, stultissimum ducebat hâc dimissâ nouam illam, & incertam expeditionem suscipere. Scripsit ergo ad Regem sibi quidem esse acerbissimum quod grauissimâ tunc quidem corporis ægritudine præpeditus, amantissimæ Regis voluntati, ac cupiditati etiam suæ, obsequi eo anno 1636. nequaquam posset, sed altero tamen anno recuperatis, vti sperabat, viribus, daturum se operam, vt ad optatissimum regnum iter impigrè intendat.

Interim autem P. Emanuelem Dias Amacai tunc agentem, qui P. Andrea Palmerio nuper defuncto, in munere visitoris successus erat, per litteras de toto eo negotio diligenter monet, & nouos ad præclaras has missiones operarios enixè postulat. P. Diazius vt eximio in Dei gloriam erat zelo, curas statim conuertit omnes, ad seligendos ex Amacaënsi seminario maximè idoneos ad tantam procuracionem, tres autem ex omnibus strenuissimos fore iudicauit P. Ioan. Bapt. Bonellum Italum Collegij Amacaënsis Rectorem P. Raymundum de Gouca Aragnensem Theologiæ antea professorem, & tunc maiorum studiorum generalem præfectum, quibus insuper tertius accessit

P. Martinus Coelho Lusitanus quos omnes
egregiè animatos ad insignem adeò
expeditionem continuo
dimisit.



*Laënsis expeditio per Tunchini terras, frustrâ tentata,
fœliciores aliunde successus habet.*

C A P V T XLIII.



Bonellus tamen Tunchinensium missio-
num visitator delectus erat, câ tamen ar-
debat cupiditate quæstus animarum, vt of-
ficio illo visitatoris dimisso, totum se Lao-
rum expeditioni obeundæ addixerit. Audiuerat enim
amplissimam illic paratam esse messem, ad quam in
horrea Dominica inferendam toto incumbere desi-
derio. Adiunctis itaque sibi viæ ac laborum sociis
Andrea & Thoma Catechistis, & iunioribus præterea
nonnullis qui seipso in vitam totam Christo manci-
pauerant ineunte Octobri anni 1638. dat se in viam
periculis plenissimam sed animi robore, ac constantiâ
laborum molestias superabat. Donec tandem per va-
stas quasdam solitudines, & inuios montes peregrin-
antibus ingruere cœpere frigora, omnia glacie, ni-
uib; latè horrere, adeo vt sancti viatores toto sæpè
rigentes corpore, incredibiliter torquerentur: Et pri-
mus quidem omnium P. Bonellus vim frigoris ultra
non ferens, deficientesque sentiens vires, intellexit im-
minere sibi vitæ, ac laborum finem cum Laënsis iti-
neris mediam partem vix confecisset. Accinxit ergo
se lætissimus ad sequendum in cœlos vocantē Deum,
& Christianis omnibus officiis deuotissimè perfun-
ctus commendatisque impensius, ac manu suâ notatis

iis quæ ad suscepti negotij felicem exitum opportuna fore iudicabat, sanctissimè diem obiit. Sociis autem illis suis, ac præsertim Andreæ, amantissimè iniunxit ut ne cœptis desisterent, ad præclaras illas Laorum terras penetrarent intrepidi, & Christi nomen qua cœperant fiduciâ importarent non defuturam ipsis orbatis patre, Christi paternam opem.

His illi monitis accensi vim illam frigorum molestissimam non verentur, susceptum persequuntur iter, ac tandem post infinitos labores, ad optatum perueniunt regnum. Illic sanctissimam Christi legem ubique annunciare aggrediuntur, Rex ipse Laorum cum optimatibus, non doctrinæ splendorem quæ tradebatur, sed personarum vilitatem attendentes, per quas illa offerebatur, neglexere amplecti veritatem quam nullus Europæorum Patrum edoceret. Audire se omninò velle vnum quempiam ex illis, simul loqueretur credituros omnes, & de mutandâ religione seriò cogitatueros. Nunc quando non viderent nisi Tunchinenses, à quibus idolorum cultum aliàs acceperant, non commissuros se vnquam ut illorum duntaxat suasu, ad ea damnanda induci se paterentur. Cumque iterùm & sæpius obfirmatis animis hæc iactarent, integrum annum duxere Catechistæ, nullo fere alio fructu quàm laborum, & patientiæ, atque adeo cogitare cœperunt de reditu, sed dum ad iter se accingunt, peregrinationis inuenit finem vocatus ad cœlum Andreas, constans & indefessus annorum vndecim operarius, quibus plura Tunchinensium millia fidei adiunxit, & incredibili virtutum omnium luce vniuersam hanc Ecclesiam illustravit. Et ne

solus cœli viam capesseret, adunctus est ei coronæ socius, meritorum egregius imitator Hieronymus. Magnæ spei iuuenis. Adeo vt Laorum missio etiam tentata, Egregios Tunchinensium operarios absumpserit.

Destinauerat autem ad eximium illud opus æterno consilio Deus P. Ioannem Mariam à Leria, qui è Cocincinæ terris pulsus, ad Laorum statim regna penetrare aggressus est: Et primùm tentato frustrâ, per Siam terminos aditu, scèliciùs postea per Cambozem amnem eo pedem intulit octo ab hinc annis: venitque cum Cocincinensibus aliquot Catechistis in urbem regiam, vbi Conciliato sibi plurimum Rege, ac magnatibus etiam deuinctis, multos Christianâ fide imbuit, speramusque amplissimos ex eâ regione fructus, si modo non defuerint operarij.



*Molestissima quædam persecutio Tunchini à 'inis concitata,
sedatur tandem in ipsorum authorum
pudorem.*

C A P V T XLIV.

E Lorebat igitur eo tempore Tunchinensis Ecclesia maiorem in modum, præsertim autem in Prouinciâ *Ghean* lætissima erant omnia, cum ecce ardentes inuidiâ cultores idolorum, Christi gregem, cum per se ipsos non possent, per emissarios Cinas qui ad hunc portum mercimorum causâ sæpè confluunt, vexare aggressi sunt. Versabatur fortè in templo cum Christianis P. Hieronymus

nymus Maiorica , dabatque sacris operam , & suos de more omnibus pietatis officiis informabat. Cùm ecce subito impetu Cinæ so. templi fores perrumpunt, & in confertam turbam irruentes, pugnis, & fustibus obuios quosque petunt , & P. ipsum Maioricam ferreo malleo percutiunt. Quod vnus è domesticis famulis non ferens, Cinam illum patris percussorem repellit, atque inter mutuam illam concertationem vulnere vulnus reponit , excluduntur postmodum è templo Cinæ, ac tumultus omnis compescitur.

Sed postridie tamen manè tumultuantes iterùm Cinæ demortui vnus è suis Cadauer Magno eiulatu deferunt in templum, & Christianos peracti pridie homicidij reos peragunt; cùm tamen ipsi haud dubiè miserum, leuissimo duntaxat hesterno vulnere saucium domi enecassent. Ad magistratum deinde conuolant exponunt crimen, vtione deposcunt. Infensissimo ille semper in Christianos fuerat animo, atque hâc occasione vtendum ratus, P. Hieronymum cum aliquot aliis compingit in vincula; & paucis post diebus, in regiam vinctos dimittit, dicturos causam coram ipso Rege. Sed non diù latuit Cinarum flagitium. & Patris ac sociorum innocens vita. Breui enim regis sententia Patrem absoluit ab omni suspitione criminis, Cinæ autem impostores pronuncians seuerè iussit, deinceps quiescere, atque à perturbandis Patribus abstinere. Sed interim dum in Curiâ; capitalis hæc causa discutitur, Christianis, in prouinciâ illâ remotissimâ degentibus, multa intulere damna furentes idololatræ, templumq; ipsum solo æquantes, omnia pietatis monumenta polucebant; donec tandem victor obtentâ causâ, Pater

Hieronymus rediens, tenebras omnes discussit, redditaque Christianis pace de omni Ethnicorum perfidia gloriosum triumphum egit. Quippe gubernator etiam supremus prouinciæ perspectâ eius eximiâ virtute ac innocentia, humanissimè illum euocari iussit, amplissimam agendi cum Christianis potestatem fecit, imò & templum ipsum, eorum impensis per quos erat dirutum, restaurari sanxit. Adeo vt sedatâ tempestate Pater eo anno 1639. Ethnicorum capita duomillia quadringenta septuaginta duo, dæmoni erepta, in Christi castra per baptismum transtulerit. Atque vt præteritorum malorum memoriam omnem Deus è fidelium animis deleteret, effecit cum ingenti eorum gaudio, vt breui postea interuallo Cinenfis alterius naus Dux, Christianorum amantissimus supplex accederet ad Ecclesiam, atque ibi coram saluatoris imagine prostratus, pro iniuriâ ipsi à ciuibus suis illatâ, veniam multis cum lacrymis exorauerit.

Qui autem Cinas illos sacrilegos postea finis vlciscentis numine oppresserit operæ pretium est huc apponere. Vestes enim sacras per derisum procaciter induerant multaue blasphemè iactauerant in Christum, sed vigilis Dei oculos, manumque præpotentem euadere nequaquàm potuere miseri, cum enim auditis eorum sceleribus Rex Tunchini, dignas de his pœnas repetere cogitaret, societatem inierunt cum aliquot hollandis, vt cum iis aufugerent in lapponem, potauerant autem quodam die largiùs hollandi, atque in ipsâ naui altissimo eos somno crapula oppresserat; quod perfidi Cinæ intuentes, humanitate omni abiectâ, irruerunt in eos, & omnes ad vnum **enecarunt,**

enecarunt, merces deinde quibus naus onusta erat diuisere tres in partes, & ne dignosci possent nauibus totidem impofuere, quarum prima postquam a d Cinenfem portum appulit, capta est à gubernatore, & merces eius omnes direptæ. Altera profecta ver- sus Cocincinam in scopulos illisa periit. Tertia vbi Camboiam attingit agnitis ex hollandico signo mer- cibus, capti prædones nefarij, tormentis coacti tan- dem sunt fateri patratum facinus, & meritis statim suppliciis puniti.



Tunchinensis Ecclesiæ latissima incrementa & operariorum aliquot mors acerbissima.

C A P V T X L V.



Nter procellas illas, & turbines Tunchi- nensis nihilominus Ecclesiæ mirabilem in modum adolefcebat. Anno enim 1639. censebat Christianorum octoginta duo millia quingenta; suscepere autem baptismum eo ipso anno duodecim millia 500. præter eos quos Bo- chinensis prouincia plurimos numerabat, Ecclesiæ maiores centum habebantur, Vbi festis semper die- bus frequentes Christiani, Sacramentis, & diuinis elo- quiis pascebantur. Minores Ecclesiæ omninò 129. in quibus cum nostri aberant, Christianarum preca- tionum pensum ritè Neophyti persoluebant. Ad hæc oratoria innumera quæ domi quisque suæ impensif- simo studio adornabat. In Gheanicâ certè prouin- ciâ

ciâ 72. pagorum omnes ferè incolæ Christum colebânt, atque in singulis plurimi tum adolescentes, tum puellæ, illibatum pudicitiaæ florem seruabant ex voto. Virginem quandam Christiani parentes desponderant Christiano, & eximiè pio iuueni, cui vbi primùm facta est potestas loquendi cum sponsâ sine arbitris, mentem illi suam aperit, nihil optare se magis quam amatori Virginum Christo, intaminatum corpus offerre. Illa verò sereno atque triumphante vultu profiteri idem sibi penitus insedissee animo consilium, fixum sibi omninò virginem mori. Consulitur super eo negotio Confessarius, ambo pudorem perpetuum voto firmant.

Neque vero desunt etiam multi coniuges qui mutuo cōsensu post peractas nuptias seruent cœlibatum, neque pauciores viduæ adhuc iuniores quæ continentiam vltro spondeant, id vnum dolentes, quod annunciato sibi tardius Christo, seriùs etiam decus pudicitiaæ agnouerint. Ad hæc quam plurimi à parentibus & propinquis multa sæpè ac grauissima bella patiuntur, pro defensione, virginei pudoris. Vt mihi, atque aliis quampluribus qui Ecclesiæ huius statum perspexere, sanctè affirmare liceat, nullam à pluribus iam sæculis Ecclesiam nouam fundaram esse, in qua virtutis huius diuinissimæ amor, frequentior fuerit & feruentior.

Cum verò in messe adeo amplâ, & copiosâ, operationum tamen tanta sit penuria, tum mirabili Dei prouidentriâ factum est, vt ex iis qui huic muneri strenuè incumbabant, plerique oneri succubuerint, & laborum magnitudine viribus exhausti tabem contraxerint.

xerint. Postea enim quàm reuocatus erat Amacaüm P. Amarallius vt fractas diuturno labore vires restauraret, suffecti erant in eius locum P. Balthazar Caldeira è primariâ inter Lusitanos nobilitate; & P. Iosephus Maurus qui venerat ex Italiâ, quod illi munus auidissimis suscipientes animis, cœperunt strenuissimè laborare, ac P. quidem Iosepho *Thin boa* obtigit prouincia, eamque adeò feracem, & tot Christianorum millibus abundantem prouinciam tanto excolere cœpit studio, vt antè illius anni finem in acutissimam incideret febrim ex quâ statim cognouit instare sibi supremum diem, ideoque de apparando discessu cogitans, P. Balthazarem socium charissimum, qui distabat itinere duorum dierum, protinus accersit; ille impigrè aduolat, & quidem opportunissimè, vix enim Sacramentis munitus erat ægrotus, cum incidere cœpit in delyrium, ac paulo post morte placidissima extinctus est: eximius sanè vir qui tamen annu ageret duntaxat 31, Canos tamen meritis æquabat, nihil illo mitius, nihil sanctius, vt meritò lacrymis cum suis, & tota Tunchinensis Ecclesia, quæ plurima ex ipsius laboribus sperabat incrementa, & nostri etiam omnes morientem sint prosequuti.

Neque P. Antonio Barboza alia fors obtigit, quippe cum annis 4. in huiusmodi laborum palæstrâ se ipsum supra vires exercuisset lentâ feбри correptus est quæ degenerauit postea in phtisim, sed in tabido illo, & marcido corpore vegetus tamen & viuax perstabat animus neque cessare volebat à laboribus, honorificentissimum sibi fore prædicans è præstantissimis

Y y illis

illis officiis pietatis in cœlum assumi. At moderato-
ribus nostris longè aliter visum est, eximij enim ope-
rarij pretiosissimam vitam ducentes omnia pro eius
incolumitate tentarunt remedia, primùm reuocan-
dum putarunt Amacaium, atque medicorum arti ac
manibus traditum variè curarunt. Cumque vana
esse videre omnia, dimisere Goam si forte mitioris
cœli temperie, vires instaurari possent. Sed prostra-
tâ iam penitus naturâ, & continuis illis laboribus
omniò fractâ, inanes fuere curæ, superauit reme-
dia omnia ægritudinis malignitas, breui enim
postea extinctus, maximum nobis omnibus reli-
quit sui desiderium, & sanctissimæ vitæ præclarissi-
mum exemplum.



Neophytorum aliquot mors sanctissima.

C A P V T XLVI.



Rimum hoc loco commemorare animus est
Ioannis Catechistæ obitum fœlicissimū, quem
Regis gener Bochinicæ provincie supremus
eo tempore gubernator crudelissimâ morte mactauit.
In hac ille prouinciâ perpetuis octo annorum labori-
bus, incredibiles fructus tulerat; quippe innocentissi-
mus, atque integerrimus iuuenis mirabile quoddam
acceperat à Deo donum curationum, quod infidelibus
etiam ipsis notissimum, magnam ei apud omnes con-
ciliabat venerationem. Atque ipsi etiam gubernatori
egregia illa virtus probata fuerat, quem periculosis-
simo

MO

mo morbo laborantem , præsentissimo solius pre-
tionis remedio curauerat ; indeque tantâ erat in eum
beneuolentiâ , vt suis eum sumptibus aleret , & Chri-
stianis etiam ipsis pollicitus sæpius fuerat , pulcherri-
mam intra palatii sui septa , & capacissimam Eccle-
siam . Simul autem ægrotare cœperat aliquis è do-
mesticis , accersebatur ipsius iussu vnus aliquis è Chri-
stianis cuius deprecationibus apud Deum morbus de-
pelleretur .

Contigit itaque vt è Concubinis vna quam ille
habebat charissimam periculosissimè decumberet ; ni-
hil habet prius gubernator quam vt euocet Ioannem
& preces ab eo pro amicâ postulet . Ille rem Deo in-
gratissimam , & Christiano nomini parùm honorificâ
se facturum ratus , si pro turpissimæ mulierculæ vale-
tudine Deû exoraret , quem illa tanto iam tempore suâ
libidine offenderet , constantissimè negat se guberna-
tori eâ in parte obtemperaturum , domum etiam ipsam
adire renuit sæpius vocatus , mortem intentat guber-
nator ni pareat , ille subiturum se potius acerbissi-
mam millies mortem , quam inferat tantam nomini
Christiano labem : hîc non se capiens præ furore gu-
bernator ; septem è militibus suis mandat , vt rebellem
protinûs rapiant in campum , & lanceis confodiant .
Nihil acceptius sibi esse posse gaudens testatur Ioan-
nes , quàm , ne tantam animæ suæ maculam contrahat ,
sanguinem , ac vitam profundere , raptatur sine morâ ,
mortem amans ne peccato inquinetur , confoditur
à crudelibus famulis , immitis Domini à quo tamen
sceleris tanti pœnas breui postea interuallo , ultor
Deus meritas repetiit ; oppressus enim à Rege Cocin-

cinæ uxorem & filios rapi vidit in captiuitatem, atque in eâ miserrimè contabescere. Ipse autem ad Tunchini Regem socerum suum præcipiti fugâ elapsus, cum se tutum putaret, multorum tamen criminum reus compertus, coniectus est in carcerem, & fame necatus, eius cadauer toto insepultum triduo, pendere publicè visum est è patibulo, vlciscente manifestè Deo, & suam, & Ioannis contumeliam.

Neque minorem videtur habuisse constantiæ laudis laudem, aliorum præterea duorum obitus, quos Tunchinensis Ecclesia hoc tempore coronatos vidit. Primus Caius cum pro fide Christi captus, ac victus esset, iis ipsis à quibus torquebatur, Christiana mysteria tradere non intermittebat, quâ mirabili animi fortitudine tortores superati vinculis eum exemerunt, sed cum probare vellet athletam suum Deus priusquam coronâ donaretur, nouo eum prælio exercuit. Lepra enim pestilentissima, toto ipso diffusa corpore, fœtorem exhalabat tantum, & suis omnibus adeo intolerabilem, vt eum nemo siue grauissimo incommodo ferre posset. At ille in iis doloribus incredibili animi fortitudine, morbi vim eludebat, cum autem exesâ ferè carne marcidum tabe corpus spiritum vix traheret, animamque ferè iam exhalaret; amantiſsimè ad filios conuersus, vos vero (inquit) charissima mea pignora, excipite postremas morientis parentis voces, amate; hoc vnum obsecro & obtestor, Amate Dominum meum Iesum, atque illius amoris studia vestra vitamque omnem deuote. Cadauer hoc fœdum sine pompâ & honore funeris, quo IESVS meus carere voluit, in altissimam scrobem defodite, ne

tabo

tabo suo aërem etiam inficiat. Tum in dulcissima cum Deo prorumpens colloquia, quando veniam, & vultui tuo apparebo, Iesv suauissime, quid desideria differs suspirantis famuli, & in amplexus tuos cupidissime anhelantis, atque in his huiusmodi suspiriis piissimam animam exhalauit.

Alter è duobus erat Ioachim, multorum vir meritum, à quo amplissima primùm ædificata fuerat Ecclesia, deinde in odium Christianæ pietatis, pulsus in exilium, sæpiusque coniectus in vincula, & flagellis cæsus, victis tandem omnibus Christiani nominis aduersariis octogenarius domi suæ tranquillissimâ morte obiit. Animaduenterat autem paulò antequam moreretur, sollicitos iuxta patriæ morem esse filios de vestibus nouis ipsi conficiendis, Eia (inquit) filij suauissimi ecquid de putridissimæ carnis huius ornatu cogitatis, quæ vermium futura est esca & præda; quin? potius ad animæ decorem, & ornamenta, si me amatis, curas omnes vestras cogitationesque conuertitis, vt ad immortalitatis stolam se paret, ad quam omnibus votis moriens aspiro.

Quibus in verbis & dicere
desuit & viuere.





*Catechistarum aliquot, & complurium aliorum finis
deuotissimus.*

C A P V T XLVII.

TRes amisit vno fere tempore Catechistas hæc Ecclesia, quorum amorem incredibilem & susceptos pro eâ propagandâ labores, colere sanè debet, pietatis & virtutum omnium memoriâ sempiternâ, fuerunt illi Thomas, Thadæus, Ignatius, qui vltimus nostrorum ab initio laborum omnium particeps, & socius fidelissimus, tantum profectò, in huiusce vineæ culturâ curarum, ac amoris contulit, vt totum se vigiliis, peregrinationibus, curis, consumens vires omnes corporis exhausserit. Anno ætatis 45. immaturâ & omnibus fidelibus acerbissimâ morte citiùs præreptus.

Trium illorum Catechistarum tristissimum obitum, breui excepere funera trium item exinio candore, ac virtute iuuenum, Caroli, Francisci, Angeli; & Carolus quidem postquam hæreditati amplissimæ prætulisset opprobrium Crucis Christi, & profapiæ nobilissimæ, Dei & Ecclesiæ obsequia eximios in viâ Dei quotidie faciebat progressus, mittebatur eo tempore Pater eius à Rege Legatus in Cinas, qui ante professionem filium per litteras benignissimè inuitat, vt veniat ad Patrem, polliceturque si venerit opes plurimas, & dignam tanto Patris amore fortunam. Fecere illi sine morâ nostri copiam eundi ad Patrem,

at

at ille metuens, ne si respexisset retrò, minùs videretur aptus esse regno Dei, neglexit oblata munera, maluitque Christo placere; quam Patri obsequi, breuique postea ob perpetuos labores, lentâ consumptus tabe, defunctus est, & ad ampliora munera in cœlum receptus. Franciscus robustissimo cum esset corpore, totumque se deuouisset Christo, perferendis vtrò citroque litteris, & longissimis itineribus obeundis totum robur corporis exhaustit, & post eiectos summo cum dolore pulmones extinctus; Tertius non moribus minus quàm nomine ipso Angelus, postquam prouinciæ huic vniuersæ mirabilis cuiusdam virtutis exempla dedit, sanctissimâ tandem morte viam sibi ad cœlum certissimam muniuit.

Neque mulierum minores victoriæ fuere. Baptismum diu expetierat matrona nobilis atque opulenta, & ad eum suscipiendum omnibus se Christianis officiis parauerat. Oratorium illi erat domi ornatissimum, in quo flexis quotidie coram pulcherrimâ imagine genibus deuotissimè orabat; & in pauperes præfertim Catechistas alendos, pecuniarum vim maximam profundeat, hoc vnum omni semper obsecratione postulans à Deo, vt ne prius excederet e vitâ quam baptismum ritè suscepisset. Cum autem medio quodam in itinere grauis eam opprimere cœpisset morbus, cruciabatur intimis sensibus quod omni Christianorum solatio destituta moreretur, sed breui mœrorem omnem absterfit Christianæ cuiusdam ac prudentissimæ fœminæ aduentus, Monicæ nomen erat, per quam baptismo ritè lustrata, & Columbæ nomine donata, inter pios maximarum virtutum actus placidè

placidè defuncta est. Deferebat autem Columba dum viueret, in sinu suo crucem pulcherrimam, quam eodem secum claudi iussit tumulo, id cum rescuiisset Ethnicus quidam ditissimus, qui defunctæ funus curauerat, quadagesimo post obitum eius die, aperire secretò iussit sepulchrum vt inde auferret crucem, sed quod neque quærebat, neque futurum sperabat, defunctæ corpus integrum reperit, atque illibatum, ex quo etiam suauissimus latissimè spargebatur odor: quo spectaculo territus ipse, ac omnes Ethnici miraculum renunciauere Christianis, & fidei vim eximiam etiam inuiti prædicauere.

Fœlicissimum quoque obitum consequuta est, Linæ mulieris sanctissimæ virtus eximia, quæ fidem iam inde ab initio amplexa 17. totos annos, omni pietatis officio duxerat. Quippè quæ maritum cum amplissimâ familiâ, aliisque quam plurimis adiunxerat Christo, in pauperes omnes adeo munifica, vt ab omnibus vulgo tanquam mater haberetur & amaretur. Sed vbi tandem sensit se ad superos vocari, ingrauescente vi morbi virtutem etiam exaggerandam putans Sacramenta iterum, & sæpius deuotè suscipit; noctes & dies orando continuat, adstantes Christianos amicè hortatur ad pietatem. Dum verò Patres nostri sacram B. Virginis effigiem moribundæ offerunt, quam & suis ipsa manibus stringit, & ore osculatur; emicuiere subito ex sacrâ imagine radij lucidissimi, & suauissimus odor conclaue totum perfudit, omnibus qui aderant; & intuentibus lucem, & cœlestem odorem experientibus. Quibus suauitatis illicitis in cœlum inuitata Lina toto pectore in cœlum aspirans, proficensque se
neque

neque filiorum, neque ullius in hac vitâ rei desiderio teneri, sed solius I E S V C H R I S T I dulcissimi amoris sui sanctissimam efflat animam; quam & in cœlum euntem, omnes qui hæc videre Christiani, omnibus votis sequi exoptabant.

Extremus mihi hoc loco erit (infinitem enim esset omnes percurrere) suo quidam vir probus, & prudens. Is subito casu, die quâdam, spectantibus, atque attonitis suis omnibus decidit in terram, neque ulli adstantium dubium erat, quin repentino fato prorsus extinctus esset, iacebat enim sine sensu & vitali omni signo destitutus, cogitabantque de curando illius funere omnes domestici. Cum autem propè iam esset ut efferretur, surgit repente suo redeunte vitâ & sensu, suosque omnes tanto spectaculo territos confirmat. Deinde ubi se collegit narrare cœpit, quid eo toto interuallo viderit, quo examinis iacere visus est. Affirmabat autem venisse ad se sex speciosissimâ formâ iuvenes, atque ab iis per viam quandam argento stratam, in amplissimam cœli aulam perductum esse. Hic vero conspectum sibi esse Regem solio, insidentem aureo, atque ad latera eius duos primo illi specie, ac maiestate pares, similibus thronis conspicuos. Intellexisse se à ducibus illis suis, tres eas esse Augustissimæ Trinitatis personas. Alij quoque complures (inquirebat suo) è Crystallo erant throni, in quibus sedebant pulcherrimo corporis habitu homines optimè mihi noti, per quos inuitabar etiam humanissimè, ut cum ipsis federem. Sed prohibebant duces illi mei, qui me subito è loco illo deliciarum in horrendam quandam rapuere specum. Fornax ibi erat

ardentissimis accensa flammis, & miseris animabus
 referta, ex aduersâ verò parte locus frigidissimo rige-
 bat gelu, atque in eo infinita quædam animarum tur-
 ba stridebat dentibus, & miserè vexabatur. Pœnarum
 deinde alia genera solo visu pariebant horrorem, &
 nunc solâ recordatione vocem intercludunt. Hic me
 attonitum, & stupentem repente sex illi iuvenes ite-
 rum redire iubent ad corpus, & quæ conspexissem
 omnia, meis enarrare, mansurum me adhuc in viuis
 donec parentibus meis sedulò nauassem operam, &
 iusta etiam persoluissém. Victuros illos duntaxat vs-
 que ad primum nouæ lunæ diem, quibus pietatis erga
 meos officiis vbi ritè defunctus fuero, asseruere se
 venturos ac me in regionem illam lucis iterum dedu-
 cturos. Hæc suo rediuius, quæ sanè non vana som-
 nia, sed verissima oracula extitisse, optimus vaticinio-
 rum omnium arbiter euentus planissimè comproba-
 uit. Obiere namque altero ab hinc mense ambo
 Iuonis parentes, ab eoque rite sepulti sunt. Atque
 sequenti die qui nouæ lunæ primus erat, prælagiens
 animo vir optimus quod res erat, se à Deo euocari,
 domesticas primùm res componit vxori, & familiæ
 vniuersæ pietatis studium impensè commendat, de-
 cumbit in lectulo, tùm nullâ ægritudinis molestiâ,
 præpeditus inter deuotissimos affectus & sermones
 cum Deo, viuere in terris desinit, cœlo
 vt spes est, receptus, ad quod
 tanto antea inuitatus
 erat.

Nous

*Nona in Christianos procella.*

C A P V T XLVIII.



Nno 1640. post iacta Tunchinensis Ecclesiæ prima fundamenta quarto decimo, erant in eo regno Christiani centies mille, tamque læta ubique spes affulgebat maioris etiam incrementi, ut nihil optandum superesse videretur, præter operariorum copiam, tantis colligendis fructibus parem. Amacai autem moderatores nostri, tantis prouentibus læti, nouis subinde missis subsidiis, iuuabant laborantes & ferè fatiscantes sub onere. Venerunt enim hoc anno P. Thomas Rodriquez Lusitanus, vir eximie gnauus, & constans, ac laborum tolerantissimus, quorum tamen grauitate breui tempore obrutus, magno totus huius Ecclesiæ damno, & desiderio defunctus est. P. Thomam sequuti mox erant PP. Petrus Albertus & Emanuel Cardozius Lusitani, P. Petrus Calabrozius Italus, P. Onuphrius Borges heluetius, omnes robusto, & vegeto corpore, atque ad labores in hâc procuracione tolerandos in primis valido.

Sed interim tamen intolerabile videbatur dæmoni ex eâ ditione procul depelli quam tot sæculis summo cum imperio tenuerat. Omni ergò inueteratæ nequitie conatu ac contentione nouam hanc surgentis Ecclesiæ arcem suffodere, ac diruere nitebatur. Quippe quo maximè tempore tuta & tranquilla videbantur omnia; nouus repente tempestatis exorta turbo

Christianam rem omnem incredibiliter concussit. Primum enim regium edictum grandioribus exaratum litteris, ad templi nostri valuas affixum videre omnes, quo Christianis seuerè iuebatur, ut ne deinceps novam hanc legem amplecterentur, neque nostros etiam ullo tempore adirent. Deinde Patrum etiam fama miserè proscindebatur, ac demum mandabatur ut Christiani omnes libri, rosaria, imagines, igne sic exurerentur, ut nulla toto eo regno vestigia haberent novæ huius doctrinæ. Hic pro eo, ac debuere Patres in tantâ calamitate territi, atque solliciti, nihil habere prius quam ut ad placandum Deum curas omnes conferrent, plures igitur dies orationibus, ieiuniis, flagellationibus ducunt, beatissimamque in primis Christi matrem & Sanctum Xaverium deprecatores apud Deum adhibent, atque ab iis tam præsens & opportunum auxilium affulsit, ut depositâ iracundiâ Rex, alia omnia cogitantem, & rei exitu suspensum P. Maioricam euocari iusserit, multaque cum illo humanissimè loquutus, accusare cœperit suorum præcipitem nequitiam, quorum perpētuis querelis, atque calumniis deceptus tam seuerum in ipsos sanxisset rescriptum, deinde amplissima omnia, & secunda polliceri, amare se Patres omnes impensissimè, à quibus etiam cuperet amari, edocerent tantum suam illam legem, & timore omni vacui, ac regiâ tuti benevolentiam viuerent.

Hæc tam noua, & tam inopinata Regis mutatio Patrem Maioricam quanto gaudio affecerit, facilis coniectura est: accurrit protinus ad suos, & tristissima omnia expectantibus nunciat lætissima, illi ad grates Deo referendas, cuius solius voce adeo repente sedata
sint

sint maria; totos se referant, & Christianos omnes ad eandem suauissimæ lætitiæ societatem vocauit: sed hoc eis tamen videbatur durissimum, quod edictum illud probris & infamiæ nobis plenissimum, ad Christiani nominis pudorem, eodem adhuc loco positum legeretur; idque cum intolerandum putaret P. Maiorica statuit tandem hâc ignominia, & mœrore bonorum omnium animos liberare, Regem itaque supplex adit, amicè apud eum quæritur, reos adhuc palam Christianos peragi, & se quoque ac suos, post tantam & tam eximiam regis gratiam publicè tamen dici facinorosos. Cupere vehementer omnes, quibus innocentium famæ prospicere cordi sit, vt index ille infamiæ stipes auellatur, refigatur edictum, & omnes irati principis notæ, de memoriâ hominum deleantur, annuit illicò Rex, & milites mittit qui edictum, & stipitem amoueant, lætantibus ex animo, & triumphantibus Christianis, Ethnicis autem ipsis etiam gratulantibus.

Tenuit acerbissima persecutio totos tres menses, in quibus magnâ, tum nostris, tum Christianis omnibus seges oblata est patientiæ. Octo certè primis diebus ædes nostræ, militum petulantia patuere, qui obuia quæque partim flammis traderent, partim ipsi sibi vindicarent. Christianis quoque passim erepta bona, illatæ contumeliæ, & religio sæpè tentata. Insignis autem præter cæteras in eo genere fuit trium virginum Monica, Nymphæ. Vittæ fortitudo, quæ vbi primùm obortam sensere tempestatem, ex Orientali Prouinciâ vbi habitabant amplissimas illicò ad Patres nostros dedere litteras, in quibus omninò asseuerabant

rabant se paratas esse; ad profitendam coram irato Rege Christi fidem, & propositum seruandæ virginitatis quam vouissent Deo, atque ab eâ voluntate, se nullâ tormentorum immanitate dimouere posse sanctè pollicebantur.

Cumque in eâ mente firmæ perseverant, grauib; tentata præliis earum pietas præclarè de superatis hostibus triumphauit: ac primum Vitta pro pudicitia tuendâ periculosum certamen subiit, inuenerat eam in remoto ab arbitris loco miles quidam luxuriosissimus, ac statim ad fœdam libidinem. Quâ blanditiis quâ minis prouocabat, illa incredibili constantiâ salacissimum hominem à se abigere, addere probra pugnos impingere, supra sexum, ac vires animo assurgere. Ille verò instare, strictoque gladio mortis metum obii-cere, virgo nihil minùs metuens quam iram petulantis viri, En inquit vulnerare hoc corpus potes contaminare non potes, non vinces sponsam Christi, hominum fœdissimè, propera necare, vt meo saltem sanguine libidini tuæ lites. Terruit hæc constantia lasciuum militem, & virginem fortissimam defendit à contumelia.

Neque minor Monica, ac Nymphæ de superactâ luxuriâ triumphus extitit, intenderant illæ aliquando cum Franciscâ muliere prudentissimâ iter in urbem Regiam, eâ mente vt sacramentorum perceptâ virtute, sæuienti persecutioni alacriùs se opponerent. Dum autem propè, iam absunt à ciuitate, occurrit eis militum aliquot palantium turma, à quibus multa primum interrogantur de fide Christianâ quam profitentur; deinde imprudentibus etiam verbis ad lasciuiam impellan

impellantur. Illæ autem cum se Christianas esse & mori pro pudore omninò paratas, inclamarent in altissimam foueam coniectæ, ac tantum non sepultæ, terrâ collo tenus obruuntur; noctemque ibi totam in diuinis laudibus ducunt, donec postridie, inuentæ à viatoribus, & amotâ terrâ illæ liberatæ reliquum iter prosequutæ sunt, ac postmodum priore illâ victoriâ benè animatæ, delegerunt sibi domicilium, in quo tres simul; aliæque quas ad eandem virtutis societatem adlegere possent, tutiores essent ab omnibus impudicitæ incurfibus, Idque nunc temporis summâ bonorum omnium gratulatione facientes, angelicam, aliis quinque, perpetuæ virginitatis voto astrictæ, vitam simul agunt.

Non omittenda hoc etiam loco videtur, Neophytæ cuiusdam, *Reginæ nomine insignis religio, & castimonie amor* eximius. Amabat illa impensissimè B. Virginem, atque marito mortuo, eam sibi pudicitie Patronam delegerat. Insidiabatur autem viduæ sanctissimæ iuuenis nefarius, & vim etiam aliquando inferre vesanus tentauit. Illa tam præsentis territa periculo cum impares puellæ vires esse ad repellendum imminens probum ad Beatæ Matris patrocinium secura confugit, tantumque precando, ac lacrymando profectò perfecit, vt inter nefarios conatus impurus ganeo repente corruens, toto corpore obriguerit, & eodem in articulo inquinatam pessimo scelere animam eiecerit, è flammis turpissimæ libidinis, in æternæ incendia detrudendam.

Dei



*Dei erga Tunchinenses Neophytos eximia quædam
gratiarum dona.*

C A P V T X L I X .

IX quo primum tempore lux Euangelica illustrare has terras cœpit, hoc affirmare verè possumus, inter eos qui fide nostrâ imbuti sunt, esse sanè plurimos qui arctissimam perfectionis absolutæ ingressi viam, ad omnem virtutis eximiæ laudem alacres contenderunt. Quippe plerique illorum, exempla sanctorum veterum, quæ per nostros descripta seruant, sic habent continuò præ oculis, vt ad eorum imitationem accuratissimam, vitæ suæ rationes sedulò dirigant. Primum enim corporis afflictationibus, & ieiuniis, itâ sunt dediti, vt scœnis ad id magis egeant, quam calcaribus. Vidimus non paucos ex opulentioribus, qui brumuli frigore duas induere tunicas refugerent, quod verterentur; ne illa nimia esset & præpostera carnis cura. Imo durissimâ illâ anni tempestate permulti non nisi nudâ cubant humo, interrogauit vnum aliquem confessarius, ecquid? solito appareret macilentior, ego vero (inquit ille) postquam ex te audiui Pater; adeo Angustam esse semitam, quâ in cœlum tenditur, fixumque omnino, ac ratum habeo illuc tendere, corpus mihi curo admodum gracile, vt facilior mihi per eas angustias transitus pateat. Reliqua omitto dicere quod sint innumera.

Sed

Sed quantò maioribus illi officiis Deum demerentur, tantò etiam ampliora dona refundit vicissim Deus, habent videlicet inter eos plurimi, eximium quoddam donum miraculorum, adedò vt dæmonibus etiam ipsis cum auctoritate imperent, & feras ipsas pro arbitrio coërceant. Quotidianum illud est, ac vulgare, vt Ethnicis solo ingressu in Ecclesiam, à nequissimis illis spiritibus planè liberentur; multi quoque pagi, quibus infestarum sæpè tigrum incursum feralis erat, nusquàm venisse, postquam in iis Christianorum templa esse cœperunt, iis autem sæuiente persecutione dirutis, rursùm aduenisse, atque omnia latè populas esse. Præceperat Ethnicus quidam, vir domi nobilis, vt pagi cui præerat, Ecclesiam postredie, solo Ethnicis æquarent, sed præuertit facinus ultor Deus, eà quippe nocte, primogenitum eius filium in lecto iacentem inopina morse extinxit. Quo casu non eruditi, sed efferati potius indigenæ, flammæ, vt iussi erant, iniiciunt in Ecclesiam, sed atrocissimum autem scelus, similis quædam pœna sequuta. Cum enim adiacentes latè terras copiosæ frequenter pluuiæ perfunderent, totius illius pagi agri, anno integro nullâ guttulâ roris decedente, prorsus exusti sunt, id quod iniquissimè ferentes Ethnicis, supplices venerunt ad Christianos, auerterent à se, ac terris suis hanc pestem clausum precibus suis cælum recluderent, daturus se operam, vt diruti prioris templi ruinas, nouo ac magnificentiore restaurarent edificio, tanto perculsi miraculo, ex ipsis octoginta baptismo suscepto, expiari crimen admissum, neque missæ incassum preces, aperto protinus cælo videre copiosis

imbribus solui sterilitatem, & restagnantibus latè campis fruges vbique copiosissimas apparere.

Ad hæc tantâ sunt omnes vitæ, ac morum innocentia & candore, vt primæuæ integritatis statui redditi, & priuilegiis etiam donati esse videantur. Simon quidam in pago *Tam dang* prouinciæ occidentalis, quadragesimâ exactâ; cuius solemne ieiunium religiosissimè obseruauerat, ambulabat ad rippam fluminis, viditq; procul immesæ cuiusdam magnitudinis aprum intra opacissimas syluæ vicinioris arbores oberrare; tum mirâ simplicitate cōuersus ad preces, nosti optimè, mi *lesv*, quâ fide toto ipso quadragesimæ spatio à carnibus abstinuerim, nunc verò quando iis vesci licet, expeterem, ego sanè si annueres, hunc ad me aprum euocare, & signo tuæ crucis munitus mitem reddere. Hæc ubi dixit, cruce frontem signat, Dominicam orationem semel pronunciat, deinde singulari animi fiducia, ferâ euocat, obsequitur aper, accedit, mansuescit, tractari se patitur à Simone, qui aures eius securus apprehendit, acceptoque curro iugulat; ac demùm pluribus ad se vocatis fociis, domum deportat, instruitque conuiuium ad quod egentium turbam inuitat, miraculi seriem exponit. atque inter diuinas laudes lætus epulatur.

Neque vero adeo mirum est, quod Christianis suis tantum gratiæ munus Deus tribuat, hoc certè incredibilius, quod ipsis etiam Ethnicis illud aliquando non denegat. Erat in Pago quodam *Kero* Ethnicus, opibus clarior quam probitate, summoque in Christianos omnes odio, sed postquam tamen mirabilium tam sæpè operum, certissimis authoribus famam audiit, mitior factus, induxit etiam, animum probare ipse, num vera essent:

essent, quæ toties audiret iactare, armëtorum plurimos habebat greges, quos pestis fœdissima, omnes enecabat, neque vlllo inhiberi poterat remedio, serpens malum, quod ægerrimè ille ferens, excogitauit mutuum accipere à Christianis quos oderat remedium, crucem in medio defigit campo, vbi armenta pascebatur; tacitusque postmodum expectat euëtum. Sed vix defixa crux erat, cessauit continuò lues, ex eâ die nullæ in animantibus mortes. Quo ille conuictus miraculo, salubrius conualuit, Christum amplexus est baptismique aquis expiatus, pulcherrimam opere magnifico statim Ecclesiam extruxit, & inter persecutionum turbines solemni dedicauit pompâ.



Patrum aliquot societatis triste naufragium.

C A P V T L.



Enerat per id tempus ex Indiis Amacaüm P. Emanuel Azeuedius, Prouinciæ huius Iaponicæ, ac Cinenfis vice prouinciæ visitator præpositus. Audiuit ille statim tã prosperos Tunchinensis Ecclesiæ prouentus, operariorumque in eâ laborantium paucitatē non ferens, præsertim quod in Insulâ quoque Ainam amplissimæ mæsis spes iam dudum euocaret plurimos, qui Patri Benedicto de Mattos laboribus tantis longè impari, opem ferrent, delegit Consultissimus Pater ad hanc expeditionem. Septem strenuissimos viros, quorum quatuor Tunchinensem agrum, tres Ainamicum excolerent. Constitutus omnium moderator fuit insignis ille omnibus vir-

AA a z tutum

tutum notis, totiesque commemoratus P. Amarallus, qui recuperatâ nuper Amacai valetudine, Rectorisque, ac visitatoris gestis officiis, post annos octo, Tunchinensem iterum missionem multis tandem precibus exorauerat, socij ei adiuncti sunt Petrus Albertus Lusitanus, Ioannes Ignatius Leuiski, Polonus, Frâciscus Africanus Ruida Italus omnes linguæ Tunchinicæ peritissimi, deinde Ioannes Lubellus, & Antonius Constantinus ambo Itali, ac demùm Valentinus Noguera Lusitanus Ainamicæ procurationi operam nauaturi.

Delecta igitur illa cohors nouorum argonautarum, die 23. Februarij anni 1646. ad destinatam expeditionem soluit turbato aliquantulum mari, altero die qui sancto Matthiæ sacer erat, veniunt ad Sanchoam insulam sancti Xauerij tumulo inclytam, in quo grandior cernitur lapis 15. Palmorum altitudine, & nostris & Cinen-sibus incisus litteris, vbi magni huius Apostoli immensa merita, paucis comprehensa verbis enarrantur. In eo portu diem integrum substitit naus, dum mitiores expectantur auræ, ac pij Patres sanctum virum in vota supplices vocant. Postridiè verò sub diluculum, tolluntur anchoræ, turbato adhuc aliquantulum mari, totâque nihilominus illâ die, quæ Dominica erat versus Ainam insulam nauigant, donec sub mediam feriè noctem, furentes venti, nauim impingunt in scopulos, eâ vi, vt P. Albertum ad antennas quiescentem impulerint in mare, & rursus aquarum vortex à scopulis re-pulerit in nauim.

Hic omnes præsentissimo territi periculo, non dubiam expectare mortem diffracta, & hiantē naui, atque aquis vndique peruiâ. Patres autem desperatâ salute corporum

corporum, de animabus solliciti, eos qui Christiani nondum erant, ad lauacrum baptismi, alios ad ablucendam aquis pœnitentiæ conscientiam serio inuitant, quod extrema illa iam hora esset, in quâ omnes eodem aquarum tumultu claudendi mox essent. Huic vni negotio dum toti vacant, furtim nautæ in subiectam descendunt Cymbam, atque vt certo se subducant naufragio, nauim fere iam dissolutam mari, & fluctibus permittunt; in hâc rerum perturbatione Cinæ duo baptismum postulant, priusquàm vndis hauriantur. Vnum ex illis continuò lustrat inuictissimus P. Amarallius, alterum P. Valentinus Noguera, deinde sensim dissolui nauis, & diffractis vndique tabulis, vectores omnes fluctibus hauriri, horrorem miserrimæ calamitatis augebant nocturnæ tenebræ, neque vlla cuiquam via salutis patuit. Periere sex Patres cum nauis primario duce, vnus periculum euasit P. Antonius Lubellus, qui diu cum mari & morte luctans, id vnum versabat animo, vt naufragos quâ posset ope ad expiandas conscientias iuuaret. Narrabat autem se in ipso maris fundo, vni eorum beneficium absolutionis opportunissimè impendisse, atque dùm plures alios per fluctuum vertices innatando quærirât, immisso diuinitus ligno, sensim appellit ad littus, quod conspicati eminus nautæ, cum Cymbâ properant semianimem omni curâ fouere, igne accenso, vigentia membra calefaciunt, omnia experiuntur, vt languentem, ac prope morientem excitent, donec ille tandem resumpto aliquantulum spiritu, continuò interroga, ecquid tandem fociis suis amantissimis factû sit: num & ipsi pari sorte ad littus eiekti sint. Vbi au-

tem factâ iam luce, oculos conuertens in omnem partem, superesse videt, & suis neminem, tum verò in suspiria, & lacrymas miserabiliter erumpens, sortem suam dolere, accusare peccata sua quibus effectum esset; vt reliquos in cœlum euolantes ipse sequutus non esset. Scribebatque postea euasisse se vnum tantquam profugum Ionam, quem iratum mare in terram expulisset, aut quasi profugum illum Iobi seruum, qui vt reliquorum infortunia enarraret, solus cladi acerbissimæ superfuerat.

Ereptus quoque naufragio est, Ægidius quidem Tunchinensis mirâ pietate adolescens, vnus ex his qui totos se Deo, ac Ecclesiæ huius obsequiis mancipauerant. Ille vt erat prudens, & sagax, vbi vidit actum esse de naui totâ, cogitauit statim de iis omnibus quæ pretiosissima erant certo naufragio subtrahendis, desiliitque mox, cum socio amicissimo in scapham perexiguam quam vidit reliquam esse, atque in eâ incolumis Patriam attigit. Accurrit illicò ad Patres; tristissimum suorum casum denunciat, atque intercludente vocem dolore, totam funestissimæ tragœdiæ seriem exponit. Illi autem ingemuere ad lugubrem narrationem, & tantorum Patrum iacturam, & totius huius Ecclesiæ summam calamitatem; restituit verò ipsis eximîâ fidei postmodum Ægidius ea omnia, quæ fluctibus subduxerat, fueruntque illis partim necessaria hoc anno ad vitam, partim opportunissima, ad offerenda Regi pretiosissima quædam munera, quibus ille magnopere delectatus, auditâ Patrum nostrorum clade, totius navis casum sibi acerbissimum esse testatus est.

Nona Tunchinensis Ecclesia incrementa ex Cinis.

C A P V T L I



. Andreas Xavier Germanus è Collegio Amacaënsi, anno huius sæculi 44. missus ad Cinas, strenuissimam in amplissimis illis regnis nauauit operam, constititque vberri-
mus laborum fructus, quippe cum Mathematicas disciplinas optimè calleret, insinuauit se faciliè in primatum amicitiam, eorumque animos arctissimè deuinxit. Sed vnum tamen è proregibus gubernatorem prouinciæ quæ adiacebat Tunchino, Christianum, & eximie Lucam indigeratum habebat in primis beneuolum. Cum igitur tunc Tunchinensis Regis ad Cinensem Legatus, in reditu è Pechinensi regiâ, illac fortè trāsiret, vtèdum ratus occasione tam opportunâ P. Andreas, pro suo erga Tunchinensem missionem, amore ad quam etiam destinatus aliquando fuerat, à prorege sibi addictissimo expetiit, vt Tunchinensem illum legatum lautissimè hospitio exceptum, omni humanitate, ac beneuolentiâ comprehenderet. Deinde litteras etiam ad Tunchini Regē daret, in quibus multa primùm in commendationē Christianæ legis perscriberet, deinde verò de suâ, erga legis huius præcones amicitia, propensissimâque volûtate plurima diceret. Fecit vtî rogatus erat prorex humanissimus, legatum regio excepit apparatu, multos dies perpetuis epulis, atque omnis generis officiis deuinxit, deinde in laudem Christianæ fidei
amantissimè

amantissimè differuit, eisdemque sermones instaurobat quotidie, addiditque demum litteras ad regem omnibus erga fidè Christianorum, & Patres eius nuncios, insignis amoris notis. Eam unicam legem sanctâ & planè diuinâ esse, quam ipse plenissimè perspectam non amplexus solùm esset, sed totâ etiam mentis contentione adamaret. Huic se vni vitam, huic opes, huic operâ omnem dicare. Deinde in Patrum cômendatione multus erat, eos se venerari, vti magistros, atque suos, dignosque omninò, quos Rex magni faceret ac amaret. Hanc si gratiam ab eo postulare vehementer, vicissimque polliceri, quæcunque illis officia Rex præstitisset, ea se perpetuis erga Regem beneficiis cumulatè repensurum: has autem litteras, non ipsius Tunchinensis legati fidei committendas putauit, sed è militum, quibus maximè fidebat, aliquos selegit, qui euntem legatum comitarentur, & suo nomine litteras ad Tunchinensem Regem perferrent.

Ille perspectâ legatione tam honorificâ, lectisque litteris adeo amantibus incredibiliter cômotus, (quippe Cincensium rerum existimatione quâdam maximâ imbuti sunt Tunchinenses, eamque gentem impensè colunt,) cœpit magna quædam & præclarissima, de Christiana fide ac de nobis etiam animo præcipere, deinde singulari quadam obseruantia, & amoris significatione Patres demereri, vnde sanè tam vberes ubique fructus sequuti sunt, vt conciliatâ Patribus auctoritate, doctrinæ quoque quam annuntiarent, iniecta sit omnium animis veneratio. Amplexi eam deinceps sunt plurimi tanto numero, vt sex mensium spatio duodecim millia venerint ad fontem sacrum. Vnus sanè

P. de

P. de Fontes quatuor millia suâ manu lustrata recensēbat, exercuitque ad hoc tempus delecta credentium multitudo, ad Christianorum ducenta millia. Estque adhuc tanta, & tam læta vberiorum fructuum spes, vt P. Emanuel Areuedius visitator hac tantâ, tot lectissimorum hominum clade, nihil de prioribus erga florentissimam hanc Ecclesiam curis remittendum putauerit. Cogitare videlicet statim cœpit de aliis in eorū locum sufficiendis, delegitque ex eodem illo fœcundissimo Amacaënsium seminario Patres quinque, quibus opatissima hæc expeditio simul est commissa, omnibus gaudiis suscepta est exeunte anno 1646.

Eorum autem hæc fuere nomina P. Ioannes Cabralius in Amacaënsi Collegio antea Rector, & Prouinciæ Iaponicæ V. Prouincialis, missionis Tunchinice visitator, P. Franc. Rogelius Theologiam cum laude diu professus, P. Franc. Figuera concionator celebratissimus, Lusitani omnes, deinde Patres Franciscus Montefocoli, & Stanislaus Torrentius Itali. Discessere illi eodem animati spiritu, ad hanc sementem nouam uis sudoribus irrigandam.



Recentiora de presenti Tunchinensium statu nuncia.

C A P V T LII.



Quæ hæctenus dixi, narrationem continent accuratissimam, & verissimam, eorum quæ ab anno Christi 1627. ad annum 1646. apud Tunchinenses gesta esse partim ipsi perspexi, partim authoribus:

B B b

thoribus:

thoribus certis comperi, nunc quæ sequuta deinceps sint, accepimus primùm ex litteris P. Ioan. Cabralij ad P. N. Generalem conscriptis, in quibus peractâ omnium eorum quæ ibi aut vidit, aut fecit rationem reddit fidelissimam, postea verò ex Epistolâ P. Barbosa strenui, & antiqui huius vineæ operarij.

Affirmat Igitur Cabralius annis omninò duobus, id est 1645. & 1646. accessisse Christo hominum millia viginti quatuor. 200 ibi iam Ecclesias numerari satis amplas & commodas, quibus singulis annexæ quoque sicut domus ad Patrum nostrorum, quando illuc adueniunt, habitationem opportunissimæ. Addit deinde cohibendos omninò esse Christianos, ne magnificentiores, quàm more Patriæ construant Ecclesias & nostrorum domos, inuenisse se tantùm in amplissimo illo regnò è nostris septem, residentiâs eorum quinque, vnum eorum P. Paulum Coloprosum defunctû hoc anno esse, post continuos & fructuosissimos trienrij totius labores, cuius obitu non nostri solùm, sed & pij omnes ingenuere suffectos in defuncti locum esse alios quinque genuissimos Patres, quorum vnus Philippus Marinus Genuensis, cum in Regnum Camboiæ contenderet, conspectâ Ecclesiæ istius pulcherrimâ specie, nihil sibi vltra quærendum ratus, magnâ suâ voluntate in eâ subsistit, & sextam residentiam prioribus adiecit, vt tantæ multitudini hominum ad fidem accurrentium cumulatius satisfaceret.

Narrat postmodum idem Cabralius, nullam orienti toto conspexisse se vnquam gentem, melioribus naturæ, ac virtutum ornamentis præditam, neque ad
Cœlestis

Cœlestis doctrinæ satus suscipiendos, magis paratam. Præferre se hanc missionem reliquis omnibus, in quibus adeo strenuè laborat societas, quin & ditionem ipsam Tunchinensem, quam omnem aliquot mensibus lustrauerat, 40. regnis in quibus se versatum esse profitebatur, amœnitate soli, populorum frequentia & probitate partim æquare, partim etiam præferre. Christianos morum innocentia, ardore pietatis, fidei constantia esse prorsus mirabili. Non minùs alienos illos esse ab auita superstitione, quam populos, quos illa nunquam afflavit. Virtutum Christianarum usum, incredibiliter apud ipsos vigere. vitiorum quæ apud alias gentes communissima sunt, nulla inter ipsos cerni vestigia. Deinde indolem esse illis eximiam, morum facilitatem incredibilem, studium orandi adeò flagrans & accensum, ut mane ante lucem surgant, & dimidiam horæ partem, alij etiam horam integram orando exigant, quod idem serò præstant ante cubitum. Nostrorum tantopere sunt amantes, ut ferre illos videantur in oculis, ad minimos voluntatis eorum nutus obsequuntur impigrè, quidquid fortunarum habent effusissimè ipsis conferunt, quoties verò munera oblata non admittuntur, id verò ferunt ægerrimè quoties ad eorum pagos novus aliquis è Patribus aduenit, magni undique fiunt concursus Christianorum tam effusâ omnium lætitiâ, ut festa & ludos publicè instituant. Atque ut constet quantæ quotidie fiant ad Christi gregem accessiones, narrat ipse Pater si paucis mensibus, quibus in perpetuo ferè cursu in his terris fuit, baptizasse tamen quingentos 11.

Alia deinde plurima, & sanè mirabiles narrant e-

B b b 2 dem

dem illæ litteræ Cabralij vnum istud omitti haud
quaquam potest. Patrem Felicem Morellium missio-
num istarum onanium superiorem, tam impensè amat
Regis ipsius filius, vt magna sit spes totum hoc re-
gnum Christo breui adiungi posse. Priùs videlicet
quam cum parens regni gubernaculis admoueret, sæ-
pissimè Spopondit Morellio fixum sibi omninò esse,
ac constitutum, adoptare ipsum in filium. Fecissetque
iam antea, nisi regis senioris quem nostris parùm æ-
quum esse nouerat, metus cum & reuerentia retardas-
set. Sed interea tamen opportunè conrigit, vt post-
quam Rex constitutus Patre tamen etiamnum super-
stite, legatos de more ad Regem Cinarum miserit,
quos in eo regno societatis Patres, tantâ vbique apud
legem, & primates omnes beneficentiâ deuinxerunt,
vt legati post reditum utrique regi prolixè commemo-
rantes, quantum nostris deberent, eorum animos
singulari erga nos beneuolentiâ conciliarent. Junior
siquidem Rex parentem cernens auditis legatis fa-
ctum esse mitiorem, statuit commodum aduenisse
tempus, præstandi quæ charissimo suo Morellio toties
sanctè promississet, ad ij. ergo martij deploma hoc Ci-
nensibus exaratum characteribus, more Patrio ad
Patrem Felicem dedit.

Serenissimus Rex *Kiem thuong*, qui summa, æquè ac
infima, in Tunchinensi regno moderatur, hanc ego
ad te ô Felix, legis quæ cœli ac terræ dominum colit
magister primariè, amoris mei erga te significatiuam
epistolam, seu deploma, propria manu conscriptum
dirigo. Ex quo huc appulisti vsque nunc, tibi singu-
lariter fidens, super omnes eiusdem legis magistros,
atque

atque aduenas, qui in hoc meo regno commorantur te præcipuâ sum prosequutus beneuolentiâ, vt optimum agrum optimis consitum plantis, quæ semper ad solis conspectum conuertuntur perspicio. Ego. te vicissim vt filium charissimum intueor, nomenque tibi nouum ideo impono Phucon, quod veracem, & summi virum iudicij significat, vt meum erga te amorem tester eximium. Tuum itaque deinceps debet esse vnû velle ac nolle mecum communè, sicuti solent ij quorum ex amore vnum est cor. Quod si perfeceris in eorum numerum adscriberis, qui magnam olim famam honoresque præcipuos consequuti sunt, eo quod hanc amoris legem custodiuerunt. Hoc si feceris amori meo satisfeceris.

Hactenus Rex iunior in diplomate quo Patrem Morellium adoptabat in filium, atque hoc diploma maximo apparatu in domum nostram à Rege missum, non à nostris tantum, sed à Lusitanis etiam omnibus gratissima testificatione amoris, maximâque vt potuit pompâ receptum est. Conuenere videlicet illi omnes cum duce suo, tubisque vnde quaque, ac tympanis insonantibus conuenere domum, & regis legatos aduenientes omni honoris & lætitiæ significatione excipere, ac postea facto agmine omnes præclaro habitu Patrem Morellium in regiam prosequuti sunt, vt pro tanto, tamque insigni beneficio gratius referret. Est autem spes, vt dixi, non parua, profuturam Ecclesiæ toti Tunchinensi eximiam hanc regis humanitatem.

Hæc habet in Epistolâ suâ P. Cabralius, in alterâ

BB b 3

verò

verò Patris Barbosa ad Patrem item Generalem datâ, mirum est quàm magnificis & amantibus verbis, horum Neophytorum pietas, & virtutis omnis studium commendetur : in primis autem singularem orandi Laudat sedulitatem, habent (inquit) destinata semper & rata tempora, quibus Christianum hoc officium incredibili obeunt diligentia. Oratoria domi habent singuli, tam exquisitè ornata, ut nullis pro modulo quisque suo impensis parcat ad pia hæc loca concinnè locupletanda, quippe in iis præter imagines & cruces affabrè factas, & multo eborè, ac testudine intertextus, vasa etiam habent ut possunt pretiosissima, in quibus lustralem asseruant aquam, atque in iis disciplinas appendunt etiam & rosaria. Quin etiam quod est ad pietatis laudem sanè mirabilius portatilia quædam conficiunt oratoria, multo auro, atque picturis illusa, quæ deferunt semper secum, quoties exeunt in viam, eaque sub finem diei erigunt in hospitiiis, & solitum precandi pensum persolunt. Ad missæ sacrificium tanto animi ardore rapiuntur, ut singuli omnibus interesse maximè cuperent, nisi pietatorum modum nostri ponerent, varentque tam frequentes concursus, quibus Ethnici offendi possent, ad sacramenta suscipienda feruor non absimilis, optarent enim quolibet mense ter aut etiam sæpius diuino cibo refici. Vnde in eorum animis tanta exoritur veneratio, & obseruantia ut omnes fortunas in eos parati sint effundere, dolentque internis sensibus quod constantissimè nostri omnia prorsus recusent.

Pergit deinde Pater dicere de mutuo amoris quoinuicem

inuicem sunt coniuncti eo solum nomine quod sint Christiani, tametsi aliunde inuicem non sint sibi noti, domum enim semper ad eos excipiendos communem habent, & pro aduenis & mensam paratam, quæ tanta coniunctio animorum efficacissimum plerisque illicium est amplectendæ fidei, imo ipsimet Ethnici Christianos non rarò se esse simulant, vt sic commodissimè apud Christianos diuertant. in Eleemosinis dispensandis sunt effusissimi. Catechistas, atque omnes eos quorum illi vtuntur operâ, insigni alunt beneficentiâ. ad eorum solamen qui pro fide ab Ethnicis rapinam passi sunt bonorum, industriam omnem, & opes conferunt, ipsos enim, vxorem, ac totam familiam in suas certatim excipiunt domos, solantur consiliis, pecuniis iuuant, vt sæpe iacturam sarciant cum vsurâ.

Denique concludit Neophytis istis satis nequaquam esse, quod viam mandatorum inoffenso decurrant pede, multi enim etiam consiliorum excellentiorem viam capessunt, omnis ætatis viri, ac mulieres, atque in iis plerique sæpius enixissimè postulant, vt obedientiæ voto se nobis obligent, id quod hætenus facere sunt prohibiti, neque pauci fortunas omnes suas dispensant in pauperes, vt Christum nudum, ipsi etiam sequuntur nudi. Continentiam plerique coniugari seruant ex voto, virginitatem illibatam iuuenes plurimi ac puellæ, omnes passim eximiam castitatem.

Atque hætenus quam satis sit de primæ huius Ecclesiæ facie speciosissimâ, quæ tametsi nondum ætatis

ris annū 13. attigerit, in eam tamen videtur excre-
uisse plenitudinem virtutis, vt nihil optandum videat-
ur deinceps, nisi vt per operarios inconfusibiles, cō-
dem semper enutrita zelo, totam se breui exhibeat
sponso suo Christo Iesv, non habentem maculam
neque rugam.

F I N I S.



